

Sam **Levempixan at ne Devit** **Levelinga Loklox Axasep**

Na lubuk Sam i umsu mi levempixan ne Devit la lentaba luvuttadi vetpes diga malagan i. Buaang limixin di tong i do na lubuk, ni lubuk at ne Devit. Ketla neni goxo malagan na levempixan axap. Luvuttadi vetpes bok diga malagan lentaba levempixan. Nedi ne Kora, Asap, Moses, Solomon, Etan, la lentaba vetpes ua nedik kopmen atanaklen levenasen atdi. Lentaba at na levempixan ik lok ti lok tooro limixin, i ngan nedi di meres, nedi di umsu mi lainbulu, nedi ua laxapmek ik lok keneng at lorooro atdi, nedi di marat at limixin munepen midi. Lentaba levempixan ik lok ti anasa limixin mi levelinga mumu ne Moroa la lodoxoma ren. Lentaba bok mo ik lok kusu ti emi asu min. Na lubuk i anasa limixin mi legepu lempapaase. Lara avot i lok keretna. Limixin dina nunu saga at ne Moroa. La lara sepsev agepura i lok keretna. Moroa i balamu aleng limixin teren. Na lubuk Sam ik lox asuusu langsung loklok tooro tinedi dina utus i. Dinaba lok kaka lomomo i silok aleng do dina utus i at levenaleng axap.

Lengkot silok keneng at na lubuk

1-41 Levempixan mumu loklok at limixin la mumu bok luruntutudum li at lempanga axap.

42-72 Levempixan mumu lubung mixin me Israel la ne Moroa ga lox sepsu di basinge limixin munepen midi.

73-89 Levempixan mumu lotu saparap ne Moroa la mumu bok loogu laplavang.

90-106 Levempixan mumu lavatpas at limixin at na lavatbung menemen.

107-150 Levempixan mumu leemi asu ri ne Moroa la mumu bok levelinga ren.

1

Lomomo Ruturun

¹ Lomomo rinedi di raba rulu levelinga loklok tooro at limixin kapmek la dixo mumu asu lampoovo at limixin di lok laxakapmek, kopla dinak lok esogo minedi di paase aksaksa ri ne Moroa. ² Ketla, di suma ka lomomo atla di mumu asu Laulis Linga at Leeme Silok, la dim doma mumu amisix i at levenaleng kangking la at levenaleng kanimin bok. ³ Di lok ngan larauna di suusu ro at lisigege dan, la di pisix akmokso levempeven at levengaaling pipisik at laxampeeve, la levenang atdi kopmen nak mada si, la na mamang. Mo limixin di ngasang kobot at levempanga axap di lox i.

⁴ Ketla limixin kapmek dixok lok kuren. Di lok ngan mun levempusuvus at levenbeo, lamanman it mas kepe i. ⁵ At laaleng ne Moroa na viila mumu loklok at limixin axap, ni naba lok li lumumuat mavana at limixin kapmek, la naba solasu xepe di basinge limixin akmokso ren. ⁶ Limixin manmanton dit pas keneng at loklok tatao at Leeme Silok, ne Moroa, ketla nedi di mumu asu langas kapmek, dinaba seeve.

2

Loorong Soksoxolik At Ne Moroa

¹ Tila ba, limixin at levenabung mixin petpes di sevut li leventaangas kapmek kusu dinoxok lok maxopok at ne Moroa? Tila ba limixin di mumu asu lodoxoma gamasa xerepmo? ² Lavaorong at na lavatbung menemen, di gagas ti esep eburu mi ne Moroa. La luvuttadi amgomgo dit kis buru ri puse ngas ti lox asi Leeme Silok, eburu mi

Lanarong no neni ga soxolik ka i. ³ La di lok, “Ata lox asepmus dik basinge lamgomgonga atnedu, la ataba ke xepe levelinga atnedu.”

⁴ To vana at loxonin orong teren at lebelen laxalibet, Leeme Silok ing longon mumu mo lodoxoma atdi, la i paase kalise ba ridi. ⁵ La melemu neni i belengatngas tinotno, la i paase sok di la lumukmusak silok teren ing long amarat aleng tinotno di. ⁶ Ni i lok tidi, “To Saion at lakaana xaala rak, ara vaxaxis aulis li vam loorong taraxe.”

⁷ Loorong i lok, “Nia anaba vaase asu bok levempanga Leeme Silok i tong atkatla li i. La ni ga lok tia, ‘Nenu ne Nuruk. Ningina nia a lok ngan ne Tamam. ⁸ Una sing ia, la nia anaba raba u mi larabung mixin axap. Unaba ruuna ka axap lavatbung menemen. ⁹ La unabam gomgonga di mi lakdak aen i lolos, la unabam sep povorok nedi ngan lengkong sosopen kangka i reporok.’”

¹⁰ Kuren la nemi lavaorong, mina xasep at levelinga rak la nemi lubung amgomgo at na lavatbung menemen, mina ronga avukat na levempapaase aronga. ¹¹ Mina lotu saparap ne Moroa mi loklok ngangao, la mina pavanga i mi lanmarat. ¹² Minat kis tintiding to melamgo ren. Naba lok kapmek do ni na musak la soso mun nemi axap mina uu. Nedi axap dik sixit uto saparap ne Moroa kusu ne Moroa na lok see atdi, dinaba momo.

3

Lisingising Ti Loklok Tooro Maxantamak Suubu

¹ Leeme Silok, limixin solo di munepen minia. La buaang bok limixin di vas taba rulu xepe nga ia, dira munepen minia. ² La di paase mumu ia la dik lok keretna, “Moroa noxo lok tooro i.”

³ Ketla nenu, Leeme Silok, amisik nenu Lenban tia at levenaniu. Nenu mene u raba ia mi lolos ti sak tup mi limixin dit kis munepen minia. La nenu mun u lox alolos ia ngan laabelemes. ⁴ A sing lolos Leeme Silok mo ik lok tovana at lakaana kaala ren Saion la ing tonga ka lanteng tarak kusu ti loklok tooro.

⁵ A subu midi xopok la a unga, la a nemen avukat at laxanimin axap atla Leeme Silok ik lok see rak. ⁶ Nia axo marat at legesa sangaun larabin sangaun kobot limixin munepen minia di tu xangkan ia at levengkot axap.

⁷ Ude u, Leeme Silok! Lox asepsu ia, Moroa rak! Unaba lox i atla uk lox asongot limixin munepen minia, la uk lok kepe lolos basinge di kusu di noxo lox asongor ia. ⁸ Leeme Silok ik lok tooro limixin teren la di sak tup mi limixin munepen midi. La a sing i xusu neni naba lox anarong limixin teren.

4

Lisingising Ti Loklok Tooro Ukantinao

¹ O Moroa, nenu Lentupe ria! Una vaase porang ia do ana sing u. Dola nia aga ekip tangarang mi levenmumuat, nenu ga lok tooro ia. Monga una lox asuusu lebelen tuntun taram tia la una ronga lising tarak.

² Lingisa ba nemi limixin kapmek miba xap ti paase aksa ria? Lingisa ba uba xap ti vavara solo ri levempanga xopmen turuturun teren, la ti mumu asu levempanga xaxarang?

³ Ketla mina xasep do Leeme Silok ira soxolik ka vam limixin manmanton kusu tin, la ing tonga ia do a toro rin.

⁴ Mi guta ke gat lebelemamao na sat arup nimi at laxapmek, la mina ke xepe libilinga. Do minak midi at laraora atnimi, minak midi pilo la minam doma mumu avukat na levelinga. ⁵ Minaplavang ti Leeme Silok mi levempanga

naba lox epovo at lodoxoma ren, la minat kis la mina nunu saga ren. ⁶ Buaang nedi di ngising keretna, “O Leeme Silok, una raba nema mi laxaloklox anarong solo. Una lox asuusu amisik lebelemulus tinama.” ⁷ Ketla mo lomomo rak tu, ne Moroa, i volo mo lomomo nedi dinaba ruuna i, ap mo laaleng levempipisik at leventaamang piao eburu mi laxadan vaen na umsu aleng.

⁸ Dola a subu midi, a unga xeneng at lenmila. O Leeme Silok nenu xusuk, u xok nunuan ia.

5

Lisingising Ti Ne Moroa Nak Lok See At Laradi

¹ O Leeme Silok. Una ronga levelinga rak. Una ronga ia, at mes silok. ² Una ronga res at lerengteng tarak ti loklok tooro. Nu ne Moroa rak la Loorong Silok tarak! Nia a sing tu.

O Leeme Silok, ³ ung tonga laxaka rak maxantamak suubu. At laxangking i soo su, a tong asu levesingising tarak, la at kis ngangais ti lovoporang taram tia.

⁴ Nenu xopmen lomoroa no uk lok momo ri libilinga. Uxo esuuxun mi libilinga. ⁵ Nenu uxo tu ebelen tinotno minedi limixin loklox aaso. U belengatngas tino rinedi axap limixin kapmek. ⁶ U sesele utut kepe limixin kaxarang. La u bulunga xepe rino nedi limixin sesep, la nedi di babala vukpuk limixin petpes.

⁷ Ketla mumu mene labalamu silok taram, u ke avolo ia xusu ana vubeles at loogu laplavang taram i melemelengan. La ana lotu saparav u go, la ana xis tintiding saparav u mi loklok ngangao. ⁸ O Leeme Silok, buaang limixin di munepen minia! Unamgonga ia xusu ana mumu asu lavavara xa ram. Una lox axasep langas taram kusu nia ana mumu asu i.

⁹ Levempanga salai limixin munepen minia dina tong i, anoxo mu asu i. Nedi mun limixin sepsep tadi. Levelinga

atnedi ik sixit nunuan ketla ni levelinga loklox atdan mun la i umsu mi laxaxarang arup kusu dina sev amet limixin. ¹⁰ O Moroa, una vaase asi di la una lox asongot di. Naba lox avukat do mo leveloklok kakapmek atnedi naba lox asuusu levenmumuat silok tidi. Una xala xepe di basinge u, mumu loklok kakapmek mi lorongtonga xepe atnedi saparav u.

¹¹ Ketla nedi dik lok keneng at loklok tatao ram, dina momo la dinak pixan momo amisik. Una lok see atnedi di vavara aleng u. Nedi di momo aleng mumu mun u. ¹² O Leeme Silok, uk lox anarong nedi di mumu asu levelinga ram. Labalamu ram i tupe di ngan lenban.

6

Lisingising At Laradi Mekmeres

¹ O Leeme Silok, nemen uta musak la uta vaase sox ia. Nemen uta lox asongor ia keneng mun at lebelemamao ram. ² O Leeme Silok, lengkot tarak i molo axap; una lox asuusu lebelen tuntun tia! Una lox alolos ia, nia na ara molos axap. ³ O Leeme Silok, labalak i reng aleng. Lingisa ba unaba lok tooro ia?

⁴ O Leeme Silok, ude u, la una lox asepsu ia. At lebelen tuntun taram una lox asepsu ia basinge lanmet, ⁵ atla to at lemenemen at labarongan, limixin kopmen dinam doma su ram, la kopmen tara na emi asu minu go.

⁶ Lanbulu silok i suxuna ia la lolos tarak i auret na xap. At laxangkanimin axap loora rak mi lavatlingun imlumlu at levengkamkabili dan at lamarak. ⁷ Axo epovo do ana reven avukat ta. Luxatli rak ira dang pe axap, atla ang teng amisik at limixin munepen minia ding long areng amisix ia.

⁸ Nemi limixin kapmek, uto nimi basinge ia. Leeme Silok ing tonga lerengteng tarak. ⁹ I ronga bok lerengteng tarak ti loklok tooro la ni naba sep siam at levesingising

tarak. ¹⁰ Limixin munepen minia dinaba ekip tangarang mi lainmangan la langsung lumumuat atla Leeme Silok naba sak tup midi. Soso mun dinaba lok tangtangu la ni naba xala oo di.

7

Lisingising Ti Lomokmokso

¹ O Leeme Silok, nu ne Moroa rak. Anaa nia a vot saparav u kusu una lok see rak. Una lok tooro ia la una lox asepsu box ia basinge nedid xala mu rak. ² Naba lok kapmek do dina lok ngan lavatlaion la dina xip kepe ia uto vaxalom la kopmen tara go ri lok tooro ia, la dinaba lais axakalik labantuxu rak.

³⁻⁴ O Leeme Silok, la nu ne Moroa rak, dola aga lok pam tibilinga ri tara, la dola aga bala vukpuk tara tarapentangas tarak, koplaga lok tavanga i lok kapmek tino ti laradi munepen minia la kopmen tavausun teren, koplaga xarang taba tara. Dola nia agara lok pam tevempanga at na i, ⁵ i lox avukat do una ke avolo limixin munepen minia dina mamat mu ia la dina rebeng alis kaka ia la dina sev asi ia la dina sev amer ia, la dina ke xepe labantuxu rak nak midi gamasa go at laxangka!

⁶ O Leeme Silok, una lox asuusu lebelemamao ram. Una beleku kaxat, la una tupe lumukmusak silok at limixin munepen minia, la una lok tooro ia. Nenu u vavara mene limixin dina rooro ngan limixin manmanton. ⁷ Kuren la unak lok bubua ka axap limixin saparav u, la unam gomgonga di boro vana at lixitkis orong taram. ⁸ Nenu laradi rongtonga linga at limixin axap. O Leeme Silok, una ru ria, uklen i do nia laradi sepse. ⁹ Nenu ne Moroa manmanton la u viila mumu levendoxoma atnema, la lavavara bok atnema. Una lox axap loklok kakapmek at limixin kapmek. La una raba luunun ti limixin nunuan.

¹⁰ Moroa ni Lurutu See Pe rak. Neni ik lox asepsu nedi di mumu asu levelinga ren. ¹¹ Moroa ni lagale laradi rongtonga linga la levelinga ren ik mokso. Amisik ni i paase asi limixin kapmek.

¹² Dola kopmen dinak lox ekun loklok atdi, Moroa naba sua ka lavarise esep teren la naba rep tong pen labanara ren la na lox agagas li i. ¹³ Ni naba lok kaka levempanga esep teren, la na lok dola na so asu mi levesoso xao ren.

¹⁴ Moroa, una ven ba limixin kapmek di doxoma gagas li leventaangas ti laxakapmek. Dik soxovo li levenmumuat la di xaxarang arup limixin. ¹⁵ Ketla nedi xa di onon at larapelixo di lili i ri leventaba vetpes. ¹⁶ Kuren la di ruuna ka losongsongot mumu xa laxakapmek atnedi. La lemusak mi leesep di gagas min ti leventaba vetpes i lok kapmek axa di.

¹⁷ A tong aorong ti Leeme Silok atla i tong asu lavapaase ramtaba ina mi lodoxoma mokmokso. Ak pixan emi asu ri Leeme Silok, ni Leeme Avolo.

8

Laasen Silok At Ne Moroa Mi Laasen At Limixin

¹ Leeme Silok, nenu xusuk mun Leeme Silok atnema. Limixin axap at na lavatbung menemen di ven lempanga uga rudum li i, la kerepmo di ven kibis i do nu u silok aleng. Leemi asu saparav u di rongga i rovana at lebelen laxalibet. ² Laxamdak mi laxaalik kakalik dik pixan emi asu minu la lubungkadede bok. Uga bos loroboro ri lok pe lebelemamao at limixin dit kis munepen minu la atnedi dik sok tixirixes kepe levelinga ram.

³ Dola a ven laxalibet nu ga rudum li i, lagaaling mi laxampenti uga vaxaxis di at levengkot atnedi la am doma xeretna. ⁴ Limixin nedi lempanga salai, la uram doma mu

solo di. Nedi lempanga gamasa mun, ketla uk lok tatao avukat tino di.

⁵ Nenu uga raba di mi lolos pana at lempanga axap, ketla lolos atdi i lixilik mun ti lolos taram ne Moroa. La uga lox asilok di mi levenasen silok la lisisinang nunuan. ⁶ Uga lok katling di xusu dinam gomgonga levempanga axap nu ga rudum li i. Uga lox asilox di mavana at levempanga axap, ⁷ i ngan levesipsip, laxanbulumaxao, la laxampanga sio axap bok at laxairing, ⁸ la lavapixa mi levenmat, la levempanga axap at lebelen laras.

⁹ O Leeme Silok, nenu xusuk mun Leeme Silok atnema. Limixin axap at na lavatbung menemen di ven lempanga uga rudum li i, la kerepmo di ven kibis i do nu u silok aleng.

9

Laradi I Tong Loklox Avukat Ti Ne Moroa Ti Lomokmokso Ren

¹ Leeme Silok, nia ana emi asu minu mi labalak axap. Anaba tong asu axap nom levempanga nunuan nu ga lox i. ² Anabak pixan mi lomomo, lavasuun teren ataram. Anabak pixan emi asu minu, ne Moroa, nu Lanaraavuk.

³ Limixin munepen minia dik sixiro do di ven u, dik sak subu epopolo ri lanmet. ⁴ Ut kis at loxot tongtonga linga ram, la u tong asu lavapaase mi lodoxoma mokmokso. Uga rong linga rak la uga ru ria.

⁵ Uga paase asi lavamolon, la uga sele utut kepe limixin kapmek. La kopmen tara noxo doma asu bok ba atdi. ⁶ Lavamunepen minema ma noxo ven bok ba di. Ura sele utut kepe vam laramenemen silok atnedi, la limixin axap dira domampe axap pam di.

⁷ Ketla Leeme Silok, neni Loorong Avolo la naba nemen amisik kuren, la kopmen tekavaxap teren. Ira lox agagas li vam loxonin orong teren ti viila mumu loklok at limixin.

⁸ Ni im gomgonga lavatbung menemen mi lavapaase mokmokso. Mi lodoxoma mokmokso i viila mumu loklok at limixin boro at larabung mixin.

⁹ Leeme Silok i tu ngan Loxot Loklox Alipe, la limixin baava di epovo dina vubeles ap mo Loxot Loklox Alipe ren, la dina nemen nunuan e at levenaleng kakapmek.

¹⁰ Leeme Silok, nedi dikleklen u, dinaba nunu saga ram. La uxu raba rulu tara do lebelen i ngaongao ru.

¹¹ Minak pixan emi asu ri Leeme Silok, mo it kis ngan Lamgomgo rovana Saion. Mina tong axasev i ri limixin at larabung mixin axap mumu levempanga ni gak lox i. ¹² Moroa im doma su amisik atnedi ding songot mi laxanmumuat. Neni ixong tonga xepe lerengteng atnedi, ketla ik lox asongot nedi di lox abaava di.

¹³ O Leeme Silok, una lox asuusu lebelen tuntun tia! Una ven na levesongsongot limixin munepen minia dik lox i ria! O Leeme Silok. Lox asepsu ia baseinge lanmet, ¹⁴ kusu anaba tu ro melango at limixin to Jerusalem, la ana tong asu i ridi ri levempanga nia a emi asu minu min. La ana lox asuusu lomomo rak atla uga lox asepsu ia. ¹⁵ Lavamolon diga xe lemet kusu ti sep limixin taram. Ketla nedi xa diga subu tup teren, nedi xa diga onon at larapelixo atdi. ¹⁶ Leeme Silok ira lox asuvos pam i keneng at lorongtonga linga at langas ik mokso, la limixin kakapmek dinaba tu at lavapaase mumu leveloklok atnedi.

¹⁷ Lanmet ni langas at limixin axap dik lok laxakapmek, la tinedi axap bok dik sok sisixe ne Moroa. ¹⁸ Moroa noxo domampe rino amisik limixin dik pakes. Moroa noxo ke xepe amisik levendoxoma voovo at limixin banbalo ti loklok tooro la ni noxo lox abulubun kepe amisik di.

¹⁹ Leeme Silok, ude u! Nemen uta ke xepe limixin dina lox abulubun kepe levelinga ram! Una lam kaka lavamolon uto melango ram la una vaxaru di at lavapaase.

²⁰ O Leeme Silok. Una lox amarat di, la una lox asuma xibis di do nedi luvuttadi mun kuren la dina ekip tangarang mi lanmet.

10

Laradi I Ngising

Ne Moroa Ri Loklok Tooro

¹ Leeme Silok, tila ba u nemen paxalom basinge nama? Tila u lipe basinge nema, dola nema ma ekip tangarang mi lumumuat? ² Laradi xapmek it las i la ik lox asongot limixin banbalo. Una rebeng alis ka i at larapelixo i lili i xusu ti lox asubu limixin taram.

³ Laradi xapmek it las i mi levendoxoma xakapmek teren. Laradi mokmorong i paase aksaksa ri Leeme Silok la im taba sinta i. ⁴ Laradi xapmek kopmen nak lok ngangao at Leeme Silok. Ik lox aaso, kuren la at lodoxoma ren i lox abulubun ne Moroa.

⁵ Laradi xapmek ipnovos at levempanga axap ni ik lox i. Ketla ni ixo epovo na xasep avukat at lavapaase ramtaba ina at ne Moroa. Neni i paase aksaksa ri limixin munepen min. ⁶ Neni ik lok tin axa xeretna, “Kopmen tepanga naba lox abulu ia la ana ekip tangarang mi levenmumuat at lorooro axap tarak.” ⁷ Levempapaase ren i umsu mi lavapaase aksaksa, laxaxarang la levelinga xikiilu, la i paase asu soso mun levelinga bilinga.

⁸ Neni it kis alipe ro at laramenemen, la i gagas kusu nap sev amet limixin nunuan. La neni i kuxut tangais luvuttadi mokmokso, ⁹ la neni it kis alipe ro at loxot kukuxut teren ngan lavatlaion. Ik midi tangais limixin banbalo, la im tebeng alis kaka di at lelixo ren, la i sasat pes kaka di. ¹⁰ Kopmen tara go ti lok tooro di, kuren la ip sev asi di la di subu uto xopok, la lolos silok teren ik lok kakapmek tino di. ¹¹ Laradi xapmek im doma i do,

“Moroa xopmen nam doma solo limixin! Ira vamet pam la kopmen na epovo ri ven ia!”

¹² O Leeme Silok, una lox asongot mo limixin kakapmek la una doma nedi limixin ua dim suma mo losongsongot!

¹³ Kereva lodoxoma at limixin kakapmek? Dim taba sinta ne Moroa, la dim doma i do, “Neni noxo lox asongot dik.”

¹⁴ Ketla nenu, Leeme Silok, u ven lenget ka mo levenmumuat la levesongsongot dik lox i ri limixin baava, la u gagas amisik kusu una lok tooro di. Limixin pakpakes di vot pasa u xusu una lok tooro di atla nenu laradi loklok tooro at limixin pakpakes.

¹⁵ Una lox axap lolos at luvuttadi xapmek, unak lox asongot di mumu levempanga xapmek dira lok pam i, kusu di noxo lok bok ba i.

¹⁶ Leeme Silok, neni Loorong Avolo la kopmen tekavaxap teren. Nedi di lotu saparap lomoroa vetpes, dinaba sonao rino basinge lenep kangka ren.

¹⁷ O Leeme Silok, unabang tonga levesing at limixin di lox alixilik di maxopok taram. La unaba lox abelemes nedi. ¹⁸ Unabang tonga levesing at lubungkarun la atnedi limixin baava. Unaba ru ridi, kusu limixin at lavatkangka di noxo lox amarat bok ba di.

11

Laradi I Nunu Lolos At Ne Moroa

¹ Nia a nunu saga at Leeme Silok, ni laradi xumkubak pe ria. Kuren la anoxo ronga res at limixin tangtangu di tong i ria dola, “Una rava oo ngan lapka uto vana at lempatkaana, ² atla limixin kapmek di gagas kusu dina so u mi levesoso atdi. Di kuxut tangais luvuttadi avukat to at levengkot buxumin kusu do dina soso di. ³ Laradi avukat naba lok lavanga salai, dola limixin axap ding

tonga xepe levelinga at lubung amgomgo la kerepmo lorooro at limixin ik lok kapmek aleng?”

⁴ Leeme Silok, mo it kis at loogu laplavang teren i melemelengan. Loxonin orong teren ik lok toxun pana at lebelen laxalibet. I reven tatao limixin axap at lavatbung menemen la ikleklen levempanga axap dik lox i. ⁵ I viila mumu loklok at limixin avukat la limixin kapmek bok. Neni i belengatngas tino ti limixin di los polo Laulis Lingar.

⁶ Neni naba soli asi laxao bokbolot la nabak bolot limixin kapmek mi la salpa (sulfur). La naba lox asongot di mi lamanman kapmek iplivi aleng. ⁷ Loklok at Leeme Silok in manton la i vara mun leven gugu nunuan. Laradi ik lok lempanga avukat nabat kis esogo eburu min to at lemenemen teren.

12

Lisingising Ti Loklok Tooro

¹ O Leeme Silok. Lok tooro nema. Kopmen bok ba taradi avukat go i nemen. U noxo ven kaka bok ba taradi raturun go ik lok kantubu at limixin axap. ² Nedi axap di vekarang taba, la di velox atdan ka la kerepmo dira xaxarang arup bok di.

³ O Leeme Silok. Una vamngus nedi limixin di velox atdan ka, la una vamngus bok nedi limixin dim simi aurut di la dik lok keretna, ⁴ “Mi levelinga atdik dik ta lok kaka levempanga dik ta vara rin. La dik ta tong levempanga nedik ta vara i do ata tong i, la ixo epovo tara na sep pepe dik.”

⁵ Ketla Leeme Silok i vaase xeretna, “Na nia anaba vot, atla di lox abaava limixin dik pakes. La nedi di sev asongot labantuxu atdi mo dit mes silok mi losongsongot. Anaba raba nedi limixin baava mi nom lixitkis avukat ding kongkat tin.”

⁶ I epovo rinotno do ata nunu at leveng kakaape at Leeme Silok atla leveng kakaape ren i lok ngan loxon siliva uat gamgames din tin i at laxao bokbolot ise at lavanuti rintin axap la i nunuan axap.

⁷⁻⁸ Limixin kakapmek di umsu at lengkot axap la ned i axap di emi asu mi laxakapmek. O Leeme Silok. Una lok tatao avukat nema basinge di. La una lok tooro nema xusu limixin kerepmo di noxo lok kapmek nema.

13

Lisingising Ti Loklok Tooro

¹ O Leeme Silok, ningisa ba unaba doma su rak? Kereva, u domampe rino nga ia? Tila rinotno la u lipe lamaram basinge ia? ² Ningisa ba unaba lox axap na levenmumuat nia arap kip tutu min? Lavanisa aleng kangking la kanimin lanbulu silok i nemen keneng at lorooro rak? Ningisa ba unaba lok tooro ia xusu anoxok lok bok ba at loklok tatao at limixin munepen minia?

³ O Leeme Silok, nu ne Moroa rak. Doma su rak. Una sep siam at lising tarak. Una raba amlong ia mi lolos tarak. La nemen uta ke xepe ia xusu ana met. ⁴ Nemen uta ke avolo limixin munepen minia dina tong i do, “Nedik tara sev asubu vam i.” Nemen uta ke avolo di kusu dina lok momo aksaksa ria mumu i nom.

⁵ Ketla a nunu saga ram, atla labalamu lexen taram tia naba nemen amisik. Anaba momo dola una lox asepsu box ia basinge limixin munepen minia. ⁶ O Leeme Silok. Anabak pixan tu, atla ugara lox anarong pam ia.

14

Loklok Kakapmek At Limixin

¹ Mo limixin di doma i do, “Kopmen tomoroa go.” Nedi limixin tangtangu. Lodoxoma atnedi i bilingot axap

tino mi laxakapmek. La dira lok pam levempanga ik lok kapmek aleng tinotno, kopmen tara atdi i lok levempanga i lox avukat.

² Leeme Silok ik milik si boro vana at lebelen laxalibet, la i reven limixin axap, do ni naba epovo ri ven kaka taradi leklen la tara bok i lotu saparav i. ³ Ketla nedi axap digara oon soogong pam, lorooro atnedi axap ira mau axap pam. Kopmen tinotno tara atdi ik lok lempanga i lox avukat, kopmen tinotno tegesara.

⁴ Leeme Silok i sue xeretna, “Kopmen dinaklen leven-taangas nunuan? Kereva, nedi axap na dik lok laxakapmek, kopmen takleklen atdi? Dip kip pilo amisik limixin tarak, la kopmen tinotno dina ngising tia.”

⁵ Ketla melemu dinaba lingun aleng, atla ne Moroa i nemen eburu minedi limixin di mumu asu levelinga ren. ⁶ Nedi dik lox aekarakat levempanga luvuttadi banbalo di vara i do dina lox i. Ketla Leeme Silok nabak lok see atdi.

⁷ Nia a vara aleng tinotno i do ne Moroa na sak tiki tara boro Saion kusu na lox asepsu limixin me Israel basinge limixin munepen midi. Melemu limixin me Israel dinaba lok momo dola Leeme Silok na lox asang kobot amu manga di.

15

Loklok Ne Moroa I Vara I

¹ Leeme Silok, nege i epovo na vubeles at loogu xaala ram? Nege i epovo na nemen eburu minu ro Saion at lakaana xaala ram?

² Neni laradi i mumu asu lavavara at ne Moroa at leventaangas axap, la ik lox amisik leveloklok in manton la levelinga ren i ruturun amisik. ³ La kopmen ni na paase asi taasen at tara ukopok. Kopmen na lok tibilinga ri larapen tangas teren, kopla na paase mumu nedi dik lox auret tin. ⁴ Neni i rexes nedi no ne Moroa i raba rulu

nedi. Ketla neni ip kiv aurut levenasen atnedi di mumu asu levelinga at Leeme Silok. Ik lox epovo amisik leveng kakaape ren, keke i do i lolos aleng tin, ni ixo epovo na ke xepe i. ⁵ Im taba levendinau, ketla kopmen dina porang i mi luunun i volo. Ixo epovo do tara na un i mi tevempilas kusu na vaxaru taradi manmanton at tavapaase.

Laradi i mumu asu na leveloklok, lixitkis teren naba nemen matmatkun.

16

Laradi I Nunu La I Ngising Ne Moroa

¹ O Moroa, una lok see rak, a nunu saga ram kusu una kubak pe ia basinge limixin munepen minia. ² A tong i ri Leeme Silok, “Nenu Leeme Silok tarak. Levempanga nunuan axap tarak, nenia a ruuna i, nenu axa um taba ia min.”

³ Limixin tuturun at Leeme Silok, nedi limixin nunuan. Ak lok momo amisik ti nemen eburu midi.

⁴ Limixin dit pas uto at levenmoroa vetpes, dinaba ekip tangarang mi laxanmumuat solo. Nia noxo nemen eburu midi at levelaplavang atnedi. La nia noxo lotu saparap levenmoroa atnedi.

⁵ Leeme Silok, nenu mun tarak la kopmen tomoroa bok. Ang sang kobot mumu mun u, la kopmen bok ba tepanga vetpes nia anak pakes tin. Lorooro axap tarak i nemen at lukngam. ⁶ A ruuna ka leventamtaba nunuan mun taram la di lox avukat tinotno.

⁷ A emi asu mi Leeme Silok, atla neni im lam lorooro rak, la at leveng kanimin lodoxoma rak i anasa ia mi loklox avukat. ⁸ Nia a xasep amisik ti Leeme Silok i nemen to melango rak. Mi mo i tu saparap lakngak tino la kopmen tavanga noxo sev asubu ia.

⁹ Kuren la lorooro rak i umsu mi lomomo, la levelinga rak i paase asu mun lososoro. La kopmen tinotno nia na marat tangarang ka tepanga, ¹⁰ atla nenu u noxo raba rulu ia xusu anat pas uto at lemenemen at labarongan, la u noxo ke xepe Laradi Melemelengan taram la labantuxu ren napso. ¹¹ Unaba lox ase ia mi langas it pas uto at loxot ti lorooro. Ut kis esogo minia, la a momo amisik. Uk lox aumsu ia mi lososoro mo naba nemen amisik la kopmen tekavaxap teren.

17

Lisingising At Laradi Manmanton Ga Tu At Lavapaase

¹ O Leeme Silok, una ronga lorotoro rak la una ru ria mi levelinga ruturun. Una ronga res at lerengteng tarak saparav u ri loklok tooro. Una ronga na lising tuturun tarak saparav u. ² Nenu uklen leveloklok in manton, kuren la unaba ronga linga rak la unaba ru ria.

³ Uklen lorooro rak. Uga vot pasa ia at laxanimin la uga viila mumu axap lorooro rak, u goxo vuse kaka tibilinga rak. Nenia axo paase kapmek, ⁴ ngan leventaba vetpes di lox i. A mumu asu amisik levelinga ram, la kopmen ana mu asu langas at lemusak la leesep. ⁵ At pas amisik at langas taram, la kovisi nia ana vas aase ren.

⁶ O Moroa, a sing saparav u atla uk lox epovo levesingising tarak. Una xa roolong tia la una ronga levelinga rak. ⁷ Una lox asuusu nom labalamu avukat taram la una lox asepsu ia. Nia at kis esogo minu la kopmen nia ana marat at limixin munepen minia.

⁸ Una lok see rak ngan uk lok tatao luxatli ram. Una lipe ia at lamamau at luvapa ram, ⁹ kusu limixin kapmek di noxo sev asi ia.

Limixin munepen minia di tu kangkan ia kusu dina sev amer ia. ¹⁰ Kopmen dina balamu leventaba vetpes. Dit las

amisik di. ¹¹ Nanga ding kan ia, at levengkot nia a tepukus taba ve, di mamat mu amisix ia kusu dina sev asubu ia. ¹² Di lok ngan lubunglaion, di kuxut tangais ia, di vara i xusu dina lais koxorop axakalik labantuxu rak.

¹³ O Leeme Silok, ude u. Una esep tangarang limixin di munepen minia, la una sak tup midi. Una lox asepsu ia basinge limixin kapmek mi lavarise esep taram. ¹⁴ O Leeme Silok, una lox asepsu ia mi lolos taram basinge nedi limixin at na lorooro di ruuna ka levempanga axap nedi xa di vara i. Una lox asongot di mi levesongsongot nu ga gagas li i ridi, teventaba bok ti laxamdak mi laxaalik atdi, la teventaba naba volo bok ti luvuttubuno avolo atdi.

¹⁵ Ketla nia anaba ven lamaram atla nia goxo lok tibilinga. Dola ana aus, anaba umsu mi lososoro atla anaba nemen eburu minu.

18

Loxompixan At

Ne Dedit, Ti Lok Momo

¹ O Leeme Silok. A vavara aleng tu! Nenu Lentupe ria.

² Leeme Silok ik lok see rak basinge limixin munepen, atla neni Loogu Matmatkun tarak. Moroa rak, neni Lurutu See Pe rak, la keneng mun teren nia a nemen matmatkun. I tupe ia ngan Lenban. I tu tooro ia, la i kubak pe ia basinge limixin munepen minia. ³ A toro ri Leeme Silok, la i lox asepsu ia basinge limixin munepen minia. Leemi asu ri Leeme Silok!

⁴ Loxoxo uu ga suxuna ia ngan ta lovo paxanao sesele utut ga vuulus labaaxin tarak. ⁵ Loxoxo uu ga suxuna ia ngan ta loos ga itis ia. Lamaaut ga lok do na xonom ia. ⁶ At lumumuat keneng at lorooro rak, aga ro ke at Leeme Silok. Aga ro ke at ne Moroa rak ti loklok tooro ro xeneng at loogu laplavang teren la ni ga ronga laxaka rak. La ga

ronga bok lerengteng tarak ti loklok tooro basinge limixin munepen minia.

⁷ La ne Moroa ga musak di la ga lox angne lavatkangka la lempar abuxumkun at lempatkaana gang nengne.

⁸ Lusuxa ga ravasu at lisna ren la langangao at laxao bokbolot tintin asonao vanga eburu mi laxali kao bokbolot ga ravasu at lungusno.

⁹ Ni ga vaxat kuang laxalibet la ni ga vas si ude xopok, mi loxontakabu bibi maxopok at luxangkedek teren.

¹⁰ Ni ga xis pana at lavanga raptava ren (cherubim) la ga rava si soso min ude xopok ngan lamanman silok.

¹¹ Ni ga xua pe i mi lubuxumin. Lengkon takabu lolos ga umsu mi laxadan gak lok kangkan i.

¹² Laxampengkos uat gan bun aleng ga subu la laxao mi lavanga ga mam gamgomgo rin, la ga soosoo das su at loxon takabu bibi.

¹³ To vana at laxalibet, Leeme Silok gap kup butbutki ngan lerepaavat. La limixin axap diga ronga laxaka at Leeme Avolo.

¹⁴ Ni ga so limixin munepen mi laxasoso ren, la diga oo epeseves, la diga sixiro basinge laxasep at lavanga ga mam etitit.

¹⁵ To maxopok at lebelen laras gamdi saxaven, la lavara buxumkun at lavatkangka bok gamdi saxaven, at loxonaleng nu Leeme Silok uga musak limixin munepen minu, la uga vaase lolos aleng tidi.

¹⁶ Leeme Silok ga song asi boroxun pana la ga rebeng tu rak. La ni ga rev asu ka ia boro xeneng at lamaxat.

¹⁷ Ni ga lox asepsu ia basinge limixin lolos diga munepen minia, la basinge bok di, di belengatngas tia. Nedi diga lolos polo ia.

¹⁸ Nia ga nemen keneng at lumumuat, diga esep minia, ketla Leeme Silok ga lok see rak.

¹⁹ Ni ga lok tooro ia basinge laniu, la ga lox asepsu ia atla ni ga lok momo minia.

²⁰ Leeme Silok im taba ia mi luunun atla nia laradi manmanton la ni ik lox anarong ia atla nia laradi sepsen.

²¹ Agara mumu asu Laulis Linga at Leeme Silok. A goxo

raba sinta ne Moroa rak. ²² Agara mumu asu amisik leven-taangas axap teren. Nia goxo rongga xepe at levempapaase ali ren. ²³ Iklen i do kopmen tibilinga rak, la aga lok tatao avukar axa ia la nia goxo lok taxakapmek. ²⁴ Kuren la im taba ia mi luunun atla nia aga lok mun leveloklok manmanton la iklen i do nenia laradi sepsen.

²⁵ O Leeme Silok, nenu u ruturun tinedi di ruturun saparav u. La uk lox avukat tinotno rinedi din manton tino. ²⁶ La uk lok lempanga i dadat tinedi loklok atdi i dadat. Ketla do tentaba dik lok laxakapmek, nenu u lok ngan laradi munepen midi. ²⁷ Uk lox asepsu nedi di lox asi di ukopok, la uk lox asi nedi dim simi aurut di.

²⁸ O Leeme Silok, um taba ia mi laxasep, la uk lok kepe ia basinge loklok at lamain. ²⁹ Um taba box ia mi lolos ti vesep mi limixin munepen minia, la lolos tip sev asi di.

³⁰ Na ne Moroa, loklok teren in manton tino. Dola ni na xaape mi tavanga, ni naba lox i. La neni Lenban tinedi di vot pasa i xusu na lok see atdi. ³¹ Leeme Silok, neni xusuk ne Moroa. Moroa xusuk i lok ngan Lentupe ridik. ³² Neni mun ne Moroa ik lox alolos ia, la neni mun ik lok tatao lavatpas tarak. ³³ Neni mun i su auru ia at lavatpas tarak ngan lavanga mi lavanuet kangkedek it pas matmatkun. Ik lok tatao box ia rovana at lempatkaana. ³⁴ Ik lox ase ia ri vesep, kusu anaba soso avukat mi lososo lolos.

³⁵ O Leeme Silok, uk lok see rak la uk lox asepsu ia. Loklok tooro ram ira lox asilok pam ia, la lolos bok taram ga kubak pe ia basinge limixin munepen minia. ³⁶ Ugak lok tatao avukar ia basinge di la di goxo xoxo ka ia. La nia goxo subu bok. ³⁷ Nia ga xala limixin munepen la aga rebeng alis kaka di. Nia goxo lok mamas se aga sev amet axap di. ³⁸ Aga bobo amet di, la digoxo epovo na xatu kaxar amlong. Digak midi etaba ro melamgo rak. ³⁹ Uga raba ia mi lolos ti nom leesep, la nia aga sak tup mi limixin

diga munepen minia. ⁴⁰ Uga lox aoo limixin munepen minia la diga sixiro rak. Agap sep kakapmek tino nedi diga belengatngas tia. ⁴¹ Digang teng ti loklok tooro, ketla tara goxo lox asepsu di. Diga toro ri Leeme Silok, ketla ni goxo ronga res atdi. ⁴² Aga long povorok tino di la di lok ngan ta lakbus kao no lamanman it mas kepe i. Aga vas asi di, ngan ta at pas at lapke ro at langas. ⁴³ Uga lox asepsu ia basinge limixin tongtonga xepe la uga lox asilox ia ngan loorong at levenabung mixin axap. Limixin nia goxoklen di, nanga nia am gomgonga di. ⁴⁴ Limixin boro xadiong dit kis tintiding mi levempatgulom atnedi saparav ia. Dola di ronga ia, di ronga res at levelinga rak. ⁴⁵ Dixo abelemes bok ba, la di dede aleng, mo do di on basinge laraogu matmatkun atdi.

⁴⁶ Leeme Silok ni Luntoo Avolo rak. A emi asu min, ni Lentupe ria. Ana tong asu i ri limixin do ne Moroa i silok aleng la ik lox asepsu ia basinge limixin munepen minia. ⁴⁷ Im taba ia mi lolos ti sak tup mi limixin munepen minia, la i tupe ia at limixin kapmek. La neni mun ik lox asi at larabung mixin axap kusu diba nemen maxopok tarak, ⁴⁸ la ik lox asepsu ia basinge limixin munepen minia.

O Leeme Silok, u raba vam ia mi lolos kusu ti sak tup mi limixin munepen minia, la u lok see rak kusu limixin sepsep di noxo sev asi ia. ⁴⁹ Ni lavasuun teren la nia ana emi asu minu kantubu at limixin at levenabung mixin petpes. Anak pixan emi asu mi laasen taram.

⁵⁰ Moroa im taba lolos silok ti loorong teren kusu nak sak tup mi limixin munepen min. Ik lox asuusu labalamu lexen teren ti no lara neni xa ga soxolik kaka i, ti ne Devit la ri luvuttubuno avolo umelemu.

19

Luruntudum Li At

Ne Moroa I Lox Asuusu Laasen Silok Teren

¹ Laxalibet ik lox asuusu lisisixam at ne Moroa. La levempanga axap go ik lox asuusu lugugu silok neni ga lox i. ² At levenaleng kangking axap mo levempanga dik lox asuusu i. La levenaleng kanimin axap bok, dik lox asuusu i. ³ Kopmen dina vaase asu tevelinga la kopmen bok ata rongga asu i. ⁴ Levempapaase atdi i ravasu ri limixin at lavatbung menemen axap. La levelinga atdi it pas ti latnese at na lavatkangka. Moroa ga lok loxot kitkis to vana at lamavangkap ti laxangking. ⁵ Ip tavasu maxantamak suubu ngan laradi i epot maxat la i lok momo ri vas su, i ngan bok laradi lolos i lok momo ti sixit at lekampoovo. ⁶ Laxangking i ravasu ro at lenep kavaxap at lavatbung menemen la ik sixit korop uto at lara lenep kavaxap bok. Kopmen tempanga i epovo na lipe basinge liplivi ren.

Laulis Linga At Ne Moroa

⁷ Laulis Linga at Leeme Silok ik mokso axap. Im taba lolos maxat ti limixin di mu asu i. Levempapaase ali at Leeme Silok, i epovo do dik ata nunu saga ren. La im taba lodoxoma avukat tinedi xopmen todoxoma avukat atnedi. ⁸ Laulis Linga at Leeme Silok ik mokso aleng, la nedi di mumu asu i di momo. Levempapaase ali at ne Moroa i nunuan, la im taba lodoxoma avukat ti limixin. ⁹ I lox avukat do laradi na lok ngangao at Leeme Silok, la limixin dinaba lok ngangao epasum amisik. Levelinga loklox akmokso at Leeme Silok in mantan la i lox avukat amisik. ¹⁰ I lox avukat do limixin dina vara aleng i polo logol. La i so avukat tino ri limisiu. ¹¹ Leeme Silok, leventaangas taram im taba ia mi lakleklen, nia lasaxaruki ram. Anabak lok kaka luunun teren, mo do nia ana mumu asu levelinga ram.

¹² Leeme Silok, kopmen tara i epovo xusu ni na ven lenget ka axa libilinga ren, kuren la una doxoma xepe mo libilinga nia xopmen na xasep teren. ¹³ Una lok tooro ia xusu nia noxo lok laxapmek ua nenia a vara i. Nemen uta ke xepe i na sak pavaa ia xusu nia anaban manton la anaba sepmus basinge lolos at libilinga. ¹⁴ Nia a vara i do levempapaase rak mi lodoxoma rak nan manton at lamaram. O Leeme Silok, nenu Loxot Loklox Alipe rak, la nenu Lentu Korop Pe rak.

20

Lisingising Ti Lok Tooro Loorong At Leesep

¹ Ma sing Leeme Silok, ni ne Moroa at ne Jakop, do ni naba ronga ram dola una ekip tangarang mi lumumuat, la naba lok see ram! ² Ma sing box i do loklok tooro ru naba laa boro xeneng at loogu laplavang teren, la loklok tooro bok tu naba vot boro Saion at lakaana ren. ³ Ma sing box i do ni naba siam ka ampana letaba ram, la ni naba momo rino bok mi levelaplavang taram. ⁴ Ma sing box i do ni naba raba box u mi lempanga ung kongkat tin, la ni naba lox asoxos levendoxoma gagas taram. ⁵ Do Leeme Silok na lox epovo na levesingising la una sak tup mi limixin munepen minu, manabap kup mi lomomo, la manaba lok katling i mi leemi asu ri ne Moroa. Ma sing Leeme Silok naba lox asoxos axap levesingising taram.

⁶ Na nia aklen i do Leeme Silok im taba lolos ti loorong soksoxolik teren kusu ti sak tup mi limixin munepen min. Neni i paase porang levelinga ro at loxot melemelengan teren keneng at lebelen laxalibet at ne Moroa. At lolos axa ren neni im taba i mi lolos avolo aleng ti sev asi limixin munepen. ⁷ Leventaba di nunu saga at leveng karis esep atnedi, la leventaba di nunu saga laxanos atdi. Ketla nedik ta nunu saga at lolos at Leeme Silok, ni ne Moroa

atdik. ⁸ Limixin kerepmo dinaba vas kais la dina subu, ketla nedik tanaba xatu upana la manaba tu tuxuruxun.

⁹ O Leeme Silok, una raba lolos ti loorong kusu na sak tup mi limixin munepen min. La una ronga atnema do mana toro ke ram.

21

Moroa I Lok Tooro Loorong La Loorong I Xiv Aurut Laasen Teren

¹ O Leeme Silok. Loorong i lok momo, atla nenu ugam taba i mi lolos. I sosoro atla nenu ugam taba i mi lolos tik sak tup mi limixin munepen min. ² Uga raba vam i mi levempanga axap lebelen ga tu i. Uga raba box i mi mo lavanga neni ga ngising tin.

³ Uga raba i mi leveloklox anarong silok, la ugara vaxasiga i mi lavatbungorong gol at lavatlak teren. ⁴ Ni ga sing u ri lorooro, la nu ga raba vam i min, lorooro abao naba baalom aleng. ⁵ Lisisilok teren i volo, atla nenu uk lok tooro i. Laasen silok mi lisisinang teren, nenu xa uga raba i min. ⁶ Um taba amisix i mi leveloklox anarong, la ik lok momo atla ut kis esogo amisik min.

⁷ Loorong i nunu saga at Leeme Silok, ni Lanaraavuk. Nom labalamu lexen at Leeme Silok naba tu amisik, kuren la lixitkis orong teren nabak lox amisik. ⁸ Loorong naba xoxo alis ka limixin axap di munepen min, la ni naba xoxo alis axap nedi di belengatngas tin. ⁹ La ni naba sele utut kepe axap di ngan laxao, imsum at laxairing, dola ni na ru asuvos.

Leeme Silok naba lox asi axap di mi lebelemamao ren, la laxao naba rin asonao di. ¹⁰ La kopmen tara at livipisik li atnedi noxo sepsu at lanmet. Loorong naba sep kepe axap di.

¹¹ Di epaase li la di sevut li leventaangas kusu dinaba lok kapmek loorong, ketla di noxo lox epovo i. ¹² Ni naba xala di mi levesoso ren, la dinaba repukus la dinaba sixiro.

¹³ Leeme Silok, ma emi asu minu, ti mo langsung lolos taram! Manabak pixan la mana emi asu mi leveloklok taram i lolos aleng.

22

Lanteng At Laradi Mekmeres

¹ Moroa rak, Moroa rak, tila u raba rulu ia? Arang teng pupuse aleng ti loklok tooro ram, ketla uxu lok tooro ia. ² Moroa rak, a toro ru at laxanaleng kangking, la uxu vorang lisingising tarak. La at levengkanimin bok a toro ru, ketla uxok lox amamana labalak. ³ Ketla nenu ut kis at loxonin orong taram ngan Laradi Melemelengan. Nenu mun limixin me Israel di emi asu minu. ⁴ Lavalabat atnema diga nunu saga ram. Diga nunu at levelinga ram, la uga lox asepsu di. ⁵ Diga ro ke ram la di goxo ekip tangarang mi levenaniu. Diga nunu saga ram la uga lox epovo levendoxoma atdi.

⁶ Ketla nia xopmen bok ba ana ngan laradi, a lok ngan ta laxalon. Limixin axap di lele abulubun ia! ⁷ Limixin di ven ia, la di paase aksaksa ria. Dim lem gam tia la dira piriapat patlak. ⁸ Dik lok tia xeretna, “Nenu ga nunu saga at Leeme Silok, tila neni xopmen na mulus ti lox asepsu u? Dola Leeme Silok i vavara ru, tila ni xopmen na lok tooro u?”

⁹ Nenu mene, ne Moroa, uga lox asu avukar ia at lebelen ne naga at laaleng pipisik tarak. Nenia nove aga xadede, uga lok tatao avukar ia. ¹⁰ Agam doma saga ram, ga ru xaka i at laaleng ne naga ga visix ia ren, la at levenaleng axap tarak, nenu mun ne Moroa rak. ¹¹ Nemen uta nemen paxalom basinge ia! Levenmumuat mo i auret, la

kopmen tara ri lok tooro ia. ¹² Limixin solo di munepen minia, la di tu xangkan ia ngan ta laxanbulumaxao temes, ngan ta laxanbulumaxao mukmusak boro Basan. ¹³ Di vavangangba la di booro ngan ta lubunglaion, di gagas ti atat lalais ka ia ngan levempanga anan.

¹⁴ Lolos tarak ira xap pam, i xap ngan laxadan i soli su ri laxangka. Levennin etudum at levesi rak ira rem kida vam. Labalak i umsu mi lainmarat i silok aleng. ¹⁵ Luxukung tarak ira vatmang axap ngan laxakup, la lagam tarak i xis pe langsuk. Nenu xa u ke xepe ia la ak midi ro at laxangka xusu ana met.

¹⁶ Libinam tadi at limixin kakapmek nanga di ru xangkan pam ia. Di lok ngan ta lubung man di xala sa rak, di atat lais koxorop luxangkedek tarak mi lukngak. ¹⁷ Ara gelegen axap. Limixin munepen minia di reven tooro ia la di paase aksaksa ria. ¹⁸ Diga lu buru mi lengkon uat kusu ti lok kisp ka nege ba lok ka levempanga singsiga rak.

¹⁹ O Leeme Silok, nemen uta on basinge ia! Ude, una lox asepsu soso mun ia! ²⁰ Lox asepsu ia basinge lemparise at limixin esep. Lox asepsu ia basinge na lubung man. ²¹ Lox asepsu ia basinge na lubunglaion. Axo epovo kusu ti sixiro basinge na laxanbulumaxao sio. ²² Nenia anaba tong asu laasen taram ti luvutnetak. Anaba emi asu minu ro at lovtopot buru atnedi.

²³ Nemi livisik li at ne Jakop me Israel, mi lok ngan lavasaxaruki at Leeme Silok, mina vemi asu amisik min. Mina raba asinorong i la mina lotu saparap amisix i! ²⁴ Leeme Silok ixo raba sinta limixin baava dip kip levesongsongot. La ixo raba rulu bok di, ketla ing tonga di do di toro ri loklok tooro.

²⁵ Anaba emi asu mi laasen taram to at lovtopot buru silok, ti levempanga ugara lok pam i. Anaba tu ro melamgo atnedi di lotu saparav u la anabaplavang tu mi

levempanga nia aga xaape min. ²⁶ Limixin banbalo dinaba an mais at leveluxa di vavara rin. Nedi di repukus taba Leeme Silok, dinaba emi asu min. A sing ne Moroa na lox anarong di xusu dina ngasang kobot amisik at levenaleng axap i tu melamgo!

²⁷ Limixin boro at larabung mixin axap dinabam domasu amisik at Leeme Silok. Boro at lengkot axap at lavatbung menemen, dinaba repukus taba i, la levenasen bantuxu axap dinaba lotu saparav i. ²⁸ Leeme Silok neni Loorong Silok mavana at limixin axap. La neni im gomgonga limixin at levenabung mixin axap.

²⁹ Limixin dit las nedi, dinaba xis tiktikbu saparav i. Limixin at lavatbung menemen axap dinaba xis tiktikbu saparav i. ³⁰ Lavaola melemu dinaba gugu taba amisix i. Limixin dinaba tere avolo na loklok at Leeme Silok ti lavaola mo dinabat pot melemu. ³¹ Limixin kovisi dina visik nedi, dinabaklen i do, “Leeme Silok ga lox asepsu limixin teren basinge limixin munepen midi.”

23

Lisingising At Laradi Loklok Tatao Sipsip

¹ Leeme Silok, ni laradi ik lok tatao ia ngan laradi ik lok tatao levesipsip teren. Kuren la a ruuna ka axap levempanga ak pakes tin. ² I lox amdi ia ro at lenep kangka i ruuna levempivilis avukat kusu ana lok mamana ren, la i lam kaka box ia uto at laradan i sesen atnaasan kusu ana inin. ³ Neni im taba ia mi lolos maxat. La im lam ase ia keneng at larangas mokmokso, ngan ni gara vaase ali vam i. ⁴ Keke i do ana vas beles keneng at langsgangan lamain bonot, nia noxo marat. Leeme Silok, u nemen eburu amisik minia, luvuukup mi lakdak taram ik lox amenemen amisix ia.

⁵ U lok gagas li leluxa silok tia, kuren la limixin munepen minia, dinaba ven ia, dola una seega rangarang

ia ngan laradi silok. La unantu aumsu aleng lavanga inin tarak. ⁶ Aklen i do loklok nunuan mi labalamu ram naba kuxun amisik keneng at lorooro axap tarak, la loogu ram naba lok ngan loogu aulis tarak at levenaleng axap nia anaba rooro ren.

24

Loorong Silok

¹ Lavatbung menemen la levempanga axap di nemen keneng teren, ni at Leeme Silok. Lavatkangka mi levempanga axap di rooro, ateren mun. ² At lurutu kaxat, neni ga lok li laxangka ro mavana at lamaxat. La ni ga lok li bok levenamkunkun to xa maxopok at lisimaramain.

³ Loklok atnege i lox avukat kusu neni ba epovo na vas urut uto vana at lakaana at Leeme Silok ti lotu saparav i? Loklok atnege i lox avukat kusu neni ba epovo na vubeles uto xeneng at loogu laplavang teren i xaala? ⁴ Nedi mene di dadat at loklok atnedi la lodoxoma atnedi, la kopmen dina lotu saparap laxampoovo moroa la kopmen dina tong asu leveng kakaape xaxarang. ⁵ Leeme Silok naba lox anarong di. Moroa ni Luntoo Avolo atdi la naba tong atkatla li i ridi do nedi limixin sepse. ⁶ Limixin kerepmo di ngaongao ri ne Moroa, la dit pas amisik ti lotu saparap ne Moroa at ne Jakop.

⁷ Mina suang soso mene lempatban at langas uat, mina suang axap lempatban diga lox i ganoxa kusu Loorong Silok na vubeles. ⁸ Nege na Loorong i silok solo? Ni Leeme Silok la Lanaraavuk. Lolos teren i volo la ik sak tup mi limixin munepen min at levenaleng at leesep. Neni Leeme Silok.

⁹ Mina suang soso mene lempatban at langas uat, mina suang axap lempatban diga lox i ganoxa, kusu Loorong

Silok na vubeles. ¹⁰ Nege na Loorong i silok solo? Neni Leeme Silok, la Lanaraavuk. Neni Loorong Silok.

25

Lisingising Ti Loklok Tatao La Logomgonga At Leeme Silok

¹ O Leeme Silok, a lok lisingising tu mi lorooro axap tarak. ² O Moroa rak, a nunu mene ram. Una lok tooro ia kusu ana sak tup mi limixin munepen minia la nia anoxo ruuna ka lainmangan at leesep. Nemen uta ke xepe di xusu dina sev asubu ia la dina lok momo aksaksa ria. ³ Limixin di nunu saga ram, limixin munepen midi noxo epovo na sak tup minedi, ketla nedi mene ding tonga viribang at levelinga ram, dinaba subu at leesep.

⁴ O Leeme Silok, una anasa ia mi leventaangas taram. Una lox axasev i ria. ⁵ Una anasa ia xusu ana rooro mu asu levelinga ruturun taram, atla nenu ne Moroa rak, la uk lox asepsu ia. A nunu saga amisik taram.

⁶ O Leeme Silok, una doma amlong ti lebelemulus taram mi labalamu lexen taram, ugara lox asuusu vam i, ga ruka i ganoxa at lereot. ⁷ Una doxoma xepe axap leveng kakapmek la levesoogong tarak, aga lok pam i, ganoxa ga laau mun be ia. O Leeme Silok, una domasu rak mumu labalamu lexen taram mi loklox avukat!

⁸ Loklok at Leeme Silok in manton tino la i lox avukat. Kuren la i lox ase limixin kakapmek mi langas i epovo dina mumu asu i. ⁹ Nedi dik lox axakalik di, neni im gomgonga di at langas ik mokso. La i lox ase bok di mi lavavara ren. ¹⁰ Nedi di mumu asu lekabus teren eburu mi levempapaase ali ren, neni im gomgonga nedi mi loklok tuturun la labalamu.

¹¹ Leeme Silok, una lox epovo laxakaape ram la kerepmo una doxoma xepe laxaloklok kakapmek axap tarak, atla a ruuna laxaloklok kakapmek solo. ¹² Nedi ding tonga res at Leeme Silok, ni naba anasa di mi langas dina

mumu asu i. ¹³ Limixin kerepmo dinaba ngasang kobot amisik la laxamdak mi laxaalik atnedi dinaba ruuna ka mo lenep kangka aulis atdi. ¹⁴ Leeme Silok neni lentangas atnedi ding tonga res teren, la neni i lox amuat levelinga at lekabus teren eburu minedi.

¹⁵ Am tem saga amisik ti Leeme Silok ti loklok tooro, la ik lox asepsu amisix ia basinge levenaniu. ¹⁶ O Leeme Silok, una doma amlong tia, la una lox asuusu lebelen tuntun tia, atla ak lok tuntun la kopmen tololos tarak. ¹⁷ Una lox asooloo ia basinge lodoxoma saasaa, la una lox asepsu ia at laxanmumuat tarak. ¹⁸ Una doma loklok tuntun mi laxaloklox asongot tarak, la una doxoma xepe laxangkakapmek axap tarak.

¹⁹ Una doma mumu i do buaang nedi limixin di munepen minia la di belengatngas tia. ²⁰ Una lok see rak, la una lox asepsu ia, kusu limixin di munepen minia di noxo sak tup minia. A vot pasa u kusu una xubak pe ia basinge di. ²¹ Nia a sing u xusu unaba lok tatao amisix ia atla a nunu saga ram, la loklok tarak i nunuan la i ruturun.

²² O Moroa, una lox asepsu leme Israel basinge lev-
enmumuat axap atdi. Una lox asepsu leme Israel, nedi limixin tinotno ram.

26

Lisingising At Laradi Manmanton

¹ O Leeme Silok, una tong atkatla li i ria do, nenia laradi sepsen, atla nia a nunu saga mun taram la ak lox amisik levempanga ik mokso. ² Una lok tong pen axap na lorooro rak, la una ven mumu avukar ia. La una viila mumu lavavara axap keneng at labalak eburu mi lodoxoma rak. ³ Una lox i na atla um gomgo ria mi labalamu lexen taram, la um lam amisix ia at lavatpas tarak la kopmen tinotno una ke aie xepe ia at tengkon aleng.

⁴ Nia xopmen ana vemu eburu mi luvuttadi ekarakat. Nia axot kis esogo mi luvuttadi sosolo arup. ⁵ Nia axo vesum mi limixin kakapmek, la a tu asepsu basinge di. ⁶ O Leeme Silok, na a gos lukngak ti lox asuusu i do nia laradi sepsen. La at pas emi asu kangkan loxonin laplavang taram. ⁷ A vixan loxompixan ti tong avukat tu la a tong asu lewempanga nunuan ugak lox i.

⁸ O Leeme Silok. A vara rinotno na loogu laplavang, ua nenu u nemen teren. Ni na loxot lisisixam taram i nemen e. ⁹ Nemen uta sele utut kepe ia eburu mi limixin kapmek, la una ke ia basinge levenmumuat uba raba limixin sepsev amet min. ¹⁰ Nedi limixin dik lox amisik laxakapmek la di gagas amisik ti siam ka lempilas ti lox alolos lenngitngit atdi.

¹¹ Ketla nenia, ak lox amisik leveloklok in mantan. Una lox asuusu lebelen tuntun tia la una lox asepsu ia basinge di! ¹² La xerepmo nia ana nemen avukat basinge levenaniu. La anaba emi asu mi Leeme Silok to at lovtopot buru at limixin teren.

27

Lisingising Emi Asu

¹ Leeme Silok ni Laxasep la Laradi Loklox Asepsu rak. Nia anoxo marat tangarang ka teta. Leeme Silok neni Loogu Matmatkun tarak ti pe levenaniu. Kuren la nia noxo marat bok ba.

² Dola limixin kakapmek dina esep tangarang minia xusu dina sev amer ia, dinaba sak kikixin la dinaba subu. ³ Keke i do buaang atnedi limixin esep dina ru xangkan ia, nenia noxo marat. Dola limixin munepen dina lox agagas do dina sev asi ia, nenia move anaba nunu saga at ne Moroa.

⁴ Nia ara sing pam Leeme Silok mi legesa vanga. Legesa vanga mene nia a vara rin, do at lorooro axap tarak ana

nemen ia ro xeneng at loogu ren, la anaba pavanga at leveloklok nunuan teren la nia anaba ngising i kusu nam lam lorooro rak. ⁵ At levenaleng kakapmek neni naba lox ali pe ia ro xeneng at loogu ren. Neni naba xubak pe ia ro xeneng at loogu laplavang, la ni naba vaxaxis aurur ia uto vana at langangan luuat kis silok kusu anaba nemen matmatkun teren. ⁶ La kerepmo anaba sak tup mi limixin munepen minia do dina ru xangkan ia. Anabaplavang saparap Leeme Silok mi luxupkup momo ro xeneng at loogu laplavang teren. Anabak pixon, la ana emi asu min.

⁷ O Leeme Silok, una rongga ia, dola ana toro ru! Una lox asuusu lebelen tuntun tia la una siam mu ia! ⁸ Uga lok tia, “Ude u, una lotu saparav ia.” Aga vorang i do, “Leeme Silok, anaba vot pasa u.” ⁹ Kuren la nemen gat uta lipe rak!

Nemen uta belemamao ia. Nemen uta musak kepe ia, lasaxaruki ram, atla nenu Laradi Loklok Tooro rak. Nemen uta on basinge ia! Nemen uta raba rulu ia atla nenu ne Moroa, Laradi Loklox Asepsu rak. ¹⁰ Keke i do ne tamak mi ne naga duna raba rulu ia, ketla nenu, Leeme Silok, unabak lok tatao ia.

¹¹ O Leeme Silok, una lox ase ia mi langas sala u vara i do nia ana mumu asu i. La unam lam ia at langas nunuan, atla a ruuna buaang limixin munepen. ¹² Nemen gat uta on taba rulu xepe ia ri levengkikngen limixin di munepen minia. Di xaxarang taba amisix ia, la di lok momo aleng ti vaaban ia. ¹³ Nia akleklen i do anaba ven luvukat at Leeme Silok at na lorooro. ¹⁴ Kuren la minam doma ngangais ti Leeme Silok, la mina lolos. Nemen gat mita doma abulubun kepe i, mina nunu saga at Leeme Silok.

28

Lisingising Ti Loklok Tooro

¹ O Leeme Silok, nenu Lentupe ria, na nia a ro ke ram! Una ronga lanteng tarak! Dola u noxo ronga ia, nenia anaba lok ngan nedi diba si uto xopok at lemenemen at labarongan. ² Una ronga ia at loxonaleng nia anang teng saparav u ri loklok tooro, la at loxonaleng ana xip aurut lukngak ti loogu laplavang taram i xaala aleng. ³ Nemen gat uta lii lumumuat tarak at loxonaleng u vaase asi limixin kakapmek, la eburu minedi dik lok libilinga. Nedi limixin levelinga atnedi ik sixit nunuan, ketla lodoxoma atdi i umsu mi loklok kakapmek.

⁴ Una lox asongot nedi mumu leveloklok kakapmek atnedi eburu mi lempanga bilinga digara lok pam i. Una lox asongot nedi mumu xa leveloklok atnedi, la una raba bok nedi mi luunun i epovo at loklok atdi. ⁵ Kopmen dina ven kisip levempanga Leeme Silok gara lok pam i, kopla at levempanga neni ga rudum li i. Kuren la ni naba lox asongot di la naba sele utut kepe axap tino di.

⁶ Leemi asu ri Leeme Silok, atla ni ira ronga ka vam lanteng tarak ti loklok tooro. ⁷ Leeme Silok ik lok see rak, la i tupe ia. Labalak it kis saga ren, neni im taba ia mi loklok tooro, la ik lox amomo box ia. A tong avukat tin mi livikpixon momo.

⁸ Leeme Silok ik lok see at limixin teren la neni i lok ngan lenban tidi, la ik lox asepsu mo loorong ni ga soxolik ka i. ⁹ Leeme Silok, una lox asepsu limixin taram, la una lox anarong nedi limixin manmanton taram. Una nemen ngan laradi loklok tatao sipsip tinedi, la mo loklok tatao ram noxo xap.

29

Laxaka At Leeme Silok Keneng At Lamanman Silok

¹ Nemi limixin lolos toxun pana at laxalibet, mina emi asu mi Leeme Silok, mina emi asu min mumu lisisixam la

lolos teren. ² Mina emi asu mi laasen silok at Leeme Silok. Mina xis tintiding to melamgo at Laradi Melemelengan do ni na ru asuvos.

³ Limixin di ronga laxaka at Leeme Silok to at levengkot axap at laras la lagale lo Moroa silok ik lox asuusu leretepaavat. Laxaka at Leeme Silok i onon to mavana at laras aaxa. ⁴ Limixin di ronga i atla laxaka ren i silok la i lolos aleng.

⁵ Laxaka at Leeme Silok ik sak pirivit larauna Seda (Cedar), keke i do ni larauna i silok aleng to Lebanon. ⁶ Neni inglong angne larakaana ro Lebanon kusu dinat los ngan laxannatnat bulumaxao, la lakaana Emon nat los ngan lanat bulumaxao temes.

⁷ Laxaka at Leeme Silok ik lox asuusu lavanga i mam. ⁸ Laxaka ren i lox angne lamatbin, la ingnengne bok lamatbin to Kades. ⁹ Laxaka at Leeme Silok ingne larauna Ok la it mas kepe larapavaxan una, at loxonaleng limixin axap to xeneng at loogu laplavang teren dinabap kup silok keretna, "Leemi asu ri ne Moroa."

¹⁰ Leeme Silok ni Loorong mavana at lisimaramain. Ni im gomgonga amisik limixin ngan Loorong Avolo la kopmen tekavaxap teren. ¹¹ Leeme Silok im taba lolos limixin teren la ik lox anarong nedi mi limila.

30

Lisingising Ti Tong Avukat

¹ Leeme Silok, nenia a emi asu minu, atla nu uga lox asepsu ia. La uga rupe limixin munepen minia di goxo lok momo aksaksa ria. ² O Leeme Silok, nia agang teng saporav u ri loklok tooro. Nenu ne Moroa rak, la uga lox aroo ia basinge lanmeres. ³ La uga lox asepsu ia basinge lamaaut atla ga auret kusu ana met. Nia aga mumu langas

uto xa xopok at lemenemen at labarongan, ketla nenu uga lox asepsu ia basinge lanmet.

⁴ Nemi luvuttadi ruturun teren, minak pixan emi asu ri Leeme Silok! Mina doma lempanga silok Laradi Melemelengan gara lok pam i, la mina tong loklox avukat tin.

⁵ Lumukmusak teren kopmen nak lox abao, ketla loklok nunuan teren i nemen at levenaleng axap at lorooro rak. Kuren la levengkamkabili dan ba sesen su at luxatli rak at laxanimin, ketla lomomo naba ravasu maxantamak suubu.

⁶ Nia aga nemen avukat, la aga doma i do, tepanga noxo sev asi ia. ⁷ Leeme Silok, ugak lok lempanga nunuan tia. Uga rupe ia ngan loogu matmatkun to at lempatkaana silok. Ketla melemu uga lox aliipe manga rak la nia aga marat.

⁸ Leeme Silok, gano aga ro ke ram. Aga ngising aleng u ri loklok tooro keretna. ⁹ O Leeme Silok, uba ruuna ka lavanga salai at lanmet tarak? Luunun salai uba ruuna ka i do nia ana si uto at lamaaut? Kereva, i epovo limixin diga met pam dina emi asu minu? I epovo bok dina tong asu lebelen tuntun lexen taram? ¹⁰ Leeme Silok, una ronga ia, la una lox asuusu lebelen tuntun tia! Lok tooro ia, Leeme Silok!

¹¹ Ketla monga lingina ura lok kun pam lanbulu rak mi liriti momo. Ura lok kepe vam lumumuat at labalak, la ura lox aumsu ia mi lososoro. ¹² Kuren la nia noxo vamngus, anak pixan emi asu minu. Leeme Silok, nenu ne Moroa rak. Anaba tong avukat amisik tu.

31

Lisingising At Laradi I Nunu Saga At Ne Moroa

¹ Leeme Silok, na a vot parav u xusu unak lok see rak. Nemen uta ke avolo limixin munepen minia dina

sep kapmex ia la ana lok mamangan. Loklok taram in manton tino, na a sing u do una lox asepsu ia basinge di. ² Una ronga ia, na! Una lox asepsu ia basinge di! Nenu una nemen ngan Loxot Loklox Alipe rak, kusu una lok see rak. La una rupe avukar ia, kusu anaba nemen avukat, la limixin munepen minia di noxo sep kapmex ia.

³ Nenu mun Loxot Loklox Alipe rak la Lentupe ria. Unam gomgonga ia, la unam lam ia at nom langas nenu ga xaape min. ⁴ Una kubak pe ia basinge lelixo no diga lok li ngais ia min. Una xua pe ia mi lolos taram basinge laniu. ⁵ A lok li lороonan tarak at lukngam. Leeme Silok, nenu ne Moroa u ruturun amisik ti limixin tarak, la unaba lox asepsu ia.

⁶ U belengatngas tinedi di lotu saparap leven moroa xaxarang. Ketla nia a nunu saga ram. ⁷ Anaba momo la ana sosoro mumu nom labalamu lexen taram. Ura ven pam laxasongsongot nia a ruuna i. La uklen bok levenmumuat tarak. ⁸ Nenu u goxo ke xepe limixin munepen minia, gita xoxo ka ia. Nu uga lok tooro ia la nia aga nemen avukat, la nia agat pas tangtagap at lavavara axa rak.

⁹ Leeme Silok, una lox asusu lebelen tuntun tia, na nia a ruuna langsung lumumuat. Luxatli rak ira ung axap at lerengteng. Lengkot tarak ira molo axap. ¹⁰ Lanbulu rak at laxanmumuat i lox atmut lorooro rak. Ara molos axap at na laxanmumuat tarak, labantuxu rak ira meramun axap.

¹¹ Limixin munepen minia, la nedi di nemen aurer ia, di ven ia la di paase aksaksa ria mumu lanmeres tarak. Nedi dikleklen ia, dik marat tarak. Dola di ven ia at pas to at langas, dik sixiro rak. ¹² Limixin axap dira domampe vam ia, ngan ta dola agara met pam. Nia a lok ngan ta lavanga no digara lu xepe vam min. ¹³ A ronga buaang limixin munepen di paase siksikma mu ia. Lanmarat silok

i suxuna ia. Di seput li leventaangas kusu dina rebeng alis ia la dina sev amer ia.

¹⁴ O Leeme Silok, lununu rak i tu mun taram, la nenu ne Moroa rak. ¹⁵ Nia a nemen amisik keneng at loklok tatao ram. Una lox asepsu ia basinge limixin munepen minia, la basinge bok nedid lox asongor ia. ¹⁶ Nia lasaxaruki ram, la unak lok tatao ia mi lebelemulus taram. Una lox asepsu ia atla u ruuna labalamu lexen. ¹⁷ Leeme Silok, na nia a ro ke ram. Nemen gat uta ke avolo limixin munepen minia dina lox amangan ia. Keke nedid limixin bilinga dina lok mamangan. La dina rakdu aleng kusu dina lok pilo mun at loxonaleng dina si uto xopok at lemenemen at labarongan. ¹⁸ Una vamngus limixin di xaxarang, nedid dit las di la dim simi aurut di, di paase aksaksa mumu limixin manmanton, la di paase asi di.

¹⁹ Nenu u umsu mi lempanga avukat, mo ura gagas li vam i kusu na lox asuusu i rinedid dim taba asinorong u! Uk lok see atnedid di nunu saga ram, la limixin axap di ven kibis i. ²⁰ Uk lox alipe nedid maxopok at loklok tatao ram basinge lodoxoma ali at limixin kapmek la uk lox amaau di basinge levelinga aksaksa at limixin munepen minedi.

²¹ Leemi asu ri Leeme Silok! Ni ga lox asuusu nom labalamu nunuan teren tia at laaleng limixin munepen minia diga ru xangkan ia ri leesep! ²² Nia aga marat la nia aga nua i do ni ga lok kepe ia basinge loklok tatao ren. Ketla ni ga ronga lanteng tarak, at levenaleng nia aga sing i ri loklok tooro.

²³ Nemi luvuttadi mi nunu saga at levelinga at Leeme Silok. Lebelen nimi na ngaongao rin. Leeme Silok ik lok see atnedid luvuttadi ruturun teren. Ketla ni ik lox asongot nedid dit las di, mo losongsongot i epovo rinedid limixin kerepmo. ²⁴ Nemi axap limixin mina doxoma ngangais ti Leeme Silok. Mina tu tuxuruxun la minam doma abelemes.

Lavapaase Asu Laxakapmek Mi Lodoxoma Xepe

¹ Nedi, dira sepmus pam basinge laxakapmek atnedi, dina momo. Laxakapmek atnedi ne Moroa ira doxoma xepe vam i. ² Do taradi go la Leeme Silok kopmen na vuse ka taxapmek teren la kopmen bok taxaxarang teren, ni na lok momo.

³ Ga ruka i nia goxo vaase asu laxakapmek tarak, agang teng amisik at levenaleng kangking la kanimin, kuren la labantuxu rak ira xat molos. ⁴ At levenaleng kangking la kanimin, nenu Leeme Silok ugap sev aleeng ia. Kuren la lolos tarak gara ravasu axap pam. Ik lok ngan laxangking at lamares ik lox avatmang laxangka.

⁵ La na nia aga vaase asu laxakapmek tarak tu, kopmen a goxo lipe toxot teren basinge u. Aga vara i do ana soxomus laxakapmek axap tarak tu, la uga doxoma xepe axav i.

⁶ Kuren la i lox avukat do limixin tuturun taram dinaba sing saparav u at levenaleng at levenmumuat. Dola langangan lekarakat i rava beles mu nedi ngan ladanut, kopmen noxo lox abaava di. ⁷ Nenu Loxot Loklox Alipe rak, la unaba lox asepsu ia basinge levenmumuat. Ak pixan momo at loklok tooro ram, atla nenu uk lok see rak.

⁸ Leeme Silok i lok keretna, “Nia anaba lox ase u mi langas unabat pas teren. Nia anaba anasa u, la anaba vaase aronga box u. ⁹ Nemen gat nu tangtangu ngan la os kopla dongki. Limixin di lok li loxonaen at lungusno at lavaros la di xoxo alu labanoos to melemu at lavatlak teren, kusu na rongga res atdi.”

¹⁰ Limixin kakapmek dinaba ekip tangarang mi laxa-songsongot, ketla nedi di nunu saga at Leeme Silok, di nemen ma xeneng at loxokok at labalamu lexen teren.

¹¹ Nemi limixin manmanton, mina momo la mina sosoro

at levempanga Leeme Silok gak lox i. Nemi ming tonga res teren, minap kup momo.

33

Loxompixan Emi Asu

¹ Nemi axap limixin manmanton, minap kup mi lomomo mumu levempanga Leeme Silok gak lox i. Nemi axap ming tonga res teren, mina emi asu min! ² Mina tong loklox avukat ti Leeme Silok mi lempat taaleng. Mina vixan tin mi leven gita. ³ Mina vixan loxompixan maxat saparav i. Mina sep maraanu lerengteng at ligita, kusu naba reng nunuan, la minap kup mi lomomo!

⁴ Levelinga at Leeme Silok i ruturun, la i epovo do ata nunu saga at leven gugu ren. ⁵ Leeme Silok i vavara mo leveloklok in manton la i ruturun. Labalamu lexen teren i umsu at lavatbung menemen.

⁶ Leeme Silok ga rudum li laxalibet mi lavapaase mun teren. Laxangking, lagaaling mi laxampenti ga ravasu mun at levelinga ni ga tong asu i. ⁷ Ni ga lok bubua laras at lara loxot, la ni ga lok li lisimaramain utou xa xopok at loxot teren.

⁸ Limixin at lavatkangka axap, mina lotu saparap Leeme Silok! Nemi axap limixin at lavatbung menemen minam taba asinorong i. ⁹ Ni ga vaase mene, la lavatbung menemen ga raut. At lavapaase mun teren levempanga axap ga ravasu.

¹⁰ Leeme Silok ik lox amun lodoxoma ali at limixin amgomgo at levenabung mixin petpes la kopmen dinak lox epovo levendoxoma belemamao atnedi. ¹¹ Ketla leven doxoma gagas teren i nemen amisik, la mo do ni i doma i xusu na lok tavanga, ni nabak lox epovo amisik axa i. ¹² Nedi lubang mixin ne Moroa it kis ngan Leeme Silok

atnedi, dina momo, atla Moroa ga soxolik ka di ngan teren axa, dina momo.

¹³ Leeme Silok ik milix asi boro vana laxalibet, la i reven limixin axap. ¹⁴ Ni it kis tovana at loxot kitkis orong teren, la ik milik asi ri limixin axap di nemen at na lavatbung menemen. ¹⁵ Neni xa ga lox araut lodoxoma atnedi la ikleklen axap levempanga dik lox i.

¹⁶ Loorong at lavatbung menemen ixo epovo na sep kepe axap limixin munepen min mumu i do i ruuna buaang limixin esep la di lolos aleng. La laradi esep ixo sak tup mi limixin munepen min mumu lolos axa ren.

¹⁷ Laxan os ti leesep ixo epovo ri sev asi limixin munepen mi lolos axa atdi. Lolos silok atnedi ixo epovo na lox asepsu tara.

¹⁸ Ketla Leeme Silok i reven tatao nedidik lok ngangao aleng teren, la nedidinu saga at labalamu lexen teren.

¹⁹ Neni ik lox asepsu di basinge lanmet, la ni ik lok tatao nedidat levenaleng at loroxo.

²⁰ Ata nunu saga at Leeme Silok. Neni Lurutu See Pe la Laradi Loklok Tooro atdik. ²¹ Ata momo saga ren, la ata nunu at laasen teren i melemelengan.

²² O Leeme Silok, ma sing u do labalamu lexen taram na nemen eburu amisik minema. La ma doxoma ngangais tu.

34

Leemi Asu Ri Luvukat At Ne Moroa

¹ Nia anaba tong loklox avukat amisik ti Leeme Silok, la anoxo xap mun at leges aleng ti emi asu min. ² Nia anaba emi asu min ti levempanga ni gak lox i. Nedi limixin baava dina ronga i la dinak lek. ³ Nedik eburu ata tong asuusu i ri limixin do Leeme Silok i silok aleng. Nedik eburu axap ata emi asu mi laasen teren!

⁴ Nia aga sing saparap Leeme Silok la ni ga ronga ia. Ga lox asepmus ia basinge levenanmarat axap tarak. ⁵ Limixin baava diba ven tu ren la dinabak lek, la di noxo doma abulubun. ⁶ Luvuttadi baava di toro ke ren, la ni ing tonga ned i, la ik lox asepmus di basinge laxanmumuat axap atnedi. ⁷ Laangelo at leeme Silok ik lok tatao ned i dim taba asinorong i, la ik lox asepsu ned i basinge levenaniu.

⁸ Nemi xa mina ven terek luvukat at Leeme Silok. Laradi ik soxolik ka loxokok at Leeme Silok, ni na sosoro. ⁹ Nemi axap limixin teren, minam taba asinorong Leeme Silok. La ned i ding tonga res teren, di ruuna xobot kaka levempanga axap dik pakes tin. ¹⁰ At lepenaleng lubunglaion dik toxo la dik pakes ti levempanga anan, ketla ned i ding tonga res at Leeme Silok kopmen dinak pakes ti levempanga avukat, atla Leeme Silok im taba amisik di.

¹¹ Ude nemi, laxamdak loklox ase, la mina ronga rak, la ana anasa nemi kusu minaba raba asinorong Leeme Silok. ¹² Do nemi mi vara i xusu mina ruuna lorooro nunuan, la mi vara i xusu mina ven levenaleng avukat, ¹³ mina ke xepe lavapaase kapmek, la mina axav i at laxaxarang. ¹⁴ La nemi mina ke xepe laxakapmek la minak lok luvukat, la mina lolos ti lok ka lenmila keneng axap at lorooro axap atnemi.

¹⁵ Atla Leeme Silok i reven tatao limixin manmanton la ing tonga res at levesingising atnedi. ¹⁶ Ketla ik sok tixirixes kepe ned i dik lok laxakapmek, kusu dola dina met, limixin axap dinaba domampe soso mun ned i. ¹⁷ Limixin manmanton di toro ke at Leeme Silok, la ni ing tonga res atnedi. Neni ik lox asepsu di basinge levenmumuat atnedi. ¹⁸ Leeme Silok i gagas amisik ti lok tooro ned i dik lok tuntun, la i lox asepsu ned i ua lodoxoma abulubun i suxuna rinotno di.

¹⁹ Do laradi nunuan na ekip tangarang mi laxanmumuat solo, Leeme Silok naba lox asepmus i basinge axap mo lempanga. ²⁰ Leeme Silok naba lok tatao axav i, la kopmen toxosi ren naba repit. ²¹ Limixin kakapmek dinaba met nop loklok kakapmek atdi. Nedi di belengatngas ti limixin manmanton, dinabap kip ka losongsongot.

²² Leeme Silok naba lox asepsu limixin teren. Nedi dinaba repukus taba i ri loklok tooro ren, di noxo ruuna ka lumumuat mavana atdi.

35

Lisingising Ti Loklok Tooro

¹ Leeme Silok, una tupe nedi di tu tangarang ia, la una esep eburu minedi di vara esep minia! ² Una lok kaka lenban taram la una siga lisingsiga esep taram la una lox asepsu ia basinge di. ³ Una rebeng aurut lososo mi laasop taram ti esep eburu minedi nom di xaxala mu rak do dina sev ia. Una xaape do unaba lox asepsu ia basinge di.

⁴ Nedi nom di lok do, dina sev amer ia, una sev asi axap di kusu dinaba lok mamangan. Nedi nom di vengir ia, una sax amlong di la una lox ekarakat lodoxoma atnedi, ⁵ la dina lok ngan levempavagam mang, lamanman it mas kepe i, at loxonaleng laangelo at Leeme Silok i xaxala mu di! ⁶ Keke langas atnedi na main pe la na gagai, ap mo loxonaleng laangelo at Leeme Silok na sev asubu di!

⁷ Gano goxopmen tavasuun teren, la diga lok li pe ia mi lelixo, la diga xe lemeroon kusu anaba subu tup teren la dina rebeng alis kaka ia. ⁸ Ketla langangan lumumuat naba vor asangu nedi, la nedi xa dinaba on at lara pelixo atnedi, la dinaba subu tup at langangan leeteke!

⁹ Kuren la nia anaba momo ri Leeme Silok. Nia anabak lek atla neni ga lox asepsu ia basinge di. ¹⁰ Anaba tong i ri Leeme Silok mi lodoxoma axap tarak keretna, “Kopmen

teta i lok ngan u. Uk lok see amisik at limixin kopmen tololos atnedi basinge limixin lolos, la limixin banbalo basinge limixin loklok papavas.”

¹¹ Limixin kakapmek di vaxaru ia at lavapaase la dik sok taba ia mi leveloklok kakapmek mo nenia xopmen anaklen i. ¹² Dip sepo loklox avukat tarak mi laxakapmek, kuren la lodoxoma abulubun i suxuna ia. ¹³ At levenaleng nedi digak meres, aga siga leventamon ti lox asuusu lanbulu rak la agan mun anan. Agat kis tintiding aleng ukopok la agang sing tinedi. ¹⁴ Ga ngan ta dola nia aga ngising ti lentangas tarak koplata netak. Nia agat pas tangtagap eburu mi langsung lanbulu, ga ngan ta do a bulu mu ne naga.

¹⁵ Ketla do nia aga ekip tangarang mi levenmumuat, diga lok momo. Diga tu xangkan ia, la diga paase aksaksa ria. Limixin kadiiong bok digak lox asongor ia, amisik digap sev ia. ¹⁶ Diga lok ngan limixin di lok sese laradi luxangkedek teren i molo, la diga reven angtungun bok tia mi lebelangatngas.

¹⁷ Leeme Silok. Kereva ura reven kepe amisik di? Una lox asepsu ia basinge leveloklox asongot atdi. Lox asepsu ia basinge na lubunglaion! ¹⁸ Do kuren, nia anaba tong loklox avukat tu ro melamgo at lovtopot buru at limixin taram. Nia anaba emi asu minu ro melamgo atnedi axap.

¹⁹ Mo limixin di munepen minia, nedi limixin kaxarang. Nemen gat uta ke avolo di, dina lok momo aksaksa ria mumu lumumuat tarak. Nemen gat uta ke avolo nedi dina lok sese ia. La nemen gat uta ke avolo nedi di belangatngas parang gamasa ria la dina momo mu lanbulu rak.

²⁰ Kopmen dina paase atnaasan, dim doma xaka levelinga xaxarang kusu dina bala raba limixin loklok mulus min. ²¹ Dik sok taba ia mi levelinga, la dip kup keretna, “Maga ven u, uga lok nom levempanga xapmek!” ²² Ketla

nenu, Leeme Silok, ugara ven pam i do nenia ap sepsen. O Leeme Silok, nemen bok ba uta vamngus. Nemen uta nemen paxalom! ²³ O Leeme Silok, una xatu la una paase tooro ia. O Moroa rak, una xatu kaxat upana la una ru ria at na levelinga. ²⁴ O Leeme Silok, loklok taram in manton tino. Kuren la una tong atkatla li i ria do nia ap sepse. Nemen uta ke avolo limixin munepen minia dina lok momo aksaksa ria mumu mo lumumuat tarak. ²⁵ Nemen gat uta ke avolo di, dina lok keretna, “I lox avukat tinotno, dik tara lok pes pam i la ta lox epovo ba lavavara atnedik kuren.”

²⁶ Nedi nom di lok momo at levenmumuat i vot saparav ia, una lox ekarakat levelinga atdi la una lox amangan di. Nedi nom di lok do dik mokso polo ia, una lox abaava di la una lox amangan di. ²⁷ Naba lox avukat do nedi nom di vara i do ana sepse, dinap kup momo atla nenia a sepmus pam. La dina tong amu amgo ba i do, “Leeme Silok i silok aleng. Neni ik lok momo mi lasaxaruki ren na nemen avukat.” ²⁸ La kerepmo nia anaba tong asu loklok manmanton taram, la anaba emi asu minu at levenaleng axap.

36

Laxapmek At Laradi

¹ Laxakapmek ik lox atdan laradi xapmek keneng at lebelen. Ik sok sisixe ne Moroa, la kopmen naklen loklok tik lox asuusu loklok ngangao ri ne Moroa. ² Im doma asilox axa i, kuren la i doma i do ne Moroa ixo epovo na ven lenget ka libilinga ren la noxo vaase asi rino i. ³ Lavapaase ren i lok kapmek la i umsu mi laxaxarang. Ik sok tixirixes kepe lodoxoma avukat la leveloklok i nunuan. ⁴ Im doma agagas li levempanga xakapmek do ik midi ro at loora ren.

Kopmen nak lok tevempanga avukat, la kopmen tinotno nak sok sisixe lempanga xapmek.

Luvukat At Ne Moroa

⁵ O Leeme Silok, labalamu lexen taram i silok aleng tinotno la i urut se rovana at laxalibet. La uk lox epovo amisik leveng kakaape ram nade xopok la i se tu at lamavangkap. ⁶ Loklok manmanton taram i tu tuxuruxun ngan lempatkaana. Lempapaase ramtaba ina ram i lolos aleng ngan laras i ekapus. Limixin axap mi levempanga mi lavanuet kangkedek di nemen maxopok at loklok tatao ram.

⁷ O Moroa, labalamu lexen taram i lox avukat tinotno! Ma ven kaka loxokok taram tinema maxopok at luvapa ram. ⁸ Ma anan mais avukat mi laxaluxa solo um taba nema min, la u ke nema ma ruuna ka lorooro nunuan i sesen su ram ngan ladan sen. ⁹ Nenu lavasuun at lorooro at lempanga axap, la mumu mun lodoxoma xasep taram, nema ma ruuna ka laxakasep.

¹⁰ Labalamu ram na tu epasum tinedi dikleklen u. La una lok luvukat tinedi di ruuna loklok in manton tino. ¹¹ Nemen uta ke avolo limixin loklox aaso dina esep minia, kopla limixin kapmek dina lox amaran ia la ana sixiro.

¹² Nema ma ven ba no loxot limixin kakapmek di saksubu e. Mo dik midi, la ixo epovo do dina xatu kaxat.

37

Laxavaxap At Limixin Avukat La Limixin Kapmek

¹ Nemen gat mita doma mu solo loklok at limixin kapmek, la nemen mita ngaongao ri loklok atnedi di lok libilinga. ² La ma lixilik mun dinaba sonao axap ngan levempivilis i mamang, dinabap sopsong ngan larauna.

³ Ketla nemi mina nunu saga at Leeme Silok la mina lok luvukat mun, kusu minaba nemen at lenep kangka aulis

atnimi la minaba rooro avukat. ⁴ Mina puse ri lomomo rinimi keneng at Leeme Silok, kusu ni naba raba nimi mi levempanga no lebelen nimi i tu solo i.

⁵ Mina ke raba Leeme Silok mi lorooro ram. Mina nunu saga ren la ni naba lok tooro nimi, ⁶ la ni naba lox asaxaven loklok sepse atnimi ri limixin la naba xasep ngan labaranan. La loklok manmanton atnimi naba tu asaxaven ngan laxangking tubu.

⁷ Mina mulus mun, la mina nemen tangais Leeme Silok na lok tooro nimi. Nemen mita doma mu solo nedid ngasang kobot, kopla nedid ngasang leventaangas kakapmek atnedid diga vit li i.

⁸ Nemen gat mita musak, la mina ke xepe lebelemamao atla i sasat ka limixin ukeneng at laxakapmek. ⁹ Neded ngasang at Leeme Silok, dinaba ruuna ka lenep kangka aulis atdi, ketla Leeme Silok naba sak su limixin bilinga.

¹⁰ Soso mun limixin bilinga dinaba xav asonao. Minaba reven tidi, ketla mi noxo vuse ka di. ¹¹ Ketla nedid ngasang aulis atdi, dinaba ruuna ka lenep kangka aulis atdi, la dinaba ngasang kobot la dinaba momo rino mi limila.

¹² Limixin kapmek di sevut li levelinga ti sev asi limixin avukat la dik milix angtungun tino rinedid. ¹³ Ketla Leeme Silok ing longon arup limixin kapmek, atla ni iklen i do ni naba sele utut kepe di.

¹⁴ Limixin kakapmek di gagas li levenise esep atnedid mi levesoso, ti sev asi limixin banbalo eburu mi limixin dik pakes, ti sev amet nedid ngasang ketla ketla in manton. ¹⁵ Ketla nedid ngasang esep atnedid xa, la levesoso atnedid naba repirivit.

¹⁶ I lox avukat do laradi nunuan i ruuna lempanga xakalik mene. Ketla i lok kapmek do laradi i ruuna lapnovos silok la ik lok keneng at laxakapmek. ¹⁷ Atla

Leeme Silok naba lok kepe lolos at limixin kapmek, la ni naba lok see atnedi loklok atdi i lox avukat.

¹⁸ Leeme Silok ik lok tatao nedi ding tonga res teren la at levenaleng axap i tu melamgo dinaba ruuna lenep kangka aulis atdi. ¹⁹ Di noxo suma losongsongot at levenaleng kapmek. Dinaba ruuna epovo leveluxa at levenaleng at loroxo. ²⁰ Ketla limixin kapmek dinaba seeve, limixin munepen mi Leeme Silok dinaba xap ngan levempusuvus to laxairing, dinaba sonao ngan lusuxa.

²¹ Laradi xapmek i ngising panga ketla kopmen na porang amlong i. Ketla laradi avukat ik lok momo rim taba mi leventamtaba ren. ²² Nedi nom Leeme Silok ik lox anarong di, dinaba ruuna ka lenep kangka aulis atdi. Ketla nedi nom Leeme Silok ira lok li vam lasaxaek mavana atdi, ni naba saksu di basinge mo lenep kangka.

²³ Leeme Silok im gomgonga laradi at langas i lox avukat kusu ni nat pas teren. La ik lok see atnedi dik lox amomo i. ²⁴ Dola dina subu, di noxok midi ro xopok, atla Leeme Silok naba rebeng axatu di upana.

²⁵ Nia lasioxo nga na, nia gara rooro aba vam, ketla nia agoxovisi na ven taradi avukat Leeme Silok gita raba rulu i, koplaxamdak mi laxaalik teren gita ngising panga anan. ²⁶ At levenaleng axap laradi avukat im taba gamasa la i sisiam taba limixin mi levempanga ren. Laxamdak mi laxaalik teren di lok ngan leveloklox anarong ti limixin axap.

²⁷ Mina repukus basinge laxapmek la minak lok lununuan. La kerepmo livipisik li atnemi dinaba nemen amisik at lenep kangka aulis atdi. ²⁸ Atla Leeme Silok, i vavara ri loklok i lox avukat, la kopmen ni na raba rulu luvuttadi di nemen tuturun teren. At levenaleng axap ik lok see atdi. Ketla livipisik li at limixin kakapmek ni naba saksu di basinge mo lenep kangka aulis atdi. ²⁹ Limixin

manmanton dinaba ruuna xaka lenep kangka aulis atdi la dinaba nemen teren at levenaleng axap i tu melamgo.

³⁰ Levelinga at laradi avukat i ngan levelinga at laradi dokdoxoma, la amisik levelinga ren ik mokso. ³¹ Laulis Linga at ne Moroa i nemen keneng at lebelen la i mumu asu amisix i, la kopmen na on basinge i.

³² Laradi xapmek i kuxut tangais ti laradi avukat kusu na sev amer i. ³³ Ketla Leeme Silok noxo raba rulu taradi manmanton ti limixin munepen min kusu ni na subu tup at levengkikngen di, kopla ni noxo ke avolo i xusu ni na subu at loxonaleng at lavapaase. ³⁴ Mina doma lolos ngangais ti Leeme Silok la minang tonga res at levempapaase ali ren. Dola mina lox i xuren, ni naba raba asinorong nimi mi laramtaba, neni lenep kangka aulis atnimi. La minaba ven limixin kakapmek, Leeme Silok naba saksu di basinge lenep kangka aulis atdi.

³⁵ Nia agaklen laradi xapmek, ni laradi vapavas. Ni ga ru polo limixin axap ngan ta luuna Seda (Cedar) boro Lebanon i ru polo larauna axap. ³⁶ Ketla melemu nia aga volo go, la kopmen ta i go, nia aga reven tin, ketla agoxo vuse xaka i.

³⁷ Mina ven mu asu loklok at laradi nunuan eburu mi laradi manmanton. Laradi lorooro ren i umsu mi limila naba ruuna luvuttubuno avolo, ³⁸ ketla limixin kapmek dinaba ekip tangarang mi leeteke. La Leeme Silok naba xobo pes axap livipisik li atdi.

³⁹ Leeme Silok ik lox asepsu limixin manmanton, la ik lok see atdi at levenaleng kapmek. ⁴⁰ Ik lok tooro di la ik lox asepsu di basinge limixin kakapmek, atla di vot pasa i xusu ni nak lok see atdi.

38

Lising At Laradi I Suma Losongsongot

¹ O Leeme Silok, nemen uta lox asongor ia mi lebelema-
mao ram! ² Ura so abi vam ia mi levesoso ram, la ura sev
asubu vam ia ukopok.

³ Nia a xip tutu mi langsung losongsongot mumu
lebelemamao ram tia. La labantuxu axap tarak iram suma
lanmeres mumu libilinga rak. ⁴ Laxakapmek tarak i umsu
ngan ladan kam la i epovo ana xong keneng teren. I lok
ngan lanknixip silok i mumuat aleng tia rip kiv i.

⁵ Nia lavanga rangtangu mun mumu laxakapmek
tarak la kerepmo nia a meres la levenabi rak i so mau,
la ip sopso. ⁶ Lantuk iran baloolo, la laxakapmek tarak ik
sak palaga rino ia, arang teng tuntun at levenaleng axap.
⁷ Lanmeres to xeneng at labantuxu rak i lok ngan laxao la
i auret kusu ana met. ⁸ Labantuxu rak ira molos axap, i lok
ngan ta lavatpanga mumuat mo ik sak palaga ia. Labalak
i lok kapmek tino, la at mes mi labaava at losongsongot.

⁹ O Leeme Silok, uklen lavanga sala nia a vara aleng tin,
nenu uklen losongsongot tarak. U ronga ia at mes silok.
¹⁰ Leveve rak itlos etitit, lolos tarak ira xap pam, luxatli rak
kopmen bok ba na reven avukat. ¹¹ Larapentangas tarak
mi leventaba aurer ia di noxot pas saparav ia, atla a ruuna
laxanabi solo, la leventaba bok tarak di noxo nemen eburu
minia. ¹² Mo limixin di vara na sev amer ia di lili larapelixo
ria, la nedi di vara na lox asongor ia, di lok do dina lok
kakapmek axav ia. Dixo vaxap ti vengit ia, kusu dina lok
kapmex ia.

¹³ Nia a lok ngan laradi baulang, kopmen nang tonga, la
kopmen na paase. ¹⁴ Nia xopmen ana paase porang, atla a
lok ngan laradi lubaalung teren i rebonot. ¹⁵ Ketla a nunu
saga ram, Leeme Silok. La nenu Leeme Silok, unaba vaase
porang ia. ¹⁶ Nemen uta ke avolo limixin munepen minia
dina lok momo aksaksa ria mumu lusumsubu rak la dina

lok momo mumu lumumuat tarak. ¹⁷ Nia na ana subu nga, la a suma amisik langsung losongsongot silok.

¹⁸ Nia a tong asu laxakapmek tarak, atla mo laxakapmek ik lox abulu amisix ia. ¹⁹ Limixin di munepen minia di ruuna lorooro avukat mi lolos. Buaang nedi di belengatngas parang gamasa mun tia. ²⁰ Nedi di sepo lununuan mi laxakapmek. Kopmen dina etaba belen minia atla nia a mumu asu langas mokmokso.

²¹ O Leeme Silok, nemen uta raba rulu ia. Moroa rak, nemen uta nemen paxalom basinge ia! ²² O Leeme Silok, nu Laradi Loklox Asepsu rak! Soso mun! Una lox tooro ia.

39

Lelengeleng At Laradi I Suma Losongsongot

¹ Nia ara tong pam i, “Nia anaba lok tatao avukat langsung mi levempanga anaba lox i, kusu noxo sar asoogong ia. Nia anoxo tong tepanga xerepmo mo do luvuttadi xapmek dik lok auret.” ² Nia agak lox atnaasan, la agoxo tong toxolinga. I raturun tinotno, nia agoxo tong tepanga mumu levempanga nunuan! Ketla lumumuat tarak ga sisilox amisik, ³ la lodoxoma saasaa ga suxuna lorooro axap tarak. Nia agam doma solo i, la kerepmo labalak gan tun aleng. La nia agoxo epovo na lok pilo mun. La aga ruka i xusu ana sing keretna, ⁴ “Leeme Silok, lavanisa levenmaares nia ana rooro amisik teren? Ningisa ba ia anaba met? Una tong i ria, do ningisa lorooro rak naba xap.”

⁵ Nu uga lok lorooro rak kopmen na baalom solo! At levereven taram levenaleng ti lorooro rak ni i lok ngan lavanga gamasa. I raturun tinotno do, limixin axap di rooro, di lok ngan mene legesa mamas silok, ⁶ di lok ngan mun lamamau. Levempanga axap, limixin dik lox

i, naba ravasu gamasa mun. Dipnovos li lempanga, ketla di xoklen i do nege naba ruuna ka i.

⁷ Lavanga sala bok ba i mo xusu nia anam doma ngangais tin, Leeme Silok? Nia a nunu saga ram. ⁸ Una lox asepsu ia basinge laxaloklok kakapmek axap tarak, la nemen gat nu uta ke xepe limixin baulang dina vaase aksaksa ria. ⁹ Nia anaba lok pilo la anoxo tong toxolinga, atla nenu mun uga raba ia mi na levesongsongot. ¹⁰ Nemen bok ba uta sev aleeng solo ia! La ma lixilik kusu ana met at leven akpiksa mun taram. ¹¹ Uk lox asongot laradi mumu laxakapmek teren mi lavapaase kuxurung taram, la u lox asonao axap levempanga neni ing kongkat min ngan levempide ip sep larauna. Laradi i lok ngan mene legesa mamas ip tava su at lungusno!

¹² Leeme Silok, una ronga lising tarak. Una ronga ri lanteng tarak. Una lok tooro ia do nia anang teng tuntun. Nia a lok ngan lavalabat tarak diga nemen ngan lavaose ram nade xopok at na lavatbung menemen atla di goxo rooro abao. ¹³ Una ke xepe mulus ia kusu anaba momo avot ti loonon tarak la di noxo ven tu bok ba rak.

40

Loxompixan Emi Asu

¹ Nia aga ngangais atnaasan ti loklok tooro at Leeme Silok tia. La ni ga ronga bok lanteng tarak la ga ronga res tarak. ² Ni ga sar asu ka ia at lemeroon kapmek, la ga sar asu xaka box ia at lububura. Ni ga vaxaru li avukar ia ro vana at luuat kis silok kusu anat pas avukat la anoxo marat at tempanga. ³ Ga lox ase ia rik pixan loxompixan maxat, loxompixan emi asu ri ne Moroa atnedik. Buaang nedi limixin dinaba ven kibis lolos teren, dina sangu aleng la dina ii doxoma la dinaba nunu saga at Leeme Silok.

⁴ Lomomo rinedi di nunu saga at Leeme Silok, la rinedi bok kopmen dina repukus mu laxampoovo moroa, koplā dina nemen eburu minedi di lotu saporap laxanmoroa xaxarang. ⁵ O Leeme Silok, nenu ne Moroa atnema. Buaang laxampanga avukat ugara lok pam i rinema. Kopmen tara i nunuan polo u! Ugara lox asuusu vam buaang lempanga sangsangu nunuan tinema. Ixo epovo xusu nia ana tong ampana leexes atdi atla mo levempanga i umsu aleng!

⁶ Nenu uxo vavara solo ri levelaplavang mi leven-tamtaba, nenu uxo ngising ti levempanga mi lavanuet kangkedek kusu mana kotos asonao i ro vana at loxonin laplavang, koplā ri levelaplavang ti ves kepe laxakapmek. Ketla uga raba ia mi lubaalung ting tonga res taram. ⁷ Kuren la nia aga lok tu xeretna, “Nenia nga na, levelinga mumu ia i nemen keneng at Laulis Linga.” ⁸ Moroa rak, a vavara mene i xusu ana gugu mu asu mun lavavara ram! Levempanga axap uga lox ase ia min, i nemen keneng at labalak.

⁹ O Leeme Silok, to melango at lovtopot buru at limixin axap taram, nia aga vaase asu lagale lavavang dola uk lox asepsu nema limixin taram. Nu uklen i do nia anoxo vamngus ti tong asu i. ¹⁰ Agoxo vam luxun kaka lagale lavavang ti loklok tooro ria xusuk. Nia a tong asu amisik pam i do uk lok tooro limixin la uk lox asoorun levelinga ram tidi. Kopmen agoxo vamngus ti tong asu lixitkis esogo mi labalamu lexen taram to melango at lovtopot buru at limixin taram. ¹¹ Leeme Silok, nia aklen i do lebelen tuntun taram tia noxo xap. Labalamu mi loklok tatao tuturun taram naba kok avukat amisix ia.

Lisingising Ti Loklok Tooro

¹² Laxanmumuat solo i tu xangkan ia la nia xo epovo xusu ana exes ampana di! Laxaloklok kakapmek tarak

i sak pavaa rino ia, la axo epovo nga ri milik kadas. Di volo aleng ti leexes at levengkabinim at lavatlak tarak, la labalak i doma abulubun. ¹³ Leeme Silok, una lox asepsu ia! Lok tooro nga ia na! ¹⁴ Nedi nom di lok do dina sev amer ia, nia a vara i do una sak tup midi, la una lox ekarakterat tinotno di. Nedi nom di momo atla laxanmumuat i sak pavaa ia. A vara i do una xala xepe di la una lox amangan di. ¹⁵ Nedi nom di lok kalise ia, una lox amangan tino di mumu loklok di lox i ria.

¹⁶ Nia a vara i do nedi di repukus taba u, dina momo la dina sosoro. La nedi nom di tong loklox avukat ti loklok tooro amisik, dina tong i do, “Leeme Silok i nunuan aleng pologat.”

¹⁷ O Leeme Silok, labantuxu rak ira xat molos axap la arat kis banbalo nga, ketla kopmen una doxomampe ia. Nenu Laradi Loklox Asepsu rak, la nenu ne Moroa rak. Una lok tooro soso mun ia!

41

Lisingising At Laradi Anmeres

¹ Nedi di doma mu solo limixin banbalo, dina momo. Leeme Silok naba lok tooro di mo do dina ekip tangarang mi levenmumuat. ² Leeme Silok naba lok see atdi la naba xok avukat lorooro atnedi. La ni naba sinang di mi lorooro avukat at lenep kangka me Israel. La ni noxo raba rulu di kusu limixin munepen minedi dina lok kapmek di. ³ Dola dina meres, Leeme Silok naba lok tooro di. La ni naba lok kepe levenanmeres basinge di, la na lox alolos manga nedi.

⁴ Nia aga tong i do, “Nia ara lok pam libilinga ru, Leeme Silok ne Moroa. Una lox asuusu lebelen tuntun tia la una lox asepsu ia.” ⁵ Limixin munepen minia di vaase kuxurung mumu ia. Di vara i do nia ana met kusu limixin axap dinaba domampe ia. ⁶ Nedi dit pot pasa ia, di sosolo

asu linga rak. La ding senge ka levelinga xapmek mumu ia la dira tere mumu ia at levengkot axap. ⁷ Nedi di belengatngas tia, di epaase nemnem mu ia, di nunua i do levempanga xakapmek mo na lok kapmek tino nga ia. ⁸ Di lok do, “Lanmeres lolos mo ira sogo xaka vam i la ixo epovo do naba roo xat basinge loora mekmeres teren.” ⁹ Lentangas tino bok tarak, aga nunu saga ren. Neni mo lara ga anan eburu minia, la neni bok ira raba rulu ia.

¹⁰ Leeme Silok, una lox asuusu lebelen tuntun tia, kusu ana ruuna ka amlong lorooro nunuan, la ana sepo amlong loklok atnedi di munepen minia. ¹¹ Di noxo epovo ri sak tup minia, la kerepmo nia anabaklen i do uk lok momo minia. ¹² Unaba lok tooro ia, atla nia ak lox amisik levempanga ik mokso. Unabat kis esogo eburu minia at levenaleng axap i tu melamgo.

¹³ Leemi asu ri Leeme Silok, ne Moroa me Israel! Leemi asu rin na, la kopmen tekavaxap teren! Tuturun. Tuturun.

42

Lisingising At Laradi Moroa Ga Riki Xepe I Uto At Lenep Petpes

¹ Nia ang kongkat mu u, O Moroa, kerekngan lavanga mi lavanuet kangkedek (deer) i minu aleng la ik sixit pupuse dan mumudut ti inin. ² Nu ne Moroa Luntoo Avolo, labalak i ngaongao amisik tu. Ningisa ba, uba siam ka ia xusu anat pas uto at loogu ram la ana lotu saparav u ro melamgo ram? ³ Levenaleng kangking la kanimin nia ang teng, la kopmen ana anan. Amisik limixin munepen minia di susue ia do, “Ne Moroa ram ua?”

⁴ Lainbulu i suxuna ia at loxonaleng am doma su at levenaleng migomgo. At nom levenaleng nia aga emu mi limixin solo uto at loogu at ne Moroa. La nia agam gomgonga di at nom lavatpas. Buaang limixin digat pas

mi lomomo, livikpixan mi luxupkup mi leemi asu saparap ne Moroa.

⁵ Tila nia ak bulu amisik? Tila nia am doma saasaa? Nia anam doma ngangais ti ne Moroa, kusu anaba emi asu amu bok min, ni Laradi Loklox Asepsu la ne Moroa rak. ⁶⁻⁷ Lanbulu i suxuna ia nade at loxokoxo xeneng at lemenemen xadiong. Kuren la lodoxoma rak i repukus tin. Im taba ia mi lanbulu silok ngan leretepit paxanao i tepit pavaa ia. Lentaba ik sak pavaa ia ngan ladanut, la ngan ladan i tem soobang su ro at ladan Joridan mo i sesen boro vana at lukaana Emon la Misar. ⁸ Leeme Silok na lox asuusu labalamu lexen teren at laaleng kangking, kusu nia anabak pixan at laxanimin, ni lisingising tarak ti ne Moroa mo im gomgonga lorooro rak. ⁹ Ti ne Moroa, Lentupe ria, nia a vaase xeretna, “Tila u domampe ia? Tila nia anap kip tutu amisik mi losongsongot at na laxanmumuat at longlong kuxurung at limixin di munepen minia?” ¹⁰ Labantuxu rak ira meleexot axap at loklok kalise atnedi di susue ulu amisix ia dola, “Moroa nga ua ram?”

¹¹ Tila nia ak bulu amisik? Tila nia am doma saasaa? Nia anam doma ngangais ti ne Moroa, kusu anaba emi asu amu bok min, ni Laradi Loklox Asepsu rak la ne Moroa rak.

43

Lisingising At Laradi I Nemen At Lememen Kadiong

¹ O Moroa, una tong atkatla li i ria do nia ap sepse, la una ru at lenep tarak tinedi limixin dixo nunu ram. Una lox asepsu ia basinge limixin kaxarang la limixin kapmek.

² Nenu Lurutu See Pe rak, tila u on taba rulu ia? Tila nia a ekip tangarang amisik mi laxaloklox asongot limixin munepen minia dik lok kuxurung ia min?

³ Una lox asuusu laxasep taram eburu mi levelinga ruturun tia. Dunam gomgonga ia la duna lam ka amlong ia uto Saion, lakaana xaala ram, la uto bok at loogu laplavang

taram nenu u nemen teren. ⁴ Melemu nia anabat pas uto at loxonin laplavang taram, O Moroa. Nenu mun lavasuun at lomomo rak. Nia anabak pixan eburu mi loxontaaleng ti emi asu minu. O Moroa, nenu ne Moroa rak.

⁵ Tila nia ak bulu amisik? Tila nia amdoma saasaa? Nia anam doma ngangais ti ne Moroa, kusu anaba emi asu amu bok min. Ni Laradi Loklox Asepsu rak la ne Moroa rak.

44

Lisingising Ti Ne Moroa Nak Lok See At Limixin Teren

¹ O Moroa, nema maga ronga rinotno mo lempanga matmatkun. Lavalabat atnama diga ga ven i nom levempanga sangsangu ugak lox i at levenaleng atdi gano migomgo. ² Maga ronga i do nenu xa uga saksu mi lavamolon, la uga vaxaxis limixin taram at lenep kangka atnedi. Uga lox asongot bok limixin at levenabung mixin petpes la uga lox anarong lubang mixin taram la diga ngasang kobot. ³ Lubung mixin taram di goxo ruuna xaka nom lenep kangka at teesep. Kopmen di goxo ruuna xaka box i mi lolos atnedi. Diga ruuna ka i mi lolos mun taram, la digaklen i do uga nemen eburu minedi. Nom i ga lox asuusu i do uga balamu di.

⁴ Nenu Loorong Silok tarak la ne Moroa rak, uk lok tooro limixin taram la dik sak tup mi limixin munepen midi.

⁵ La mi lolos mun taram, nema ma sak tup mi limixin munepen minema. Keneng at laasen taram ma sev asi di.

⁶ Nia xopmen ana nunu at lososo, kopla at lavarise esep tarak ba lok tooro ia xusu na lox asepsu ia. ⁷ Ketla nenu, ne Moroa, uga lox asepsu nema basinge limixin munepen minema, la uga sak tup minedi diga belangatngas tinema.

⁸ Nema manaba emi asu amisik minu la manaba tong loklox avukat amisik tu la kopmen tekavaxap teren.

⁹ Ketla nanga ura sok sisixe nema, kuren la limixin munepen minema diga sak tup minema. Kopmen bok ba una emu buru mi limixin esep atnema. ¹⁰ Uga lok nema la maga sixiro at limixin munepen minema, la diga lok kaka levempanga atnema. ¹¹ Uga siam taba di minema xusu dina sev amet nema ngan lubang sipsip, la uga lox epeseves nema uto ri levenabung mixin petpes. ¹² I lok ngan ta do uga sesep mi limixin taram ti luunun lixilik mene. Maga lok ngan lempanga gamasa mun.

¹³ Levenabung mixin petpes dik lok saparap nama, diga ven lavanga uga lox i rinema, di paase kalise la ding longon atnema. ¹⁴ Uga ke aie xepe nema la limixin boro at lengkot petpes ding longon arup nema, di piriapat patlak la ding longon sese nema at levempanga it pot saparap nama. ¹⁵ Lainmangan i umsu at lorooro rak mumu mo levelinga atnedi ¹⁶ dit kis munepen minia la atnedi bok di belangatngas tia. Di tong asu lavapaase aksaksa la levelinga kapmek mumu nama.

¹⁷ Na lempanga axap ga vot saparap nama ketla ma goxo domampe u koplama gita los polo lekabus taram uga lox i rinema. ¹⁸ Ma goxo raba sinta u, la kopmen ma goxo rongaxepe bok at levempapaase ali ram. ¹⁹ Ketla uga ke aie xepe nema kantubu at na limixin di lok ngan laxampanga sio. Uga raba rulu nema keneng at lamain bonot.

²⁰ Mo dola nema gita xap ti lotu saparav u, ne Moroa atnema, la do nema gita sing saparap lomoroa vetpes, ²¹ nenu gitabaklen i, atla nenu uklekle levendoxoma nemnem atnema. ²² Nema limixin taram, kuren la amisik dip sev amet nema. Amisik dip sev amet etaba nema ngan ta lubang sipsip, mo kopmen tara ri tupe di.

²³ Leeme Silok, una aus! Una beleku kaxat! Una xatu upana! Nemen uta raba rulu rino axap ta nema! ²⁴ Tila u lipe avolo nema? Nemen uta domampe levesongsongot mi levenmumuat atnema.

²⁵ Diga vas amdamda nama, la maga subu midi xopok at laxangka. Mak midi ngan ta luvuttadi met! ²⁶ Ude, una lok tooro nema! U ruuna labalamu lexen tinama, kuren la una lox asepsu nema!

45

Loklok Epot At Loorong At Leme Israel

¹ Levelinga nunuan i umsu at lodoxoma rak, la nia ara rivit na loxompixan ti loorong at leme Israel. Nenia a gagas ti tong asu i ngan laradi akleken ti malagan avukat mo i gagas lavanga mamalagan teren.

² Loorong, nenu lampeneves, kopmen tara na lok ngan u. Levelinga ram ik sixit nunuan amisik. Moroa ik lox anarong amisix u. ³ Loorong lolos, una lox agagas lavarise esep taram. Lisisinang taram i umsu la laasen bok taram i silok aleng.

⁴ Nenu loorong mi laasen silok, ut kis pana at la os ti esep. La uk sak tup mi limixin munepen minu ti lox alolos loklok manmanton la levelinga ruturun. ⁵ Levesoso ram i kasum, di soso beles at larapeve at limixin munepen minu. Limixin at levenabung mixin petpes di subu mi loklok ngangao ro saparap luxangkedek taram. ⁶ Mo lixitkis amgomgo ne Moroa ga raba u min, naba nemen amisik la kopmen noxo xap. Nu um gomgonga limixin taram mi levelinga manmanton. ⁷ Uk lok momo mun mi leveloklok in manton la u belangatngas ti leveloklok ik lok kapmek. Ni lavasuun teren la ne Moroa, ni ne Moroa ram, ga soxolik ka u ngan loorong la ga raba u mi langangan lomomo i volo lomomo atnedi lentaba

lavaorong. ⁸ Levempanga singsiga ram i so mavak ngan la mea (myrrh) la alos (aloes). Limixin diga sinang laraogu at loorong mi levempanga nunuan (ivory), la di lox amomo u go mi leveng kompixan nunuan. ⁹ Kantubu at lavakin di ruuna levenasen silok, laxaalik at lavaorong mo di tu. La at lenep tino at loxonin orong taram, loorong tixin mo i tu, diga sinang i mi levempanga diga lox i mi logol i nunuan aleng.

¹⁰ Nenu loono ri loorong, una ronga na levelinga ana tong i ru. La uguta doma solo limixin taram mi libibinat taram. ¹¹ Loorong naba veneves at levereven nunuan taram. Neni laradi silok taram, la una mumu asu levelinga ren. ¹² Limixin boro Taia dinaba raba u mi leventamtaba. Limixin nopnovos bok dinaba lok tong i xusu dina sat lodoxoma ram, kusu una lok tooro di.

¹³ Loono ri loorong no i nemen keneng at loogu at loorong, neni loono maraanu rino! Ni i sigaara mi lisingsiga diga sokgatga i mi leteret gol. ¹⁴ Ni i sigaara mi lisingsiga gigiliton teren, la di lam kaka i uto at loorong. Ni i emu eburu mi lavakin pentangas teren, la di lam kaka bok di uto at loorong. ¹⁵ Di vubeles at loogu at loorong mi lomomo la lososoro.

¹⁶ Nenu loorong tarak, unaba ruuna laxanmadak temes solo, dinaba tu kun u eburu mi lavalabat taram ngan lavaorong. La unaba lok katling di kusu dina gomgonga mavana at limixin axap at na lavatbung menemen. ¹⁷ Na loxompixan tarak naba tong asu laasen silok taram kusu nedi lavaola melemu dinaba tere avolo laasen taram, la limixin axap dinaba emi asu amisik minu la kopmen tekavaxap teren.

46

Moroa Ik Lok Eburu Minedik

¹ Moroa ni Loxot Loklox Alipe atnedik la lolos atnedik. I gagas amisik tik lok tooro dik at levenaleng nedik ta ekip tangarang mi levenmumuat. ² Kuren la dik ta noxo marat, keke i do lavatkangka axap nangne, la lempattaavut na subu tup utou xopok at lebelen laras. ³ Keke i do laras na luulung aleng mi leretepit la lempattaavut nangne mumu leretepit at lara paxanao.

⁴ Lara ladan mo i nemen, im taba lomomo ri limixin at lemenemen silok at ne Moroa, ti loogu xaala at Leeme Avolo. ⁵ Moroa mo i nemen ap mo lemenemen silok la kopmen tempanga noxo sele utut kepe i. Atla ni naba rupot ti lok tooro mo limixin at larangubo, maxantamak suubu. ⁶ Limixin boro at levenabung mixin petpes dinaba rakdu mi lanmarat, levengkot silok nabangne. Moroa naba vaase butbutki, la lavatbung menemen naba sonao.

⁷ Leeme Silok, ni Lanaraavuk la i nemen eburu midik. Moroa at ne Jakop ni Loxot Loklox Alipe atnedik. ⁸ Nemi limixin axap. Ude nimi la mina ven leveloklok Leeme Silok irak lok pam i. Mina ven levempanga sangsangu ira lok pam i nade xopok at lavatbung menemen. ⁹ I lox axap levenesep to at levengkot axap at lavatbung menemen. Im bapit levenbanara eburu mi levesoso, la i xotos asonao axap larapenban at laxao. ¹⁰ Moroa i lok keretna, “Lumulum! Na xap ta leesep, la mina xasep do nia ne Moroa. Nia Loorong Avolo mavana at larabung mixin axap, nia Loorong Avolo mavana at lavatbung menemen axap.”

¹¹ Leeme Silok ni Lanaraavuk la i nemen eburu midik. Moroa at ne Jakop ni loogu matmatkun atdik.

47

Lamgomgo Pana At Lempanga Axap

¹ Nemi limixin axap at na lavatbung menemen, mina pasa tingen mi lomomo! Mina emi asu mi ne Moroa mi livikpitan lolos! ² Leeme Silok, ni Leeme Avolo. Dik atana lok ngangao aleng teren. Neni Loorong Silok, im gomgonga na lavatbung menemen axap. ³ Ni ga raba dik mi lolos ti sak tup mi limixin munepen minedik. Ga lox asilok nedik kusu atam gomgonga levenabung mixin petpes. ⁴ Neni ga lok katling ka na lenep kangka atnedik livipisik li at ne Jakop ua tana nemen teren. Ni i balamu limixin teren mo di lok momo mi lenep kangka atnedi. ⁵ Moroa i urut utoxun pana at loxonin orong teren. Limixin di ven i la dip kup silok aleng mi lomomo la lerengteng silok at laratu. ⁶ Mina vixan emi asu ri ne Moroa, mina vixan emi asu ri Loorong Silok atnedik! ⁷ Moroa ni Loorong Silok ti limixin axap at na lavatbung menemen. Mina emi asu min mi livikpitan!

⁸ Moroa it kis to at loxonin orong teren i melemelengan, la im gomgonga larabung mixin axap. ⁹ Luvuttadi amgomgo atdi di vot eburu mi limixin at lo Moroa at ne Abaram. Lolos teren i volo lolos atnedi axap limixin esep at na lavatbung menemen. Ni Loorong i silok aleng ti lavaorong axap.

48

Saion Lemenemen Silok At Ne Moroa

¹ Leeme Silok i silok aleng. Ni ne Moroa atdik la i lox avukat aleng do ata emi asu amisik min to xeneng at lemenemen silok la at loxongkaana kaala ren. ² Saion neni mo lakaana at ne Moroa, no xa it kis kasep pana la i maraanu aleng. Ni lemenemen silok at Loorong Silok, ik lox amomo limixin axap at na lavatbung menemen. ³ Moroa gara lox ase limixin do dinaba nemen avukat

mene ro xeneng at laraogu matmatkun at na lemenemen silok.

⁴ Lavaorong silok eburu mi limixin esep atdi diga vot buru la diga lok do dina esep polo limixin boro at lakaana Saion. ⁵ Ketla diga ven mo lakaana la diga sangu aleng, diga marat la diga sixiro. ⁶ Diga dede xapmek tino mi lanmarat, la diga lingun, ngan ta latkin i gagas kusu na visik. ⁷ Lodoxoma atdi gak sixit saasaa ngan lempatmon dik sixit ekarakat to at laras keneng at langangan lamanman.

⁸ Nema magara rongga vam levelinga at levempanga sangsangu ne Moroa gak lox i, la mara ven pam i ro at lemenemen silok at ne Moroa atnema. Ni Leeme Silok la Lanaraavuk, naba lok tatao amisik mo lemenemen silok at levenaleng axap i tu melamgo.

⁹ O Moroa, to xeneng at loogu laplavang taram ma doma asu at langangan labalamu lexen taram. ¹⁰ Limixin at levengkot axap di emi asu aleng minu, la limixin at levengkot axap at na lavatbung menemen dira rongga levelinga mumu u. Nenu um gomgonga limixin mi levelinga manmanton. ¹¹ Kuren la limixin axap di nemen to at lakaana Saion dina momo! Nu ung tonga linga mi lodoxoma mokmokso. Kuren la limixin axap boro at levengkot silok Juda dina momo.

¹² Nemi limixin at ne Moroa, mina vas kangkan lemenemen Saion, la mina exes laraogu likling i baalom upana. ¹³ Mina ven katling axap larangas uat la mina reven anga bok laraogu matmatkun, kusu minaba tong avolo i rinedi lavaola melemu. ¹⁴ Mina tong i ridi do na ne Moroa, neni ne Moroa atnedik at levenaleng axap i tu melamgo. Ni nabam gomgonga dik at levenaleng axap naba vot melemu.

49

Larangtangu At Lununu Saga At Lapnovos

¹ Nemi axap, mina rongka ka i na! Limixin at levengkot axap, mina rongka xaka i na. ² Nemi limixin amgomgo mi limixin gamasa, limixin apnovos eburu mi limixin banbalo, mina rongka xaka i na. ³ Lodoxoma rak naba xasep tinimi, la nia anaba vaase asu levelinga ri raba nimi mi lodoxoma avukat. ⁴ Nia anaba vaase asu levelinga voovo, la anaba soxomus bok lavasuun teren do anak pixan eburu mi loxontaaleng.

Lavapaase rak i lok keretna.

⁵ Nia xopmen anak marat ti ekip tangarang mi levenmumuat, at loxonaleng limixin munepen minia di ru kangkan ia. ⁶ Mo limixin kakapmek di nunua i do dinaba ruuna ka lorooro nunuan mumu laxampanga solo atdi la dim simi xaka di at leven apnovos atdi la dik lox aru ka bok di. ⁷ Ketla laradi ixo epovo ri ru korop ti lorooro axa ren, ixo epovo ri ru korop tin mi tuunun ti ne Moroa. ⁸ Atla luunun ti lorooro at laradi i silok aleng. Lavanga salai i vara na unun i min noxo epovo rinotno, ⁹ ri lox aase i basinge lamaaut, la ni naba roo avolo.

¹⁰ Limixin axap di reven i do luvuttadi akleklen bok di remet, ngan bok luvuttadi rangtangu mi luvuttadi baulang. Nedi axap dinaba met basinge levenapnovos atdi la levempipisik li atdi dinaba ruuna xaka i. ¹¹ Levenmaaut atdi naba lok ngan levenmenemen avolo atnedi. At levenaleng axap i tu melango dinaba nemen di e, keke i do diga ruuna lengkongkangka. ¹² Lixitkis silok at laradi noxo lox asepsu i basinge lanmet. Ni naba met bok ngan levempanga mi lavanuet kangkedek.

¹³ Limixin di nunu saga atnedi xa, diba ekip tangarang mi lavanga salai mo? Lanmet ni laxavaxap atnedi. Di

momo gamasa mene mi leven apnovos atdi. ¹⁴ Lanmet naba mumu asu di, la dinaba met ngan lubung sip-sip. Limixin manmanton dinabat kis silok polo di, atla nedi limixin kapmek dinaba nemen to at lemenemen at labarongan. La levenbaaxin tadi atnedi nabap sopso soso ro vaxalom basinge lara menemen aulis atnedi. ¹⁵ Ketla ne Moroa naba lox asepsu ia, ni naba lox asepsu ia basinge lolos at lanmet.

¹⁶ Nemen gat uta doxoma mu solo i do tara napnovos, la dola lapnovos teren na sisilok. ¹⁷ Neni noxo xip kaka mo lapnovos eburu min dola ni na met. Lapnovos teren noxo emu min ti lorooro melemu. ¹⁸ Keke i do tara i ruuna lomomo at na lorooro. La keke i do limixin di emi asu min dola ni laradi nopnovos. ¹⁹ Ni naba vot pasa lavalabat teren at lanmet, ap mo loxot lamain bonot kopmen noxo xap, ketla naba nemen amisik. ²⁰ Lixitkis silok at taradi noxo lox asepsu i basinge lanmet. Neni naba met bok ngan levempanga mi lavanuet kangkedek.

50

Laplavang Tuturun

¹ Lanaraavuk, neni Leeme Silok ne Moroa i paase. Ni i toro ri limixin axap at na lavatbung menemen i ruka i at loxot laxangking it losu e la i se ro at loxot laxangking it los tuv e. ² Lisisixam at ne Moroa i soosoo su boro Saion, lemenemen silok i nunuan axap la i milik maraanu rino. ³ Moroa atnedik nom boro naba vot, ketla ni noxo vot atnaasan. Laxao bokbolot nabam gomgo rin, eburu mi langsung lamanman bet nabak lok kangkan i. ⁴ Ni naba ro ka laxalibet mi lavatbung menemen kusu dunaba ru rin la duna reven i na ila mumu loklok at limixin teren. ⁵ Moroa i lok, "Muna lok bubua raba ia mi limixin tuturun tarak. Nedi nom diga lok lekabus eburu minia at loxonaleng digaplavang tia." ⁶ Laxalibet i tong asuusu i

do ne Moroa neni Laradi Manmanton, la neni xa laradi rongtonga linga.

⁷ Moroa i lok keretna, “Limixin tarak, mina rongia ia ana vaase. Nia anaba ruuna tevelinga rinemi, limixin tarak me Israel. Nia ne Moroa, la Moroa atnemi. ⁸ Nia anoxo vaase sok nimi mumu levelaplavang atnemi la leventamtaba bok mi kotos asonao amisix i ria. ⁹ Axok pakes bok ti mo leven bulumaxao temes boro at laraogu bulumaxao atnemi koplamo levenme boro at levenmenemen atnemi. ¹⁰ Atla levempanga axap di ruuna lavanuet kangkedek di nemen at laxairing, atarak axap, eburu mi laxan bulumaxao at lasangaun larabin sangsangaun kobot (1000) kaana. ¹¹ Lavapixa eburu mi levempanga axap di rooro ro xolonu, ni atarak kujuk.

¹² Dola nia gita roxo, nia gitoxo sing nimi ri toxompanga anan, atla lavatbung menemen mi levempanga axap keneng teren, ni atarak kujuk. ¹³ Nia xopmen ana anan levenuut bulumaxao temes koplamo inin levenda meme. ¹⁴ Loklok ti tong avukat, ni lagale laramtaba atnemi ria, ne Moroa. La mina raba nenia Lanaraavuk mi levempanga migara xaape vam i. ¹⁵ Naba lox avukat do mina ro ke rak mo do mina ekip tangarang mi levenmumuat, la anaba lox asepsu nemi, la minaba raba asinorong ia.”

¹⁶ Ketla ne Moroa i tong i ri limixin kakapmek keretna, “Kopmen tavaasuun teren la nemi mi utus empampana axap Laulis Linga rak. La kopmen tavaasuun teren la nemi mi vepaase mumu lekabus tarak, ¹⁷ atla mi ven abulubun kepe lavapaase sok tarak la mik sok sisixe bok leventaangas tarak. ¹⁸ Mi etangas mi luvuttadi xipkip pilo, la mi vemu eburu mi limixin longlongka.

¹⁹ Amisik mi vavara na paase xapmek, la soso mun mi tong asu levelinga xaxarang. ²⁰ Amisik mi gagas tik lok li luvutneton nimi at lavapapaase, la mira lele asu bok

atdi. ²¹ Miga lok na levempanga axap, ketla nia a goxo tong toxolinga, la miga doma i do nia a lok ngan nimi. Ketla nanga ana paase sok nimi la ana lox asuvos nemi at lavapaase.

²² Nemi mim taba sinta ia, mina ronga i na. Naba lok kapmek do nia ana vaxat lalais nemi, la kopmen bok ba tara go naba lox asepsu nemi. ²³ Loklok ti tong avukat, ni lagale laramtaba ip kip aurut laasen tarak, la nia anaba lox asepsu rinotno nedi di ronga res tarak.”

51

Lisingising Ti Doxoma Xepe Libilinga

¹ O Moroa, una lox asuusu lebelen tuntun taram tia, mumu nom labalamu lexen taram. Una ves kepe leveloklok kakapmek tarak atla nenu u umsu mi langsung lebelemulus. ² Una gos kepe axap libilinga rak la una lox amaxar ia basinge leveloklok kakapmek tarak!

³ Nia ara ven kisip pam i do lavasuun teren atarak. La aklen amisix i do nenia lavanga bilinga. ⁴ Nia agara lok pam libilinga ru, tu xusuk mun la aga lok lempanga ua nenu u tong i mi laxakapmek. Kuren la ik mokso do una ila mumu lorooro rak, la ik mokso bok do una tong i do nenia laradi xapmek. ⁵ Nia aga xapmek, tuka xa i at laaleng diga visix ia ren. Kovisi ne naga ga visix ia nia agara xapmek pam.

⁶ Nenu u vavara limixin kusu dina umsu mi lununuan mi levelinga ruturun taram. Una suxa aumsu lodoxoma rak mi lodoxoma avukat taram. ⁷ Una ves kepe libilinga rak, kusu nia ana dadat. Una gos amaxar ia, kusu nia anaba dadat ngan labantamon bunbun tino. ⁸ Nia a vara i xusu ana ronga limixin dina lok momo mi leklek. Keke i do ugara lox asi aleng pam ia, uga lox amenemen pam lodoxoma rak, nia anaba momo manga. ⁹ Una vampe

luxatli ram kusu unoxo ven libilinga rak, la una ves kepe axap laxakapmek tarak.

¹⁰ O Moroa, una lox amaxat labalak, la una lox aumsu lorooro rak mi lodoxoma maxat mo ik mokso la i ruturun tu. ¹¹ Nemen gat uta sok gingin kepe ia, lavanga ana nemen paxalom basinge u. Nemen bok uta lok kepe Loroonan Kaala ram basinge ia. ¹² Una raba amlong manga ia mi nom lomomo at loklok tooro ram, la una lok lodoxoma rak kusu ana vavara ri ronga res taram. ¹³ Melemu nia anaba lox ase limixin kapmek mi leventangas taram, la dinaba rem gili bilong mu u.

¹⁴ O Moroa, una lok tooro ia xusu nia anoxo met atla nenu Laradi Loklox Asepsu rak. La nia anaba tong asu ba loklok manmanton taram mi lomomo. ¹⁵ Una siam do ana vaase asu lavapaase emi asu ru, la nia anaba emi asu minu.

¹⁶ Nenu xopmen una vavara ri leventaba lempanga mabap lavang min. La kopmen bok una lok momo mi levempanga ma kotos asonao i ru. Kuren la anoxo raba u mi levelaplavang. ¹⁷ O Moroa, a lox akalix ia la a nemen maxopok taram. Nom i ni laramtaba rak tu. Nia aklen i do, nenu uxu epovo una sok sisixe laradi i lox akalix i maxopok taram la i ven kibis libilinga ren.

¹⁸ O Moroa, una balamu limixin me Saion la una lok tooro di. Una ii aurut amu levenngas uat to Jerusalem.

¹⁹ Kuren la unaba lok momo mi levelaplavang atnema manaba xotos axav i ru kerekngan uga tong i. La leven bulumaxao temes manabap lavang min tu rovana at loxonin laplavang taram.

52

Laxavaxap At Laradi Kapmek

¹ Nu laradi silok, ixo lox avukat do um simi u at laxapmek taram, la mumu bok mo lempanga xapmek uk lox i ri limixin at ne Moroa. ² U gagas li leventaangas ti

lok kapmek leventaba vetpes. Levelinga ram ing sengsen ngan loxonise. Nenu u puse ngas amisik ti xaxarang. ³Nenu u vavara aleng ti laxakapmek la u ke xepe luvukat. U vavara aleng ti levelinga xaxarang la u ke xepe levelinga ruturun. ⁴Nenu laradi xaxarang, u vavara aleng do unak lox asongot mene limixin mi laxalinga xaxarang taram!

⁵Kuren la ne Moroa noxo xap ti lok kapmek amisik tino u. Ni ba ranga alis ka u la ni naba saksu minu basinge loogu ram. La ni naba lox axap tino lorooro ram la unoxo nemen bok ba at lemenemen at limixin di rooro. ⁶Limixin manmanton dinaba ven i na la dinaba lingun. La dinabang longon arup u la diba lok do, ⁷“Mina ven ba na laradi goxo vara i do ne Moroa na lok see ren. Ketla ni ga nunu saga at lapnovos silok teren, la ga nunua i do loklok kakapmek naba lox aulis i.”

⁸Ketla nenia a lok ngan luuna Olip i suusu avukat to xeneng at loogu at ne Moroa. Nia a nunu saga at labalamu lexen teren naba nemen amisik la noxo xap. ⁹Nia anaba tong loklox avukat amisik tu, ne Moroa, ti lempanga axap ugara lok pam i. Nia anaba tong asu i do nenu u lox avukat to melango at limixin taram.

53

Laxapmek At Limixin

¹ Mo limixin di doma i do, “Kopmen tomorrow go i rooro.” Nedi limixin tangtangu. Lodoxoma atnedi i bilingot axap tino mi laxakapmek. La dira lok pam levempanga ik lok kapmek aleng tinotno, kopmen tara atdi na lok levempanga i nunuan.

² Leeme Silok ik milik si boro vana at lebelen laxalibet, la i reven limixin axap, do ni naba epovo ri ven kaka taradi leklen la tara bok i lotu saparav i. ³Ketla nedi axap digara oon soogong pam, lorooro atnedi axap ira mau axap pam.

Kopmen tinotno tara atdi ik lok lempanga i lox avukat, kopmen tinotno tegesara.

⁴ Moroa i sue xeretna, “Kereva, kopmen dinaklen leventaangas nunuan? Kereva, nedi axap na dik lok laxakapmek, kopmen takleklen atdi? Dip kip pilo amisik limixin tarak, la kopmen tinotno dina ngising tia.”

⁵ Ketla melemu dinaba lingun aleng tino, at nom lanmarat kovisi di goxo suma i gano, atla ne Moroa naba sax epeseves levesi at limixin di munepen mi limixin teren. Moroa ira sok sisixe kepe vam di. Kuren la limixin me Israel dinaba sak tup tino midi.

⁶ Nia a vara aleng tinotno i do ne Moroa naba sak tiki tara boro Saion, kusu na lox asepsu limixin me Israel basinge limixin munepen midi. Melemu limixin me Israel dinaba lok momo do ne Moroa naba lox asang kobot amu manga di!

54

Lisingising Ti Lox Asepsu I Basinge Lavamunepen

¹ O Moroa, una lox asepsu ia mi lolos taram, una lox asepmus ia basinge limixin munepen minia. ² O Moroa, una ronga lising tarak, una ronga ka levelinga rak. ³ Limixin loklox aaso di lok do dina esep minia. La limixin sepsep di lok tong pen i do dina sev amer ia. Nedi mo limixin, kopmen dina doma solo ne Moroa.

⁴ Ketla i raturun tinotno do ne Moroa ni Laradi Loklok Tooro rak. Leeme silok, ni Lentupe ria. ⁵ Nia a vara aleng i do ne Moroa na vorang taba amlong di mi laxakapmek diga lox i ria. La ni naba sele utut kepe axap di. Atla neni laradi ik lox asoorun leveng kakaape ren.

⁶ O Leeme Silok, nia anaba lok letaba ru mi lomomo. Nia anaba tong loklox avukat tu atla nenu u lox avukat tinotno. ⁷ Uga lox asepsu ia basinge laxanmumuat axap

tarak. La nia aga reven u, ugak sak tup tino mi limixin munepen minia.

55

Lisingising At Laradi Ua Lentangas Teren

Ga Lok Laxaurup Tin

¹ O Moroa, una ronga na levelinga rak. Nemen uta ronga aie xepe lisingising tarak. ² Una ronga lising tarak la una vaase porang ia. Levenmumuat i lok kapmek tino lorooro rak. ³ Labantuxu rak i marat aleng atla limixin munepen minia di kiilu ia. Na limixin kapmek di lok do dina sev amdamda ia mi levenmumuat. Di musax ia la di belangatngas bok tia.

⁴ Kuren la nia a marat kapmek tinotno, la lanmarat at lanmet i suxuna ia la lavarampen abulubun ta ia na. ⁵ Nia a suma rino langsung lanmarat la a dede. Lanmarat i suxa aumsu lorooro rak. ⁶ A vara rino i do nia di ruuna tuvapa ngan at lamno. Nia giba rava kaxat uto at loxot petpes, la lodoxoma rak dira lok mamana. ⁷ Nia diba rava uto vaxalom kusu ana nemen mimila ro at lamatbin. ⁸ Nia diba lok soso ri vuse ka toxot ti lipe, at langsung lasaii mi lamanman bet. ⁹ O Leeme Silok, una lox ekarakat levelinga axa atnedi limixin munepen minia.

Nia a reven limixin di esep keneng at lemenemen silok, la di lok kapmek tino limixin. ¹⁰ At levenaleng kangking la kanimin nia a reven di, dit pas saasaa ro at lengkot axap la dik lok leveloklok mamangan la dik paxaru kaxat buaang laxan ekarakat. ¹¹ Leeteke ik lok at levengkot axap. Larangas axap i umsu mi loklok papavas mi laxaxarang ka levempanga at leventaba vetpes.

Laradi Mamalagan

Ga Paase Ri Lentangas Teren

¹² Dola tara at limixin munepen minia na lok kalise kapmex ia, i epovo do nia noxo doxoma solo i. Dola ni natlas i mavana rak, nia giba tu asepsu basinge i. ¹³ Ketla nenu mun, lentangas tarak, nenu xa uga lok na leveloklok kakapmek tia. Gano neda tagat kis esogo amisik la taga emu eburu, ketla uga lok na lavanga ria. ¹⁴ Amisik neda taga etangas mi lavapaase la taga lotu buru vam to at loogu laplavang.

¹⁵ Nia a vara aleng i do limixin munepen minia dinaba mer avot ti loxonaleng meremet, no ne Moroa ga vit li i ridi. Nia a vara i do dinat pas uto at lemenemen at labarongan ngan limixin move di rooro, atla laxakapmek i umsu rino xeneng at lebelen di la keneng bok at laraogu atnedi.

¹⁶ Ketla nenia a ro ke at Leeme Silok ne Moroa ri loklok tooro, la ni naba lox asepsu ia. ¹⁷ At lenmaxantamak su-ubu, at levenaleng kangking la at levenaleng kanimin, nia a velevanga mi levesingising lolos tarak mo i turut saparav i, la ni naba ronga ia. ¹⁸ Ni naba lox amlong avukar ia ap mo levenesep nia a vesep teren, la kopmen tepanga naba sep kapmex ia, kantubu atnedi buaang limixin munepen minia. ¹⁹ Moroa im gomgonga na lavatbung menemen, ga ruka axa i ganoxa at lereot, la ni naba ronga ia la ni naba sak tup midi. Atla di xopara na repukus, la kopmen dina marat teren.

²⁰ Mo laradi nia aga vemu min, ga esep eburu mi larapentangas teren, ga los polo leveng kakaape ren. ²¹ Levelinga ren ga nunuan aleng, ketla lebelangatngas ga umsu at lebelen. Levelinga ren gang sengsen ngan lavarise esep, keke levelinga ren ga reng nunuan mun.

²² Una ke raba Leeme Silok mi laxanmumuat taram, ni naba tupe u. Ni xopmen na ke xepe limixin manmanton kusu limixin petpes dina sak tup midi. ²³ Ketla nenu, O Moroa, unaba lam bubua ka limixin sepsev amet mi

limixin kaxarang uto xopok at levenmaaut atnedi at loxonaleng move di aau, la kovisi na epovo rinedi ri met. Ketla nenia, ana nunu saga ram.

56

Lisingising At Lununu Saga At Ne Moroa

¹ O Moroa, una lox asuusu lebelen tuntun tia, atla nia na a nemen at leesep. Limixin munepen minia dik lox asongot amisix ia. ² At levenaleng kudun axap limixin munepen minia di esep tangarang minia. Buaang neddi di vesep eburu minia.

³ Nu Leeme Silok, nu Lanaraavuk. Dola nia ana marat, ana nunu saga mun taram. ⁴ Nia a nunu saga at ne Moroa la axo marat. Nia a emi asu min atla ni naba lox epovo mo levempanga ni ga xaape min. Ixo epovo rinotno xusu limixin mun diba lok tavanga xapmek tia.

⁵ Limixin munepen minia dip sev ia mi levenmumuat at levenaleng kudun axap. Dim doma agagas li amisik leventaangas kusu dina lox asongor ia. ⁶ Dit pot buru ri kuxut tangais ia at levengkot lipe, la di reven levempanga axap nia ak lox i, la dit kis tangais ia do dina sev amer ia. ⁷ O Moroa, una lox asongot di, mumu loklok kakapmek atnedi. Una lox asuusu lebelemamao ram la una sak tup midi mi lolos taram.

⁸ Ukleklen i do nia a xip tutu mi levenmumuat. Nenu ugak lok katling leveng kamkabili dan ga sesen su at luxatli rak. A doma i do uga malagan li i at lubuk taram. ⁹ At laaleng nia ana xup tu, limixin munepen minia dinaba oo bilong. Legesa vanga mun nia akleklen i, Moroa i tu tooro ia. ¹⁰ Nia a emi asu mi Leeme Silok mumu leveng kakaape ren. ¹¹ Nia a nunu saga mun teren, la nia anoxo marat at tempanga. Ixo epovo rinotno xusu limixin mun at na lavatbung menemen diba lok tavanga xapmek tia.

¹² O Moroa, nia anabam taba u mi levempanga aga xaape min tu. Nia anaba raba u mi laramtaba ti lox asuusu lorotong avukat tu. ¹³ Atla uga lox asepsu ia basinge lanmet, la uga lok tooro ia la limixin munepen minia di goxo sak tup minia.

Kuren la nia anabat pas maxopok at loklok tatao at ne Moroa. Neni ik lox axasep lodoxoma at limixin kusu dina rooro.

57

Lisingising Ti Loklok Tooro

¹ O Moroa, una lox asuusu lebelen tuntun tia. Una lox asuusu lebelen tuntun tia, atla nia a vot pasa u xusu unak lok see rak basinge limixin munepen minia. Una kok avukar ia maxopok at lamamau at luvapa ram. Una lok ngan Lenban tia, se at nom laaleng na levenmumuat axap na on basinge ia.

² Nia a toro ri ne Moroa, ni Leeme Avolo, mo im taba ia mi lempanga axap nia ak pakes tin. ³ Ni naba vaase porang ia boro vana at laxalibet la naba lox asepsu ia. Ni naba sev asi axap limixin loklok papavas. Moroa naba lox asuusu mo labalamu lexen la loklok tuturun teren tia.

⁴ Nia ak lok kantubu at limixin munepen minia di lok ngan lubunglaion. Di lok gagas kusu dina sev amet limixin la dina anan di. Leven gisangsa atnedi i anan ngan ta lempatsoso, la leven gam atnedi i anan ngan ta lemparise esep.

⁵ O Moroa, una lox asuusu lolos silok taram to vana at lamavangkap, la una lox asuusu lisisixam taram at levengkot axap at na lavatbung menemen.

⁶ Limixin munepen minia dira sat pam laxatkat kusu dina rebeng alis kaka ia. Lorooro rak i umsu mi levenmumuat i sak pavaa ia. Diga sep pe langas patpas tarak mi lavatmet i si aleng, ketla neddi xa diga subu tup teren.

⁷ O Moroa, nia a nunu saga rinotno ram, nia anabak pixan emi asu minu. ⁸ Lodoxoma rak, una xapsik. Nia ana gagas li loxontaaleng tarak mi ligita. Nia anaba sak aus laxangking at labara kooxot mi loxompixan. ⁹ O Leeme Silok, nia anaba tong loklox avukat tu ro melamgo at larabung mixin axap. Nia anabak pixan emi asu minu ro melamgo at limixin axap. ¹⁰ Labalamu lexen taram i umsu aleng upana i se axa ro at laxalibet. Loklok tuturun taram tinama i se tu at lamavangkap.

¹¹ O Moroa, una lox asuusu lolos silok taram to vana at lamavangkap, la una lox asuusu lisisixam taram at levengkot axap at na lavatbung menemen.

58

Lisingising Ti Ne Moroa Na Lox Asongot Limixin Kapmek

¹ Nemi luvuttadi amgomgo. Kereva, mi lox akmokso levelinga at limixin mi loklok i nunuan? Kereva, mi ronga avukat levelinga atnedi la mi tu xantubu? ² Kopmen tino. Mi doxoma mene ri leveloklok kakapmek mi lok do mina lox i, la mik lox asongot aleng limixin mede Israel.

³ Limixin kakapmek dik lok laxakapmek at levenaleng axap at lorooro atdi. Di paase asu amisik levelinga xaxarang, ga ruka axa i at levenaleng diga visik di ren.

⁴ Di lok ngan laxasii angkang atla mo levelinga xaxarang atnedi i umsu mi losomamao. La di lok ngan bok lisii xapmek di so asen i mi la Kobra, ua kopmen na ronga levelinga ⁵ la ing tonga xepe laxaka at laradi leklen at laxasii ik pixan kusu lisii naba tii, koplal at laradi ikleklen aleng levesangsanga.

⁶ O Moroa, una sak pivirit kepe leven gisangsa atnedi di lok ngan lubunglaion. ⁷ Naba lox avukat do dina sonao ngan laxadan i sesen su axap, la dina lok ngan levempivilis dit pas amling i ro at langas. ⁸ Naba lox avukat dina lok

ngan levendemdem i remet la i rap sopso. La di lok ngan bok lamdak mumulum nenen i visix amer i la kopmen bok ba na ven laxasep at laxangking. ⁹ Kovisi dinaklen i, la una lok kepe di ngan lempivilis di vixis asi i. Moroa, una mas kepe di mi lolos at lebelemamao ram do nedi move dina rooro.

¹⁰ Limixin manmanton dinaba momo dola dina ven ne Moroa na lox asongot limixin kakapmek. La dinabat pas beles mi leveng kangkedek atdi ro xeneng at lada at limixin kakapmek, mo ne Moroa naba sev amet di. ¹¹ La melemu limixin dinaba tong i do, "I ruturun do limixin manmanton dik lok kaka leveloklox anarong boro at ne Moroa. La i ruturun tinotno do ne Moroa mo i nemen la i viila mumu loklok at limixin at na lavatbung menemen."

59

Lisingising Ti Loklok Aratao

¹ O Moroa, nenu ne Moroa rak. Una lox asepsu ia basinge limixin di esep tangarang minia. Una lok see rak ap mo limixin di lok do na sev amer ia. ² Una lox asepsu ia basinge di nom limixin kakapmek, la una lok kaka amlong ia at leven tikngen di nom limixin sepsev amet.

³ Pen ba i, di kuxut ngais ia kusu dina sev amer ia. Na limixin sepsep di vot buru kusu dina esep eburu minia. Kopmen dola nia aga lok taxakapmek kopla aga lok tavanga goxo nunuan, ⁴ la kopmen bok do at tosoogong tarak. O Leeme Silok, di gagas kusu dina sev amer ia.

⁵ Leeme Silok, nu Lanaraavuk. Una rongga ia. Ude u la una lok tooro ia. Moroa at limixin me Israel, nenu xa una ven ba loklok at lavamolon. Una beleku kaxat la una lox asongot di. Nemen gat uta lox asuusu lebelen tuntun tinedi di raba rulu limixin axa atdi.

⁶ Dimlomlong at levengkantinao bungbung main uto at lemenemen silok, la dip kup saasaa ngan lubang man,

do dit pas saasaa go. ⁷ Una ronga ba lavapaase aksaksa la levelinga xikiilu atdi. Leven gam atnedi i lok ngan lemparise esep keneng at levenngusno atnedi. Ketla dim doma i do kopmen tara nang tonga di. ⁸ Ketla Leeme Silok, nenu ung longon atnedi, u lok kalise mun di lavamolon.

⁹ O Moroa, nu Lanaraavuk tarak. Nia a nunu saga at lolos taram. Nenu mun Loxot Loklox Alipe rak. ¹⁰ Moroa rak i balamu ia, la naba lox asepsu ia basinge limixin munepen minia. La ni naba keke ia kusu anaba ven i na sak tup midi.

¹¹ O Moroa, nemen gat uta sev amet soso limixin munepen minia, kusu limixin tarak dina ven mo levesong-songot dinap kiv i. Kuren la limixin tarak di noxo domampe nom lolos taram. Una sak epeseves limixin munepen mi lolos taram la una sak tup midi. O Leeme Silok, nenu Lurutu See Pe atnema. ¹² Laxakapmek i nemen mene at levenngusno di. Levelinga axap atnedi i lok kapmek. I lox avukat do dina onon at larapelixo mumu latlas atnedi, la levelinga atdi i umsu mi lasaxaek la di xaxarang. ¹³ Kuren la una sele utut kepe di mi lebelemamao ram. Una sele utut kepe axap di, kusu limixin axap dinabaklen i do ne Moroa ni Lamgomgo at leme Israel. La im gomgonga limixin axap at na lavatbung menemen.

¹⁴ Limixin munepen minia dimlomlong at levengkanti-nao bungbung main la dip kup saasaa ngan lubang man. La dit pas saasaa ro at lemenemen silok. ¹⁵ Di lok ngan lubang man dik sixit pupuse panga anan, la di booro do kopmen dina anan mais.

¹⁶ Ketla nia anaba vixan loxompixan i tong asu lolos taram. Amisik at leven maxantamak suubu anabak pixan asu labalamu lexen taram. Nenu Loxot Loklox Alipe rak,

la u kua pe ia at levenaleng mo do nia a ekip tangarang mi levenmumuat.

¹⁷ Nia anaba emi asu minu, nenu Lentupe ria.

Ne Moroa, nenu Loxot Loklox Alipe rak, nu ne Moroa u balamu ia.

60

Lavamunepen Diga Sak Tup Mi Limixin Me Israel

¹ Moroa, ugara sox sisixe xepe vam nama, la uga sev asubu vam nama. Ugara musak kepe vam nama, ketla na manga una repukus bilong mu nama. ² Kuren la nanga ura lox angnengne vam na lenep kangka atnema la ugara lox arem bang pam i. Una i axatu na levenmenemen atnema atla i lok do na subu epeseves. ³ Ura lok pam nema limixin taram kusu mana ekip tangarang mi laxanmumuat solo la laxaloklox asongot silok. Ma saaban ngan ta do ma inin laxangkadan lolos. ⁴ Nu ugara vaase aronga vam nedi nom di lok ngangao ram, kusu dinaba sepsu basinge leeteke. ⁵ Una lox asepsu nama mi lolos taram. Una siam at levesingising atnema, kusu una lox asepsu su nema limixin atla u balamu nema.

⁶ To at loogu xaala ren Moroa ga tong i xeretna, “Nia anaba sak tup mi limixin munepen minia la ana sak epeseves di basinge lenep kangka rak. Nia anabapdo epes nom lemenemen Sekem ti limixin tarak, la anapdo episa mo lasa ro Sukot. ⁷ Nia a ruuna mo lunep Gileat, la Manase. La lenep Epraem bok ni lavatkiam tarak i tupe ia at leesep. La lenep Juda ik lox asuusu lubang amgomgo ri limixin tarak. ⁸ Ketla lenep Moap naba lok ngan lavattingtigon gosogos panga. Nia anaba lu mi luxompanga vatpas tarak uto at leme Edom, ngan loklok katling do nenia Lamgomgo atdi. Limixin me Pilstia diga lok do dinaba sak tup minia, ketla digoxo epovo.”

⁹ O Moroa, nege bamgo ria ti lok tooro ia keneng at leesep eburu mi leme Edom? Nege ba lok tooro ia xusu ana sak tup midi ro at lemenemen silok atdi, mo diga bos kangkan i mi larangas uat i baalom upana. ¹⁰ Kereva, ura sok sisixe xepe rino vam nema? Kereva, ixo epovo bok ba xusu una vas su eburu bok ba mi limixin esep atnema? ¹¹ Una lok tooro nama kusu mana sep limixin munepen, atla lolos at limixin noxo lox epovo tavanga. ¹² Do ne Moroa na ru eburu minedik, tanaba sak tup mi limixin munepen, neni naba sev asubu di.

61

Lisingising Ti Ne Moroa Nak Lok See At Laradi

¹ O Moroa, una ronga ri lanteng tarak, una ronga lising tarak.

² Lodoxoma abulubun i suxuna ia la ak lok to vaxalom basinge lemenemen tarak, la a ngising tu. Una lok kaka ia uto at Loxot Loklox Alipe, ³ atla nenu Lurutu See Pe rak. Nenu u tu lolos pe ia at limixin munepen minia.

⁴ Una ke avolo ia kusu ana nemen amisik to at loogu kaala ram at lorooro axap tarak. Una kubak pe ia maxopok at luvapa ram, kusu ana nemen matmatkun.

⁵ O Moroa, uga ronga vam leveng kakaape rak, la uga raba ia mi mo leveloklox anarong mo u gagas min tinedi dim taba asinorong u.

⁶ Nia a sing u do una lox epasum levenmaares at loorong. Una ke avolo i xusu ni na rooro bok be at taxanmaares solo. ⁷ O Moroa, lixitkis amgomgo ren na nemen maxopok at loklok tatao ram at levenaleng axap i tu melamgo. Una suxuna i mi labalamu lexen la luruturun taram.

⁸ Kuren la anabak pixan emi asu amisik tu, do at levenaleng getgesara anam taba u mi leventamtaba nia aga xaape min.

62

Lununu Saga At Loklok Aratao At Ne Moroa

¹ Nia a tu atnaasan to melamgo at ne Moroa, la a ngangais i xusu na lox asepsu ia, atla nenia a nunu saga ren, la kopmen tara bok. ² Neni xusuk ik lok see rak la ik lox asepsu ia. Neni Lentupe ria, la kopmen tara naba sev asubu ia.

³ Lavanisa aleng nemi limixin munepen mi vara i do mina esep eburu minia, atla nenia laradi kopmen tololos tarak ngan loroboro i rem tereve si? ⁴ Mi vara mene i do mina lox asi ia basinge nom loxot kitkis silok tarak. Mi lok momo rik lox asuusu levelinga xaxarang. Mi paase asu levelinga loklox anarong, ketla keneng at lebelen nimi mim doma ali nemnem lasaxaek tia.

⁵ Nia ak lok sogo xusuk mun at ne Moroa la nia amdoma ngangais tin. ⁶ Neni xusuk ik lok see rak la ik lox asepsu ia. Neni Lentupe ria la kopmen tinotno tara noxo sev asubu ia. ⁷ Nia a nunu saga mun at ne Moroa, atla ik lox asepsu ia la i lox asilox ia. Neni i ruuna lolos ngan Lurutu See Pe rak. Neni i lok ngan loogu matmatkun i kubak pe ia.

⁸ Nemi limixin tarak. At levenaleng axap mina nunu saga at ne Moroa. Mina tong asu levenmumuat atnemi rin, atla neni Loxot Loklox Alipe atnedik.

⁹ Ketla nemen gat mita nunu saga at limixin atla di lok ngan mene legesa mamas silok laradi i mas abeles ka i. Limixin silok la lixilik di lok ngan levempanga gamasa mun. Do mina lok li di at lisikel, kopmen tumumuat atnedi. Di balalak ngan mene lamamas gamasa. ¹⁰ Nemen gat mita doma i do mina sak paxat ka tempanga, la nemen

gat mita doma i do mina ruuna ka tavanga at loklok tip kip pilo. Keke i dola lapnovos atnemi na sisilok. Nemen mita doma saga solo ren.

¹¹ Buaang levenaleng nia agara ronga vam ne Moroa ga tong i do, lolos axap, ateren mene, ¹² la labalamu ren i tu amisik.

O Leeme Silok, nenu naba raba unun ti legetgesara mumu xa levempanga ni ga lox i.

63

Lavavara Ti Ne Moroa

¹ O Moroa, nenu ne Moroa rak. Labalak i ngaongao ru. Lorooro axap tarak i vavara ru, atla i ngan laxangka i vat dexes, la i soso vavagam ngan lasa mes. Labalak ik minu ru.

² A vara i do anaba ven u ro at loogu xaala, a vara i do ana ven lolos la lisisixam taram. ³ Labalamu lexen taram i lox avukat ti lorooro rak, kuren la anaba emi asu minu. ⁴ Nia anaba tong loklox avukat tu at levenmaares axap nia ana rooro ren, la anaba xip aurut lukngak do ana sing u. ⁵ Nia anaba lok momo, i ngan nia a lok leluxa la a an mais. La anaba vixan leveng kompixan momo ri leemi asu ru.

⁶ Dola nia ak midi ro at loora rak, am doma su ram. At laxanimin axap nia am doma u, ⁷ atla nenu uga lok tooro amisix ia, kuren la nia ak pixan mi lomomo ro maxopok at luvapa ram. ⁸ Nia at kis pepeve ram la lakngam tino i kubak pe ia basinge limixin munepen minia.

⁹ Nedi mo dik lok tong pen i do dina sev amer ia, dinaba rava si axap uto xopok at lemenemen at labarongan. ¹⁰ Dinaba met keneng at leesep, la lubung man sio dinaba anan levenbaaxin tadi atnedi.

¹¹ Loorong naba momo mi ne Moroa atla ne Moroa naba raba i mi lolos kusu na sak tup mi limixin munepen min. Nedi nom dik lok leveng kakaape mi laasen at ne

Moroa, dinaba emi asu min, ketla ne Moroa naba vamngus luvuttadi xaxarang.

64

Lisingising Ti Ne Moroa Nak Lok See At Laradi

¹ Nia na a nemen keneng at lumumuat. Moroa una ronga lising tarak! Nia a marat at limixin munepen minia, una lox asepsu lorooro rak basinge di. ² Una rupe ia at lenngitngit at limixin kakapmek, basinge bok nedid buuang limixin bilinga.

³ Levelinga atnedi ip sep ngan ta lemparise esep ing sengsen, la levelinga xakapmek atnedi ik sixit mokmokso ngan levesoso. ⁴ Kopmen di marat kusu dina paase palas asu soso laxalinga xaxarang atnedi. Kuren la dik lok kapmek tinotno lorooro at limixin avukat mi levelinga xaxarang la di paase asi levenasen at limixin.

⁵ Nedi xa di epang aru kusu dina lok laxakapmek. Di epaase do dinaba li lara pelixo atnedi ua. La di tong i do, “Kopmen tara naba ven dik.” ⁶ Di seput li leventaangas kakapmek la di tong i do, “Dik tara gagas li vam langas i nunuan aleng.” Lebelen mi lodoxoma at limixin kerepmo ing tangku axap.

⁷ Ketla ne Moroa naba soso di mi levesoso ren, la soso mun dinaba ruuna ka levennin kooxing. ⁸ Ni naba sele utut kepe di mumu mo levelinga xapmek atdi. La limixin petpes diba ven di, diba piriapat lempatlak atnedi kusu ti lok kalise di.

⁹ La nedid axap dinaba marat, atla dinaba domasu at levempanga ne Moroa gara lok pam i, la dinaba tong asu mo leveloklok silok teren. ¹⁰ Nedi axap limixin manmanton dinaba momo ap mo levempanga Leeme Silok gara lok pam i. Dinaba nemen matmatkun maxopok at loklok tatao ren. Limixin axap di nunuan, dinaba emi asu min.

65

Leemi Asu Mi Laramtaba Rotong Avukat

¹ O Moroa, ik mokso xusu mana emi asu minu ro Saion, la mana doma xatling leveng kakaape atnema ru, ² atla up sep siam at levesing atnema. Limixin at levengkot axap dinaba vot pasa u. ³ Loklok kakapmek atnema i sev asubu nema, ketla nenu u doxoma xepe i. ⁴ Nedi nom una soxolik ka di, dina momo. U lok kaka nedi xusu dina nemen to at loogu xaala ram. Manabat kis mimila at levempanga nunuan keneng at loogu ram eburu mi leveloklox anarong at loogu laplavang taram i xaala. Mo naba lox epovo lavavara atnema.

⁵ Up sep siam at levesingising atnama mo do um taba nema mi lolos ti sak tup mi limixin munepen minema. La uk lok bok levempanga nunuan ti lox asepsu nema. Limixin at levengkot axap at na lavatbung menemen la at levennep tas paxalom bok di nunu saga ram. ⁶ Uga vaxaxis lempattaavut mi lolos taram, la kerepmo uga lox asuusu lolos silok taram. ⁷ Uk lox amila leretepit at laras mi lulung at levempo paxanao, la uk lox axap bok levenekarakat at limixin. ⁸ Limixin at lavatbung menemen axap ding sangu aleng mumu levempanga ugak lox i. Leven gugu ram i lox asu luxupkup momo boro at lara lenep kavaxap at lavatbung menemen uto at lara lenep.

⁹ Nenu uk lox asuusu loklok tatao ram ti laxangka, uk lox asi larabet tik lox ababaum laxangka kusu larauna na pisik avukat. Nenu uk suxa aumsu laradan sen mi levengkadan la um taba lavatbung menemen mi levempanga anan. Uk lox i xeretna. ¹⁰ Up sep bet avukat ti leven-taamang, la uk lox amlu laxangka mi levendan bet. U lox amumulum laxangka mi limisimisi bet la i lox asuusu larauna maxat. ¹¹ Loklok taram i nunuan kuren la um

taba aleng levempanga anan mukun avukat. At levengkot axap ut pas teren, i umsu mi laxampanga anan. ¹² Ap mo levengkot laxampanga mi lavanuet kangkedek, di umsu ro at levengkot anan atdi, la limixin di nemen at laxasigege kaana di umsu mi lososoro. ¹³ Levengkot loklok tatao levempanga mi lavanuet kangkedek i umsu mi laxasipsip. To at larasa i umsu mi laxam piao. Levempanga axap i nunuan aleng la limixin dip kup la dik pixan momo.

66

Loxompixan Emi Asu Mi Lorotong Avukat

¹ Nemi axap limixin, mina emi asu mi ne Moroa mi luxupkup momo! ² Minak pixan ti lox aurut laasen teren la mina tong asu leemi asu i nunuan aleng tin! ³ Mina tong i ri ne Moroa xeretna, “Levempanga uk lox i, i nunuan aleng! Lolos taram i silok aleng, kuren la limixin munepen minu di xis tintiding to melamgo ram mi lanmarat. ⁴ Limixin axap at lavatbung menemen di lotu saparav u. Dik pixan emi asu saparav u, dik pixan emi asu ri laasen taram.”

⁵ Nemi limixin, ude nimi, la mina ven levempanga ne Moroa gak lox i. Ni gak lok leveloklok sangsangu ren kantubu at limixin. ⁶ Ni ga lox arepukus Loxontas Memele ga ngan ta laxangka mesemes. Melemu lavalabat atnedik diga vas korop lavatdan sen silok mi lengkangkedeke mene. Ap mo loxot diga lok momo mi mo lavanga ni ga lox i. ⁷ Lixitkis amgomgo ren naba nemen amisik mi lolos teren, la ni i reven tatao larabung mixin axap. La neni noxo ke xepe limixin tongtonga xepe dina lox asilok di mavana ren.

⁸ Nemi limixin at larabung mixin axap, mina emi asu mi ne Moroa atnedik, mina emi asu silok min. ⁹ Neni ga

lok tatao lorooro atdik basinge laniu, la ni xopmen goxo ke limixin munepen midik gita sak tup midik.

¹⁰ Moroa, uga lok li nema at loklok tong pen, i ngan lisiliva laxao i aan adatdar i. Kerepmo ura lok tong pen pam nema. ¹¹ Uga ke nema la maga subu tup at lemet diga sep li rangais nama min la uga lok li levenaknixip mumuat pana at levenantuno nama. ¹² Uga ke xepe limixin munepen minema diga vas asi nama. Magat pas keneng at laxao silok mi ladanut. Ketla nanga ura lok kaka nema uto at loxot ua manaba nemen matmatkun maxopak at loklok tatao ram.

¹³ Nia anaba lok kaka levelaplavang ti kotos uto at loogu ram. Anabam taba u mi leven tamtaba nia aga xaape min tu. ¹⁴ Nia anaba raba u mi levempanga nia aga tong i do anaba raba u min, at levenaleng nia aga nemen keneng at lumumuat. ¹⁵ Anabam taba u mi levesipsip, kusu ti xotos i ro at loxonin laplavang. Anabaplavang mi levenbulumaxao remes la levenme, la losobu ren naba urut uto vana at lamavangkap.

¹⁶ Nemi mim taba asinorong ne Moroa, ude nimi, la mina ronga i na. Nia ana tong asu axap nom levempanga ni gak lox i ria. ¹⁷ Agang teng tin ti loklok tooro, nia agak pixan emi asu min. ¹⁸ Dola lorooro rak gi umsu mi laxakapmek, Leeme Silok gixo ronga rak. ¹⁹ Ketla i ruturun tinotno do ne Moroa ira ronga vam ia, ira ronga res pam at lisingising tarak.

²⁰ Nia a emi asu mi ne Moroa, atla ni xopmen nak sox sisixe lisingising tarak, koplala ni na rebeng alis labalamu lexen teren tia.

67

¹ Moroa, una lox asuusu lebelen tuntun tinema la una lox anarong bok nema. Una lox asuusu lebelemulus taram tinema, ² kusu limixin at lavatbung menemen axap dinabaklen lodoxoma ram, la kusu limixin at larabung mixin axap dinabaklen i do u lox avukat la uk lox asepsu limixin taram.

³ O Moroa, naba lox avukat do limixin at levengkot axap dina emi asu minu. La naba lox avukat tinotno do larabung mixin axap dina emi asu minu! ⁴ Naba lox avukat do limixin axap boro at levenabung mixin petpes dina sosoro la dinak pixan mi lomomo, atla nu u viila mumu loklok at limixin mi lodoxoma mokmokso la levelinga ruturun, la um gomgonga limixin at larabung mixin axap at lavatbung menemen.

⁵ O Moroa, naba lox avukat bok do limixin dina emi asu minu. I epovo rinotno do limixin axap dina emi asu minu! ⁶ Laxangka ira lox asu vam leventaamang mukun teren. Moroa, ni ne Moroa atnedik ira lox anarong pam dik.

⁷ Moroa ira lox anarong pam dik, la naba lox avukat do limixin at levengkot axap dinam taba asinorong i.

68

Loxompixan Ti Lox Asilok Laasen At Ne Moroa

¹ Moroa i beleku kaxat la ik sak epeseves limixin munepen min. Nedi di belangatngas tin, dik sixiro atla ik sak tup midi. ² I lok ngan lamanman it mas kepe lusuxa, la i xala xepe di. I lok ngan levelumlut misiu i sonao at liplivi kao. Kerepmo la limixin kapmek di seeve ro melamgo at ne Moroa. ³ Ketla limixin manmanton dik lek la di momo at lemeren ne Moroa. Dik lok momo la dip kup mi lososoro.

⁴ Minak pixan ti ne Moroa, minak pixan emi asu mi laasen teren. Mina gagas li langas tin mo it kis pana at

loxontakabu. Laasen teren ne Leeme Silok. Mina lok momo ro melamgo ren!

⁵ Moroa i nemen to xeneng at loogu laplavang teren i xaala. Ni i kok lubungkarun la ik lok tatao lubung naa rixin, lavatlok atdi diga met pam. ⁶ Ni im taba lavanat mamangan mi limixin kusu dina nemen eburu midi, la i sasar asepmus asu nedi limixin di nemen at loxokoxo xusu dina momo. Ketla nedi dixo etu ebelen min, dinaba nemen at lenep kangka i vat dexes.

⁷ O Moroa, at levenaleng ugam gomgo ri limixin taram, la ugat pas korop lamatbin midi, ⁸ lavatbung menemen axap gangnengne, la lamavangkap ga soobang asu lebet, mumu lovotpot at ne Moroa boro at lakaana Sinai, lovotpot at ne Moroa me Israel. ⁹ Nenu uga lox asu larabet nunuan ti lox amonok amu laxangka i vat dexes. ¹⁰ Limixin taram diga vaxaru li levenmenemen atnedi go, la keneng at luvukat taram uga lox epovo lavakpakes at limixin banbalo.

Leme Israel Diga Sak Tup Mi Lavamunepen Midi

¹¹ Leeme Silok ga raba asu levelinga, la buaang lavakin diga etong aonon na levelinga ren keretna, ¹² “Lavaorong mi limixin esep atnedi dira sixiro!” Lavakin to xolonu diga episa levempanga, limixin esep diga esep kaka i. ¹³ Mo levempanga ga ngan ta levempoovo amno, diga vop di mi lisiliva, lempapa atdi gam games aleng mi leven gol avukat. (Tila leventaba atnemi diga lipe ro xeneng at loroboro at lubungsipsip at laaleng esep?) ¹⁴ Ap mo laaleng, Lanaraavuk ne Moroa ga sak epeseves lavaorong to at lavattaavut Salmon, ni ga lox asi lusugao mumudut (snow) ri subu ap mo loxot.

¹⁵ Nu lavattaavut Basan u silok aleng tino, nu lavattaavut mi laxampatlak solo ram! ¹⁶ Nu lavattaavut mi laxampatlak solo, tila uk milik angtungun lavattaavut ne

Moroa ga lok katling i do rin ti nemen, la u doma i do ni lavanga gamasa? Leeme Silok naba nemen amisik ap mo lavattaavut.

¹⁷ Leeme Silok ga rupot boro Sinai eburu mi laxanabin sangsangaun kobot laxang karis esep lolos teren, la ni ga vubeles at loxot kaala ren. ¹⁸ Ap mo laaleng ni gat pas uto vana, ni ga emu ka buaang limixin kokoxo eburu min. Ni ga ruuna ka leventamtaba atdi mo limixin tongtonga xepe. Leeme Silok ne Moroa naba nemen go.

¹⁹ Leemi asu ri Leeme Silok, neni ip kip levenmumuat atnedik at levenaleng getgesara. Neni ne Moroa ik lox asepsu dik. ²⁰ Moroa atnedik ni ne Moroa ik lox asepsu limixin. Ni Loorong Avolo la ik lox asepsu dik basinge lanmet.

²¹ Moroa naba rit povorok tuturun tinotno levempatlak at limixin munepen min. Lempatlak atnedi di xopara na xap at leveloklok i bilinga. ²² Leeme Silok ga tong i xeretna, “Nia anaba lok kaka amlong limixin munepen minemi boro at lengkot axap. Keke i do di nemen to at lempat kaana Basan koplā to xa maxopok at lisimaramain, nia anaba lok kaka amlong nedi, ²³ kusu minabat pas keneng at lada atnedi la lubung man atnemi dinaba dem ka solo laxanda ri lox axap lavavara atdi.”

²⁴ O Moroa, limixin axap di reven u, ut pas to melamgo at limixin taram melemu at loxonaleng u sak tup mi limixin munepen minu ap mo leesep. O Moroa, nenu Loorong Silok tarak ut pas beles uto xeneng at loogu xaala ram. ²⁵ Nedi dik pixon, dit pas to melamgo. Nedi dik sak gita, dit pas to melemu. La laxaalik dit pas to xantubu, dik sak leven tambarin. ²⁶ La digak pixon, “Ata emi asu mi ne Moroa ro xeneng at lovtopot buru at limixin teren. Nemi axap livipisik li at ne Jakop, mina emi asu mi Leeme Silok!”

²⁷ Loxonabung mixin at ne Benjamin dingomgo, nedi di xakalik ti levenabung mixin axap. Melemu ren lubang amgomgo at leme Juda eburu mi loxon binam tadi atnedi, la lubang amgomgo me Sebulon la Napitali di mumupit to melemu.

²⁸ O Moroa, una lox asusu lolos taram, nom lolos uga ru min tinema. ²⁹ Una lox asusu lolos taram boro xa at loogu laplavang taram to Jerusalem, ap mo loxot lavaorong silok dim taba u mi leventamtaba ve. ³⁰ Una vaase sok leme Isip. Nedi di lok ngan lavatpanga sio mi lavanuet kangkedek i nemen to at lisigege dan. Una vaase sok limixin at levenabung mixin petpes. Nedi limixin tongtonga xepe, di lok ngan laxanbulumaxao remes mi laxannat bulumaxao. Una paase lolos tidi se dinaba xis tiktikbu ro melamgo ram la dina lok letaba ru mi levesiliva. Una sak epeseves mo limixin di vavara esep amisik! ³¹ Luvuttadi rutu katling dinaba vot boro Isip. Leme Itiopia dinaba xip aurut tikngen mi levesingising atnedi ri ne Moroa.

³² Nemi larabung mixin at lavatbung menemen, mina vixan mi leemi asu saparap ne Moroa. Mina vixan emi asu saparap Leeme Silok, ³³ mo it pas tangtagap de vana at lamavangkap, mo lamavangkap me ganoxa at lereot. Mina ronga levelinga ren i lulung silok boro vana at laxalibet. ³⁴ Tong asu lolos at ne Moroa i silok aleng, la im gomgonga mavana leme Israel. I lox asusu lolos teren tovana at lamavangkap. ³⁵ Moroa me Israel i vas su boro xeneng at loogu xaala ren, la limixin dinaba lingun teren! Neni im taba lolos ti limixin teren.

Leemi asu ri ne Moroa!

69

Lerengteng Ti Loklok Tooro

¹ O Moroa, una lox asepsu ia! Ladan na ira urut pam ti laxaka rak. ² Nia na ara dong tup silatla nga at lapke, la kopmen toxongkangka lolos ti tu ren. Nia nga na xeneng at ladan i si aleng, la lara paxanao i lok do nak mir axong ia. ³ Laxaka rak ira xo axap mi luxupkup ti loklok tooro, luxukung tarak ira songot. Luxatli rak ira ung mi lerengteng, nia a ngangais ti loklok tooro ram. ⁴ Nedi limixin munepen minia, kopmen tavasuum at lebelangatngas atdi saparav ia, la di umsu aleng tino polo leexes at levengkabinim at lavatlak tarak. Di xaxarang taba ia. Di lolos aleng la di lok do dina sev amer ia. Di xaxarang taba ia do aga xip pilo xaka lempanga nia agoxo xip pilo xaka i. La di tong i ria do ana raba amlong i. ⁵ O Moroa, libilinga rak kopmen na nemen alipe ram, nu uklen larangtangu rak.

⁶ O Leeme Silok, nenu Loorong Avolo la Lanaraavuk. Nemen gat uta ke xepe limixin nunu ram dina mangan mu loklok tarak. Moroa me Israel, nemen gat uta ke mo loklok tarak na sox asu lainmangan tinedi di lotu raturun saparav u. ⁷ Limixin munepen minia di paase aksaksa ria mumu mun u la ara umsu mi lainmangan. ⁸ Luvutnetak di reven ia ngan laradi votpot mun, la a lok ngan laradi me xadiong keneng at lixitkis koetemen atnema.

⁹ Lodoxoma rak i tu at loogu laplavang taram. I anan tos keneng tarak ngan ta laxao. Levempapaase aksaksa dik lox i ru, im subu mavana rak. ¹⁰ Ak lox asi mun ia mi loklok ti mun anan, la limixin dirak lox aksaksa ria. ¹¹ Ang sigaara mi levesingsiga ri duudu, la ding longon tarak. ¹² Di paase mumu ia ro xeneng at larangas silok, la limixin inin tangtangu di voovo lengkompixan mumu ia.

¹³ Leeme Silok, nenia anaba ngising parav u. Moroa, unaba sep siam mu ia at loxonaleng axa nenu una lok

katling i. Una vaase porang ia atla labalamu lexen taram i silok aleng la unaba lox epovo laxakaape ram tik lox asepsu limixin taram. ¹⁴ Una lox asepsu ia kusu anoxo dong si rino ukopok at lapke. Una kubak pe ia basinge limixin munepen minia, la una lox asepsu ia basinge lisimaramain. ¹⁵ Uguta ke xepe gat ladanut na vaxat ka ia. Uguta ke xepe ia la ana xong to xeneng at lisimaramain, kopla ana dong tup to xeneng at lamaaut.

¹⁶ Leeme Silok, una ronga res tarak mumu luvukat at labalamu lexen taram. Una repukus mu ia mi lebelemulus silok taram! ¹⁷ Uguta lipe axa u basinge ia lasaxaruki ram. Nia na ak lok at langsgangan lumumuat, la una ronga res tarak! ¹⁸ Una vot parav ia la una lox asepsu ia. Una lox asepmus ia basinge limixin munepen minia.

¹⁹ Uklen i do di paase aksaksa ria, la dixo lok ngangao rak la dirak lox abaava ia. U ven axap di na limixin munepen minia. ²⁰ Levempapaase aksaksa atnedi ira ba koxorop pam leveve rak. Lavarampen abulubun ta ia na. Aga vara tara xusu ti lox amenemen ia, ketla goxopmen tara go ga lox amenemen ia. ²¹ At loxonaleng aga roxo, diga raba ia mi laxanbasa. At loxonaleng aga minu, diga raba ia mi laxadan mamao.

²² Keke levenanan atdi nabak paxaru kaxat lasaxaek. La keke levempeluxa kaala atnedi naba lox ekarakat di kusu dina subu tup at leeteke. ²³ Una sep di mi lemeramain! Unak lox amolos amisik lempat sintun atdi! ²⁴ Una soobang asu lebelemamao ram mavana atnedi. Keke lebelemamao mokmokso ram na sak pavaa di. ²⁵ Keke lara menemen atnedi nak midi kixinak tino, la teta noxo roo su go xeneng at laraogu kadis atdi. ²⁶ Dik lox asongot nedo no nenu uga lox aleeng nedo. La di paase mumu nedo no nenu uga sev abi nedo. ²⁷ Una malagan li xatling leveloklok kakapmek axap atnedi la uguta ke avolo di xusu

dina ruuna xaka toxot at loklok tooro ram. ²⁸ Una lok pes levenasen atnedi ro at lubuk at lorooro. Uguta malagan li gat levenasen atdi eburu mi levenasen at limixin taram.

²⁹ Ketla nia lampen abulubun, ak lok keneng at losong-songot. O Moroa, una lox aurur ia la una lox asepsu ia basinge na levenmumuat!

³⁰ Anaba emi asu mi ne Moroa mi loxompixan. Anaba paase asu laasen silok teren at loxonaleng ana tong avukat tin. ³¹ Neni na, naba lox amomo rinotno Leeme Silok la naba volo mo loklok tim taba mi levenbulumaxao, la naba volo bok laplavang tin mi lavat bulumaxao temes. ³² At loxonaleng limixin baava dina ven i na, dinabak lek aleng. La neddi di ngising parap ne Moroa, dinaba lok momo aleng. ³³ Leeme Silok ing tonga res atnedi dik pakes la ixom domampe limixin teren dik lok at loogu xokoxo.

³⁴ O laxalibet mi lavatkangka, muna emi asu mi ne Moroa. Laras bok mi lempanga xeneng teren, mina emi asu min. ³⁵ Neni naba lox asepsu leme Jerusalem basinge limixin munepen midi la na vaxaru amlong levenmemen silok at lenep Juda. Limixin teren dinaba ruuna ka mo lenep kangka la dinaba nemen amisik go. ³⁶ Livipisik li at limixin axa ren dinaba ruuna ka i. La neddi ua di vavara aleng i, dinaba nemen amisik go.

70

Lisingising Ti Loklok Tooro

¹ O Moroa, lox asepsu ia! Leeme Silok, lok tooro soso nga ia! ² Keke lodoxoma ekarakat na suxuna neddi di lok do dina sev amer ia. La una sak tup midi. Keke leklek atnedi dik lek mumu levenmumuat tarak, na repukus ti lainmangan. ³ Una xala xepe neddi di lok kalise xapmex ia, kusu dinaba mangan.

⁴ Naba lox avukat do nedu di vot parav u, dina momo la dinak lek. Naba lox avukat do nedu di tong avukat ti loklok tooro ram, dina paase amisik keretna, “Moroa i silok aleng!”

⁵ O Moroa, nenia na ara molos ta la arat kis banbalo de. Soso mun, una vot pasa ia. Nenu Laradi Loklox Asepsu la Leeme Silok tarak. Lox asepsu soso ia!

71

Lisingising At Laradi Amgomgo

¹ Leeme Silok, a vot parav u mi lisingising kusu una lok see rak basinge limixin munepen minia. Uguta ke xepe di, dina sak tup minia! ² Nenu Laradi Manmanton, kuren la una lok tooro ia la una lox asu ia at na lumumuat. Una ronga ia la una lox asepsu ia basinge di! ³ Una lok ngan lomoo vungpung tia, la loogu lolos la matmatkun ti lok see rak. Nenu Lentupe ria la Loroboro rak. La nenia ak lok alipe ro xeneng taram.

⁴ Lomoroa rak, una lox asepsu ia basinge limixin kapmek, la basinge lolos at limixin kapmek ding long kuxurung. ⁵ Leeme Silok, nenu Loorong Avolo. Una ronga res tarak atla a doma sogo nga na ram. Ga ruka i at laau rak, agara nunu saga vam taram. ⁶ Agara sep sogo vam taram ap mo axap laxanmaares nia aga rooro ren. La tuka i at laaleng ne naga ga visix ia, uga lok see rak. Anaba emi asu amisik minu.

⁷ Lorooro rak ga lok ngan lampoovo avukat ti buaang nedu limixin diga mu asu i, atla nenu uga lok ngan loroboro lolos ga tu xangkan ia. ⁸ Kuren la a emi asu amisik minu at levenaleng axap, la a paase asu lununuan taram. ⁹ Uguta raba rulu ia at na loxonaleng nenia a sioxo nga. La uguta doxoma xepe ia mumu i do ara ventaae nga.

¹⁰ Lavamunepen minia di vara i do dina sev amer ia. Di vepaase nemnem levendoxoma ri levempanga diba lox i ria. ¹¹Di paase xeretna do, “Moroa ira raba rulu vam i. Ata mu arup ta i la ata lox epovo lodoxoma atnedik. Kopmen bok ba teta go xusu naba lok tooro i.”

¹²O Moroa. Uguta nemen paxalom basinge ia. Lomoroa rak, una lok kepe soso na lumumuat tarak! ¹³Una lox asi nedi di sox ia mi levelinga xaxarang, una sev asubu di. La keke nedi di lok do dina lox asongor ia, dina mangan la dina baava.

¹⁴Anabam doma saga amisik taram. Anaba emi asu amisik minu la leemi asu rak tu naba nemen epasum. ¹⁵Anaba tong asu luvukat taram. La at levenaleng axap, anaba paase mumu loklok tooro ram, la keke i do axoklen ausuv i. ¹⁶Anabat pas keneng at lolos at Loorong Avolo. Anaba paase asu kujuk mun mo luvukat taram to at lemeren limixin axap.

¹⁷Ugarak lox ase vam ia, tuka axa i at levenmaares nia aga aau ren, la nia move a paase mumu leveloklok maraanu ram. ¹⁸Ananga ara sioxo la levengkabinim at lavatlak tarak irak sokso. O Moroa, uguta raba rulu ia. Una su auru ia at levenaleng ana paase asu lolos silok taram tinedi lavaola axap mo dibap tavasu.

¹⁹Moroa, lempanga axap at na lavatbung menemen kopok la lempanga axap toxun pana at laxalibet, ik lox asuusu loklok taram in manton tino. Ugara lok pam levempanga silok. Kuren la kopmen teta go na lok ngan u. ²⁰Ugara li vam levenmumuat mi levesongsongot mavana rak. Ketla unaba suxa kun ia mi lorooro nunuan la unaba lox asepsu ia basinge lamaaut. ²¹Unaba lox asilox ia polo mo levenmaares avot tarak la unaba lox amamana bok ba lodoxoma rak.

²² Nia anaba emi asu ruturun minu mi loxontaaleng. Moroa rak, anaba emi asu mi loklok tuturun tia. Anabap sep levengkom pixan tu ro at ligita rak. Nenu Laradi Melemelengan at limixin me Israel. ²³ Anabap kup mi lososoro ru at loxonaleng anak sak loxontaaleng. Anabak pixan mi lorooro axap tarak, atla ugara lox asepsu vam ia. ²⁴ At levenaleng kudun axap anaba paase asu loklok manmanton taram, atla ugara sev asi vam nedi ua diga vara i do dina lok kapmex ia. Uga sak tup midi la nanga dira baava.

72

Lisingising Ti Loorong

¹ O Moroa, una anasa loorong kusu ni naba viila mumu loklok at limixin mi lodoxoma mokmokso i ngan mun taram. Una lox ase i mi levelinga loklox akmokso ram, ² kusu neni naba viila mumu avukat limixin taram at levenaleng neni naba nemen ngan lamgomgo atnedi. La neni nabam gomgonga nedi luvuttadi ua di baava. Neni naba lox i na mi levelinga manmanton. ³ Nia a sing bok do limixin at na lenep kangka ren dina ngasang kobot, la na lenep na umsu mi loklok manmanton. ⁴ La loorong na ila leveloklok at luvuttadi banbalo mi lodoxoma ruturun. La neni na lok tooro luvuttadi vakpakes la nat pas asi luvuttadi loklok papavas.

⁵ La a sing bok do limixin taram dina lotu saporap amisix u at levenaleng laxangking i soosoo, la at levenmaares lagaaling im taba asu losoosoo ren ti na lola la ti mo bok lavaola dibap tavasuu. ⁶ La loorong na lok ngan larakabu ri leventaamang la naba ngan bok levengkaramis dan im subu ro vana at laxangka. ⁷ La loklok manmanton na sisilok lolos kantubu at limixin at ne Moroa keneng at levenaleng axap at lorooro ren. La

dina ngasang kobot amisik kerekngan lagaaling im taba amisik laxasep.

⁸ La a sing bok do lixitkis orong teren na vung kimit mo levennep kangka ik lok saparap laras, la na sisilok, ruka i ro at ladan sen Iupretis la na se at latnese at lavatbung menemen. ⁹ La limixin boro at lamatbin dina tu tiktikbu mi lempatgulom atdi ro melamgo ren. La limixin munepen min dina subu midi gamasa mi lenbantuxu atnedi uto xopok at laxangka ri lok ngangao ren. ¹⁰ La lavaorong me Spein la boro at levesoxan bok, dinak lok leventamtaba rin. Lavaorong me Sheba la Seba dinabam taba i mi leventamtaba. ¹¹ La lavaorong axap dinat kis tiktikbu ro melamgo ren. Limixin at larabung mixin axap dina gugu taba i.

¹² La a sing bok do loorong na lox asepsu luvuttadi banbalo ua di toro rin basinge lorooro etaba, la nedi bok ua dik pakes la lavapen abulubun. ¹³ Neni na lox asuusu lebelen tuntun tinedi dixo ruuna lolos la di banbalo. Neni na lox asepsu limixin pakpakes basinge lanmet. ¹⁴ Neni na lox asepsu di basinge limixin loklok papavas, limixin mukmusak, la limixin sepsep tadi, atla lorooro atnedi i lok ngan lavanga matmatkun tin.

¹⁵ Naba lox avukat do loorong na rooro amisik! La limixin dinam taba i mi levengol boro Sheba. La keneng at levesingising at limixin, dina tong ke amisik teren at levenaleng axap. La loklox anarong at ne Moroa na nemen amisik pana ren! ¹⁶ La na lenep kangka na umsu mi laxam piao. La lengkong kaana nam tebonot pe mi levempieve anan, la dina pisik solo ngan leventauna ro Lebanon. Keke mo laramenemen silok teren na umsu mi limixin, la na lok ngan laxangka i umsu mi levempivilis. ¹⁷ Naba lox avukat do limixin di noxo domampe laasen at loorong at levenaleng axap i tu melamgo. La keke

mo lakleklen at limixin mumu i, na nemen amisik ngan laxangking. La limixin at larabung mixin petpes bok dina ngising ne Moroa ri lox anarong nedi ngan ni gara lox anarong pam loorong.

¹⁸ Leemi asu ri Leeme Silok ne Moroa me Israel! Neni xusuk mun ik lok mo levempanga maraanu. ¹⁹ Leemi asu amisik la kopmen tekavaxap teren ti laasen meleme-lengan teren! Keke lisisinang teren na suxuna axap lavatbung menemen. Tuturun! Tuturun!

²⁰ Neni na laxavaxap at levesingising at ne Devit, lamdak at ne Jesi.

73

Levelinga Loklox Akmokso At Ne Moroa

¹ Moroa ga vukat tuturun tinotno ri leme Israel, la tinedi ua levempeve atnedi i kasep.

² Ketla nenia, aga auret tinotno xusu lesepepe sogo rak at ne Moroa gita xap. La lununu rak gita subu, ³ atla nenia ga bele mumuat tinedi digak lox aaso, la at levenaleng aga reven levempanga gak sixit avukat tinedi limixin kapmek.

⁴ Dixo ekip tangarang mi levesongsongot, la di lolos la dixok meres. ⁵ Dixong songot ngan lentaba luvuttadi ding songot kuren. Dixon tuuna bok tevenekarakat ngan leventaba vetpes din tuuna i. ⁶ Kuren la ding sigaara mi loklox aaso i ngan levenonga di vonga i at lengkaka atdi, la ding siga bok lemusak mi leesepe i ngan lengkontamon babaalom di vitis korop di min. ⁷ Lempatpeve atnedi ip kip soobang asu laxapmek, la levendoxoma atnedi ik lox angtang tinotno mi levendoxoma alipe xapmek. ⁸ Ding longon aksaksa ri limixin la di paase mumu levempanga xapmek. Dik lox aaso la dik lox agagas li leventaangas kusu tik lox abaava lentaba vetpes. ⁹ Di paase vupu ri ne Moroa mo ik lok toxun pana at laxalibet, la di paase asu

avut lemet ti limixin at lavatbung menemen. ¹⁰ Kuren la mo limixin at ne Moroa di repukus ti mu asu di la di nunu lolos tinotno at lempanga di paase i. ¹¹ Mo limixin kapmek di tong i do, “Ne Moroa noxoklen i. Leeme Avolo noxo long terek nedik.”

¹² Limixin kapmek di paase kerepmo. Di ruuna laxampanga solo la move dirak lok ka panga bok.

¹³ Kereva ba nenia, aga kok avukat gamasa mene lorooro rak, la agoxo lok laxapmek? ¹⁴ O Moroa, uga lox asongot solo ia at laxanaleng axap. At leven maxantamak amisik ugap sev asongor ia. ¹⁵ Do nia agita paase asu tevelinga vetpes kerekngan mo limixin kapmek, agitaba lox asuusu i do nenia xopmen lara atnedi limixin taram.

¹⁶ Aga lok tong pen i do ana doxoma mumu na lumumuat, ketla ga lolos tinotno ria ri lox akmokso i, ¹⁷ ga se at loxonaleng aga beles uto at loogu laplavang taram. Go ba i, aga long lenget ka ba i do lavanga salai mo naba vot atnedi limixin kapmek.

¹⁸ Unaba lok li di ro at lenep i gagai, la unaba lok nedidiba subu tup at leeteke! ¹⁹ Di naba pubeles soso mun at lesorexores. La laxavaxap atnedi, dinabap tava si rinotno uto xopok at loxot pis. ²⁰ Dinabak lok ngan lapnobo i xap basinge lodoxoma at laradi at len maxantamak. La kerepmo bok at loxonaleng nenu, Leeme Silok, una beleku kaxat, dinaba sonao.

²¹ At levenaleng levendoxoma rak ga soogong tu la labalak ga mamao ru. ²² Agang tangku ngan lavanga mi lavanuet kangkedek. A goxo xasep at lodoxoma ram.

²³ Ketla nanga a nemen saparap amisix u, la um tebeng lakngak tino. ²⁴ Um lam ase ia mi levenanasa ram la at laxavaxap teren, unaba siam ka ia mi leemi asu ram tia. ²⁵ Nege bok ba nia a ruuna ka i ro at laxalibet? Nenu xusuk mun. At na levenaleng nenia a ruuna u, a vara bok ba

tavanga sala i de at lavatbung menemen? ²⁶ Do lodoxoma rak la labantuxu rak na molos, nu ne Moroa, nenu lolos tarak. Nenu xusuk mun nia ak pakes tu.

²⁷ Nedi di raba rulu u, ne Moroa, dinaba seeve. Unaba sele utut nedi di babala vukpux u mi lorooro atnedi.

²⁸ Ketla i lox avukat tinotno do nenia a nemen saparap ne Moroa, nu Lurutu See Pe rak. Nenu Leme Silok, Loorong Avolo. La i lox avukat tinotno bok mo do a paase asu lempanga axap nenu gara lok pam i!

74

Lisingising Ti Lox Asepmus Leme Israel

¹ O Moroa. Ua lavasuun teren la u raba rulu nema xeretna? Kereva, lebelemamao ram ti limixin akmokso ram naba nemen amisik ta, la noxo xap? ² Una doma limixin taram mo nenu uga soxolik ka axa di gano xusu nedi ataram. La nedi ua uga lam asu ka di at loxokoxo kusu diba ravasu ngan lubang mixelin akmokso ram. Una doxoma lakaana Saion, no nenu uga nemen bok be ve kantubu atnema. ³ Una vas mavana at loogu laplavang taram ga rem utut. Lavamunepen minema digara sele utut axap pam lempanga ro xeneng teren.

⁴ Lavamunepen minu digap kup silok tinotno mi lomomo ro xeneng at loogu laplavang taram. Diga lox aurut leventamon i ru katling lenep silok atnedi, i ngan lampoovo do, nedi diga sak tup minema la diga ruuna ka loogu laplavang. ⁵ Diga esep ngan luvuttadi ratara una diga tara asi laxanuna mi levenmatao atdi. ⁶ Diga tit povorok levengkon una diga xovox i at levengkot kitkis, levenora anan, la at laramusmaragu mi levenasop la lempatmatao silok atdi. ⁷ Diga ut tereve xepe loogu laplavang taram la diga song arup laxao ren. Diga lox amexexe rinotno Loxot Kaala ua limixin diga lotu saparav

u. ⁸ Diga vara i do dina vas amdamda axap nema. La diga kotos asi laraogu axap i xaala at na lenep kangka.

⁹ Ma xopmen na ven bok ba tempanga abis. Kopmen ta teputadi vapaase ali go dik lok, la kopmen teta naklen i do na lumumuat naba nemen at lavanisa maares axap.

¹⁰ O Moroa, naba vanisa maares mo na limixin munepen minema dibang longon sese u? Kereva, diba paase vupu amisik ta ri laasen taram la kopmen tekavaxap teren?

¹¹ Ua lavasuun teren la u ronga xepe ri lok tooro nema? Tila ba uk lok li lukngam to melemu ram?

¹² O Moroa, ugarat kis orong silok pam tinema, tuka axa i at lurutu kaxat at lubung mixin me Israel, la buaang laxanaleng ugak lox asepsu vam nema at levenmumuat.

¹³ Uga lok langas to at laras mi lolos silok taram, la uga tit povorok lempatlak at laxampanga silok boro xeneng at laras. ¹⁴ Uga rit povorok lempatlak at lavatpanga silok ne Levietan, la uga raba lempanga mi lavanuet kangkedek no at lamatbin mi labantuxu ren, tidi ri anan. ¹⁵ Uga lok levempuuvut dan mi levendan lixilik digara sen bok ba. La uga lox ames lempatdan sen silok. ¹⁶ Uga rudum li laaleng kangking, la laxanimin. Uga vaxaxis li laxangking mi lagaaling at luxot atdu. ¹⁷ Uga lok li latnese at na lavatbung menemen. Uga lok lamaares mi laavat.

¹⁸ Ketla, Leeme Silok tarak, unaklen i do limixin munepen minu ding longon sese u, atla diplavang ti levenmoroa xaxarang, kuren la dik sok tixirixes u. ¹⁹ Uguta raba rulu limixin axap taram. Di lok ngan mun limixin pentaae. La uguta ke xepe di kusu dina vubeles at longlong kuxurung at limixin munepen midi. Uguta domampe limixin taram mo dim suma leveloklox asongot.

²⁰ Una doma laxakaape uga lox i eburu minema kusu una lok tatao nama. Levenekarakat mo ik lok at lengkon mesuluk main axap at na lenep kangka. ²¹ Uguta ke xepe

luvuttadi baava kusu dina mangan. Una lok tooro mo luvuttadi banbalo mi lavamun panga xusu diba emi asu minu.

²² O Moroa, una beleku kaxat, la una tu xa at lenep taram mumu na levenmumuat atnema. Una doxoma box i do limixin tongtonga xepe ding longon sese amisix u at laxanaleng axap. ²³ La uguta domampe leven aknuxup belemamao at limixin munepen minu, mo di gagang linga amisik taram.

75

Morua Neni Laradi Rongtonga Linga

¹ O Moroa, ma tong avukat tu, ma tong avukat tu! Ma tong aonon lisisilok taram atla u silok aleng, la ma tong aonon bok levempanga maraanu ugara lok pam i.

² Moroa ga vaase xeretna, “Nia ara vit li vam laaleng ti leete, kusu anaba ila loklok at limixin la anoxo tong asu levelinga xaxarang. ³ Keke i do levempanga axap di ruuna lorooro, dina dede mi lanmarat, la lavatbung menemen nang nengne, ketla nenia anabak lox aru lolos laamkumkun at na lavatkangka. ⁴ A paase ri limixin tongtonga xepe xusu dinak lok ngangao la di noxo simi aurut di. ⁵ La dina xap ta di rik lox aru axa di la na xap bok tit las di.”

⁶ Mo laradi rim gonga leete, noxo ravasu do boronak kopla borois, la noxo ravasu do borou xopla boroxun. ⁷ Neni axa ne Moroa naba ila loklok at limixin la ni naba riki xepe lentaba la na vuxaxis avukat lentaba. ⁸ Leeme Silok im tebeng lavanga runtu dan to at lekngen, la i umsu mi laxadan vaen lolos mo i ru katling lebelemamao ren. Neni i soobang asu i, la limixin kapmek di inin i. Di inin asi rinotno i se at lengkootu avit.

⁹ Ketla nenia noxo xap at lavapaase asu levelinga mumu Lomoroa at ne Jakop kopla anak pixan emi asu rin. ¹⁰ Neni

naba ba koxorop lolos at limixin kapmek, ketla lolos atnedi di ruuna loklok manmanton naba sisilok.

76

Moroa Laradi Vatpas Asi

¹ Limixin to Juda dikleklen ne Moroa, la dim taba asinorong laasen teren to Israel. ² I ruuna langkolonu ro Jerusalem. Loogu ren i nemen to at loxongkaana Saion. ³ Ap mo loxot neni ga sak pirivit levesoso at laradi munepen min, la ga sak pirivit bok larapenban mi lemparise esep atdi, la lempanga esep axap bok atdi. Na levelinga i ruturun tinotno.

⁴ O Moroa, u silok aleng. Laasen silok, neni ataram kusuk mun, at loxonaleng ugamlong boro vana at lev-engkaana, ap mo loxot ua uga sev asi limixin munepen minu. ⁵ Limixin taram diga sak paxat ka axap lempanga atnedi mo limixin esep lolos, la monga dira vunga ngan luvuttadi met. Levelolos atnedi mi lakleklen atdi ri vesep ga ravasu ngan lempanga gamasa. ⁶ O Moroa at ne Jakop, at loxonaleng uga paase lolos tinedi, lemparos eburu mi luvuttadi ro vana ren digam subu ri lanmet. ⁷ Ketla nenu Leeme Silok, limixin axap dik marat taram. Teta ixo epovo xusu na ru tangarang u at loxonaleng u belemamao. ⁸ To vana at laxalibet uga tong axasep limixin axap mi levelinga loklox akmokso ram. La limixin at lavatbung menemen diga marat, kuren la mo digat kis sixim mun. ⁹ Atla uga ru kaxat kusu ti vaase asu lempapaase ramtaba ina ram, la kusu ti lox asepsu limixin baava de at lavatbung menemen. ¹⁰ Lebelemamao at limixin at lavatbung menemen ik lox asuusu mun leemi asu silok tu. Nedi di roo su at levenesep silok, dinabak lok katling amisik levenaleng silok taram.

¹¹ Nemi levenabung mixin petpes, mina raba Leeme Silok, neni ne Moroa atnemi mi levempanga no migaplipis i min. Mik lok auret leme Israel, minabam taba i mi leventamtaba atnemi. Moroa ik lok limixin axap kusu dinak marat teren. ¹² Neni ik lox asi laxamdak at lavaorong silok dit las di, la lavaorong dik marat aleng tinotno teren.

77

Loklox Amamana Xeneng At Levenaleng Songsongot

¹ Nia ang teng silok ti ne Moroa, ang teng silok la ing tonga ia. ² Angising ti Leeme Silok keneng at levenaleng at levenmumuat. La at levenaleng kanimin axap, angosong aurut mi lukngak keneng at levesingising tarak, ketla lodoxoma rak kopmen nat kis bus.

³ At lengkonaleng amdoma mumu ne Moroa, lamamas tarak ixot lottu saga la arat mas gaaga. La mo do anam doma mumu levelinga ren, arak lox abulubun bok tarak. ⁴ Neni ik lox ia ara tuang aan at lengkanimin. Lodoxoma saasaa i suxuna lorooro rak, kuren la axo epovo ri vaase tekolinga. ⁵ Am doma levenaleng ira vovolo vam la aram doma su bok at levenmaares me gano axa. ⁶ At laaleng kanimin axap, a pubeles at levendoxoma lolos aleng. Am doma mumu u ne Moroa, la ara susue bok axa ia xeretna.

⁷ “Kereva, Leeme Silok naba lox abulubun kepe amisik nedik limixin me Israel? Kopla neni noxo momo bok ba minedik? ⁸ Kereva, labalamu ren tinedik ira xap ta kopla ira los polo vam laxakaape ren ti kok avukat dik? ⁹ Kereva, Moroa ira domampe vam i xusu neni na lox asuusu lebelen tuntun ti limixin teren? Kopla lebelemamao ren na ira soxun asu vam lebelen tuntun teren?” ¹⁰ Melemu aga vaase xeretna, “Lara lavanga i lox abulu ia xeretna, neni na ne Moroa ixo lok tatao bok ba nedik.”

¹¹ Ketla nenia anabam doma amisik leven gugu silok taram ugak lox i, Leeme Silok. Anabam doma su la ana paase asu lempanga sangsangu no nenu ugarak lok pam i ga migomgo. ¹² Anabam doma mumu mo levempanga axap nenu ugarak lok pam i. Anaba paase eburu minu mumu na levempanga lolos nenu uga lox i.

¹³ O Moroa, leven gugu axap nenu uk lox i, ik mokso aleng tinotno. Kopmen bok ba temoroa go i silok ngan u. ¹⁴ Nenu vam nom ne Moroa uk lok lempanga sangsangu. La ugak lox asuusu lolos silok taram kusu levenabung mixin petpes dina ven i. ¹⁵ La mumu mun mo lolos taram, uga lox epovo i xusu una lox asepmus limixin taram, nedi livipisik li at ne Jakop la at ne Josep.

¹⁶ O Moroa. At loxonaleng laradan mi laras diga reven u, digak marat. La lisimaramain at laras ga dede. ¹⁷ Lempat main bet ga soobang asu larakabu. La leretepaavat boro vana at laxalibet, la lavanga ga mam su boro at laramera manman axap. ¹⁸ Leretepaavat at lengkon takabu ram ga teposok su, la losoosoo at lavanga ga mam ga soosoo axasep lavatbung menemen. La lavatbung menemen ga dede la gangne. ¹⁹ Ugat pas kantubu at loxontas, la uga xoxorop loxontas main. Ketla maxo epovo ri ven kaka lenain at luxangkedek taram. ²⁰ Ugam lam limixin taram ga ngan laradi loklok tatao sipsip, la uga lok li ne Moses mi ne Aron kusu dunam gomgonga di.

78

Moroa Eburu Mi Limixin Teren

¹ Limixin tarak, minang tonga ka i na levenanasa rak, la minam doma mumu lempanga nia ana paase i. ² Nia anaba tong asu levempapaase poovo ridi la ana re musumus levempanga megano ua gak lox alipe. ³ Mo levelinga ua tagara ronga vam i la tagaklen ka i, mo levelinga ua

lavalabat atdik diga tere avolo i ridik. ⁴ Ata xo lok pepe i na at laxamdak mi laxaalik atnedik. Ataba tere i ri mo lavaola dibap tavasus melemu mumu mo lolos at Leeme Silok, la leven gugus silok teren la levempanga maraanu ua neni gara lok pam i. ⁵ Neni ga raba leventaangas manmanton mi Laulis Linga ren ti limixin me Israel, nedi livipisik li at ne Jakop. Neni ga paase alolos i ri lavalabat atnedik kusu dinaba anasa laxamdak mi laxaalik atnedi mi Laulis Linga, ⁶ kusu mo lavaola melemu dinabakleklen i la dinaba tere avolo box i ri luvutnitna di. ⁷ La mumu mun na langas, dinaba nunu saga rinotno at ne Moroa la dinoxom domampe lempanga neni garak lok pam i, ketla diba mumu asu amisik Laulis Linga ren. ⁸ Di noxok lok ngan lavalabat atnedi ua diga gagang linga, la digang tonga xepe amisik levelinga at ne Moroa. La lesesep sogo atnedi rin goxo lolos la di goxo ruturun amisik tin.

⁹ Leme Epraem, diga ruuna laxanbanara eburu mi levesoso, diga sixiro at laaleng at leesepe. ¹⁰ Diga los polo lekabus atnedi mi ne Moroa. La di goxopara na ronga res at Laulis Linga ren. ¹¹ Diga domampe lempanga neni ga lok pam i, i ngan mo lempanga sangsangu ni ga lox i ro melamgo atdi. ¹² Ap mo levenaleng lavalabat atnedi diga reven tinotno ne Moroa gak lok lempanga sangsangu ro at lemelubu ro Soan ua ik lok keneng at lenep silok Isip. ¹³ Neni ga lox epeseves loxontas la ga lam avolo di ren. La ni ga lok mo lunep tas ga tu ngan luvat kapkapla. ¹⁴ At levenaleng kangking, neni gam lam di mi lovtakabu la at lengkanimin ni gam lam di mi langangao at laxao. ¹⁵ Neni gak lok pagam lemparuat to at lamatbin la gam taba di mi levedan boro xa xopok at lebelen laxangka. ¹⁶ Neni ga lok ladan kusu na sen su boro xeneng at lavaruat la ga lok mo ladan ga sesen ngan lavatdan silok.

¹⁷ Ketla nedi leme Israel di goxo xap tik lok leveloklok

kakapmek ti ne Moroa, la digang tonga viribang at Leeme Avolo ro at lamatbin. ¹⁸ Diga lox asuusu rinotno i xusu dina lok tong ne Moroa keneng at levempapaase lolos atnedi ri leveluxa salai diga vavara rin. ¹⁹ Diga tere asu at ne Moroa xeretna, “Kereva, i epovo ne Moroa naba raba dik mi teveluxa de at na lamatbin? ²⁰ I ruturun do neni ga viksa lavaruat, la ladan ga rem soobang su ngan ladanut. Ketla kereva, i epovo bok do neni na raba bok nema mi lengkongkide eburu mi tempanga lomlomon?”

²¹ Kuren la Leeme Silok ga ronga di la ga belemamao aleng di. La neni ga lox asongot di mi laxao, la lebelemamao ren tinedi ga sisilok. ²² Atla di goxo nunu saga ren la di goxo nunu bok do neni naba lok tatao di ro at lamatbin. ²³ Ketla neni ga vaase ri laxalibet no vana la ga tong i ri laramusmaragu ren kusu na rem suang. ²⁴ Ap mo levenaleng neni ga raba di mi lamaana boro vana at laxalibet. At na mun langas ni ga lox asu lempanga anan tinedi ri anan.

²⁵ Kuren la diga anan leveluxa at lubung angelo, la ne Moroa ga lox epovo axap lavavara atnedi. ²⁶ Mi lolos teren neni ga lok bok lemere manman boronak kusu nat mas. Ni ga lox araut lamatmas at lemere manman boroxun, ²⁷ la ga raba asu laxampixa ukopok ti limixin la diga buaang aleng ngan laxanit kapulang nou loxon. ²⁸ La digam subu ro xantubu ap mo lemenemen la kangkan laraogu kadis. ²⁹ Kuren la limixin diga vanan la diga anan mais. Ne Moroa ga raba nedi mi leveluxa ua nedi diga vavara i. ³⁰ Ketla di goxok lox axap ba langaongao anan atnedi, keke i do move digara vanan. ³¹ Kuren la ne Moroa ga belemamao di la ga sev amet nedi luvuraau lolos avukat at leme Israel.

³² Ketla limixin di goxo doma mu i na levempanga la move digak lok leveloklok kakapmek. Lempanga sangsangu bok di goxo doxoma mu i la diga ke xepe

lununu saga ren. ³³ Kuren la ne Moroa ga lox axap soso mun leventooro atnedi mi langsung lumumuat la levenaleng at lorooro atdi ga xap kot. ³⁴ At lengkonaleng neni gap sev amet lentaba atnedi, nedi mo lentaba diga ba tepukus taba i. Diga ngaleeng la diga ngising tin mi lorooro axap atnedi. ³⁵ Diga doma ka i do ne Moroa neni Lurutu See Pe at lorooro atnedi, la do mo Lanaraavuk ga vot ngan Laradi Loklok Tooro atdi. ³⁶ Ketla levelinga atnedi ga umsu mi laxaxarang la goxopmen teruturun at levelinga atdi. ³⁷ Di goxo ruturun tin, la di goxo mumu asu lekabus diga lox i eburu min.

³⁸ Ketla ne Moroa ga lox asuusu lebelen tuntun tidi atla nedi limixin teren. Neni ga doxoma xepe leveng kakapmek atnedi la ni goxo sev amet nedi. Buaang laxanaleng neni gam tebeng amlong lumukmusak teren la gak lox asi mo lolos ap mo lebelemamao silok teren. ³⁹ Neni gakleklen i do nedi limixin mun ua neni ga rudum nedi mi laxangka, la lorooro atnedi goxo babaalom. Diga lok ngan mun lamanman it mas polo la ira onon tino nga.

⁴⁰ Digang tonga viribang solo ren to at lamatbin. La buaang mene nga laxanaleng digak lox antun i. ⁴¹ La digak lok tong pen amu amgo ne Moroa la digak lox abulu i, keke i do neni ne Moroa la Laradi Melemelengan me Israel. ⁴² Diga doma aie i do lolos teren i silok aleng, la mo bok laaleng ua neni ga lox asepse di basinge limixin munepen minedi, ⁴³ la ga lok bok levempanga sangsangu silok to at lemelubu ro Soan keneng at lenep silok Isip.

⁴⁴ Neni ga vuk gili laradan ti lok ngan lada, la leme Isip di goxo ruuna tevendan ti inin. ⁴⁵ Neni ga riki abeles laxanulang ukeneng tidi ua ga raba nedi mi losongsongot silok, la laxangkoak ua ga lok kapmek levenmenemen atdi. ⁴⁶ Neni ga riki asu laxasixu ri anan levempееve atnedi la ga lok kapmek axap leventaamang atnedi.

⁴⁷ Neni ga sev amet larauna vaen mi lavatbet uat, la ga sev amet bok larauna angnu mi langsung lumudut. ⁴⁸ Neni ga sev amet laxanbulumaxao atnedi, mi lavatbet uat, la ga sev amet laxasipsip atnedi mi lavanga ga mam. ⁴⁹ Ni ga lox abaava rinotno di at loxonaleng ni ga soobang asu lebelemamao sepsep teren, mo gat pot ngan ta laradi sepsev amet tadi. ⁵⁰ Neni goxo ranga alis lebelemamao ren koplā gita lox asepsu nedi leme Isip, ketla ga sev amet di mi levenanmeres sepsev amet. ⁵¹ Neni ga sev amet laxamdak avot at lara koenasun axap me Isip.

⁵² Melemu neni ga lam asu limixin teren me Israel ngan laradi loklok tatao sipsip la ga lam avolo di ro lamatbin. ⁵³ Neni gam lam aratao avukat di la di goxok marat. Ketla laras ga repit pavaa limixin munepen minedi la diga met axap pam. ⁵⁴ Neni ga lam li di ro at lenep kangka xaala ren la uto at levengkaana no neni ga los kaka i. ⁵⁵ Neni ga saksu mi limixin mego at levenaleng limixin teren diga pubeles. La ga vesinga laxangka atnedi xantubu at levenabung mixin me Israel, la gam taba limixin teren mi laramenemen atnedi limixin mego.

⁵⁶ Ketla leme Israel diga ronga viribang at Lanaraavuk ne Moroa, la diga lok tong pen i mi leveloklok atnedi. Digoxo ronga res at Laulis Linga ren, ⁵⁷ ketla diga ronga viribang la di goxo ruturun tin ngan lavalabat atdi di goxo ruturun tin. Digak lok ngan lososo xakauk ixo sixit akmokso. ⁵⁸ Digak lox abelemamao i atla diga lotu saparap levenmoroa xaxarang. Digak lox abelengatngas tinotno i mi laxampoovo moroa atnedi. ⁵⁹ Moroa ga belemamao at loxonaleng ni ga ven mo lempanga. Kuren la ni ga sok sisixe axap tino limixin teren. ⁶⁰ Neni ga on basinge rino loogu kadis teren to Silo, ni lanemen ua neni gak lok kantubu at limixin teren. ⁶¹ Neni ga siam avolo limixin munepen minedi xusu dina sak paxat ka lobokis

at lekabus, neni mo loklok poovo at lolos la lisisixam teren. ⁶² Neni ga belemamao limixin akmokso ren la ga ke xepe di xusu limixin munepen midi nabap sev amet di. ⁶³ Luvuraau atlok diga remet at levenesep, la luvuraau rixin di goxo ruuna bok ba tavatlok kusu tidi ri vepot atdi. ⁶⁴ Lavamaasa diga remet keneng at levenesep, la limixin munepen digap sep pepe lavakin atnedi lavamaasa xusu dinoxok saxaanu.

⁶⁵ La soso mun, Leeme Silok ga beleku kaxat, ga lok ngan ta do ni ga rakdu tuang ngan boro at lanunga. Neni ga lox agagas lodoxoma ren ngan leeme lolos i inin laxadan vaen kusu ti gagas ti esep. ⁶⁶ La neni ga sak tup tinotno mi limixin munepen min la digak lok mamangan aleng amisik. ⁶⁷ Ketla neni ga lox abulubun kepe livipisik li at ne Josep, nedi lubung mixin me Epraem. Ni goxo soxolik ka di. ⁶⁸ Ketla ni ga soxolik ka manga lubung mixin me Juda mi lakaana Saion, mo loxot ua lebelen ga tu rinotno i. ⁶⁹ La neni ga vaxaru loogu laplavang tin go, i lok ngan lemenemen aulis teren noxun pana at laxalibet. Neni ga lox atmatkun tinotno i ngan at na xa lavatkangka axap, la gak lox alolos i kusu naba nemen avukat amisik kuren. ⁷⁰ Neni ga soxolik ka lasaxaruki ren ne Devit ngan loorong. Ni ga lam asu xaka i ro at loxot anan at laxasipsip, ⁷¹ ap mo loxot ua neni ne Devit gak lok tatao laxasipsip teren. La ne Moroa ga vaxaxis li i ngan loorong me Israel, ga neni laradi loklox aratao at limixin at ne Moroa. ⁷² Devit gak lok tatao nedi la goxo reven kepe tepentaba la neni gam gomgonga nedi mi lodoxoma avukat teren.

79

Lisingising Ti Lox Asepmus Leme Israel

¹ O Moroa, lavamolon digara buxup beles pam at lenep kangka ram. Digara lox amexexe vam loogu laplavang taram i xaala la ira lok kapmek axap. La diga sele utut kepe lemenemen silok Jerusalem. ² Diga ke xepe lenbantuxu at limixin taram kusu ti lempatpixa silok. Diga ke xepe lenbantuxu at limixin akmokso ram kusu ti laxampanga sio mi lavanuet kangkedek atdi ri anan. ³ Digap sev asu ladaada at limixin taram ngan ta ladan, la ladaada ga sesen ngan ladan to at lengkot axap keneng Jerusalem. Goxopmen tara ga roo su xusu tik mikmit avukat limixin diga remet. ⁴ Limixin at lubang mixin petpes ua dik lok saparap nema, di paase mumu parang nama. Ding longon sese nama la di paase aksaksa rinama.

⁵ Leeme Silok. Kereva, lebelemamao ram tinema noxo xap ta? Kereva, mo lebelemamao ram nabak lox amisik ta la naba lox asongot nama ngan laxao? ⁶ Una lok pukus mo lebelemamao ram kusu na subu mavana ap mo limixin petpes no dixo lotu saparav u, la pana atnedi no dixo ngising saparav u. ⁷ Atla diga sev amet pam limixin taram. Digara lok kapmek lengkot axap at lenep Israel, ni lenep kangka ram. ⁸ Uguta lox asongot nema mumu laxakapmek at lavalabat atnema. Una lox asuusu nga lebelen tuntun tinema mo, atla lodoxoma abulubun na i suxuna rinotno nga nama.

⁹ O Moroa, una lok tooro nema la una lox aroo nema. Una lox asepsu nema basinge na lumumuat la una doma xepe laxapmek atnema xusu levenabung mixin petpes diba raba asinorong u. ¹⁰ I lok kapmek do limixin at levenabung mixin petpes diba lok tinema dola, “Ne Moroa nga ua atnemi?” Ma vara i do una lox asongot levenabung mixin petpes atla digap sev amet buaang atnema limixin axa ram. ¹¹ Una rongga lerengteng at limixin dik lok at loogu xokoxo, la mi mo lolos taram una lox asepmus ned

mo limixin munepen di gagas kusu dina sev amet di.

¹² Leeme Silok, una vorang i ridi levenabung mixin petpes, mi tavanuti teveloklox asongot axap, mumu mo laxaloklox aksaksa digak lox i ru. ¹³ Kuren la nema limixin taram, ma ngan laxasipsip taram, manaba tong avukat amisik tu la manaba emi asu amisik minu at levenaleng axap i tu melamgo.

80

Lisingising Ti Vaxaru Amlong Lubung Mixin Me Israel

¹ O laradi loklok tatao sipsip me Israel. Nenu Lamgongo at limixin taram, una ronga atnema. Ut kis at loxonin orong taram ik lok mavana at lempanga raptava (cherubim). ² Una ru asuvos ti levenabung mixin taram me Epraem, Benjamin, la Manase. Una lox ase nema mi lolos taram. Ude u la una lox asepsu nema!

³ O Moroa, una siam ka amlong nema! Una lox asuusu lebelen tuntun taram tinema, kusu manaba roo su.

⁴ Leeme Silok, nu Lanaraavuk ne Moroa. Naba se ba ua mo lebelemamao ram ti levesingising at limixin taram?

⁵ Ugara raba vam nema mi levenanbulu ua ga lok an mais nema ngan lempanga anan, la i lok ngan ta do magara inin pam lempatbuxom kamkabili dan at lengkatli atnema.

⁶ Uga lox avolo limixin at levenabung mixin petpes dik lok saparap nema xusu dina vesep eburu ti lok kaka mo lenep kangka atnama. La monga limixin munepen minema di paase aksaksa rinema.

⁷ Lanaraavuk ne Moroa, una lok ka amlong nema basinge na lumumuat. Una lox asuusu lebelen tuntun taram tinama, kusu manaba roo su. ⁸ Uga xip ka nema limixin taram boro Isip ngan labanoos vaen. La uga saksu mi limixin at levenabung mixin petpes la ugatlo mo labanoos vaen to at lenep kangka atnedi. ⁹ Uga lox axasep

lenep kusu tin ti susu. La levenixe ren ga si rinotno uto xopok tubu, la levenoos teren gat las to mavana ap mo lenep kangka axap. ¹⁰Ni gang pung kimit lengkong kaana mi lamamau ren la levengkakan teren ga engeng urut at lemparuna Seda (Cedar) la ga kua abuxumin axav i. ¹¹Ni ga lox asu levengkakan teren utois axa saparap loxontas Mediterenian la utoinak axa bok at ladan sen Iupretis.

¹²Tila ba la uga ut asi loroboro no gak lok kangkan i? La monga limixin munepen dit pas polo go, i epovo mene dinam nem kaka lempeven teren. ¹³La laxanbo sio dirat pas axangka i, la laxampanga vetpes bok mi lavanuet kangkedek atdi boro laxairing, dira vanan levempeven teren. ¹⁴Lanaraavuk ne Moroa, una repukus tinema! Una ven asi boroxun pana at laxalibet tinema. Ude u la una lox asepsu limixin taram! ¹⁵Ude u la una lox asepsu na labanoos vaen no nenu ugatlo li i. Na labanoos vaen tamaxat ba mo, nu uga lox asuusu dangdangun la alolos box i.

¹⁶Lavamunepen minema digara ra koxorop asi vam i la digara song arup laxao ren. Una sep di mi lebelemamao ram la una sev amet asonao rino di! ¹⁷Una lok see atnema limixin no nenu uga soxolik ka vam nama. Nema lubang mixin ua nenu uga lox alolos nema. ¹⁸Ma noxo repukus basinge bok ba u. Una kox arooro nema, kusu manaba vemi asu minu. ¹⁹Leeme Silok, Lanaraavuk ne Moroa. Una siam ka amlong nema, una lox asuusu lebelen tuntun taram tinema, kusu manaba roo su.

81

Loxompixan Ti Lok Katling Laaleng Silok

¹Nemi minap kup mi leklek ti ne Moroa, neni Lentupe rinedik. Minak pixan emi asu ri ne Moroa at ne Jakop!

²Mina vaxaru kaxat laxaka at livixan la minak sak leven

tambarin. Minak sak lengkaka pixan avukat to at lempat taaleng mi lempat gita.

³ Minat mas lempat tu ap mo levenaleng silok, at laaleng at lagaaling maxat la at laaleng at lagaaling i re kobot. ⁴ Neni na Laulis Linga at leme Israel, la neni langas ne Moroa at ne Jakop ga tong taba di min. ⁵ Neni ga raba i ri limixin me Israel melemu at loxonaleng neni ga lox asongot limixin at lenep kangka me Isip.

Nenia aga ronga laxaka at laradi ua nia a goxo ronga xibis i, ga lok keretna, ⁶ “Nia aga lok kepe levenmumuat boro at levenantuno atnemi. Aga lok nemi xusu miba soxope asi lempat aknixip uat (birikis). ⁷ At levenaleng migak lok keneng at levenmumuat to Isip, miga toro ria, la nia aga lox asepsu nemi. Aga lox epovo leventotoro atnemi at loxonaleng agak lok to xeneng at loxot alipe rak no xeneng at lamanman takabu. Aga lok tong pen nemi ro at levem puuvut dan to Meriba.

⁸ Limixin tarak, mina ronga i na levempapaase aronga rak. Leme Israel, a vara rinotno i xusu minang tonga res tarak! ⁹ Nemen tinotno nemi guta lotu saparap teven moroa vetpes. ¹⁰ Nenia mun Leeme Silok ne Moroa atnemi, la nenia mun aga lam asu nemi boro Isip. Mina vangangba, la anaba raba luxa nemi.

¹¹ Ketla nemi limixin tarak me Israel mi goxo ronga ia, migita goxo ronga res tarak. ¹² Kuren la aga ke aie nimi mila lodoxoma atnimi ga vatken mi lorongtonga rubu linga. La miga mumu asu lavavara atnemi keneng at leveloklok miga vavara i. ¹³ Nia a vavara rinotno i xusu nemi limixin tarak minang tonga ia. La a vara rinotno i xusu minang tonga res tarak! ¹⁴ Mo do kuren, nia gitaba sak tup soso mun mi limixin munepen minemi la gira vas asi nedi diga tu tangarang nimi. ¹⁵ Nedi ua di belengatngas tia, dinabak milik tiding mi lanmarat to

melango rak. La mo loklox asongot tinedi naba nemen amisik noxo xap. ¹⁶ Ketla anabak lox anan nemi mi levempiao i so misigisigis la anabak lox axap lavavara atnimi mi levendan misiu boro xanubuan.”

82

Moroa Neni Lamgomgo Me Vana Axap

¹ Moroa it kis silok keneng at lixitkis buru roxun at laxalibet. Neni i sevut li levendoxoma avit keneng at lixitkis buru at leven moroa. Mo levelinga ren i lok keretna,

² “Mina xap tinotno nga at liila gesenep at levenaleng mik lok levenete. Mi gutak tu taba limixin kapmek!

³ Mina viila mumu avukat loklok atnedi limixin banbalo la lubungkarun mi lodoxoma mokmokso. Mina paase mi luruturun tinedi dik pakes la dixo ruuna tevenasen silok.

⁴ Minak lox asepmus di boro at lolos at limixin kapmek.

⁵ Laxampanga vereven aie nemi! Langas panga rangtangu! Loklok atnimi ipsopso aleng tinotno! La kopmen tara atnimi at na lavatbung menemen i tong asu levelinga manmanton ting tong ina.”

⁶ La nenia aga lok bok tidi, “Nemi lavaanat moroa. Nemi axap luvutnitna Leeme Avolo. ⁷ Ketla minaba remet ngan luvuttadi at na laxangka. Lorooro atnemi naba vaxap ngan bok lorooro at luvutnitna lavaorong.”

⁸ O Moroa, ude u la unam gomgonga lavatbung memen. Larabung mixin axap, ni ataram.

83

Lisingising Ti Sak Tup Mi Lavamunepen

¹ O Moroa, ugutak lok sixim, ugatang longivilo, la ugatam pamngus! ² Una ven ba limixin munepen minu di lolos kusu diba remkaa su, la nedi no di belengatngas tu dirang tonga viribang. ³ Di vetong li leven taangas alipe

xusu dibak lok mo laxakapmek ti limixin taram. Dik lok leven taangas kusu ti sosolo arup nedu ua uk lok see atdi. ⁴ Di paase xeretna, “Ude nimi, ata sele utut lenep silok Israel eburu mi limixin di nemen go, kusu limixin axap diba domampe axap tino di.”

⁵ Di sisiam mu mo levempapaase li atdi la dik lok momo ri tu buru xusu ti vekini minu, ne Moroa. ⁶ Nedi limixin me Edom la me Ismael, leme Moap mi leme Agirit; ⁷ limixin me Gebal mi leme Amon; limixin me Amalek, leme Pilistia la leme Taia. ⁸ Leme Asiria di ru buru bok midi atla di vara i xusu dina lok tooro leme Amon la Moap, nedu livipisik li at ne Lot.

⁹ Unap sep kapmek bok di ngan ugap sep kapmek leme Midien, Sisera, la Jabin to at ladan Kison. ¹⁰ Uga sak tup midi ro Endo, la lenbantuxu atnedi garap sopsa ro at laxangka. ¹¹ Una sev asi bok lubang amgomgo atnedi ngan uga lox i ri ne Orep mi ne Seep, la una sak tup mi lavaeme silok atnedi ngan i mo uga lox i ri ne Zeba mi ne Salmona xuren. ¹² Atla nedu diga vaase xeretna, “Ataba lok kaka amlong mo lenep kangka at ne Moroa ridik.”

¹³ O Moroa, una sak epeseves di ngan laxakup, la ngan leventuxu piao no lamanman it mas kepe i. ¹⁴ Naba lok ngan laxao i kavat lavatbuan, la ngan langangao at laxao i kavat lengkong kaana. ¹⁵ Una xala xepe di mi lamanman takabu ram la una lox amarat aleng di mi lavatmanman silok taram. ¹⁶ O Leeme Silok, una suxuna di mi lainmangan, la una lok nedu xusu dinaba ven kibis lolos taram. ¹⁷ Naba lox avukat do una sak tup midi la lainmarat atnedi nabak lox amisik la noxo xap. Keke di dina remet eburu mi lainmangan i silok aleng. ¹⁸ Naba lox avukat do dina xasep do nenu xusuk mun Leeme Silok, la Lamgomgo silok tinotno. Nenu u lolos aleng pana axap at lavatbung menemen.

84

Lavavara Ri Loogu At Ne Moroa

¹ Leeme Silok, nu Lanaraavuk. Nia angkongkat mu loogu laplavang taram! ² A vavara aleng i xusu ana lotu saparav u go! Am doma onon amisik uto at loogu laplavang taram. La anabak pixan momo mi lorooro axap tarak tu, Luntoo Avolo.

³ Leveng kamkabilin bok dip kip levempotpos atdi ro xeneng at loogu laplavang, la larapixa lixilik (sparrow) bok din tuuna laraogu axa atdi go. La dik lok tatao luvutnitna di ro saparap loxonin laplavang taram. Nenia bok a vara i xusu nak lok saparav u, nu Leeme Silok la Lanaraavuk. Nu Loorong Silok la ne Moroa rak. ⁴ Lomomo silok atnedi dik lox amisik to at loogu laplavang taram dim suma i, la dik pixan emi asu amisik tu.

⁵ Lomomo silok atnedi ua nenu um taba di mi lolos dim suma i, la neddi di vavara rinotno i xusu dinat pas ngan lavaose uto lakaana Saion at loogu laplavang. ⁶ Kuren la at loxonaleng dit pas polo lemelubu vatmang no at lasa Baka, di reven mo lenep na ravasu ngan lenep at levempuuvut dan, la leventakabu avot ik suxa i mi levempat tibung dan. ⁷ Ap mo lavatpas di ruuna ka lolos maxat. La dinaba rupot to vana at loxongkaana Saion la neddi getgesara dinaba tu ro melango at ne Moroa, mo i silok ti levenmoroa axap.

⁸ O Leeme Silok nu Lanaraavuk ne Moroa, una ronga res at lisingising tarak. O Moroa at ne Jakop, tonga ia! ⁹ O Moroa, una lox anarong loorong atnema, mo loorong ua nenu ugara soxolik ka vam i. ¹⁰ Mo legesa aleng mak lok teren to xeneng at loogu laplavang taram, i silok aleng ti mo legesa abin sangaun kobot aleng mak lok teren to vetpes. Naba lox avukat do ana tu mun amisik to maxamang saparap lumusmaragu at loogu at ne Moroa rak la nemen gat ana nemen avukat amisik to at laraogu at

luvuttadi dik lok laxapmek. ¹¹ Leeme Silok, nenu Lurutu See Pe atnema la nu Loorong Silok i ruuna lisisinang, la uk lox asuusu lebelemulus tinama la uk lox asilok nama kusu limixin dina raba asinorong nama. Nenu uxom tebeng alis lempanga avukat basinge nedi dik lok luvukat.

¹² Leeme Silok nu Lanaraavuk. Nedi di nunu saga ram din tuuna xaka i lomomo silok!

85

Lisingising Ti Lebelen Tuntun At Leeme Silok

¹ Leeme Silok, ugara lox asuusu vam lebelen tuntun tinema limixin taram me Israel. Ugara lok pam nema la uga lox asang kobot amu manga nama. ² Ugara doxoma xepe vam lengkakapmek atnema limixin taram la ugara gos kepe vam levesoogong atnama.

³ Lebelemamao ram tinama ga xap tino la uga rebeng alis amlong mo lebelemamao sesele utut taram.

⁴ O Moroa, nenu Laradi Loklox Asepsu atnema, monga una rebeng ka amlong manga nema basinge levenmu-muat, la na xap ta u ri belengatngas amisik tinema!

⁵ Kereva, unabak belemamao amisik ta nema la noxo xap? Kereva, mo lebelemamao ram noxo xap ta? ⁶ Una lox alolos amu manga nema, kusu nema limixin taram manaba emi asu minu. ⁷ O Leeme Silok, una lox asuusu mo labalamu lexen taram, la una lok tooro nema xusu manaba sepmus.

⁸ Nenia ang tonga lempanga Leeme Silok ne Moroa i paase i. Neni i xaape mi lenmila ridik limixin akmokso ren, mo do ata xomlong ti loklok tangtangu atnedik.

⁹ Tuturun tinotno do neni i gagas kusu tik lox asepsu nedi dim taba asen silok tin, la mo loklok tooro ren naba nemen amisik eburu minedik at na lenep kangka atnedik.

¹⁰ Labalamu eburu mi luruturun at ne Moroa dunaba vot eburu kantubu atnedik. La loklok manmanton eburu

mi lenmila ren dunabak lok bok. ¹¹ Limixin mede xopok dinaba ruturun ti ne Moroa, la ne Moroa naba lox asuusu loklok manmanton teren boro vana at laxalibet ti limixin mede xopok. ¹² Leeme Silok naba lox asang kobot amu manga dik, la lenep kangka atnedik naba lox asuusu lev-eluxa dangdangun avukat. ¹³ At lengkot axap Leeme Silok it pas teren, loklok manmanton naba umsu la kerepmo langas i gagas tin.

86

Lisingising Ti Loklok Tooro

¹ Leeme Silok, una ronga ia. Una sep siam mu ia, atla ara molos axap la axo epovo ri lok tooro axa ia. ² Una lox asepsu ia basinge lanmet, atla nia a ruturun amisik tu. Una lox aroo ia, atla nia lasaxaruki ram la a nunu saga ram. ³ Nenu ne Moroa rak, kuren la una lox asuusu lebelen tuntun tia. At levenaleng axap, a ngising tu. ⁴ O Leeme Silok, una lox aklek ia, lasaxaruki ram, mila levesingising tarak i ruturun amisik tu.

⁵ Uk lok luvukat tinema limixin taram la um doxoma xepe laxakapmek atnema, la u umsu mi labalamu lexen tinedi axap no di ngising parav u. ⁶ Leeme Silok, una ronga i na levesingising tarak. Una ronga na lerengteng tarak ti loklok tooro. ⁷ A toro ru xeneng at levenaleng at levenmumuat, atla up sep siam at levesingising tarak.

⁸ O Leeme Silok, kopmen bok ba temoroa go i lok ngan u, la xopmen tino teta go ga lok tavanga silok ngan mo lempanga nenu ga lox i. ⁹ Mo levenabung mixin petpes ua nenu uga rudum li di, dinaba vot pasa u la dina xis tintiding to melamgo ram. La dinaba emi asu minu atla nenu u silok aleng. ¹⁰ Nenu Lanaraavuk la uk lok lempanga maraanu. Nenu xusuk mun ne Moroa.

¹¹ Leeme Silok, una anasa ia mi lempanga u vara i xusu ana lox i, la anaba ronga res amisik taram. Una anasa ia

xusu anaba gugu taba u mi lorooro axap tarak. ¹² O Leeme Silok ne Moroa rak, anaba emi asu minu mi labalak axap. Anaba vavang asu lisisilok taram at levenaleng amisik la noxo xap. ¹³ Labalamu lexen taram tia i silok aleng! Ugara lox asepsu vam ia basinge lamaaut.

¹⁴ O Moroa, limixin loklox aaso nga mo dit pas tangarang ia. La libinam tadi longlong kuxurung mo di lok do dina sev amer ia. Nedi limixin ua dik lox abulubun kepe levelinga ram. ¹⁵ Ketla nenu ne Moroa la Leeme Silok tarak, u ruuna lebelen tuntun la labalamu lexen. Uk lox atnaasan, uk belen tuntun, la u ruturun amisik ti limixin taram. ¹⁶ Una repukus mu ia la una lox asuusu lebelen tuntun tia. Lox alolos ia la una lox asepsu ia, atla nia a gugu taba u ngan lasaxaruki rinotno ram. ¹⁷ Leeme Silok, una lox asuusu mo luvukat taram tia, kusu nedi ua di belengatngas tia, dinaba mangan at loxonaleng dina ven i do ura kok avukar ia la ura lok tooro ia.

87

Leemi Asu Mumu Ne Jerusalem

¹ Leeme Silok ga vaxaru lemenemen silok teren to vana at loxongkaana Saion, mo loxongkaana i xaala. ² La lavavara ren ti mo lemenemen silok Jerusalem i volo axap mo levenmenemen petpes bok keneng at lenep silok Israel. ³ Nemi limixin boro at lemenemen silok at ne Moroa, mina ronga i mo levempanga maraanu neni i tong asu nom lemenemen mumu u xeretna, ⁴ “At loxonaleng ana siam ka nedi limixin at levenabung mixin no ding tonga res tarak, anaba lox abeles bok leme Isip mi leme Babilon. Anaba siam abeles ka bok nedi leme Pilistia, Taia, la Itiopia ukeneng la dinaba nemen go ngan limixin bus tinotno me Jerusalem.”

⁵ Melemu limixin petpes dinaba epaase mumu mo loxot Saion, la diba tong i do larabung mixin axap, nedi mego

di. La mo Lanaraavuk naba vaxaxis atmatkun mo loxot.
⁶ Leeme Silok naba malagan levenasen ap mo limixin me xadiong la naba lox abeles axap di kusu dina ravasu ngan leme Jerusalem tino nga. ⁷ Dinabak pixan la dinaba tii. Mo loxompixan atdi naba lok keretna, “Lemenemen Saion neni xusuk mun laamkumkun at leveloklox anarong atnedik.”

88

Lerengteng Ti Loklok Tooro

¹ Leeme Silok ne Moroa, nu Laradi Loklox Asepsu rak, ang teng tu at levenaleng kangking la at lengkanimin at pas parav u mi lisingising. ² Lox epovo lisingising tarak. Tonga ia na ang teng kusu una lok tooro ia! ³ Laxanmumuat solo na ira subu vam mavana rak la i auret kusu ana met. ⁴ A lok ngan mun nedi ua di auret kusu dina met. Levelolos axap tarak ira xap pam. ⁵ Ak lok ngan laradi diga ke xepe i ro at lanmet eburu mi labarongan. A lok ngan lau ik midi ro xeneng at lamaaut at labarongan. La nenu ugara domampe axap pam nedi, la ixo epovo bok ba xusu una lok tooro nedi.

⁶ Ugara lu arup pam minia uto xopok tubu at lamaaut, uto rinotno at lemeroon ua i si aleng. ⁷ Lebelemamao ram ik midi mavana rak la i lolos aleng. I lok ngan ta do ara dong si axap pam uto at larapo paxanao.

⁸ Uga lok larapentangas tarak la digara raba rulu ia. Uga lox ia la limixin di milingot tarak. Ak lok keneng at loxokoxo at lanmeres, la axo epovo na sepsu. ⁹ Luxatli rak na ira molos ta mumu laxasongsongot. Leeme Silok, a toro amisik tu at levenaleng axap, la ara ngosong aurut mi lukngak keneng at levesingising tarak.

¹⁰ Kereva, uk lok lempanga sangsangu ri labarongan? Koplā di rooro xat la dira vemi asu minu? ¹¹ Kereva, di

paase asu labalamu lexen taram to xeneng at lamaaut koplā di paase asu luruturun taram to at lenep i umsu mi leeteke? ¹² Kereva, di ven levempanga sangsangu ram to xeneng at lenep i main bonot koplā di ven luvukat taram to lemenemen at labarongan, ua limixin diga domampe di? Kopmen tinotno.

¹³ Leeme Silok, a toro ru xusu una lok tooro ia. A ngising amisik tu at levenmaxantamak, kusu una lox asepsu ia basinge lanmet. ¹⁴ Leeme Silok, tila la u sok tixirixes kepe ia? Ua lavasuun teren la u raba rulu ia?

¹⁵ Ga ruka axa i at levenmaares nia aga aau, agam suma levesongsongot la aga auret kusu ana met. Nia na ara soklu axap at laxanmumuat at leveloklox asongot taram.

¹⁶ Laxan belemamao silok taram ik lox amdamda ia. La lesepep taram ik lox abaava rino ia. ¹⁷ At levenaleng amisik duk lok kangkan ia ngan ladanut. La dura si etang amisik tarak to at lengkot axap. ¹⁸ Ugara lok pam larapentangas tinotno rak la digara raba rulu vam ia, la lubuxumin ta mo i lok ngan laradi i vemu minia la kopmen tara bok.

89

Loxompixan Keneng At Levenaleng Mumuat

¹ O Leeme Silok, anabak pixan amisik mumu mo labalamu lexen taram. Anaba vavang amisik do nenu u ruturun tinema limixin taram at levenaleng axap i tu melamgo.

² Aklen i do labalamu la loklok tatao ram tidi naba tu tuxuruxun amisik, la na nemen tino ngan laxalibet.

³ Uga vaase xeretna, “Nia agara lok pam lekabus mi mo laradi nia aga soxolik kaka i. Neni lasaxaruki rak ne Devit la a agara xaape vam tin, keretna, ⁴ ‘Lavaorong nabap tavasū amisik keneng at livipisik li ram la mo lugugu ti

lavaorong nabak lok at livipisik li ram amisik la noxo xap basinge nedi.’ ”

⁵ Leeme Silok. Lempixan ip tavasus boro vana laxalibet mumu mo lempanga maraanu uk lox i. Luvuttadi melemelengan dik pixan do u ruturun amisik ti limixin taram. ⁶ Leeme Silok, kopmen teta roxun pana at laxalibet i lok ngan u. Kopmen teta at lempanga rooro no vana at laxalibet i epovo eburu minu. ⁷ Keneng at lixitkis buru at limixin kaala, dik marat aleng taram. La nedi axap ding sangu aleng taram.

⁸ Leeme Silok ne Moroa nu Lanaraavuk, kopmen teta go, lolos teren i volo aleng ngan u. O Leeme Silok, nenu u ruturun at lempanga axap. ⁹ Um gongonga mavana ap mo laras lolos, la uk lox amila lolos lempat popaxanao. ¹⁰ Uga rit amdanda mo lavatpanga sio ne Raap la uga sev amer i. Uga sak tup mi limixin munepen mi mo lolos silok taram. ¹¹ Laxalibet neni ataram, la lavatbung menemen bok. Uga rudum lavatbung menemen la lempanga axap bok di nemen keneng teren. ¹² Uga rudum li lunep borou la boroxun. Lakaana Tabor mi lakaana Eremon dik pixan mi lomomo ru. ¹³ U lolos pologat! Lolos taram i silok la i volo aleng!

¹⁴ Lixitkis amgomgo ram it kis mavana at levelinga manmanton mi lodoxoma avukat. Labalamu eburu mi luruturun dip tavasus asaxaven keneng at lempanga nenu uk lox i. ¹⁵ Nedi di lotu saparav u mi levempixan la dik lok maxopok at lebelemulus taram, dinabak lok momo aleng! ¹⁶ La di momo amisik at levenaleng axap mumu mun u, la di vemi asu minu mumu luvukat taram. ¹⁷ Uk lok nema la mak sak tup mi limixin munepen minema. Uk lok nema xusu mana sak tup midi atla, mumu mun labalamu ram tinama. ¹⁸ O Leeme Silok, nenu xa uga soxolik ka

lurutu see pe rinema. Nenu xa ne Moroa Melemelengan me Israel. Uga raba nema mi loorong ti lok see atnema.

*Laxakaape At
Ne Moroa Ri Ne Devit*

¹⁹ Keneng at lara lisilimet gano, uga paase ri lavaeme vapaase ali ram ua diga ruturun amisik tu. Uga lok keretna, “Nia ara raba vam loklok tooro ri mo laasesep doxodok. Ara raba vam lugugu at loorong tin, neni mo lara nia a soxolik kaka i ro xeneng at limixin. ²⁰ Neni lasaxaruki rak ne Devit ara vaxaxis pam i ngan loorong at loxonaleng aga lox anarong i mi ladan momonok i xaala. ²¹ Lolos tarak nabak lox amisik eburu min, lolos tarak naba lox alolos i. ²² Lavamunepen min di noxo epovo ri vas asi i. Limixin kapmek di noxo epovo ri sak tup min. ²³ Anaba sax amdanda nedi di esep tangarang min, la anaba sev amet nedi axap ua di belangatngas tin. ²⁴ Anaba balamu i la ana lok tatao amisix i. Anaba lox i xusu limixin munepen min di noxo sak tup min. ²⁵ Anaba lox epasum lixitkis orong teren, tuka i ro at laras Mediterenian la uto epopolo at ladan Iupretis. ²⁶ La neni naba vaase ria xeretna, ‘Nenu ne Tamak la ne Moroa rak. Nenu Lurutu See Pe rak la Laradi Loklox Asepsu rak.’ ²⁷ Anaba lox asilox i ngan lamdak avot tarak, la neni naba silok axap ti lavaorong axap at na lavatbung menemen. ²⁸ Anaba lox epovo amisik laxakaape rak tin, la lekabus tarak eburu min naba nemen amisik la noxo xap. ²⁹ La mo leesooxun ngan lubung amgomgo keneng at livipisik li ren, naba nemen amisik ngan laxalibet. Tavaorong nabap tavasus amisik boro at livipisik li ren.

³⁰ Ketla do livipisik li ren dina ronga xepe at Laulis Linga rak la di noxo rooro mu asu leventaangas tarak, ³¹ la do di noxo doxoma mu levempapaase axasep tarak, la dixo mu asu levempapaase ali rak, ³² anaba lox asongot

di mumu laxakapmek atnedi. Anaba lok nedi dina baava mu mo laxapmek atdi. ³³ Ketla labalamu rak ti ne Devit noxo xap koplana subu kot ap mo laxakaape rak tin. ³⁴ Anoxo los polo lekabus tarak eburu min koplana ke xepe tara taxakaape go agara lox pam i eburu min. ³⁵ Aga xaape gesara mene nga keneng at laasen kaala rak la noxo lox ekun bok ba i. La mo laxakaape naba nemen amisik. Anoxo xarang tinotno ne Devit. ³⁶ Neni naban tuuna amisik taxampipisik li, la anaba reven aratao lixitkis orong teren at levenaleng axap laxangking mo ik lok. ³⁷ Na loklok tatao rak naba nemen amisik ngan lagaaling, ua neni i soosoo axasep amisik to vana at lamavangkap.”

Lanteng Ti Loorong Diga Sak Tup Min

³⁸ Ketla nenu ne Moroa, u belemamao mo loorong nenu uga soxolik ka i. Ugara raba rulu vam i la uga sok sisixe i. ³⁹ Ugara los polo vam lekabus taram eburu mi ne Devit, lasaxaruki ram, la ura lox asi aleng i basinge lixitkis teren ngan loorong. ⁴⁰ Ura ut tereve asi vam larangas uat ik lok kangkan lemenemen silok teren, la ura lok kapmek pam laraogu esep matmatkun teren. ⁴¹ La nedi limixin ua dit pas polo go, dim nem kaka lempanga ren. La nedi dik lok saparav i, ding longon sese i. ⁴² Ura lok tooro vam limixin munepen min kusu dina sak tup mi limixin taram. Ura lok pam limixin munepen la dira momo aleng. ⁴³ U lok lempanga esep teren i lok ngan lempanga gamasa nga la limixin munepen minu dirak sak tup etaba nga midi keneng at levenesep. ⁴⁴ Ura lok kepe vam laasen silok teren la ura lok pes pam i basinge lixitkis orong teren. ⁴⁵ Ura lox asioxo vemput ta i la ura vung kimir i mi lainmangan.

Lisingising Ti Loklox Asu

⁴⁶ Leeme Silok, kereva, unak lox alipe rino nga basinge nema? Mo lebelemamao ram na babao ngan laxao la naba se ba ua? ⁴⁷ Una doma mumu be na lorooro rak it mut tinotno. La unaklen box i do nenu uga rudum li nema mi lenbantuxu gamasa mun! ⁴⁸ Nege ba naba rooro amisik la noxo met? Taradi naba lok ba xereva xusu ni noxo beles at lamaaut?

⁴⁹ Leeme Silok, ua nga no lempanga nenu uga lox asuusu i ri lox asaxaven mo labalamu ram? Ua nga no leveng kakaape nenu uga lox i ri ne Devit? ⁵⁰ Uguta domampe i do ram, la aga vekip mi mo lempapaase vupu at lavamolon. ⁵¹ O Leeme Silok. Limixin munepen minu diga paase xapmek ti loorong soksoxolik taram. Di paase aksaksa rin ap mo axap lengkot neni it pas teren.

⁵² Leemi asu amisik ti Leeme Silok la kopmen tekavaxap teren! Tuturun! Tuturun tinotno!

90

Levelinga Mumu Ne Moroa La Limixin

¹ O Leeme Silok, nenu ugak lok ngan amisik loogu aulis atnema lavaola axap. ² Avot ti laaleng uga rudum li levengkaana la lempanga di rooro xeneng at lavatbung menemen, nenu ugak lox axa ngan ne Moroa i rooro lexen, la unabat kis Moroa amisik la kopmen tekavaxap taram.

³ U tong i ri luvuttadi axap kusu dinaba vee kangka ngan diga ravasu ren. U baba gili amlong di xusu dina repukus ti laxakup. ⁴ Nenu u ven legesa abin sangaun kobot maares di lok ngan mun legesa aleng. Di lok ngan mun laaleng itinongo, ira onon pam, i lok ngan mun legesa xonatat aleng at laxanimin. ⁵ Up kip pes kaka nema ngan ladanut. Maxo rooro abao bok, ma ngan lapnobo i sonao. Ma lok ngan levenang i suu valas maxantamak suubu, ⁶ di suu la

di repalas asu lamaraanu, la melemu dira molos la dira met manga ukantinao.

⁷ U sesele utut nema mi mo lebelemamao ram. Ma emilik sak mumu lebelemamao ram. ⁸ U saali leveloklok kakapmek atnema ro melamgo ram, mo leveloklox alipe atnema ik lok go ap mo loxot nenu u epovo ri reven kaka di.

⁹ La lorooro atnema, nenu u tara korop atmur i mi mo lebelemamao ram. La i sonao ngan lavapaase siksikma. ¹⁰ Lorooro atnema it pot mun at lavanuti sangaun maares la do ma lolos, maba se ka lavanuan sangaun maares. Ketla ana levenmaares move im taba nema mi leven ekarakat la lainbulu. La soso mun lorooro atnema i vaxap kot, la mara onon tino nga.

¹¹ Kopmen tara go gata suma vam lolos silok at lebelemamao ram. Kopmen bok teta iklen ka ba lanmarat silok, mo lebelemamao silok taram i epovo ri lox asuusu i xeneng atnema. ¹² Una anasa nema do lorooro atnema it mut mun kusu manaba ruuna ka lodoxoma avukat.

¹³ O Leeme Silok, lebelemamao ram naba xap ba lingisa? Una belen tuntun mu nema, limixin me Israel, atla nema limixin tinotno ram! ¹⁴ Una suxa amisik nema at leven maxantamak mi labalamu lexen taram, kusu manabak pixan la mana sosoro keneng at lorooro axap atnema at na lavatbung menemen. ¹⁵ Una raba nema mi lomomo silok ngan bok pam mo lanbulu silok uga raba nema min ap mo levenmaares magak lok keneng at laxanmumuat solo. ¹⁶ Una lox avolo nema lavasaxaruki ram kusu mana ven leven gugu lolos taram. Una lok bok livipisik li atnema xusu dina ven mo lolos silok taram.

¹⁷ Leeme Silok ne Moroa atnema, una ke mo loklox anarong taram nak lok keneng atnema. Una lox epovo levendoxoma atnema keneng at leven gugu axap nema ma lox i!

91

Moroa Lurutu See Pe Atnedik

¹ Nege it kis esogo eburu mi Leeme Silok, la ik lok maxopok at loklox aratao at Lanaraavuk, ² i epovo xusu dina tong i rin keretna, “Nenu Lentupe ria la Lurutu See Pe rak. Nenu ne Moroa rak, la nia a nunu saga ram.” ³ Neni naba lox asepsu u basinge levempanga sepsep mo ik lox alipe la basinge bok levenanmeres sepsev amet. ⁴ Neni naba kok u mi luvapa ren, la unabak lox avukat keneng at loklok tatao ren. Neni i ruturun ti limixin teren, kuren la ni naba lok tatao la na tu banpe u. ⁵ Unoxo marat at tepanga sepsep at laxanimin koplā limixin sepsep diba vot soso mun at laxangking, ⁶ koplā tevenanmeres kapmek na lutpot at laxanimin koplā mo lubang gas kapmek dip sep at lengkangking.

⁷ Tegesa abin sangaun kobot giba met mun go saparav u, la legesa sangaun larabin sangaun kobot go xangkan u, ketla dixo epovo ba ri lok kapmek tekot taram. ⁸ Unabak milik kaxat la una reven ba i mo limixin kapmek dik lok ka levesongsongot kuren.

⁹ Ura siam ka vam Leeme Silok i ngan Lentupe ru. Ni Leeme Avolo i ngan Lurutu See Pe ru. ¹⁰ Kuren la ba xopmen bok ba tumumuat naba sak pavaa u, la tempanga loklox asongot nat pot saparap laraogu aulis taram. ¹¹ Moroa naba lok li lubang angelo ren kusu dinabak lok tatao u, la kusu dinabak lok see ram at levengkot axap unat pas teren. ¹² Dinaba rebeng aurur u mi lengkikngen di xusu tuuat noxo lox asongot tekot at luxangkedek taram. ¹³ Unabat pas povorok asi lempatlaion mi lempat sii, mo lempatlaion atat la lempat sii mamao.

¹⁴ Moroa i vaase xeretna, “Nia anaba lox asepsu mo lara i vavara aleng ia la anaba lok see ap mo lara ua i ven kibis ia do nenia Leeme Silok. ¹⁵ At loxonaleng ni

na ro ke rak, anaba sep siam at levesingising teren. Do ni na ekip tangarang mi levenmumuat, anabak lok eburu min kusu ti lok tooro i. Anaba lox asepmus i basinge mo levenmumuat la ana xip aurut laasen atdi. ¹⁶ Anaba lox anarong i mi lorooro abao, la anabak lox asepmus i at levenmumuat.”

92

Loxompixan Emi Asu

¹ O Leeme Silok, loklox avukat tinotno mo do mana tong avukat tu, la manak pixan tim taba asinorong u, O Moroa Avolo. ² La i lox avukat bok do at lenmaxantamak axap, mana vavang asu mo labalamu lexen taram. La mana vavang asu loklok tuturun tinama at lengkanimin axap. ³ Mana lox i na mi lerengteng at leven gita la lenaon at lengkon taaleng. ⁴ O Leeme Silok, leven gugu lolos taram ik lox aklek ia. La ak pixan momo mumu mun mo lempanga ugara lok pam i.

⁵ Leeme Silok, mo leven gugu uga lox asuusu i, i silok aleng! La levendoxoma ram i si aleng! ⁶ La ixo epovo xusu taradi baulang naklen mo lempanga. Taradi rangtangu bok ixo epovo ri xasep teren. ⁷ Keke i do limixin kapmek dina posok aleng ngan levempivilis, la nedik lok leveloklok bilinga diba ngasang kobot. Ketla ne Moroa naba sele utut axap tino bok di, ⁸ atla nenu Leeme Silok u silok aleng mavana at lempanga axap la unaba nemen amisik kuren la kopmen tekavaxap teren.

⁹ Makleklen i do limixin munepen minu dinaba remet kot, la unaba sak tup minedi axap limixin dik lok laxapmek. ¹⁰ Ugara lox alolos pam ia ngan lavatbulumaxao aaxa. Ugara lox anarong pam ia mi lomomo. ¹¹ Agara ven pam u, uga sak tup mi limixin munepen minia la aga ronga lerengteng at limixin dik lok laxapmek.

¹² Limixin manmanton dinaba ngasang kobot ngan lempar iivin ua i pisik aleng. Dinaba lolos ngan levenuna Seda (Cedar) boro Lebanon. ¹³ Dinaba lok ngan larauna i suusu ro xeneng at loogu at Leeme Silok, i suusu dangdangun to xeneng at loogu laplavang at ne Moroa atnedik. ¹⁴ Mo larauna me gaxatdo nga la ira mukun ta, ketla move ira pisik peeve la lempavaxan move ren i mamaxa la i lolos. ¹⁵ Anai, i lox asuusu i do levelinga at Leeme Silok in manton tino amisik, la kopmen tesooogong keneng at Lurutu See Pe rak.

93

Morua Ni Loorong Silok

¹ Leeme Silok ni Loorong Silok. Laasen teren i volo aleng la neni Lanaraavuk. Kuren la lavatbung menemen mo it kis atmatkun at loxot teren la ixo epovo ri repes meeve. ² O Leeme Silok, lixitkis taram ngan Loorong Silok ga tu tuxuruxun ka axa at lurutu kaxat, la nenu uga rooro avot ti levenaleng ga ru kaxat.

³ O Leeme Silok, laaknuxup silok ip tava su boro xopok tubu at laras main. Dik lox areng silok lengkaka atnedi mi laaknuxup silok. ⁴ Leeme Silok it kis amgomgo toxun pana at laxalibet, la lolos teren i volo aleng. I silok ti mo laaknuxup silok boro at laras main, la i lolos polo larapo paxanao at laras.

⁵ Leeme Silok, Laulis Linga ram i nemen amisik, la loogu laplavang taram i xaala rinotno amisik la kopmen tekavaxap teren.

94

Morua Ni Laradi Naba Ila Limixin Axap

¹ Leeme Silok, nenu ne Moroa uk lox asongot limixin kapmek. Una lox asuusu lebelemamao ram tidi! ² Nenu laradi ila mumu lороoro at limixin axap. Una beleku kaxat la una raba nedi luvuttadi loklox aaso mi luunun ti laxakapmek atdi! ³ Mo leklek ap mo limixin dik lok laxapmek naba se ba ua? Naba se ba ua, Leeme Silok? ⁴ Mo loklox aaso at luvuttadi dit los polo Laulis Linga la dirak lox aru di mumu leveloklok kakapmek atnedi. Mo loklok atdi naba xap ba lingisa?

⁵ Leeme Silok, di rubut puuvus limixin taram, la dik lox abaava nedi no nenu u ruuna di. ⁶ Dip sev amet lempatnaa mi lubungkarun, la dip sev amet bok lavaose mo dik lok at na lenep kangka atnema. ⁷ La di paase xeretna do, “Leeme Silok ni kopmen na reven nedik. Moroa me Israel ixo ven lenget ka na loklok tak lox i.”

⁸ Limixin tarak, kereva rinotno la mik lok sorova baulang gamasa? Minabaklen ba lingisa? ⁹ Moroa ga lok levenbaalung atnedik. Kereva, neni ixo epovo na ronga nimi? Neni ga lok lengkatli atdik, koplа ni noxo reven nimi? ¹⁰ Neni i metlaat ti levenabung mixin petpes, kereva ni noxo lox asongot bok nemi? Neni Laradi Anasa at limixin axap, kereva, kopmen takleklen teren? ¹¹ Leeme Silok iklen axap levendoxoma at limixin. La iklen latnese at levendoxoma etaba atdi.

¹² Leeme Silok, lomomo silok mene i mo ik lok ap mo laradi ua nenu u paase aru amisix i, mo laradi ua nenu u anasa amisix i mi Laulis Linga ram! ¹³ Uk lox amamana i basinge levenaleng at levenmumuat, ise at laaleng di xe lavatmet tik lixo ka luvuttadi dik lok laxapmek. ¹⁴ Leeme Silok noxo raba rulu limixin teren. Neni noxo lox abulubun nedi ua neni i ruuna di. ¹⁵ Levendoxoma mokmokso nabamlong keneng at levenaleng dina tu at lavapaase. La nedi axap limixin manmanton dinaba su auru rino mo levendoxoma.

¹⁶ Nege ga ru katling ia ri ru tangarang mo limixin kapmek? Nege ga lok ka loxot tarak kusu ti ru tangarang mo limixin bilinga? ¹⁷ Mo do Leeme Silok gitoxo lok tooro ia, nia ro agita onon soso vam uto at lemenemen at labarongan, ni lemenemen at lavaanat pamngus. ¹⁸ Aga vaase xeretna, “Am subu si na ukopok.” Ketla, labalamu lexen taram, Leeme Silok, gam tebeng ama aurur ia. ¹⁹ At levenaleng nia a suma levenmumuat la lodoxoma saasaa i suxuna lorooro rak, nenu uk lox amenemen ia la urak lox aklek ia.

²⁰ Nenu kopmen nak lok momo mi luvuttadi rongtonga linga gesenep ua di xaxarang pepe lolos tinotno luvukat at levenaleng ete, la di sisiam ka laxakapmek. ²¹ Dik lok li levenmumuat mavana at luvuttadi avukat, la di tong aurut liina ti luvuttadi sepsen la kerepmo di sev amet nedi. ²² Ketla Leeme Silok ik lok ngan Lentupe ria. Ne Moroa rak ni Lurutu See Pe. ²³ Neni naba lox asongot di mumu mo leveloklok kakapmek atnedi. La ni naba sele utut di mumu mo libilinga atnedi. Leeme Silok ne Moroa atnedik naba lok pes axap tino di.

95

Loxompixan Emi Asu

¹ Ude nimi, ata emi asu mi Leeme Silok! Atak pixan mi leklek ti ne Moroa, neni ua ik lok see atnedik! ² Ata vot saparav i mi levelinga rotong avukat la atak pixan lengkompixan leklek la emi asu rin. ³ Atla Leeme Silok neni Lanaraavuk ne Moroa. Neni Loorong Silok i lolos kimit axap levenmoroa xaxarang. ⁴ Neni im gomgonga mavana axap at lavatbung menemen, tuka i ro xeneng tubu at lempatbuang i si aleng, la uto xa vana at lempatkaana babaalom. ⁵ Neni im gomgonga mavana at laras no neni ga lox i. La laxangka bok no neni axa ga rudum i.

⁶ Ude nimi, la ata xis tintiding la ata ngising tin. Ata xis mi lempatgulom atdik at lemeren Leeme Silok, neni Laradi Runtudum Li atdik! ⁷ Neni ne Moroa atnedik. La neni ik lok tatao nedik limixin, ta ngan levesipsip no neni im taba luxa di.

Mo do mina rongaxaxa at ne Moroa lingina, ⁸ “Mi gutak lox ametarauat lebelen nimi, ngan lavalabat atnemi digak lox i ro Meriba, la kerekngan bok mo laaleng digak lok to at lamatbin Masa. ⁹ Diga edak minia go, la diga lok tong ia, keke i do digara ven pam lempanga silok agak lox i ridi. ¹⁰ At lavanuet sangaun maares axap, aga bele songsongot tinotno mi limixin ap mo loola. Aga lok keretna, ‘Lebelendi i onon petpes amisik basinge ia la diga rongaxa xepe levempapaase ali rak.’ ¹¹ Kuren la aga belemamao nedi la aga lok laxakaape matmatkun tinotno xeretna, ‘Dixo epovo rinotno xusu dina beles ap mo loxot loklox amas tarak.’”

96

Morox Ni Loorong Silok Ik Lok Mavana Axap

¹ Mina vixan toxompixan maxat ti Leeme Silok! Limixin at na lavatbung menemen axap, minak pixan ti Leeme Silok! ² Minak pixan ti Leeme Silok, la mina emi asu min! At levenaleng axap mina vavang mi lagale lavavang do neni ga lox asepmus nedik. ³ Mina vavang asu lisisixam teren uto at larabung mixin petpes, la mina tere limixin axap mi mo lempanga lolos neni gak lox i.

⁴ Leeme Silok, neni i silok aleng. Kuren la i epovo rinotno do leemi asu atdik tin na silok aleng. Loklox asinorong atnedik tin naba volo axap levenmoroxaxaxarang at na lavatbung menemen. ⁵ Leven moroxa ap mo levenabung mixin petpes, nedi levempooxo vanga mun. Ketla mo Leeme Silok, neni ga rudum li lempanga axap

tovana at lamavangkap. ⁶ Lisisixam mi lisisinang duk lok kangkan i. Lolos eburu mi lempanga maraanu du umsu xeneng at loogu laplavang teren. ⁷ Nemi limixin axap at lavatbung menemen, mina emi asu mi Leeme Silok. Mina emi asu mi lisisinang la lolos teren. ⁸ Leemi asu ri laasen melemelengan at Leeme Silok. Mina emu eburu mi leventamtaba atnimi la mina beles de at loogu laplavang teren. ⁹ At loxonaleng mo Laradi Melemelengan na vor asuvos, mina xis tintiding to melango ren. Lavatbung menemen axap, mina lok ngangao aleng mi lanmarat to melango ren.

¹⁰ Mina paase i ri larabung mixin axap do, “Leeme Silok, neni Loorong Silok!” Ni lavasuun teren la lavatbung menemen it kis tuxuruxun to at loxot teren la teta noxo vuk gili i. Neni naba ila mumu limixin mi lodoxoma mokmokso. ¹¹ Limixin at lavatkangka eburu mi laxalibet, minak lek! Laras, una luulung mi lomomo! Lempanga dik lok keneng taram, dinap kup momo. ¹² Levennep kangka eburu mi levempanga dik lok keneng atnimi, minak lek! La larauna ro xeneng at laxairing, dinabap kup mi leklek, ¹³ at loxonaleng Leeme Silok na vot kusu tim gomgonga lavatbung menemen. Neni nabam gomgonga limixin at lavatbung menemen mi lodoxoma mokmokso la levelinga ruturun.

97

Moroa Neni Lamgomgo Ik Lok Mavana Axap

¹ Leeme Silok neni Loorong Silok! Lavatkangka, unak lek! Nemi levesoxan kantubu at laras, mina sosoro! ² Lengkon takabu mi lubuxumin dung kan i. Neni im gomgonga limixin mi levelinga manmanton la lodoxoma avukat. ³ Laxao im gomgonga i la i kotos kepe limixin munepen min mo dik lok kangkan i. ⁴ Neni ik lox asu

lavanga i mam la i soosoo axasep lavatbung menemen. La lavatkangka i reven i la ira dede. ⁵ Lengkong kaana di xadan ngan levelumlut misiu ro melamgo at Leeme Silok, go melamgo at Leeme Silok at lavatbung menemen axap. ⁶ La laxalibet i lox asuusu i do Leeme Silok ni laradi manmanton la larabung mixin axap di reven lisisinang teren.

⁷ Ik lox amangan nedi axap no di lotu saparap laxam-pooovo vanga. Laxanmoroo xaxarang axap dit kis tintiding to melamgo at Leeme Silok. ⁸ O Leeme Silok, limixin me Saion dik lek, la laramenemen silok at leme Juda di sosoro atla u tong asu lavapaase ramtaba ina ram mi lodoxoma mokmokso. ⁹ Leeme Silok Lanaraavuk, nenu lamgomgo at lavatbung menemen axap. Nenu u silok tinotno rinedi axap levenmoroo xaxarang.

¹⁰ Leeme Silok i balamu nedi di belangatngas ti laxapmek. Neni ik lok tatao lorooro at limixin teren. Neni ik lox asepmus di basinge lolos at limixin dik lok lengkakapmek. ¹¹ Leveloklox anarong i ngan laxasep i soosoo mavana atnedi limixin manmanton. La leklek ik lok atnedi luvut-tadi avukat. ¹² Nemi limixin manmanton minak lek ap mo lempanga Leeme Silok gara lok pam i! Mina doxoma aklen ti mo lempanga ne Moroo Melemelengan gara lok pam i rinimi, la mina tong avukat tin.

98

Moroo Ni Lamgomgo At Lavatbung Menemen

¹ Mina vixan toxompixan maxat ti Leeme Silok. Neni gara lok pam lempanga maraanu! Neni gara sak tup mi limixin munepen mi lolos kaala axa ren. ² Leeme Silok ga vaase asu i do ni ga sak tup mi limixin munepen min. La neni ga vaase aronga larabung mixin axap mi mo lolos teren ti lox asepmus limixin. ³ Neni ga lox epovo

laxakaape ren ti limixin me Israel la i ruturun amisik tidi la ik lox asuusu labalamu lexen tidi. Limixin at lengkot axap digara ven pam ne Moroa atnedi ga sak tup mi limixin munepen min.

⁴ Nemi axap limixin at na lavatbung menemen, minak pixan sosoro ri Leeme Silok. Mina emi asu rin mi lempixan la luxupkup sosoro! ⁵ Minak pixan mi lengkom-pixan emi asu ri Leeme Silok! Minak sak lerengteng maraanu ro at lempat taaleng! ⁶ Minat mas lempat tu mi lengkongkidi, la minap kup mi lososoro ri Leeme Silok, ni Loorong Silok atdik.

⁷ Laras eburu mi lempanga dik lok keneng taram, mina vaas mi luxupkup. Lavatbung menemen mi lempanga axap dik lok mavana ram, minak pixan! ⁸ Laradan sen, mina pasa leventingen nimi. Lengkong kaana, minak pixan eburu mi lososoro at lemeren Leeme Silok, ⁹ atla i vot kusu nam gomgonga lavatbung menemen. Neni nabam gomgonga limixin at lavatbung menemen mi lo-doxoma mokmokso la levelinga ruturun.

99

Moraa Ni Loorong Silok Ik Lok Pana Axap

¹ Leeme Silok, neni Loorong Silok. Larabung mixin dina dede mi lanmarat. Neni it kis at loxonin orong teren mavana at lempanga raptava (cherubim) la lavatbung menemen ing nengne. ² Leeme Silok neni Lanaraavuk to xeneng Saion, neni ik lok mavana xasep tinotno ri larabung mixin axap. ³ Limixin axap dinaba emi asu mi mo laasen silok doxodok teren la dinaba tong i do, neni i melemelengan!

⁴ Loorong Silok nenu Lanaraavuk, u vavara aleng level-oklok in manton. Ugara vaxaru vam leventaangas man-manton kusu limixin diba mumu asu i ro xeneng Israel.

Ugara xip pot pam mi loklok manmanton la levelinga raturun. ⁵ Leemi asu ri Leeme Silok ne Moroa atnedik. Mina lotu saparav i ro melango at loxonin orong teren! Neni i melemelengan!

⁶ Moses mi ne Aron duga gugu ngan lumaasa ren, la ne Samuel neni ga ngising tin. Diga ngising ti Leeme Silok la neni ga lox epovo levesingising atnedi. ⁷ Neni ga paase ridi boro xeneng at lovtakabu ga baalom upana. Digang tonga res at leventaangas la levelinga neni gam taba nedi min. ⁸ O Leeme Silok, nenu ne Moroa atnema, uga lox epovo lodoxoma at limixin taram. Uga lox asuusu i ridi do nenu ne Moroa umdoma xepe lengkakapmek, la uga lox asongot nedi mumu levengkakapmek atdi. Ketla melemu uga doxoma xepe laxakapmek atnedi. ⁹ Leemi asu ri Leeme Silok ne Moroa atnedik, la ata ngising tin to at loxongkaana xaala Saion! Leeme Silok ne Moroa atnedik i melemelengan.

100

Loxompixan Emi Asu

¹ Nemi limixin at lavatbung menemen axap, minak pixan ti Leeme Silok! ² Mina lotu saparap Leeme Silok mi lososoro. Minat pot parav i mi lempixan loklok momo!

³ La mina ven kibis i do Leeme Silok neni ne Moroa. Neni ga rudum dik, la nedik ateran akmokso. Nedik limixin teren, nedik laxasipsip teren. ⁴ Minak beles at langas povolo ukeneng at loogu laplavang mi leventamtaba ri tong avukat tin. Minak beles eburu mi leemi asu rin uto xeneng at lenep tongtonga linga ren. Mina tong avukat tin la mina vemi asu min. ⁵ Leeme Silok, neni i lox avukat. Labalamu ren ik lox amisik la luruturun teren ti limixin naba nemen amisik la noxo xap.

101

Laxakaape At Loorong At Leme Israel

¹ O Leeme Silok. Loxompixan tarak i paase mumu labalamu ram la um gomgonga limixin at langas in manton. La nia anak pixan emi asu minu. ² Loklok tarak nabap sepse. Ningisa ba unaba vot pasa ia? Lorooro rak naba dadat to xeneng at loogu rak, ³ la anoxo esuuxun mi laxapmek. Nia ak lox angtungun ti leveloklok atnedi limixin tongtonga xepe. Nia a noxot kis esogo rinotno bok ba eburu minedi. ⁴ Anoxo babala vukpuk, la anoxo emu mi limixin kapmek. ⁵ Anaba riki xepe nege di, di vepaase siksikma xapmek mumu lentaba vetpes. A belengatngas ti taradi loklox aaso la im simi aurur i.

⁶ Anaba siam kaka nedi di ruturun tu la anaba siam abeles nedi xusu dinabak lok eburu minia ro xeneng at loogu rak. La nedi ua dixo babala vukpuk, anaba siam ka di xusu dina gugu ria.

⁷ Naba xopmen tetadi xaxarang naba nemen eburu minia ro xeneng at loogu rak. La xopmen tinotno tetadi sosolom naba nemen saparav ia. ⁸ At levenaleng amisik anaba sesele utut limixin ua dik lok leveloklok kapmek keneng at lenep kangka atnema. Anaba saksu minedi lorooro atdi i bilinga rino uto xamang basinge lemenemen silok taram.

102

Lisingising At Laradi Mumu Lumumuat Teren

¹ O Leeme Silok, una ronga lerengteng tarak la una lox epovo lisingising tarak ti loklok tooro ram tia. ² Uguta raba rulu ia at loxonaleng ak lok at lumumuat. At loxonaleng ana ro ke ram, una ronga res tarak la una lox epovo soso levesingising tarak!

³ Lorooro rak na i sonao ngan lusuxa. La lanmet tarak i anan labantuxu rak ngan laxao. ⁴ Limixin munepen minia dip sev asi ia ngan levempivilis mang, la lavavara anan tarak ira xap pam. ⁵ Nia at mes silok tinotno. Labaaxin tarak ira gelegen axap la labantuxu rak na ira vaa nga at laxasi. ⁶ A lok ngan lavatpixa aaxa no xeneng at lamatbin, a lok ngan bok lavatdudu i nemen kusuk to at lemenemen ira bin pam. ⁷ Axo vunga at lengkanimin. Ak lok ngan tinotno lapka ik lok tutulu kap to vana at loogu. ⁸ At laxanaleng axap limixin munepen minia di paase vupuria. La nedi ua di paase aksaksa ria, di tong laasen tarak at loxonaleng di paase asi lentaba vetpes.

⁹⁻¹⁰ La mumu i mo lebelemamao silok taram, laxakup i lok ngan ta leveluxa rak, la a inin elong levendan inin mi levengkabili dan at luxatli rak. Uga rebeng kaka ia la uga lu xepe minia. ¹¹ Lorooro rak i lok ngan ta lamamau ukantinao noxo nemen abao. A lok ngan tinotno levempivilis mang.

¹² Ketla nenu Leeme Silok, unaba nemen amisik ngan Loorong Avolo. Lavaola axap dinabam domasu ram. ¹³ Unaba ravasu la una lox aru amu lemenemen Saion. Loxonaleng ira vot pam kusu tu ri lox asuusu lebelen tuntun tin, loxonaleng mokmokso nga na ren. ¹⁴ Lavasaxaruki ram di vavara aleng i, keke i do limixin petpes diga sele utur i la ira bin ta. La keke i do mo lemenemen ira lok kapmek axap pam, ketla move lebelendi i tu aleng i.

¹⁵ Larabung mixin axap dinaba marat taram, Leeme Silok. La lavaorong axap at lavatbung menemen dinaba marat at lolos taram. ¹⁶ Nenu Leeme Silok, unaba vaxaru amlong lemenemen Saion, kerepmo nenu unaba lox asaxaven lolos taram. ¹⁷ Nenu unaba rongga res atnedi limixin taram di baava, la unaba lox epovo levesingising atnedi.

¹⁸ I epovo do tara na malagan li mo lempanga nenu, Leeme Silok, uga lox i xusu mo lavaola melemu diba utus i, la dinaba emi asu minu. ¹⁹ Nenu, Leeme Silok, uga reven su boro vana at lenep kaala ram. Uga reven su boro vana at lemenemen taram ude xopok at lavatbung menemen. ²⁰ Uga rongga lanteng atdi digak lok at loogu xokoxo la uga lox asepmus nedi ua limixin petpes diga lok do dina sev amet nedi. ²¹ Kuren la limixin dinabap kip aurut laasen taram to Saion, la dinaba emi asu minu ro xeneng Jerusalem. ²² Ap mo loxonaleng levenabung mixin axap eburu mi limixin at levengkitkis orong dinaba etu buru la dina lotu saparav u, Leeme Silok.

²³ Kovisi nia ana sioxo la ura lox amolos pam ia. Ura lox atmut pam lorooro rak. ²⁴ O Moroa, kovisi nia ana sioxo la uguta lok kepe soso ia.

O Leeme Silok, nenu u rooro amisik. ²⁵ Uga rudum li lavatbung menemen ganoxa, la uga lok laxalibet mi lukngam akmokso. ²⁶ Mo lempanga naba sonao, ketla nenu unaba nemen amisik. Dinaba maut ngan lenbantamon. Unaba lu asu midi ngan lenbantamon, la dina sonao. ²⁷ Ketla levelinga ram kopmen nak lox ekun, la lorooro ram noxo xap. ²⁸ Laxamdak mi laxaalik atnema dinaba nemen avukat atla unabak lok see atdi. Levempipisik li atnedi dinaba rooro avukat mun.

103

Labalamu At Ne Moroa

¹ Labalak, una emi asu mi Leeme Silok! Lorooro axap tarak, una emi asu mi laasen kaala ren! ² Labalak, una emi asu mi Leeme Silok, la uguta domampe na leveloklox anarong ik lox asuusu i. ³ Neni i doxoma xepe lengkakapmek axap tarak la ni i lok kepe levenanmeres axap tarak. ⁴ Ik lox asepsu ia basinge lamaaut la ik lox anarong ia

mi labalamu la lebelen tuntun. ⁵ Ik suxa lorooro rak mi lempanga avukat, kusu anaba nemen ngan laau la ana lolos ngan lamaalom.

⁶ Leeme Silok i tu at lenep at limixin baava la ik lox asepmus nedi ua limixin di lox asi di. ⁷ Neni ga lox asuusu leven doxoma ali ren ti ne Moses la ni ga lok leme Israel kusu dina ven leven gugu lolos teren. ⁸ Leeme Silok neni laradi at lebelen tuntun la labalamu, la ixok belemamao soso ketla i umsu mi labalamu lexen. ⁹ Ni noxo paase lolos amisik, la lebelemamao ren noxo nemen amisik. ¹⁰ I epovo xusu atap kip ka leveloklox asongot teren, ketla neni xopmen nak lox asongot nedik na epovo mi levengkakapmek atnedik. La ixo porang leveng kakapmek la leveloklok bilinga atdik.

¹¹ La labalamu ren i urutan aleng upana at lamavangkap mavana at lavatbung menemen la kerepmo labalamu ren i silok aleng tinedi ua dit kis esogo min. ¹² La ik lok kepe leveloklok bilinga atdik uto vaxalom tino, i ngan utonak at lemeren laxangking la utois kopok tino. ¹³ I ngan ne temen laxamdak mi laxaalik i lox asuusu lebelen tuntun tidi. I lok ngan bok Leeme Silok i lox asuusu lebelen tuntun tinedi ua dit kis esogo min. ¹⁴ Neni iklen i do ga rudum dik mi lavanga salai. Iklen i do nedik laxakup mene nga.

¹⁵ Kuren la nedik, lorooro atnedik i lok ngan mun lempivilis. Nedik ta suusu la ta tepoposok ngan levempusuvus aaxa. ¹⁶ La lamanman it mas i la ira vaxap manga, la ata noxo ven ka bok ba i. ¹⁷ Ketla nedi di mumu asu Leeme Silok, labalamu ren ik lox amisik mavana atnedi. La luvukat teren ik lox amisik tinedi lavaola axap, ¹⁸ la tinedi bok di ruturun ti lekabus teren la ding tonga res tuturun amisik at levempapaase ali ren.

¹⁹ Leeme Silok ga vuxaxis li loxot kitkis teren to vana at laxalibet. La neni i ngan Loorong Silok mavana at

lempanga axap. ²⁰ Nemi lubung angelo lolos, mina emi asu mi Leeme Silok. La nemi bok ua ming tonga res at levempapaase ali ren, la ming tonga lempanga neni i tong i. ²¹ Nemi limixin lolos axap to vana at laxalibet, mina emi asu mi Leeme Silok. La nemi bok lavasaxaruki ren no mik lok leven gugu mu asu lavavara ren. ²² Nemi lempanga vipis axap teren at lengkot axap neni ik lok gomgo ren, mina emi asu mi Leeme Silok.

Labalak, una emi asu mi Leeme Silok!

104

Leemi Asu Ri Laradi Runtudum Li

¹ Labalak, una emi asu mi Leeme Silok! O Leeme Silok, Moroa rak, u nunuan aleng pologat! Ung sigaara mi lisixam la lisisinang. ² U bom u mi laxasep. Uga rep asala laxalibet ngan ta loogu kadis ³ la uga vaxaru loogu silok tu ro mavana at ladan ik lok tovana. La ut kis to mavana at lengkon takabu ngan lagengen taram la lamanman it mas aonon u. ⁴ Uk lok luvuttadi loklok ka linga ram di lok ngan laramera manman la lavasaxaruki ram di lok ngan laxao at lavanga i mam.

⁵ Ugara vaxaxis li atmatkun pam lavatkangka to vana at laamkumkun teren, la ixo epovo do tara na ut asi bok ba i. ⁶ Uga lok li laras to mavana ren ngan labantamon, la ladan gak mit lempat kaana. ⁷ At loxonaleng uga vaase sok laradan, diga sixiro. Diga ekakala oo at loxonaleng diga rong levelinga lolos taram. ⁸ Digam tem soobang su boro vana at lempat kaana la uto xopok at larasa, ugo ap mo loxot nenu uga lok li i xusu tidi. ⁹ Uga lok li lapdopdo mo nedi di noxo los polo i, tik lok pe di xusu di noxo sak pavaa bok ba lavatkangka.

¹⁰ Uga lok levempuuvut dan i sesen to at larasa, la lempat dan silok i sesen kantubu at levengkaana.

¹¹ Dik lox asuusu levendan ti levempanga sio mi lavanuet

kangkededk atdi. Laxan dongki sio dik lox axap lanminu atdi go. ¹² La lavapixa dip kip levempotpos atdi, go at larauna at larasigege dan la dirak pixan.

¹³ La uk lox asu larakabu boro vana at laxalibet uto vana at lengkong kaana, la lavatkangka i unumsu mi leveloklox anarong taram. ¹⁴ Uk lox asuusu levempivilis ti laxan bulumaxao la levempanga suusu ri limixin, la kusu dibat lotlo bok leveluxa ridi, ¹⁵ la dinak lox asuusu leven vaen tik lox amomo di, la levenmonok dan olip nabak lox aklek di, la leng kongkide nabam taba di mi lolos.

¹⁶ Laxanbet it pot solo at lempar una Seda (Cedar) ro Lebanon, mo laxanuna at Leeme Silok axa gatlo li di.

¹⁷ La lavapixa dik lok laraogu atnedi go. La lempatboxon dip kip levempotpos atdi ro at larauna kaa (fir tree).

¹⁸ Laxanme sio dik lok to vana rubu at lempatkaana, la lempat pusi sio di lipe ro xeneng at lempat buang.

¹⁹ Uga rudum li lagaaling kusu tik lok katling leven gaaling. La laxangking ikleklen loxonaleng teren ti lotup.

²⁰ Uga lok laxanimin, la keneng ap mo lamain, laxampanga sio axap dip tvasu. ²¹ Levelaion maxat di booro lolos at loxonaleng di puse luxa. Di puse ri mo levempanga anan no ne Moroa im taba i. ²² La do laxangking na rip su, dimlomlong la dirak midi ro at lempatmamara atdi. ²³ Melemu limixin dip tvasu xusu tik lok leven gugu atdi la dira gugu abung tino.

²⁴ O Leeme Silok. Ugara rudum li vam laxampanga solo. Mi lakleklen silok taram uga lok di. Lavatbung menemen i umsu mi laxampanga vipis axap taram. ²⁵ Pen ba mo laras, i silok tinotno la ip teplas, la i umsu mi mo lara met panga vipis silok la lixilik ua ata xo epovo ri exes i, di nemen teren. ²⁶ La lempatmon di sesen to vana ren, la mo lavatpanga sio boro at laras, ne Levietan no nenu uga lox i, i gosogos go xeneng ap mo laras.

²⁷ Nedi axap na di nunu li ram kusu unabam taba luxa di mo do dinak toxo. ²⁸ Nu um taba luxa di la di vanan i. Nenu um taba leveluxa xusu tik lox axap lavavara atdi. ²⁹ Mo do u raba rulu di, dik marat. Mo do una lok pes lamamas taram atdi, di remet la diramlomlong ti laxakup no nedi diga ravasu ren. ³⁰ At loxonaleng u rudum di, u raba di mi lamamas taram, la di ruuna ka lorooro. La lempanga axap di ravasu at na lavatbung menemen, um taba di mi lorooro maxat.

³¹ Naba lox avukat do lisisixam at Leeme Silok naba nemen amisik la kopmen tekavaxap teren! Naba lox avukat do Leeme Silok na momo mi lempanga neni ga rudum pam i! ³² Neni i reven tooro lavatbung menemen la lavatbung menemen ing nengne. Neni inglong tu at lempat kaana, la dirap kip soobang asu lusuxa.

³³ Anabak pixan ti Leeme Silok keneng at lorooro axap tarak. At levenaleng nia ana rooro ren, anabak pixan emi asu ri ne Moroa rak. ³⁴ A vara i do ni naba momo at lengkom pixan tarak, atla leklek tarak i laala boro ren. ³⁵ A vara i xusu limixin kapmek dina sonao basinge na lavatbung menemen, la noxopmen bok ba timixin kapmek.

Labalak, una emi asu mi Leeme Silok!
Leemi asu ri Leeme Silok!

105

Moraa Ga Lok Tatao Limixin Teren Me Israel

¹ Nedik ata tong avukat ti Leeme Silok, ata tong asu laasen silok teren. Ata tong axasev i ri levenabung mixin buaang, mumu lempanga sangsangu neni ira lok pam i. ² Atak pixan emi asu ri Leeme Silok. Ata tong asu lempanga nunuan neni ira lok pam i. ³ Ata momo mila nedik ateren. La nedi di lotu parav i mi lebelendi axap dina sosoro. ⁴ Atat pas parap Leeme Silok atdik kusu ti lok

ka leveloklok tooro, la ata lotu parap amisix i. ⁵⁻⁶ Nemi livipisik li at ne Abaram, laradi gugu at ne Moroa, la nemi livipisik li at ne Jakop, mo laradi ne Moroa ga soxolik ka i. Minam doma aklen ti lempanga sangsangu ne Moroa ga lox i, la mo levenmumuat neni ga raba limixin munepen min.

⁷ Leeme Silok neni ne Moroa atdik. La mo levempa-paase ali ren ti limixin axap at na lavatbung menemen. ⁸ At levenaleng axap i tu melamgo neni naba tu at lekabus teren, la naba lox epovo mo leveng kakaape ren tinedi larabin sangaun kobot laraola, mo naba vot melemu. ⁹ Neni naba doma amisik livirivit li ni ga lox i mi ne Abaram la mo laxakaape ren ti ne Isak. ¹⁰ Leeme Silok ga lok lekabus mi ne Jakop, mo lekabus ua naba nemen amisik la noxo xap. ¹¹ Ni ga lok ti ne Jakop keretna, “Nia anaba raba u mi na lenep silok Kanan, la na lenep kangka naba nemen ngan ataram axa.”

¹² Limixin at ne Moroa di goxo buaang, la diga nemen kading ngan lavaose to at lenep silok Kanan. ¹³ Diga vovo saasaa onon mun at levennep silok uto at levennep silok petpes, la at lara kitkis orong silok uto at lara kitkis orong silok petpes. ¹⁴ Ketla ne Moroa goxo ke xepe ba tara gita lox abaava nedi. Neni ga lok see atnedi, la ga sak pinak lavaorong silok mi levelinga i lok keretna, ¹⁵ “Nemen gat mita lox asongot limixin soksoxolik tarak. La nemen gat bok mita lox asongot lavaeme vapaase ali rak.”

¹⁶ Leeme Silok ga riki asi lean kangking ti mo lenep kangka at limixin teren, la leveluxa atdi gara xap pam. ¹⁷ Ketla neni ga riki amgo lara laradi uto Isip, laasen teren ne Josep, mo diga sesep min kusu naba ravasu ngan lasaxaruki go. ¹⁸ Diga xoxo alis luxangkedek teren mi lemparoos sen, la diga vaxa onga i mi loxon aen. ¹⁹ Josep ga nemen ngan laradi xokoxo, ga se ap mo laaleng

lavapaase ali ren ga soorun. Levelinga at Leeme Silok ti ne Josep ga lox asusu i do neni goxo raba rulu i. ²⁰ Loorong me Isip ga soxomus asu i, ni lamgomgo at levenabung mixin buaang la ga lox asepmus i. ²¹ Neni ga lok li ne Josep kusu nam gomgonga lagavaman teren. La ga lok li box i ri lok tatao mavana ap mo lenep silok Isip. ²² Ni ga ruuna lolos mavana atdi lentaba luvuttadi amgomgo at loorong la gak lok ka bok levelinga ren kusu ti anasa luvuttadi vapaase at loorong.

²³ Melemu ne Jakop eburu mi limixin teren diga beles ukeneng Isip, la digara nemen ta go ap mo lenep silok.

²⁴ La Leeme Silok ga lox avosok aleng nedi go, la ga lok nedi diga lolos aleng tinotno ri limixin munepen midi.

²⁵ Neni ga lok limixin me Isip diga bele mumuat ti limixin teren, nedi lavasaxaruki ren. La leme Isip diga xarang arup amisik di.

²⁶ Melemu Leeme Silok ga riki ne Moses, lasaxaruki ren uto ri limixin teren, la ga riki bok ne Aron, mo neni ga soxolik ka i. ²⁷ Duga lok leveloklok katling at ne Moroa kantubu atdi, la lempanga sangsangu bok teren keneng at lenep silok Isip. ²⁸ Neni ga riki lamain bonot la ga lox amain axap mo lenep kangka. Ketla leme Isip move diga rongaxepe levelinga ren. ²⁹ Neni ga vuk gili laradan atdi ri lada, la laxanmat axap digara met. ³⁰ La lenep kangka atdi ga umsu mi laxangkoak, mo digat los beles bok uto xeneng at lengkot mikmidi at lubang amgomgo. ³¹ La ne Moroa ga tong i, la laxanulang mi laxan ngirobo diga umsu aleng ap mo lenep silok axap.

³² La ni ga lok pe larakabu ketla ga riki lavatbet uat eburu mi lavanga ga mam, ukeneng ap mo lenep silok atdi.

³³ La ni gak paksa asi larauna vaen atdi, eburu mi larauna pik (fig) bok la ga lox asubu bok larauna axap. ³⁴ Neni ga tong mun i la, laxasixu diga vot, ga buaang aleng la di goxo

epovo rinotno kusu ti exes di, ³⁵ diga van axap lempanga ga suusu at laxangka. La diga van axap bok lempanga digat lotlo i. ³⁶ Neni ga sev amet axap laxamdak temes avot keneng at lara kitkis koetemen to Isip.

³⁷ Melemu neni ga lam asu limixin me Israel, digap kip ka laxa siliva la gol at leme Isip, la nedi axap diga rooro nunuan la diga lolos. ³⁸ Limixin me Isip diga momo aleng at limixin me Israel diga vas kaxat basinge di, mila diga marat aleng atdi. ³⁹ Moroa ga vung pavaa nedi mi loxontakabu kusu ti lok tatao di, la lababao at laxao ti raba nedi mi laxasep at lengkanimin. ⁴⁰ Diga sing ne Moroa, la neni ga raba nedi mi levempixa (quail) kusu tidi ri anan, la ga raba avan mais nedi mi lengkide boro vana at laxalibet. ⁴¹ Neni ga lox arem suang lara lavaruat, la ladan ga rem soobang su ukamang. Ga ngan lavatdan sen la ga sesen go xeneng at lamatbin. ⁴² Mila neni gam doma mo laxakaape xaala ren, ga raba i ri ne Abaram, laradi gugu ren.

⁴³ Kerepmo neni ga lam asu limixin soksoxolik teren basinge lenep silok Isip, mi langsung lososoro, la digak pikan la digap kup momo. ⁴⁴ Neni ga raba nedi mi lenep kangka at lentaba levenabung mixin petpes, la digara ruuna ka nga leventaamang atdi, ⁴⁵ kusu limixin teren diba ronga res at levempapaase ali ren, la dina mumu asu Laulis Linga la leventaangas axap teren.

Leemi asu ri Leeme Silok.

106

Leveloklok Anarong At Leeme Silok Ti Limixin Teren

¹ Leemi asu ri Leeme Silok.

Ata tong avukat ti Leeme Silok, mila neni mun i lox avukat, la labalamu ren naba nemen amisik. ² Kopmen tara i epovo na tong axap leven angangan lempanga silok neni gara lok pam i. Kopmen tara i epovo xusu naba lox

epovo lodoxoma ren mi leemi asu rin. ³Nedi dinang tonga res at levempapaase ali at ne Moroa la dinak lox amisik lempanga ik mokso, Moroa naba lox anarong di.

⁴ O Leeme Silok. Uguta domampe ia, mo do una lok tooro limixin taram. Una us abeles box ia ukeneng at limixin taram, mo do una lox asepsu di. ⁵ Una ke ia aba ven limixin taram dinaba ngasang kobot, la ana ruuna bok tomomo eburu minedi la anak lok eburu bok midi xusu ti emi asu minu.

⁶ Nema marak lok pam laxakapmek kerekngan lavalabat atnama diga lox i. Mara soogong pam la mara bixurun. ⁷ Lavalabat atnama di goxo xasep nunuan at lempanga sangsangu neni ga lox i ro Isip. Diga domampe mo levenaleng buaang neni ga lox asuusu labalamu ren tidi. La digang tonga viribang tin, Lanaraavuk to at Loxontas Memele. ⁸ Ketla Leeme Silok ga lox asepsu di go kusu ti lox asilok laasen teren, la ni ga lox asuusu mo langsung lolos teren. ⁹ Neni ga tong mun i ri Loxontas Memele, la laras gara mes ta, la neni ga lam avolo limixin teren at laxangka mesemes. ¹⁰ Neni ga lok tooro di basinge limixin munepen midi, la ga lox asepsu di basinge limixin esep boro Isip. ¹¹ Laras ga vula pe axap di, la kopmen tinotno tara ga roo su basinge laniu. ¹² Kuren la limixin teren diga nunu at leveng kakaape ren, la digak pixan emi asu min.

¹³ Ketla diga domampe soso mun lempanga silok ne Moroa ga lox i, la di goxo ngangais ba ri tevelinga axasep teren. ¹⁴ To at lamatbin diga umsu aleng mi langaongao anan, la diga lok tong pen ne Moroa. ¹⁵ Kuren la neni ga raba nedi mi levempanga nedi diga sing tin, ketla neni ga sep bok nedi mi lanmeres kapmek.

¹⁶ La to bok at lamatbin diga tere mumu aleng ne Moses, la ne Aron, ni lamaasa kaala at Leeme Silok. ¹⁷ Melelu lavatkangka ga rem suang la ga xonom ne Datan, la garak

mit bok ne Abiram midi loxoetemen. ¹⁸ La laxao ga si boro vana la ukopok tinedi diga mumu asu du, la ga rin asonao axap mo luvuttadi.

¹⁹ Melemu leme Israel diga lok lovovo at lubulumaxao maxat to Sinai, la digara lotu parav i ngan mo lomoroa xaxarang. ²⁰ Diga sok sisixe ne Moroa mo i silok aleng la diga xap ti lotu saparav i, la diga lotu parap mo lovovo at lubulumaxao, mo i anan pivilis. ²¹ Diga domampe rinotno ne Moroa mo ga lox asu di, mi levempanga silok teren to Isip. ²² Diga domampe mo lempanga nunuan, neni ga lox i go, la lempanga sangsangu neni ga lox i ro at Loxontas Memele. ²³ Melemu ne Moroa ga lok do naba sele utut kepe limixin teren. Ketla laradi gugu ren ne Moses, mo ni ga soxolik ka i, ga vaase pe ne Moroa xusu noxo lox asuusu lebelemamao ren tidi.

²⁴ Melemu diga sok tixirixes kepe mo lenep kangka avukat, mila di goxo nunu at laxakaape at ne Moroa. ²⁵ Digak lok to xeneng at laraogu kadis atdi la digara gagalinga amisik la di goxo ronga ba levelinga at Leeme Silok. ²⁶ Kuren la neni ga xaape rinedi mi luruturun do ni naba lok nedi dina remet to at lamatbin. ²⁷ La na lok livipisik li atdi, dina epeseves ti levenabung mixin petpes la na ke xepe nedi, dina remet etaba onon to at levenep silok petpes.

²⁸ Melemu nedi limixin at ne Moroa digak lok to Pior, diga lotu saparap lomoroa xaxarang ne Baal la digara anan leventamtaba digap lavang min ti lenmoroa kopmen torooro atdi. ²⁹ Kuren la diga lox axatu lebelemamao at Leeme Silok mi leventuptuvuk kapmek atdi, la langsung lanmeres kapmek ga vot kantubu atdi. ³⁰ Ketla ne Penias ga ru upana la ga sev amet mo luradi xapmek la mo lanmeres ga xap ta. ³¹ Na lavanga avukat, ne Penias ga

lox i, move limixin at ne Moroa dim doma i. La dinabam doma su bok teren at na levenaleng i tu umelamgo.

³² Melemu diga lox amusak Leeme Silok to Meriba at levempuuvut dan. La ne Moses ga xip tutu mi mo lumumuat mumu laxakapmek atdi. ³³ Diga lox abelemamao aleng i, kuren la ni ga paase solo la ga paase tupgat ta.

Leme Israel Diga Rupot To At Lenep Kangka Ramtaba

³⁴ Leme Israel di goxo sev amet lavamolon ap lenep kangka ramtaba kerekngan Leeme Silok ga tong taba di min ti lox i. ³⁵ Ketla diga epot ka di, la diga reven seo ka loklok benben atdi. ³⁶ Limixin at ne Moroa diga lotu parap laxampoovo vanga, kuren la diga oon at levesin mumu mo loklok atdi. ³⁷ Digam taba mi laxamdak mi laxaalik atdi, ngan laplavang atdi ri levenmoroa xaxarang me Kanan. ³⁸ Diga sev amet mo laxamdak mi laxaalik ua kopmen taxakapmek atdi, la mumu mun mo langas diga lox abilinga mo lenep kangka ramtaba. ³⁹ La kerepmo bok diga lox abilinga nedi xa. Digoxo ruturen ti ne Moroa.

⁴⁰ Kuren la Leeme Silok ga belemamao aleng limixin teren, neni ga bulunga xepe rino di. ⁴¹ La neni ga raba rulu kepe di kusu lavamolon, limixin munepen minedi limixin me Israel dinabam gomgonga di. ⁴² Diga baava aleng mi levenaknixip, mo limixin munepen midi diga raba nedi min. La diga nemen aleng maxopok at lolos at levendoxoma atnedi limixin munepen. ⁴³ Buaang levenaleng Leeme Silok ga rebeng asu ka limixin teren basinge di. Ketla move digang tonga xepe levelinga ren, la digam subu tup tino ukeneng at laxakapmek silok. ⁴⁴ Ketla Leeme Silok ga ronga nedi, at loxonaleng digang teng tin, la neni ga ronga xibis lumumuat atdi. ⁴⁵ Mumu mo lumumuat atdi, neni ga doma mo lekabus teren. La mumu langsung labalamu ren, neni ga lox ekun lodoxoma ren.

⁴⁶ La neni ga lok limixin munepen midi, diga suma xapmek mumu loklok diga lox i ridi.

⁴⁷ O Leeme Silok ne Moroa atnama. Lox asepsu nama, la una lam asu nama boro xantubu at na larabung mixin, kusu maba tong avukat tu la mana emi asu mi laasen kaala ram. ⁴⁸ Leemi asu ri Leeme Silok, Moroa me Israel. Leemi asu rin monga la at levenaleng axap. La limixin axap dina vaase xeretna, “Tuturun!” Leemi asu ri Leeme Silok!

107

Leemi Asu Ri Ne Moroa Mumu Labalamu Ren

¹ Nedik ata tong avukat ti Leeme Silok mila neni axa i lok nunuan. Labalamu ren naba tu lexen! ² Nemi axap ua neni ga lox asepsu nimi, mina tong amisik na levelinga ti emi asu mi Leeme Silok i lok keretna, “Labalamu ren naba tu lexen!” Neni ga lox asu ka nimi basinge limixin munepen minimi, ³ la gara lam amlong nimi ude boro at levenabung mixin petpes, at lenep meso la mesi la boro bok at lenep mero la mexun.

⁴ Lentaba diga soronga ro at lamatbin aaxa la di goxo epovo xusu dina vuse ka tangas tidi uto at temenemen silok kusu diba nemen e. ⁵ Nedi digak toxo la digak minu, la diga doma i do, di mo dina seeve nga. ⁶ Melemu diga ro ke at Leeme Silok mumu lumumuat atdi, la neni ga lox asu di basinge lixitkis etaba. ⁷ La neni ga lam nedi at langas manmanton uto at lemenemen silok, la diga nemen e. ⁸ Kuren la ik mokso do dina tong avukat ti Leeme Silok mumu mo labalamu lexen teren, la ri lempanga nunuan neni gara lok pam i ridi. ⁹ Atla Leeme Silok im taba dan limixin dik minu, la im taba nedi dik toxo mi lempanga anan avukat.

¹⁰ Lentaba vetpes digang songot keneng at lamain bonot ngan luvuttadi xokoxo, mo diga xoxo nedi mi

levenoos sen. ¹¹ Digak lok go mila diga rongga viribang at levempapaase ali at ne Moroa, ni Lanaraavuk. La diga sok tixirixes xepe levenanasa ren. ¹² Kuren la ni ga lox abaava rinotno di mi laxan gugu solo, la digak sak saaban, la goxopmen tara go ri lok tooro di. ¹³ La melemu diga ro ke at Leeme Silok at levenaleng at levenmumuat la neni ga lox asepmus di basinge mo labaava. ¹⁴ Neni ga lam asu nedi basinge lamain la loxokoxo, la ga ba koxorop pes levenoos sen basinge di. ¹⁵ Kuren la ik mokso do dina tong avukat ti Leeme Silok mumu mo labalamu lexen teren, la lempanga nunuan neni gara lok pam i ridi. ¹⁶ Neni i tit dadas asi lempatban silok limixin dik lox i mi loborons (bronze), la i tit amdanda lengkompanga soksoxoba matmatkun dik lox i mi la aen.

¹⁷ Lentaba vetpes diga lok ngan ta luvuttadi baulang, la diga xip levesongsongot mumu leveloklok kakapmek la leventaangas kapmek atdi. ¹⁸ Digak bulunga levempanga anan, la ma lixilik diga lok do dina met. ¹⁹ Melemu diga ro ke at Leeme Silok mumu levenmumuat digap kiv i, la neni ga lox asepmus di basinge mo levenaknixip. ²⁰ Neni ga tong asu levelinga ren ti lok pes leven anmeres atdi, la neni ga lox asepsu di basinge lanmet. ²¹ Ik mokso do nedi dina tong avukat ti Leeme Silok, mumu mo labalamu lexen teren, la mo lempanga nunuan neni gara lox pam i ridi. ²² Ik mokso do dina tong avukat ti Leeme Silok la dina raba i mi leventamtaba eburu mi livikpixon momo, mo naba tong asu mo lempanga neni ga lok pam i.

²³ Lentaba vetpes diga sen tangtagap mi lempatmon to at laras aaxa, kusu dina ruuna kaka lempilas ap mo lugugu atdi rovana at lempatmon. ²⁴ Diga ven lempanga sangsangu Leeme Silok ga lox i mi mo lolos teren to at laras. Mo lempanga ga nunuan aleng. ²⁵ Neni ga vaase, la ga lok kaxat mo langsgangan lamanman silok, mo ga

lox axatu kaxat lempo paxanao. ²⁶ Lempopaxanao ga xip kaxat mo lempatmon upana xasep la ukopok tino. La mumu mo laniu di goxo doma abelemes bok ba do diba roo. ²⁷ Diga saaban onon la digat pas tangtangu ngan diga inin lengkadan lolos. Di goxo epovo na lok tavanga, keke i do lakleklen solo mo atdi.

²⁸ Melemu diga ro ke at Leeme Silok mumu mo leven-mumuat atdi, la neni ga lox asu nedi basinge mo laniu. ²⁹ Neni ga lox amila lamanman bet la garak lox atnaasan ta, la lempotas at laras bok digak midi mila. ³⁰ Diga momo aleng at lavanga ga mila, la neni ga mu asu lavavara atdi diga oso avukat to at losoolom. ³¹ Ik mokso do dina emi asu mi Leeme Silok, mumu labalamu lexen teren la lempanga nunuan neni ga lok pam i ridi. ³² Ik mokso do dina tong asu laasen silok teren keneng at lovotpot buru at limixin, la dina emi asu min kantubu at lovotpot buru at luvuttadi amgomgo.

³³ Leeme Silok ga vuk gili leven menemen dan ga ngan ta lamatbin patmang. La lengkondan i puuvut su, neni ga lox amesemes i, ³⁴ la laxangka liliun neni ga lox i ga ngan ta lomontep. Neni ga lok na lempanga mumu laxapmek atnedi diga nemen go ap mo leven menemen dan.

³⁵ Melemu neni ga ba gili lamatbin patmang, ga ngan manga lengkodan i puuvut su, la neni ga lox asen amu laradan sen go ap mo lenep. ³⁶ Neni ga siam avolo limixin digak pakes ti lempanga anan kusu dina nemen go, la diga xip lemenemen silok tidi ri nemen e. ³⁷ Digat lotlo leven-taamang la laxanoos vaen, la digap sepkin aleng. ³⁸ Neni ga lox anarong nedi limixin teren, la diga vosok aleng. Neni goxo ke xepe ba levesipsip mi levenbulumaxao atdi gita mun pipisik.

³⁹ Melemu limixin munepen diga sak tup mi mo limixin at ne Moroa la diga lox amangan nedi, la diga lox abaava

aleng nedi mi leven aknixip la levesongsongot silok. ⁴⁰ Ketla ne Moroa ga lox asongot nedi limixin munepen. Ni ga riki di uto at lamatbin aaxa kusu dina soronga go. ⁴¹ Ketla neni ga lam aase mo limixin pakpakes teren, basinge levenmumuat atdi. La ga lox anarong di kusu dina vosok aleng ngan laxasipsip. ⁴² Do limixin manmanton dina ven i na, dina momo, ketla nedi limixin kapmek dinaba vamus levenngusno atdi.

⁴³ Do nege lodoxoma ren i xasep nunuan, ni na doma mumu i na lempanga, la na doma mumu avukat bok labalamu lexen at Leeme Silok.

108

Lisingising Ti Loklok Tooro Keneng At Leesep

¹ O Moroa, labalak it kis saga ram. Anak pixan tu, la ana emi asu minu.

Labalak, una aus! ² Loxontaaleng tarak mi ligita, muna gagas. Nia anaba sak aus laxangking at labara kooxot mi loxompixan. ³ O Leeme Silok. Ana tong avukat tu kantubu at larabung mixin axap, la anabak pixan emi asu minu kantubu at limixin axap. ⁴ Mila labalamu lexen taram i silok aleng tinotno, la i umsu bok to mavana at laxalibet. La luruturun taram i suxuna axap lamavangkap.

⁵ O Moroa, una lox asuusu lolos taram tovana at lamavangkap, la una lox asuusu bok lisisixam taram to at lengkot axap at na lavatbung menemen. ⁶ Una rebeng nama mi lolos taram la una lox asepsu nama basinge limixin munepen minama. La una sep siam at lisingising tarak, kusu una lox asu ka nema limixin taram, mo u balamu nama, basinge limixin munepen minama.

⁷ To at loogu xaala ren Moroa ga tong i xeretna, “Nia anaba sak tup mi limixin munepen minia la ana sak epeseves di basinge lenep kangka rak. Nia anabapdo epes

nom lemenemen Sekem ti limixin tarak, la anapdo episa mo lasa ro Sukot tidi. ⁸ Nia a ruuna mo lunep Gileat la Manase, la lenep Epraem bok ni lavatkiam tarak i tu katling ia at leesepe. La lenep Juda ik lox asuusu lubang amgomgo ri limixin tarak. ⁹ Ketla lenep Moap naba lok ngan lavattingtigon gosogos panga. Nia anaba lu mi luxompanga vatpas tarak uto at lenep Edom, ngan loklok katling do nia a ruuna i. At laaleng nia anaba sak tup mi limixin me Pilistia, anabap kup mi lomomo.”

¹⁰ O Moroa, nege bamgo ria uto at lenep silok Edom? Nege ba lok tooro ia xusu ana sak tup midi ro at lemene-men silok atdi, mo diga bos kangkan i mi larangas uat?

¹¹ Kereva, ura sok sisixe xepe rino vam nema, limixin taram? Kereva, ixo epovo bok ba xusu una vas su eburu bok ba mi limixin esep atnema? ¹² Una lok tooro nema kusu mana sep limixin munepen, atla lolos at limixin noxo lox epovo tavanga.

¹³ Do ne Moroa na ru eburu minedik, tanaba sak tup mi limixin munepen, neni naba sev asubu di.

109

Lisingising At Laradi I Ekip Tangarang Mi Lumumuat

¹ Moroa, nenu xusuk mun, nia a emi asu minu. Nemen gat utam pamngus, ² mila limixin kapmek la limixin sosolo arup, monga di paase sox ia, la dira li laxaxarang mavana rak. ³ Di xarang taba ia, mi laxalinga belangatngas atdi. Dik sok taba parang mun ia mi levelinga la kopmen tavasuun teren. ⁴ Nia agat kis etangas eburu midi la aga ngising tidi, ketla dixo tu tooro ba ia. ⁵ Di vorang amlong lununuan tarak tidi mi laxakapmek, la lixitkis etangas tarak tidi di vorang i mi lebele ngatngas atdi.

⁶ O Moroa, una lok katling ka taradi sosolo arup, kusu ti lok li laradi munepen minia at lavapaase, la mo laradi

sosolo arup na sok taba i mi levelinga. ⁷ La do dina ronga linga ren, a vara i xusu diba vuse ka laxapmek teren. La i epovo do limixin dina ronga levesingising teren la dinaba ronga xibis i do ni laradi xapmek. ⁸ A vara i xusu levenaleng at lorooro ren na xap kot. A vara i do tara vetpes na lok ka lixitkis amgomgo ren. ⁹ A vara i do laxamdak mi laxaalik teren dina ravasu ngan lubungkarun, la latkin teren nak lok naa. ¹⁰ A vara i do laxamdak mi laxaalik teren dina lok ngan luvuttadi singising panga. A vara i xusu dina sakala su midi boro at loogu tem dadas atdi. ¹¹ A vara i do na laradi xapmek, do tevendinau go ren, mo luvuttadi na laradi xapmek ga dinau atdi, dina vot la dina lok ka axap lempanga ren. A vara i do limixin petpes bok dina lok ka mo lempanga ni ga gugu ka i. ¹² A xopara tara na lox asu loklox anare rin, kopla na balamu mo laxamdak mi laxaalik teren melemu at lanmet at ne temen di. ¹³ A vara mo livipisik li ren dina met ut, la laasen teren dina sakpun kepe i ap mo laraola melemu. ¹⁴ A vara i do laxakapmek at lavalabat teren nak lox amisik at lodoxoma at Leeme Silok, la mo laxapmek at nenen, na nemen amisik la nemen gat di guta lok pes kepe i. ¹⁵ A vara mo laxapmek atdi nak lox amisik to melamgo at Leeme Silok la neni naba ra korop asu xepe levenasen atnedi basinge lodoxoma at limixin.

¹⁶ Mo laradi xapmek goxom doma i do nak lok toloklox anare, ketla gak lox asongot limixin banbalo la gap sev amet di eburu mi limixin pakpakes la baava. ¹⁷ Neni ga vavara solo i xusu na lili lasaxaek, a vara i do mo laxasaxaek namlong mu i. Neni goxopara i xusu nak lox anarong limixin, a vara i do teta noxo lox anarong i. ¹⁸ Neni gak lok momo rik lox asaxaek limixin, ngan lasakula ren. La a vara i do mo loklox asaxaek teren na suxuna amlong i ngan ladan la ngan bok ladan momonok

i beles ukeneng at levesi ren. ¹⁹ A vara i do lasaxaek na nemen amisik eburu min ngan lavanga singsiga ren, la na ngan labanbaane diga sevut li i ren.

²⁰ O Leeme Silok. A vara i do una mu asu mo langas la una lox asongot nedi limixin munepen minia, atla di xaxarang taba ia do nia laradi xapmek. ²¹ Ketla nenu Leeme Silok la Loorong Avolo. Una lok tooro ia kerekngan uga xaape min, la una lox asu ka ia basinge di mumu labalamu nunuan taram. ²² Nenia mun laradi banbalo la pakpakes, la no xeneng at lavatpeve rak ing songot aleng tinotno. ²³ La i auret do ana sonao mun ngan lovovo at laradi laxangking i soosoo rin ukantinao, la a lok ngan mun lasku lamanman i mas kepe i. ²⁴ Luvatgulom tarak i meramun axap mila anmun anan. La labantuxu rak ira gelegen ta la ira molobe nga. ²⁵ Do limixin di ven ia, dik lok kalise ia. La do di ven kora ia, dira piripat patlak ta.

²⁶ Leeme Silok ne Moroa rak. U ruuna labalamu lexen, kuren la una lok tooro ia la una lox asepsu ia basinge limixin munepen minia. ²⁷ Una lok di dinaklen i do nenu Leeme Silok, uga lox asepsu ia basinge di. ²⁸ Diba li lasaxaek tarak, ketla nenu unaba lox anarong ia. A vara i do una lox amangan nedi limixin loklox asongot kusu nenia, lasaxaruki ram anaba lok momo. ²⁹ A vara i do limixin munepen minia dinaba ruuna ka lainmangan silok, la mo lainmangan naba suxuna di ngan lavanga singsiga atdi.

³⁰ Nia anaba tong avukat aleng ti Leeme Silok la ana emi asu min kantubu at lovotpot buru at limixin. ³¹ Mila Leeme Silok i tu at lenep at limixin banbalo, la ik lox asepsu nedi basinge limixin sepsev amet.

110

Leeme Silok Mi Loorong Soksoxolik Teren

¹ Leeme Silok ga vaase ri leeme silok tarak keretna, “Unat kis de saparap lakngak tino, se nenia ana lok li limixin munepen minu na ngan loxot burubut ti luxangkedek taram.” ² Leeme Silok naba lox asilok mo lixitkis amgomgo ram naba ruka i ro Saion. La unabam gomgonga nedi limixin munepen minu. ³ At levenaleng at leesep limixin esep taram diba xulubi aleng kusu ti esep. La no mun at lenmaxantamak suubu, luvuraa radi ram dibat pot pasa u ro vana at lempatkaana i xaala.

⁴ La Leeme Silok gara xaape vam la kopmen noxo lox ekun bok ba lodoxoma ren. Neni ga lok keretna, “At levenaleng axap i tu melamgo nenu unaba nemen amisik ngan lamaasa kerekngan ne Melkisedek.”

⁵ Leeme Silok mo i tu at lenep taram ti lok see ram, la neni naba vas adamda lavaorong silok ap mo laaleng neni naba lox asuusu lebelemamao ren. ⁶ Neni naba viila mumu loklok at larabung mixin axap, la naba lili bubua lenbantuxu at limixin ni ga sev amet pam di, la na sak tup mi limixin amgomgo at lavatbung menemen axap. ⁷ Loorong naba in dan to at ladan sen saparap langas ti lox alolos amu i. Kuren la neni naba sak tup mi limixin munepen axap teren.

111

Leemi Asu Ri Leeme Silok

¹ Leeme asu ri Leeme Silok.

Anaba tong avukat ti Leeme Silok mi labalak axap kantubu at lovtopot buru at limixin manmanton teren.

² Leven gugu at Leeme Silok i nunuan aleng, la limixin axap di lok momo min, dim doma solo i. ³ La lempanga neni i lox i, i lox aurut laasen kaala ren la i lox asuusu lolos silok teren. La loklok manmanton teren naba nemen lexen.

⁴ Neni ira lok pam nedik kusu atabam doma amisik mo lempanga nunuan neni ik lox i. Leeme Silok neni ik lox anare ka limixin la i umsu mi lebelen tuntun tidi. ⁵ Neni mun im taba leveluxa, tinedi dim taba asinorong i. La neni im doma amisik lekabus neni ga lok pam i eburu mi limixin teren. ⁶ Neni ira vaxase vam limixin teren mi lolos at leven gugu ren keretna. Ni ga raba nedi limixin teren mi levennep kangka at levenabung mixin petpes.

⁷ Leven gugu axap at lukngen i nunuan la ik mokso. La kopmen taxaxarang keneng at Laulis Linga ren. ⁸ Laulis Linga naba nemen lexen, mila mo levelinga ga laa boro at Leeme Silok la i raturun la in manton tino. ⁹ Neni xusuk mun Laradi Loklox Asepmsu ti limixin teren, la ga vaxaxis aulis mo lekabus teren kusu naba nemen amisik. La laasen mun teren i melemelengan la i silok aleng. ¹⁰ Loklox asinorong ti Leeme Silok, neni lurutu kaxat ti levendomdoma nunuan. La im taba lodoxoma mokmokso rinedi ding tonga res at levempapaase ali ren.

Leemi asu rin naba nemen amisik la kopmen tekavaxap teren.

112

Lomomo At Laradi Nunuan

¹ Leemi asu ri Leeme Silok.

Luvukat ti mo laradi im taba asinorong Leeme Silok, la i lok momo aleng ting tonga res at levempapaase ali at ne Moroa. ² Laxamdak mi laxaalik teren dinaba ruuna levenasen silok go at lenep kangka ramtaba la Leeme Silok naba lox anarong livipisik li ren. ³ Nedi loxoetemen dinaba ngasang kobot at laxampanga solo la dinap novos aleng. La at levenaleng axap i tu melamgo di noxok pakes bok ba ti tempanga.

⁴ Do lamain na vot, laxasep mo ik lok ti laradi manmanton. La ik lox asuusu lebelen tuntun, loklox anare, la

loklok ik mokso rin. ⁵Luvukat nabat pot ti mo lara im taba gamasa, la ik lok mo lugugu pilas teren mi lomokmokso. ⁶Lugugu ap mo laradi avukat noxo subu, la limixin bok di noxo domampe i.

⁷Neni noxo marat ba at tevelinga mumu tumumuat boro vetpes neni i ronga i, mila lununu ren i lolos la i nunu saga at Leeme Silok. ⁸Leveve ren ira xus pam, la neni kopmen na marat at tempanga. I nunu do ne Moroa naba sak tup mi limixin munepen min. ⁹Neni im taba leventamtaba solo mi lebelemulus ti limixin banbalo. La amisik ik lox asuusu labalamu ren ti limixin. La naba ruuna laasen silok la limixin dina lok ngangao aleng teren. ¹⁰La limixin kapmek dinaba ven i la dina musak, la dinabak milik angtungun tin. Ketla levenasen silok atdi ba si aleng tino la mo levendoxoma agagas atdi kopmen noxo soorun tinotno.

113

Leemi Asu Ri Lununuan At Leeme Silok

¹Leemi asu ri Leeme Silok.

Nemi luvuttadi gugu at Leeme Silok, mina emi asu mi laasen teren. ²I lox avukat do limixin dina emi asu mi laasen teren mo, la at levenaleng axap i tu melango. ³Limixin axap boro at lavanuet mera manman at na lavatbung menemen, mina emi asu mi Leeme Silok. ⁴Leeme Silok mun im gomgonga larabung mixin axap, la lisisixam teren i lox avukat aleng ti lempanga rovana at lamavangkap.

⁵Kopmen tara i lok ngan Leeme Silok ne Moroa atdik, neni mo it kis tovana at loxonin orong teren pana. ⁶La mo ik milik si ukopok ti reven lamavangkap mi lavatkangka. ⁷Neni ik lox axatu nedi luvuttadi banbalo basinge laxakup la iram tebeng luvuttadi pakpakes basinge laxakup at lempat balangkao. ⁸La irak lox asilok nedi kusu dina etangas

eburu mi lavanarong at loorong, nedi di silok kantubu at limixin teren. ⁹ Neni ik lox amenemen lodoxoma at lavakin kopmen dina pisik, la im taba nedi mi laxamdak mi laxaalik.

Leemi asu ri Leeme Silok.

114

Loxompixan At Lovovolo Pe

¹ At laaleng limixin me Israel, nedi livipisik li at ne Jakop, diga vas kaxat boro Isip. Diga on basinge lara lubung mixin at lavapaase vetpes. ² Nedi leme Juda diga ravasu ngan limixin kaala at ne Moroa, la nedi leme Israel diga ravasu bok ngan limixin tinotno ren.

³ At lavatpas atdi boro Isip, Loxontas Memele ga ven tangarang di la ga sonao, la ladan sen Joridan ga mes korop, ⁴ la lempattaavut digat los ngan lempatme, la lengkong kaana digat los ngan lempatnat sipsip.

⁵ Tila ba la nenu loxontas uga sonao, la tila ba la nenu ladan sen Joridan uga mes korop? ⁶ La tila nemi bok lempattaavut migat los ngan laxanme, la nemi lengkong kaana migat los ngan lempatnat sipsip?

⁷ Lavatkangka axap, una dede at lovotpot at Leeme Silok, atla ne Moroa at ne Jakop naba ru asaxaven. ⁸ Ni ga lok das asu ladan sen boro xeneng at lavaruat, la lengkodaan ga puuvut das su at lempat buang uat.

115

Legesa Moroa Raturun Mene

¹ O Leeme Silok, ik mokso do limixin dina xip aurut laasen taram, la ixok mokso do dina xip aurut levenasen atnama. Ketla nenu xusuk mun u epovo ri lok ka leemi asu, mumu labalamu lexen taram la uk lox epovo amisik levelinga ram.

² Tila ba la larabung mixin di sue nedik do, “Ua nga no ne Moroa atnimi?” ³ Moroa atdik ik lok toxun pana at laxalibet, la neni ik lok lempanga salai neni i momo min. ⁴ Levenmoroa atdi di lox i mi lisiliva la gol, la di lok mun i mi levengkikngen di. ⁵ Levenngusno mo atdi, ketla dixo epovo na paase. Lengkatli mo atdi, ketla dixo epovo ti reven. ⁶ Levenbaalung mo atdi, ketla dixo epovo nang tonga. Levenisna mo atdi, ketla dixo epovo nam sumak. ⁷ Levengkikngen mo atdi, ketla dixo epovo na suma xisip. Lengkangkedek mo atdi, ketla dixo epovo nat pas. La dixo epovo na tong toxolinga. ⁸ Naba lox avukat do nedi di vop na lempat poovo moroa eburu bok minedi di nunu saga atdi, dinaba vee voovo vanga bok.

⁹ Nemi limixin me Israel, mina nunu saga mun at Leeme Silok. Neni mun Laradi Loklok Tooro la Lenban bok atnimi. ¹⁰ Nemi bok lavamaasa at ne Moroa, mina nunu saga at Leeme Silok. Neni mun Laradi Loklok Tooro la Lenban bok atnimi. ¹¹ La nemi axap mi lotu saparap Leeme Silok, mina nunu saga ren. Neni mun Laradi Loklok Tooro la Lenban bok atnimi.

¹² Leeme Silok im doma dik, la neni xa naba lox anarong dik. Neni naba lox anarong nedik limixin me Israel, la naba lox anarong bok nedi lavamaasa at ne Moroa. ¹³ Neni naba lox anarong bok nedi dik lok ngangao ren, nedi limixin amgomgo la nedi bok limixin gamasa.

¹⁴ A sing Leeme Silok do na raba nemi mi taxamdak mi taxaalik, tinemi eburu bok mi livipisik li atnimi. ¹⁵ A sing Leeme Silok kusu na lox anarong nemi. Neni Laradi Runtudum Li at laxalibet mi lavatkangka.

¹⁶ Laxalibet, neni at Leeme Silok kusus mun, ketla neni ga raba lavatkangka ri limixin. ¹⁷ Luvuttadi dira met pam, dixo epovo kusu dina emi asu mi Leeme Silok, kopla nedi dirat pas pam uto at lemenemen at labarongan. ¹⁸ Ketla

nedik limixin, move ata rooro, ata tong aorong ti Leeme Silok, monga la amisik, kopmen taxavaxap teren.

Leemi asu ri Leeme Silok.

116

Laradi Ne Moroa Ga Lox Asepsu I Basinge Lanmet

¹ Labalak i tu aleng Leeme Silok, mila neni ing tonga ia, neni i ronga res at lisingising tarak. ² Neni ing tonga ia at lorooro axap tarak. ³ Loxoxo uu ga suxuna ia, la lainmarat at lamaaut ga suxa aumsu ia, la lodoxoma saasaa ga suxuna axap lorooro rak. ⁴ Melemu aga ro ke at Leeme Silok, “O Leeme Silok, lox asepsu ia.”

⁵ Leeme Silok i umsu mi lebelen tuntun la luvukat. Moroa atdik neni Laradi Balamu. ⁶ Leeme Silok ik lok see at limixin banbalo. At laaleng nenia aga ekip tangarang mi laniu, neni ga lox asepsu ia.

⁷ Labalak, una nunu saga at Leeme Silok, mila Leeme Silok irak lok pam lempanga nunuan tia. ⁸ La neni ga lox asepsu ia basinge lanmet, la ga lok kepe lainbulu rak, la ga lok tooro ia xusu nia anoxo sak saaban. ⁹ Kuren la nia at pas eburu mi Leeme Silok at na lorooro nade xopok. ¹⁰ Nia aga nunu saga at Leeme Silok kuren la aga vaase, keke i do aga lox abulubun mumu levenmumuat ga lok do na sev amer ia. ¹¹ La keke i do aga marat aleng, la aga lok keretna, “Nia axo epovo kusu ana nunu saga at teta atla limixin axap di luvuttadi xaxarang.”

¹² Anaba vorang amlong lununuan at Leeme Silok ik lox i ria xereva? ¹³ Anaba raba Leeme Silok mi lisinta dan vaen ngan laramtaba, kusu ti tong avukat tin mumu neni ga lox asepsu ia. ¹⁴ Anaba lox epovo mo laxakaape rak ti Leeme Silok, to melango at lovtopot buru at limixin teren.

¹⁵ Leeme Silok ik bulu aleng mo do tara at limixin axa ren i met. ¹⁶ O Leeme Silok, nenia laradi gugu ram.

Nenia anaba lok lugugu ram kerekngan ne naga ga lok lugugu ram. Ugara lox asepsu vam ia basinge lanmet. ¹⁷ Anaba lok tetaba ti tong avukat tu la ana ro ke at laasen taram. ¹⁸ Anaba lox epovo laxakaape rak tu ro melango at lovotpot buru at limixin axap taram. ¹⁹ Anaba lox i na ro at lemelua saparap loogu xaala ram, keneng tinotno at lemenemen Jerusalem.

Leemi asu ri Leeme Silok.

117

Leemi Asu Ri Leeme Silok

¹ Nemi axap limixin kopmen nemi me Juda, mina emi asu mi Leeme Silok. Limixin at lengkot axap, mina xip aurut laasen teren. ² Mila mo labalamu ren tidik i silok aleng, la luruturun teren tidik naba tu amisik la kopmen taxavaxap teren.

Leemi asu ri Leeme Silok.

118

Lisingising Ti Tong Avukat Ti Leeme Silok

¹ Ata tong avukat ti Leeme Silok, mila neni mun i lox avukat la labalamu ren i tu lexen. ² Limixin me Israel, mina tong i do, labalamu ren i tu lexen. ³ Nemi lavamaasa, livipisik li at ne Aron, mina tong box i do, labalamu ren i tu lexen. ⁴ Nedi bok limixin di lotu saparap Leeme Silok, dina tong i do, labalamu ren i tu lexen.

⁵ Keneng at levenaleng at levenmumuat, aga toro ke at Leeme Silok la ni ga ronga ia la ga lox asepsu ia basinge mo levenmumuat. ⁶ Leeme Silok ik lok eburu minia, la nia xopmen anoxo marat at lempanga limixin kapmek diba lox i ria. ⁷ Leeme Silok ik lok eburu minia. Neni mun Laradi Loklok Tooro rak. La nenia anaba ven Leeme Silok na sak tup mi limixin munepen minia. ⁸ Naba lox avukat do nedik ata nunu saga at Leeme Silok, la nemen

gat dik guta nunu saga at limixin. ⁹ Naba lox avukat do ata doxoma saga at Leeme Silok, la nemen gat dik guta doxoma saga at lubung amgomgo at limixin.

¹⁰ Lavamunepen buaang diga tu kangkan ia, ketla aga sele utut kepe axap di mi lolos at Leeme Silok. ¹¹ Diga tu kangkan ia at lengkot axap, ketla aga sele utut kepe axap di mi lolos at Leeme Silok. ¹² Diga tu kangkan mu ia ngan laxampo masum, ketla soso mun diga met axap ngan ta laxao i anan levempivilis mang. Ara sele utut kepe axap di mi lolos at Leeme Silok. ¹³ Diga esep tangarang minia la ga auret do dina sev amer ia, ketla Leeme Silok ga lok tooro ia. ¹⁴ Leeme Silok ik lox alolos ia la neni ga lox asepsu ia basinge di.

¹⁵ Limixin mo dip kup mi lomomo keneng at laraogu kadis at limixin manmanton, mila dira sak tup pam mi limixin munepen midi. La lolos mun at Leeme Silok ga lox i na lempanga. ¹⁶ Lolos at Leeme Silok ga lok tooro dik kusu ti sak tup mi limixin munepen midik. Lolos teren ga lok tooro dik keneng at leesep.

¹⁷ Nenia anoxo met, ketla anaba rooro, la anaba paase asu lempanga Leeme Silok ga lok pam i. ¹⁸ Leeme Silok ira sep aleeng kapmek tinotno vam ia, ketla neni ixo ke xepe ba ia xusu ana met.

¹⁹ Mina suang lempatban at loogu laplavang, kusu aba beles la ana tong avukat ti Leeme Silok.

²⁰ Anai ni lumusmaragu at Leeme Silok. Limixin manmanton kusus mun di epovo kusu dina beles teren.

²¹ Leeme Silok, nia a emi asu minu, mila uga ronga lisingising tarak. La uga lok tooro ia xusu ana sak tup mi limixin munepen minia.

²² Mo luuat limixin kipkip gu diga sok tixirixes kepe i, ga ravasu ngan Luuat Kis la lugugu ren i silok aleng.

²³ Leeme Silok axa ga lox i na, la i lox avukat aleng at

levereven atdik. ²⁴ Na xa laaleng ni laaleng ti lok katling loklok tooro at Leeme Silok. Ata sosoro la ata momo aleng min. ²⁵ Leeme Silok, una lox asepsu nama basinge limixin munepen minama. O Leeme Silok, una lok tooro nama xusu mana ngasang kobot at lempanga nunuan mak pakes tin.

²⁶ Luvukat ti na laradi it pas mi laasen at Leeme Silok. Manaba lox anarong nemi axap mira vubeles pam to xeneng at loogu laplavang at Leeme Silok. ²⁷ Leeme Silok, neni ne Moroa, la neni ira lox anarong pam dik. Ataba tu eburu mi lengkakan bisi at lentingen dik at na laaleng momo la atap tii ben kangkan mo loxonin laplavang.

²⁸ Nenu mun ne Moroa rak, la a tong aorong tu. La a xip aurut laasen taram mumu lolos silok taram.

²⁹ Ata tong avukat ti ne Moroa, mila neni mun i lok nunuan. Mo labalamu ren naba nemen lexen.

119

Laulis Linga At Leeme Silok

¹ Leveloklox anarong mo ik lok tinedi lorooro atdi kopmen tosoogong teren, la di rooro mumu asu Laulis Linga at Leeme Silok. ² Lomomo mo ik lok tinedi di mumu asu lempapaase matmatkun at Leeme Silok la ding tonga res teren mi lebelendi axap. ³ Dixo lok tempanga i bilinga, ketla dit pas mu asu leveloklok at Leeme Silok. ⁴ Leeme Silok, nenu ura li vam levempapaase auru ram, kusu nema manang tonga res mu nunuan tino i. ⁵ Naba lox avukat aleng mo do nenia a ruturun tim tebeng atmatkun leventetere avolo ram. ⁶ Do nia anam doma aklen amisik ti mo levempapaase ali ram, nia noxo ruuna ka lainmangan. ⁷ Aba emi asu minu mi labalak i xasep, dola nenia anaklen avukat ka leventaangas mokmokso ram. ⁸ Aba ronga res

mu axap leventetere avolo ram, kuren la nemen uta rexes kepe ia.

Lorongtonga Res Mu Laulis Linga At Leeme Silok

⁹ Tamdak aau naba lok lorooro ren kereva xusu na nemen manmanton? Neni na rooro mu mun levelinga ram. ¹⁰ Nia a lolos kusu ana gugu taba u mi labalak axap, la una lok tooro ia xusu nia anoxo ronga xepe mo levempapaase ali ram. ¹¹ Ara xonom ka axap pam levelinga ram mi labalak, kusu nenia anoxo lok taxakapmek tu. ¹² O Leeme Silok, leemi asu mun tu. Una anasa ia mi leventetere avolo ram. ¹³ Nenia anaba paase asu amisik mo leventaangas nenu uga raba nema min. ¹⁴ A momo ri mumu asu levempapaase matmatkun taram. Mo lomomo i volo lomomo at laradi i lok momo mumu langsung lapnovos teren. ¹⁵ A viila mumu levempapaase auru ram la aram doma mumu avukat levenanasa ram. ¹⁶ A momo aleng at leventetere avolo ram, kuren la anoxo doma aie xepe ba levelinga ram.

Lomomo Keneng At Laulis Linga At Leeme Silok

¹⁷ Una lok lununuan tia, laradi gugu ram, kusu nia aba rooro, la abang tonga res at levelinga ram. ¹⁸ Una valas luxatli rak kusu aba ven kibis levenanasa nunuan keneng at Laulis Linga ram. ¹⁹ A nemen ngan loose at na lavatkangka, la nemen gat uta lipe levempapaase ali ram basinge ia. ²⁰ Lorooro axap tarak, mo i ngaongao mu leventaangas taram. A vara i xusu ana xasep avukat teren at levenaleng amisik. ²¹ U paase sok luvuttadi loklox aru, la lasaxaek ik lok mavana atnedi dit pas taba rulu mo levempapaase ali ram. ²² Una sep pinak di kusu di noxo paase aksaksa ria la dinoxo paase kapmek bok tia, mila nenia a mumu asu lempapaase matmatkun taram. ²³ Keke i do luvuttadi amgomgo dina xis buru, la dina puse ngas ti sev amer ia. Ketla nenia abam doma mumu amisik

leventetere avolo ram. ²⁴ Lempapaase matmatkun taram i so misigisigis, ni mun ik lok tooro ia xusu ana ruuna ka lodoxoma avukat.

Laradi Na Lolos Kusu

Na Mumu Asu Laulis Linga At Leeme Silok

²⁵ Nia mo ak midi rinotno ro xeneng at laxakup la i auret kusu ana met. Una lox aroo ia kerekngan levelinga ram. ²⁶ Aga tong asu axap lorooro rak, la uga ronga ia. Una anasa ia mi leventetere avolo ram. ²⁷ Una lok tooro ia xusu ana xasep at levenanasa at levempapaase auru ram, kusu abam doma mumu mo leven gugu nunuan taram. ²⁸ Lorooro rak mo i umsu mi lainbulu, kuren la una lox alolos ia kerekngan levelinga ram. ²⁹ Una tupe ia xusu anoxo beles at leveloklok i lok kapmek. La una lox ase ia mi Laulis Linga ram atla u balamu ia. ³⁰ Ara soxolik ka vam langas ti mumu asu levelinga ruturun taram. Ara ronga avukat pam leventaangas linga ram. ³¹ O Leeme Silok, am tebeng lolos lempapaase matmatkun taram. Nemen uta ke xepe ia la limixin dina lox amangan ia. ³² A lolos aleng kusu ana mumu asu mo levempapaase ali ram, mila uba suxa amu manga ia mi lodoxoma avukat.

Lisingising Ti Lok Ka Lodoxoma Avukat

³³ O Leeme Silok, una lox ase ia kusu ana xasep at leventetere avolo ram, la anabang tonga res teren at levenaleng axap. ³⁴ Una soxomus asu Laulis Linga ram tia la abam tebeng atmatkun teren. La anang tonga res teren mi labalak axap. ³⁵ Una lam ia xusu ana mumu asu mo levempapaase ali ram, mila ik lox asuusu lomomo ria. ³⁶ Una lok labalak kusu ana mumu asu lempapaase matmatkun taram, la kopmen nia anoxo vara solo lapnovos silok mede xopok. ³⁷ Una lok luxatli rak kusu anoxo veneves at laxampanga gamasa la una lox anunuan lorooro rak kerekngan levelinga ram. ³⁸ Una lox epovo laxakaape ram

tia, laradi gugu ram, i ngan uk lox epovo i rinedi ding tonga res taram. ³⁹ Una ru pepe mo lempapaase aksaksa, ua ik lox amaran ia. Leventaangas taram i lox avukat. ⁴⁰ A vara rinotno i xusu ana mumu asu levempapaase auru ram. Una lox amaxat lorooro rak mila loklok taram in manton tino.

Tanam Tebeng Atmatkun At Laulis Linga At Leeme Silok

⁴¹ Leeme Silok, una lox asusu labalamu ram tia, la una lox asepsu ia kerekngan laxakaape ram tia, ⁴² kuren la aba epovo na vaase porang levelinga ap mo luvuttadi di paase aksaksa ria, mila nia a nunu saga at levelinga ram. ⁴³ Nemen uta lok pes mo levelinga ruturun taram basinge ia, mila nia aga lok li lodomdoma voovo rak at leventaangas taram. ⁴⁴ Anabang tonga res amisik at Laulis Linga ram at levenaleng axap i tu melamgo. ⁴⁵ Anaba nemen asepmus basinge levenmumuat, mila nia a mumu asu levempapaase auru ram. ⁴⁶ Anaba paase asu levempapaase matmatkun taram ti lavaorong silok, la nia anoxo mangan. ⁴⁷ Levempapaase ali ram ik lox asusu lomomo ria, la labalak i tu i. ⁴⁸ A lok ngangao aleng ap mo levempapaase ali ram la labalak i tu mun i, la abam doma mumu amisik mo leventetere avolo ram.

Laradi I Nunu Ruturun At Laulis Linga At Leeme Silok

⁴⁹ Leeme Silok, una doxoma mo laxakaape ram tia, laradi gugu ram, mila i lox alolos ia xusu ana nunu saga ram. ⁵⁰ Uga lox amenemen ia at laaleng aga nemen keneng at losongsongot, mila uga lox epovo laxakaape ram tia la uga lox asepsu ia. ⁵¹ Limixin loklok keexee dik lok kalise amisix ia, ketla nia axo vas basinge ba Laulis Linga ram. ⁵² O Leeme Silok, a doma mo leventaangas taram me gaxatnak, la im taba ia mi loklox amenemen. ⁵³ Dola nia a ven limixin kapmek di los polo Laulis Linga

ram, lebelemamao i suxuna lorooro rak. ⁵⁴ At lorooro rak at na lavatkangka, a vo lengkompixan mi leventetere avolo ram. ⁵⁵ Leeme Silok, am doma u at lengkanimin, la am doma mumu bok Laulis Linga ram. ⁵⁶ Lomomo it pot tarak mumu mun levempapaase auru ram, la nia ang tonga res mu i.

Laradi I Raba Axap Lorooro Ren Ti Laulis Linga At Leeme Silok

⁵⁷ O Leeme Silok, labalak i tu xusuk mun u. Nia a xaape do anabang tonga res mu amisik levelinga ram. ⁵⁸ A sing u mi labalak axap do una lox asuusu lebelen tuntun taram tia, ngan ugara xaape vam min. ⁵⁹ Ara ila mumu vam lorooro rak, la ara ba gili lorooro rak kusu ana mumu asu levempapaase matmatkun taram. ⁶⁰ Aba lok soso mun la anoxok lok sila kusu ti mumu asu mo levempapaase ali ram. ⁶¹ Keke i do limixin kapmek dinam kobot ia mi laxalinga xaxarang, anoxo ke xepe ba Laulis Linga ram. ⁶² At lengkanimin tubu a katu kaxat kusu ana tong avukat tu ri nom leventaangas mokmokso ram. ⁶³ Nenia lentangas atnedi axap limixin dik lok ngangao ram la atnedi axap bok di mumu asu levempapaase auru ram. ⁶⁴ O Leeme Silok, lavatbung menemen i umsu aleng mi labalamu lexen taram. Una anasa ia mi leventetere avolo ram.

*Laulis Linga At Leeme Silok
I Nunuan Aleng*

⁶⁵ O Leeme Silok, urak lox anarong pam ia, laradi gugu ram, kerekngan levelinga ram. ⁶⁶ Una anasa ia mi levendoxoma nunuan la lakleklen, mila nia a nunu saga at levempapaase ali ram. ⁶⁷ Nia aga vas soogong, la uga sev asongor ia. Ketla ananga nia ang tonga res at levelinga ram. ⁶⁸ Nenu u umsu mi lununuan, la uk lox asuusu loklox anare ri limixin. Una anasa ia mi leventetere avolo

ram. ⁶⁹ Limixin loklox aaru di paase xaxarang mumu ia, ketla mi labalak axap ang tonga res at levempapaase auru ram. ⁷⁰ Mo luvuttadi kopmen tevendoxoma nunuan atdi ti levelinga ram, ketla nia an tuuna ka lomomo boro at Laulis Linga ram. ⁷¹ Mo levesongsongot uga raba ia min ga lok tooro ia, kuren la agaklen ka avukat leventetere avolo ram. ⁷² Mo Laulis Linga nenu uga raba ia min, ni i lok nunuan aleng ti lempilas axap at na lavatbung menemen.

Laulis Linga At Leeme Silok

Ni In Manton

⁷³ Uga rudum ia mi lukngam la uk lox alipe ia basinge lanuu. Una raba ia mi levendoxoma nunuan kusu ti lox ase at levempapaase ali ram. ⁷⁴ Nedi dim taba asinorong u, dik lok momo do dina reven tarak. Mila nia a nunu saga at levelinga ram. ⁷⁵ O Leeme Silok, aklen i do leventaangas taram ik mokso aleng, la ugak lox aleeng ia mila nenu u ruturun at laxakaape ram. ⁷⁶ Una lox asuusu mo labalamu lexen taram kusu na lox amenemen ia, kerekngan uga xaape vam min tia, laradi gugu ram. ⁷⁷ Una lox asuusu lebelen tuntun taram tia xusu lorooro rak naba nemen avukat mila an tuuna ka lomomo boro at Laulis Linga ram. ⁷⁸ Naba lox avukat do una lox amangan nedi limixin loklox aaru, mila di lili laxalinga xaxarang mumu ia. Ketla nenia, anabam doma mumu levempapaase auru ram. ⁷⁹ Naba lox avukat do nedi dim taba asinorong u, dina vot pasa ia kusu dina etaba belen minia. Nedi bok di xasep at lempapaase matmatkun taram. ⁸⁰ Naba lox avukat do labalak nang tonga res mu avukat leventetere avolo ram, kusu naba lox asepsu ia basinge lainmangan atdi mo dik lox asi ia.

Lisingising Ti Lox Asu Lara At Loxokoxo

⁸¹ O Leeme Silok, lengkot axap tarak ira meleexot axap la a ngangais tu xusu una lox asepsu ia. Nia a nunu saga at levelinga ram. ⁸² Luxatli rak ira molo nga ri reven

pupuke ri leveng kakaape ram. La ara lok, “Lingisa ba uba lok tooro ia?” ⁸³ Nenia a lok ngan mun labantamon tem das. Ketla axo ke xepe ba leventetere avolo ram. ⁸⁴ Nenia laradi gugu ram, anaba ngais alika ba? Lingisa ba uba sev asongot nedidik lox asongor ia? ⁸⁵ Limixin loklox aaru di ke xepe Laulis Linga ram, dira lok pam lenngitngit tia. ⁸⁶ Levempapaase ali ram i epovo rinotno xusu limixin dina nunu saga ren. Una lok tooro ia, mila limixin dik lox asongot gamasa mun ia la kopmen tavaasuun teren. ⁸⁷ Ga auret kusu dina sev amer ia. Ketla nia axo raba rulu ba levempapaase auru ram. ⁸⁸ Mumu labalamu lexen taram, una lok lempanga nunuan tia, kusu abang tonga res at levempapaase matmatkun taram.

Laradi I Nunu At Laulis Linga At Leeme Silok

⁸⁹ O Leeme silok, levelinga ram nabak lok at levenaleng axap i tu melamgo, la mo levelinga i tu tuxuruxun kerekngan laxalibet. ⁹⁰ Nenu unaba ruturun amisik ti limixin la kantubu bok at lavaola axap mo dibap tavaasu melemu. Uga vaxaxis aulis na lavatangka la mo it kis tuxuruxun kuren. ⁹¹ Laulis Linga ram mo i nemen tuxuruxun se at na levenaleng, mila lempanga axap i lok ngan lavasaxaruki ram. ⁹² Mo do Laulis Linga gixo lox amomo ia, nia ro gira met pam mumu laxasongsongot tarak. ⁹³ Anoxo rongaxepe levempapaase auru ram, mila mumu mun i na levelinga loklok tooro ram, nenu urak lok tatao lorooro rak basinge lanmet. ⁹⁴ Una lox asepsu ia mila nenia ataram. La nia ara lolos amisik kusu ana mumu asu levempapaase auru ram. ⁹⁵ Limixin kapmek mo di kuxut tangais ia xusu dina sev amer ia. Ketla nenia abam doma mumu levempapaase matmatkun taram. ⁹⁶ Araklen ba i do lempanga axap noxo nemen abao, ketla mo levempapaase ali ram kopmen taxavaxap teren.

*Lodoxoma At Laradi
Ri Levelinga At Leeme Silok*

⁹⁷ Labalak i tu mun Laulis Linga ram, la am doma mumu amisix i at levenaleng kangking la kanimin. ⁹⁸ Mo levempapaase ali ram, ik lox amisik keneng at lodoxoma rak, la i lox ia, a xasep nunuan aleng polo nedi limixin munepen minia. ⁹⁹ Aklen aleng polo nedi axap luvuttadi loklox ase rak, mila am doma mumu amisik levempapaase matmatkun taram. ¹⁰⁰ Aklen aleng polo nedi loxongkulao mukun, mila ang tonga res at levempapaase auru ram. ¹⁰¹ Aga lok tatao alabat lavatpas tarak basinge lempatpas ua ga xapmek, kusu aba ronga res mu levelinga ram. ¹⁰² Axo ke xepe leventaangas taram, mila nenu axa uga anasa ia min. ¹⁰³ Levelinga ram i so misigisigis aleng, la i volo loso at ladan misiu. ¹⁰⁴ Lempapaase auru mun taram im taba ia mi levendoxoma nunuan. Kuren la nia a xopara aleng mo langas kapmek limixin dit pas teren.

Laxasep Boro At Laulis Linga At Leeme Silok

¹⁰⁵ Levelinga ram i lok ngan lababao rim lam ia, la i lok ngan bok laxasep ti langas tarak. ¹⁰⁶ Anaba lox epovo laxakaape lolos tarak do, anaba mumu asu amisik mo leventaangas mokmokso ram. ¹⁰⁷ Leeme Silok, levesong-songot tarak i silok aleng tinotno. Una lok tatao nunuan lorooro rak, kerekngan levelinga ram. ¹⁰⁸ O Leeme Silok, una mulus ka lisingising emi asu rak, la una anasa ia mi leventaangas taram. ¹⁰⁹ Laniu i tu saparap amisix ia xusu na lok korop kepe lorooro rak, ketla nia axo ke xepe gamasa ba Laulis Linga ram. ¹¹⁰ Limixin kapmek di lili larapelixo ria, ketla nia axo ronga xepe lempapaase auru ram. ¹¹¹ Lempapaase matmatkun taram i lok ngan loxom pulus nunuan naba nemen amisik eburu minia, la i lox aumsu labalak mi lomomo. ¹¹² Nia a doma vam i do

anabang tonga res at leventetere avolo ram, naba se at laaleng lorooro rak naba xap.

Laradi Na Tu Tuxuruxun At Laulis Linga At Leeme Silok

¹¹³ A belangatngas tinedi dixo ruturun tinotno ru. Ketla labalak i tu mun Laulis Linga ram. ¹¹⁴ Nenu Lentupe la Lurutu See Pe rak, a nunu saga at levelinga ram. ¹¹⁵ Nemi luvuttadi loklok kakapmek, uto nimi basinge ia, nenia anaba mumu asu levempapaase ali at ne Moroa rak. ¹¹⁶ Nenu una lox alolos ia kerekngan laxakaape ram, kusu nenia aba rooro. La nemen uta ke xepe ia ketla una lox asepsu ia kerekngan lavavara rak. ¹¹⁷ Unam tebeng ia mi lukngam, kusu nia anoxo ekip tangarang mi lumumuat. La abam doma mumu amisik leventetere avolo ram. ¹¹⁸ Uk sok tixirixes nedi luvuttadi di rongga xepe leventetere avolo ram. Mo levendoxoma xaxarang atdi naba xet polo. ¹¹⁹ Nenu u ven limixin kapmek ngan laxanboobong, ketla labalak i tu lempapaase matmatkun taram. ¹²⁰ Nenia a dede aleng atla a marat taram, la a lingun aleng mumu leventaangas taram.

Lorongtonga Res At Laulis Linga At Leeme Silok

¹²¹ Ara lok pam lempanga in manton la i nunuan, kuren la nemen uta ke avolo ia ri limixin munepen minia. ¹²² Una xaape ria, laradi gugu ram do, unaba lok tooro ia, la nemen uta ke xepe luvuttadi loklox aaru dina lox abaava ia. ¹²³ Luxatli rak ira molo nga ri reven tangarang ti nom loklok tooro la kusu ti lox asepsu ia basinge di kerekngan ugara xaape vam min. ¹²⁴ Una reven tatao ia, laradi gugu ram, kusu naba epovo rinotno mi labalamu lexen taram, la una anasa ia mi leventetere avolo ram. ¹²⁵ Nenia laradi gugu ram. Una lox axasep lodoxoma rak, kusu aba xasep at lempapaase matmatkun taram. ¹²⁶ Leeme Silok, limixin dirat los polo amisik pam Laulis

Linga ram. Kuren la levenaleng ira vot pam, kusu una lox asongot di. ¹²⁷ Labalak i tu aleng levempapaase ali ram i volo lavavara ri leven gol, la mo leven gol i nunuan aleng. ¹²⁸ Kuren la ara mumu asu lempapaase auru ram. La ak sok sisixe leveloklox axap i lok kapmek.

Langaongao Kusu Ting Tonga Res At Laulis Linga

¹²⁹ Lempapaase matmatkun taram i lok nunuan aleng, kuren la nia arang tonga res mu i mi labalak axap. ¹³⁰ Losoksoxomus at levelinga ram im taba ia mi laxasep, la im taba bok lakleklen avukat tinedi kopmen takleklen atdi. ¹³¹ La nia a belengaongao rinotno ri levempapaase ali ram. ¹³² Una repukus mu ia la una lox asuusu lebelen tun-tun tia, kerekngan pam uk lox i rinedi axap di vavara aleng u. ¹³³ Unam lam aratao ia at lavatpas tarak, kerekngan levelinga ram. Nemen uta ke xepe laxakapmek nak sak tup minia. ¹³⁴ Una rebeng asu ia basinge levenmumuat at luvuttadi xapmek dim taba ia min, kusu nenia anabang tonga res at levempapaase auru ram. ¹³⁵ Unak lox amisik eburu minia ngan loklox anarong tia, la una anasa ia mi leventetere avolo ram. ¹³⁶ Lengkabili dan ing pengkos su aleng at lamarak, mila limixin dixong tonga res at Laulis Linga ram.

Laulis Linga At Leeme Silok Ik Mokso

¹³⁷ Leeme Silok, loklok taram in manton tino, la lev-entaangas bok taram ik mokso. ¹³⁸ La mo lempapaase matmatkun uga li i, ik mokso la i epovo rinotno do nema manat mas saga ren. ¹³⁹ Mo lebelemamao keneng tarak i lok ngan laxao, mila limixin munepen minia dik lox abulubun levelinga ram. ¹⁴⁰ Mo leveng kakaape ram agara lok tong pen pam i, kuren la nenia a vara aleng i. ¹⁴¹ Nenia mun laradi gamasa la limixin di lele abulubun ia, ketla axo ke xepe ba levempapaase auru ram. ¹⁴² At levenaleng axap

i tu melamgo loklok taram naba nemen manmanton tino, la Laulis Linga ram i ruturun amisik. ¹⁴³ Levenmumuat mi lodoxoma saasaa mo ira ebosa mavana rak, ketla levempapaase ali ram ik lox amomo ia. ¹⁴⁴ Mo lempapaase matmatkun taram ik mokso aleng tino. Una raba ia mi lodoxoma avukat kusu nia aba rooro.

Lisingising Ti Loklox Asepsu Basinge Laniu

¹⁴⁵ O Leeme Silok, nia a ro ke ram mi labalak axap. Una ronga res tarak la anabang tonga res at leventetere avolo ram. ¹⁴⁶ A ro ke ram kusu una lox asepsu ia basinge laniu. La nia anabam tebeng avarang at lempapaase matmatkun taram. ¹⁴⁷ A aus kaxat no mene maxantamak suubu la ang teng tu xusu una lok tooro ia. Atla a nunu saga at levelinga ram. ¹⁴⁸ A tuuang aan amisik at lengkanimin, kusu ana i doxoma mu leveng kakaape ram. ¹⁴⁹ O Leeme Silok, labalamu ram i nemen lexen. Kuren la una ronga ia. Una lox asuusu lebelen tuntun taram la una lok tatao lorooro rak kerekngan levelinga ram. ¹⁵⁰ Nedi mo dik lox asongot kapmex ia monga dit pas aurer ia, la dik lok paxalom tinotno basinge Laulis Linga ram. ¹⁵¹ Ketla nenu Leeme Silok uk lok auret mun ia, la nom axap levempapaase ali ram i ruturun amisik. ¹⁵² Ga ruka xa i gano, aga lox ase boro at lempapaase matmatkun taram, ua nenu uga vaxaxis i la naba nemen lexen.

Lorotoro Ri Loklok Tooro

¹⁵³ Una ven mumu laxasongsongot tarak la una lox asepsu ia basinge i, mila xovisi toxonaleng go nia ara ke xepe vam Laulis Linga ram. ¹⁵⁴ Una ru at lenep tarak la una lox asepmus ia. Una lok tatao lorooro rak kerekngan leveng kakaape ram. ¹⁵⁵ Nenu u noxo lox asepsu limixin kapmek, mila dixo mumu asu leventetere avolo ram. ¹⁵⁶ Leeme Silok, labalamu ram i silok aleng. Una lok tatao lorooro rak kerekngan leventaangas taram. ¹⁵⁷ Buaang

nedi limixin munepen dik lox asongor ia, ketla nia axo raba rulu ba lempapaase matmatkun taram. ¹⁵⁸ A ven tinedi limixin tongtonga viribang, la a bele mumuat mila dixo mumu asu levelinga ram. ¹⁵⁹ Leeme Silok. Pen ba ia, a vara aleng levempapaase auru ram. Una lok tatao lorooro rak mila nenu Laradi Balamu. ¹⁶⁰ Levelinga axap taram i ruturun la nom axap leventaangas taram ik mokso la naba nemen amisik la kopmen tekavaxap teren.

Lavavara Ri Mu Asu Laulis Linga

¹⁶¹ Limixin silok dik lox asongot parang ia, la kopmen tavasuun teren. Ketla leveve rak it kat tava mu levelinga ram. ¹⁶² Levengkakaape ram ik lox amomo ia, kerekngan laradi i ruuna laplus i silok aleng. ¹⁶³ A xopara rino laxaxarang axap la labalak i xapmek tin, ketla labalak i tu aleng Laulis Linga ram. ¹⁶⁴ Keneng at leges aleng, a tong avukat tu i vanuti mumu leventaangas taram ik mokso. ¹⁶⁵ Nedi di vavara aleng Laulis Linga ram, dinaba ruuna ka limila silok keneng at lorooro atdi la kopmen ba tavanga naba lox angtang nedi kusu dinak sak saaban. ¹⁶⁶ Leeme Silok, a ngangais ti loklok tooro ram, la a mumu asu levempapaase ali ram. ¹⁶⁷ Ang tonga res at lempapaase matmatkun taram, mila a vara aleng tinotno i. ¹⁶⁸ Ang tonga res at levempapaase auru ram la nom lempapaase matmatkun bok taram, atla ukleklen axap leveloklok tarak.

Lisingising Ti Loklok Tooro

¹⁶⁹ Leeme Silok, una ronga lanteng tarak saparav u ri loklok tooro. Una lox asuusu lodoxoma aklen taram tia kerekngan laxakaape ram. ¹⁷⁰ Una ronga res at lisingising tarak, la una lox asepsu ia kerekngan laxakaape ram. ¹⁷¹ Ana emi asu amisik minu, mila nenu u anasa ia mi leventetere avolo ram. ¹⁷² Anabak pixan mumu levelinga

ram, mila levempapaase ali ram ik mokso. ¹⁷³ Una gagas amisik ti lok tooro ia, mila nia a mumu asu levempapaase auru ram. ¹⁷⁴ O Leeme Silok, labalak ing teng aleng ti loklok tooro ram. La Laulis Linga ram ik lox amomo ia. ¹⁷⁵ Una lok tatao lorooro rak kusu aba emi asu minu. La una ke mo leventaangas taram na su auru ia. ¹⁷⁶ Ara vas soronga nga ngan lisipsip i soronga. Una puse ria, laradi gugu ram, mila nia axok lox aie xepe levempapaase ali ram.

120

Lisingising Ti Loklok Tooro

¹ Nia aga ngising ti Leeme Silok keneng at levenmuat tarak, la neni ga sep siam at lisingising tarak.

² Leeme Silok, una lox asepsu ia basinge luvuttadi xaxarang la sosolo arup.

³ Nemi limixin kaxarang, lavanga salai mo ne Moroa naba lox i rinimi? La neni naba lox asongot nimi xereva?

⁴ Neni naba lox asongot nimi mi levesoso ing sengsen at luvuttadi esep la mi laxangkali kao iplivi aleng.

⁵ Axot kis avukat kantubu atnemi limixin kapmek. Nemi mi lok ngan limixin tongtonga viribang di nemen to Mesek la to Kedar. ⁶ A molo tik lok eburu minedi limixin ua dixo sisiam ka limila. ⁷ La do a paase rinedi mi limila, di vavara na vesep mun.

121

Leeme Silok Neni Lurutu See Pe Atdik

¹ A milik aurut at lengkong kaana, la a lok keretna, “Loklok tooro ria naba laa meava?” ² Loklok tooro naba suusu xusuk boro at Leeme Silok, neni ga rudum li laxalibet mi lavatkangka.

³ Neni noxo ke xepe ba u la una subu. Atla neni mo Lurutu See Pe ram kopmen na vunga.

⁴ Mo Lurutu See Pe at leme Israel neni xopmen na vunga xis kopla na vunga met. ⁵ Leeme Silok naba reven tatao u. Neni naba nemen saparav u kusu nak lok see ram. ⁶ Laxangking noxo sev asongot ba u at levenaleng kangking la lagaaling noxo sev asongor u at lengkanimin.

⁷ Leeme Silok axa nabak lox asepsu amisix u basinge levenaniu, la ni naba kubak pe u. ⁸ Ni nabak lok see ram at levempatpas taram at nai levenaleng la ap mo bok levenaleng axap i tu melamgo.

122

Leemi Asu Ri Lemenemen Silok Jerusalem

¹ Aga momo aleng atla diga lok tia, “Uto dik at loogu at Leeme Silok.” ² La ananga nedik tara vubeles pam at langas povolo la tara tu nga ro xeneng at lemenemen silok Jerusalem.

³ Diga vaxaru li amu na lemenemen ngan lemenemen silok la diga penbixa avukat tinotno i. ⁴ La nedi larabibinat me Israel dit pas pot de. Nedi dit pas kusu dina tong avukat ti Leeme Silok, kerekngan mo levempapaase ali Leeme Silok ga raba di min. ⁵ Nade lavaorong boro Israel digat kis at lengkonin orong atdi xusu dinang tonga linga at limixin.

⁶ Nemi mina sing kusu limila nak lok to lemenemen Jerusalem keretna, “Nedi di vavara aleng na lemenemen, dina ngasang kobot. ⁷ I epovo bok do limila nak lok keneng at na lemenemen la Leeme Silok na lok tatao avukat limixin keneng at laraogu silok atdi.” ⁸ Nia a lok lisingising mumu lemenemen Jerusalem keretna, “Limila nak lok keneng teren.” Ak lox i xerepmo kusu lentaba rak la larapentangas tarak dinaban tuuna lorooro nunuan.

⁹ Nia a sing bok Leeme Silok kusu nemi limixin mego mina sang kobot avukat atla loogu at Leeme Silok ne Moroa atdik ik lok go.

123

Lisingising Ti Labalamu

¹ O Leeme Silok, a milik aurut tu, toxun pana at laxal-ibet at loxot nenu ut kis teren la um gomgonga limixin nade xopok. ² O Leeme Silok, nenu ne Moroa atnama. Lavasaxaruki di nunu saga at lubung amgomgo atdi, la lavasaxaruki rixin di nunu saga at lavakin amgomgo atdi. La kerepmo bok nema manaba nunu saga amisik taram, se at loxonaleng una lox asuusu lebelen tuntun taram tinama.

³ O Leeme Silok, una lox asuusu lebelen tuntun tinema. Una lox asuusu lebelen tuntun tinema, mila mara baava nga na mi laxanmumuat dik lok li i mavana atnama.

⁴ Mara baava nga na mumu laxalinga sese limixin loklox aaru dik lox i rinama. La limixin apnovos bok di lele abulubun nama.

124

Morua Neni Lurutu

See Pe At Limixin Teren

¹ Mo do Leeme Silok gixo tu at lenep atdik, nedik limixin axap me Israel giba ekip tangarang mi lempanga salai?

² Mo do Leeme Silok gixo tu at lenep atdik, limixin munepen midik giba esep tangarang midik. ³ La lebele-mamao atdi giba lok kapmek aleng tidik, la nedi giba linge bintoo nedik ⁴ la di lok ngan ladanut giba vula pe nedik, la na vaxat ka nedik uto vetpes, ⁵ la nedi di lok bok ngan laraan silok gibak mir axong nedik.

⁶ Ata tong avukat ti Leeme Silok atla goxo ke kepe limixin munepen midik kusu dina sele utut dik. ⁷ Nedik

tara sixiro vam kerekngan lapka i sixiro basinge lelixo, nai lelixo ira rexorop pam, la nedik na tara sepmus ta. ⁸ Loklok tooro atdik ip tvasu boro at Leeme Silok, neni ga rudum li laxalibet mi lavatbung menemen.

125

Lixitkis Nunuan

Ti Limixin At Ne Moroa

¹ Nedi di nunu saga at Leeme Silok, di lok ngan Lakaana Saion ua ixo epovo do tara nakma asubu i, ketla naba tu atmatkun lexen tino. ² Larakaana dit kis kangkan lemenemen Jerusalem, la kerepmo bok Leeme Silok nabang kan pe axap limixin teren monga la at levenaleng axap i tu melango.

³ Limixin kapmek di noxom gomgonga amisik lenep kangka atnedik limixin manmanton teren. Mo do dina lox i xuren, limixin manmanton bok giba vubeles at laxakapmek. ⁴ Leeme Silok, una lok lununuan tinedi dik lok nunuan, la tinedi bok ding tonga res at levempapaase ali ram. ⁵ Ketla una lox asongot nedi dit pas at leventaangas i xakauk, la una lox asongot nedi bok di sok tixirixes kepe leventaangas taram.

Limila nak lok to Israel.

126

Lisingising Ti Leeme Silok Ti Sang Kobot

¹ Gase Leeme Silok ga lam asu amlong nema limixin kokoxo uto Saion, maga nunua i do magam tobo mun. ² Kuren la magang longon aleng mi leklek, la magak pixan momo aleng. La levenabung mixin petpes diga lok keretna, “Leeme Silok ga lox anarong solo vam nedi.” ³ I ruturun do Leeme Silok ga lok lempanga silok tinama, kuren la maga umsu mi lomomo.

⁴ Leeme Silok, una lox asang kobot amu manga nama kerekngan larakabu ik lox aumsu amu laradan to at lamatbin Negev. ⁵ Ma vara i xusu mana lok ngan mun nedidigat pas titlotlo la digang teng. Ketla uga lok tooro di kusu dinak lok momo at levenaleng dina sepkin. ⁶ Nedi digat pas la digap kip levennit piao titlotlo i la digang teng. Melemu diga laa boro at leventaamang la digak pixan momo mi lempanga anan atnedi.

127

Leemi Asu Ri Leeme Silok Mumu Lununuan Teren

¹ Mo do Leeme Silok noxo vaxaru loogu, limixin kipkip gu di noxo lox adak toxot. La do Leeme Silok noxo lok see bok at temenemen silok, luvuttadi pereven tatao di noxo lox adak toxot. ² Kopmen tavasuun teren kusu limixin dina gugu lolos to at leventaamang atdi at laxanaleng axap, tuka i at lenmaxantamak suubu la naba se ukantinao bungbung main, mila Leeme Silok nabam taba nedid mo neni i balamu di. La i gagas li i at lengkanimin, keke i do nedid mo di unga.

³ Laxamdak temes di lok ngan leventamtaba boro at Leeme Silok. Laxamdak mi laxaalik di lok ngan loklox anarong ti limixin. ⁴ Laxamdak temes at latlok maxat, di lok ngan levesoso ro at lekngen laasesep.

⁵ Luvukat ti mo laradi i visik buaang atdi. Limixin munepen min di noxo vas asi ba mo laradi mo do neni na ekip tangarang midi ro at loxot tongtonga linga.

128

Leveloklok Anarong Boro At Leeme Silok

¹ Lomomo mo ik lok tinedi ding tonga res at Leeme Silok, la lavatpas atdi i mumu asu leventaangas teren.

² Do nemi bok mina rongga res teren, mo lugugu atnimi naba lox asuusu lempanga ri lox epovo lavakpakes atnimi, la minabak lok momo la minaba ngasang kobot at lempanga axap. ³ La lavakin atnimi dinaba lok ngan loos vaen to xolonu ua i pisik aleng. Laxamdak mi laxaalik atnimi dinaba rooro avukat ngan larauna olip maxat to xeneng at levenang kolonu atnimi. ⁴ Do laradi nang tonga res at Leeme Silok, neni naba lok kaka ruturun leveloklox anarong kerepmo.

⁵ Naba lox avukat do Leeme Silok boro Saion, naba lox anarong nimi. Naba lox avukat bok do at levenaleng axap at lorooro atnimi minaba ven lemenemen Jerusalem na vosok. ⁶ La naba lox avukat bok do mi noxo met se minaba ven luvuttubuno nimi.

Limila nak lok to Israel.

129

Lisingising Ti Lok Pe

Lavamunepen

Mi Limixin Me Israel

¹ Limixin me Israel, mina tong asu mo levenngas ua limixin munepen minemi diga lox asongot nemi min, ga ruka i at lurutu kaxat at lubang mixin atnedik.

² Ap mo levenmaares limixin munepen minema digak lox asongot kapmek tinotno nema, ketla di goxo epovo ri vas asi nema. ³ Ga lok ngan ta do diga tara lempat nin kooxing at leven antuno atnema, la gak milik ngan ta laxangka ding kin li i ritlotlo vanga anan. ⁴ Ketla Leeme Silok, ni Laradi Manmanton, gara lox asepmus pam nema basinge lasaksaxango at limixin munepen.

⁵ A vara Leeme Silok do, neni naba sep aoo nedi limixin ua di belengatngas ti limixin me Saion. ⁶ A vara i do dinaba lok ngan levempivilis i suu xat ro vana at lavatlak gu, ua naba mang soso mun. ⁷ La teta noxo dik kaka tempanga

ren koplá nap kos eburu i la na xip kaka i uto at loogu ren. ⁸ La do tentaba na ekip tangarang midi ro at langa nedi noxo tong i ridi do, “Ma sing Leeme Silok kusu na lox anarong nimi. Ma lox anarong nimi mi laasen at Leeme Silok.”

130

Lisingising Ti Doxoma Xepe Laxapmek

¹ I lok ngan ta do nenia at kis keneng tubu at lamain bonot, atla lodoxoma abulubun i suxuna ia, la a ro ke ram, Leeme Silok. ² O Leeme Silok, una ronga lanteng tarak. Una ronga res at lorotoro rak la una lox asuusu lebelen tuntun taram tia. ³ Nege giba sixiro at loklox asongot taram mo do nenu gitak lok katling leveloklok kakapmek atnema? Kopmen tinotno tara giba sixiro. ⁴ Ketla u doxoma xepe laxapmek atnema limixin taram, kuren la ma pavanga u mi loklok ngangao.

⁵ Nia a xulubi aleng ti loklok tooro at Leeme Silok, la a nunu saga at levelinga ren. ⁶ A xulubi aleng ti loklok tooro at Leeme Silok, la axo lok ngan luvuttadi xukuxut di xulubi ri labara kooxot. Lavavara rak ti xulubi ri Leeme Silok i volo mo lavavara at luvuttadi xukuxut di ngangais ti labara kooxot.

⁷ Leme Israel, mina nunu saga at Leeme Silok atla, labalamu ren naba nemen lexen, la neni i vavara amisix i xusu nak lox asepsu limixin basinge leveloklok kakapmek. ⁸ Neni naba lox asepsu limixin teren me Israel basinge leveloklok kakapmek atnedi.

131

Lisingising At Laradi Nunu Ik Lok Atnaasan

¹ Leeme Silok, nenia xopmen laradi loklox aaso, la nia xopmen na vavanga xa ia. Axo doma mumu bok ba mo

leveloklok ua i silok aleng tia. La nia xopmen na xasep avukat teren. ² Ketla at kis atnaasan mi limila xeneng tarak. Ak lok ngan laxadede ik midi pilo ro at lukngen nenen, la no xeneng at labalak i xis saga. ³ Leme Israel, mina nunu saga at Leeme Silok, monga la amisik, kopmen tekavaxap teren!

132

Leemi Asu Ri Loogu Laplavang

¹ Leeme Silok, nemen uta domampe ne Devit mumu mo levenmumuat neni ga vekini min. ² Leeme Silok, una doxoma aklen ti mo laxakaape ren gara lok pam i ru. Nenu Lanaraavuk ne Moroa at ne Jakop. Devit ga lok keretna, ³ “Nia anoxo onon uto xolonu xopla ana midi ro at loora rak. ⁴ Anoxo lok mamana xopla ana unga, ⁵ naba se rinotno at loxonaleng anaba lok katling tenep kangka ri Leeme Silok ngan ta lang kolonu ri lok loogu ri Lanaraavuk ne Moroa at ne Jakop.”

⁶ Nema maga ronga levelinga ro Betilem mumu lobokis at lekabus la maga long lenget kaka i ro at laraamang gak lok saparap lemenemen Jaar. ⁷ La maga lok keretna, “Atat pas uto loogu at Leeme Silok, la ata lotu saparav i ro melango at loxonin orong teren.”

⁸ Leeme Silok, una beles eburu mi lobokis at lekabus uto xeneng at loogu laplavang, neni lampoovo at lolos taram. ⁹ A vara i do lavamaasa ram dina siga loklok in manton. La a vara i do limixin taram dinap kup mi lomomo!

¹⁰ Uga lok laxakaape ri lasaxaruki ram ne Devit. Kuren la Leeme Silok, uguta sok sisixe loorong soksoxolik taram. ¹¹ Uga lok laxakaape lolos ti ne Devit la ni laxakaape ua u noxo lok ka amlong i, la i lok keretna, “Nenia anaba soxolik tara tamdak taram kusu naba ravasu ngan loorong, la naba rukun u rim gomgonga limixin tarak.

¹² La mo do luvutnurum dina ruturun ti lekabus tarak, la ti levelinga nia anam taba di min, luvutnitna di bok dinaba tu kun u ngan lavaorong ap mo bok leven maares melemu.”

¹³ Leeme Silok ira soxolik ka vam lemenemen Saion. La i vara i xusu na lox i ngan langkolonu aulis teren, i lok keretna, ¹⁴ “Nia anaba nemen amisik ba ia de. La nia a vara i xusu anabat kis ngan Loorong Silok de at na loxot. ¹⁵ Anaba lox apnovos lemenemen Saion mi mo lempanga neni ik pakes tin. La anaba lox epovo lavakpakes at luvuttadi banbalo mego mi lempanga anan tidi. ¹⁶ Anaba lox anarong lavamaasa mego keneng at leven gugu axap nedi dinak lox i. La limixin dik lok keneng teren, dinabak pixan la dinabap kup mi lomomo. ¹⁷ Nade anaba soxolik kaka tara at livisik li at ne Devit go xeneng kusu nabat kis ngan loorong mi laasen silok teren. La anaba lok tatao avukat lixitkis orong at loorong soxolik tarak. ¹⁸ Anaba sak tup mi limixin munepen min kusu dina suma ka lainmangan. Ketla limixin at lixitkis orong teren dinaba ngasang kobot la dinap novos.”

133

I Lox Avukat At Labalamu Ela At Limixin At Ne Moroa

¹ I milik maraanu la i nunuan aleng at loxonaleng limixin at ne Moroa di nemen buru xeneng at lenmila oon. ² I nunuan ngan ta loxodan momonok maraanu gano diga lox anarong lamaasa ne Aron min. Diga soli asu mo loxodan to mavana at lavatlak teren la mo loxodan ga sesen su boro at laraes teren, la ga sesen si uto at laxaka at lavanga singsiga ren. ³ I lox avukat ngan bok ledemi boro at lakaana Eremon it pot at lengkong kaana lixilik to Saion. La ap mo loxot ne Moroa ga xaape kusu naba lox anarong limixin mi lorooro lexen.

134

Lorotoro Ri Emi Asu Mi Leeme Silok

¹ Nemi axap lavaanat saxaruki at Leeme Silok, ude nimi la mina emi asu min. Nemi ua mi gugu ro xeneng at loogu laplavang at lengkanimin, mina emi asu min. ² Mina xip aurut kikngen keneng at lisingising to xeneng at loogu laplavang, la mina emi asu mi Leeme Silok.

³ A sing Leeme Silok i nemen de Saion la ga rudum li laxalibet mi lavatbung menemen naba lox anarong nemi!

135

Loxompixan Ti Emi Asu

¹ Leemi asu ri Leeme Silok.

Nemi lavasaxaruki at Leeme Silok, mina emi asu mi laasen teren. ² La nemi bok mo mi gugu ro at loogu laplavang at Leeme Silok, ni loogu at ne Moroa atnedik, mina emi asu mi laasen teren. ³ Mina emi asu mi Leeme Silok atla neni i vukat. Minak pixan emi asu ri laasen teren, atla mo loklok i nunuan aleng. ⁴ Neni ga soxolik kaka limixin at ne Jakop kusu tin. Neni ga soxolik ka limixin me Israel kusu ateren akmokso.

⁵ Aklen i do Leeme Silok atnedik i nunuan aleng pologat, la i silok polo mo leven moroa vetpes. ⁶ Neni i epovo na lok lempanga salai neni i vara i to vana at laxalibet, la de at lavatbung menemen, to xeneng at laras la to xopok tubu at lisimaramain. ⁷ Neni ik lox asuusu lamanman takabu boro axa at latnese at lavatbung menemen. La ik lok lavanga i mam su boro at lamanman takabu, la i susuang asu lamanman boro at loogu lili ren.

⁸ Neni ga sev amet laxamdak temes avot at limixin me Isip, la lempanga bok mi lavanuet kangkedek atdi. ⁹ Neni ga lox asuusu bok lempanga lolos la sangsangu xusu ti lox asongot loorong eburu mi luvuttadi silok ua diga gugu

maxopok teren. ¹⁰ Neni ga sele utut buaang levenabung mixin, la ga sev amet lavaorong lolos. ¹¹ Nedi ne Sion loorong at leme Amor, Ok loorong at leme Basan, la nedi lavaorong axap me Kanan. ¹² Neni ga lok ka levennep kangka atnedi na lavaorong la ga raba limixin teren min. Neni ga raba leme Israel min.

¹³ Leeme Silok, limixin dinaba tong asuusu amisix i do nenu ne Moroa. La lavaola axap melemu dinabam domasu ram. ¹⁴ Leeme Silok naba tupe limixin teren. Neni naba lox asuusu lebelen tuntun ti lavaanat soxolik teren.

¹⁵ Limixin boro at levenabung mixin petpes dik lok levenmoroa atdi mi la siliva la gol. Luvuttadi mun mede xopok di vop di mi leventingen di. ¹⁶ Di ruuna leven ngusno ketla dixo epovo ri paase. La levengkatli bok mo, ketla dixo epovo ri reven. ¹⁷ Levenbaalung mo atdi, ketla dixo epovo ring tonga. La dixo epovo rinotno bok tik lok ka lamamas. ¹⁸ A vara i do mo luvuttadi diga vop mo lempoovo vanga la dira nunu saga atdi, dinaba vee voovo vanga ngan mo lentaba diga vop di!

¹⁹ Limixin me Israel, mina emi asu mi Leeme Silok. Nemi lavamaasa at ne Moroa, mina emi asu min. ²⁰ Nemi lubung mixin me Levi, mina emi asu mi Leeme Silok, la nemi axap mo mi lotu saporav i, mina emi asu min. ²¹ Mina emi asu mi Leeme Silok to xeneng Saion, neni ik lok to xeneng at langkolonu aulis teren Jerusalem.

Leemi asu ri Leeme Silok!

136

Loxompixan Ti Tong Avukat

¹ Ata tong avukat ti Leeme Silok, atla neni i lox avukat; kopmen tekavaxap at labalamu ren. ² Ata tong avukat ti ne Moroa mo i silok ti leven moroa axap; kopmen tekavaxap at labalamu ren. ³ Ata tong avukat

ti Lanaraavuk i lolos silok polo nedi lavaeme silok axap; kopmen tekavaxap at labalamu ren.

⁴ Neni xusuk mun ik lok lempanga sangsangu i silok aleng; kopmen tekavaxap at labalamu ren. ⁵ Neni ga rudum li laxalibet mi mo lakleklen teren; kopmen tekavaxap at labalamu ren. ⁶ Neni ga vaxaxis li laxangka to mavana at laras; kopmen tekavaxap at labalamu ren. ⁷ Neni ga rudum laxangking mi lagaaling; kopmen tekavaxap at labalamu ren. ⁸ La mo laxangking ti lok tatao levenaleng kangking; kopmen tekavaxap at labalamu ren. ⁹ La lagaaling mi laxam penti rik lok tatao levenaleng kanimin; kopmen tekavaxap at labalamu ren.

¹⁰ Neni ga sev amet laxamdak temes avot at leme Isip; kopmen tekavaxap at labalamu ren. ¹¹ Neni ga lam asu limixin me Israel basinge lenep silok Isip; kopmen tekavaxap at labalamu ren. ¹² Neni ga lox i mo mi lolos silok teren atla lekngen i lolos aleng; kopmen tekavaxap at labalamu ren. ¹³ Neni ga lok langas to xantubu at loxontas memele; kopmen tekavaxap at labalamu ren. ¹⁴ Neni ga lam avolo limixin teren go xantubu at laras; kopmen tekavaxap at labalamu ren. ¹⁵ Ketla ni gak mit axong loorong mi luvuttadi esep me Isip; kopmen tekavaxap at labalamu ren.

¹⁶ Neni ga lam avolo limixin teren to at lamatbin; kopmen tekavaxap at labalamu ren. ¹⁷ Neni ga sev amet lavaorong mi levenasen silok atdi; kopmen tekavaxap at labalamu ren. ¹⁸ Neni ga sev amet bok mo lavaorong mi levenasen silok; kopmen tekavaxap at labalamu ren. ¹⁹ Sion loorong at leme Amor ga met at lekngen Leeme Silok; kopmen tekavaxap at labalamu ren. ²⁰ Ok loorong me Basan ga met at lekngen Leeme Silok; kopmen tekavaxap at labalamu ren. ²¹ Neni ga raba limixin akmokso ren mi levennep kangka atnedi na lavaorong;

kopmen tekavaxap at labalamu ren. ²² Neni ga raba levenep kangka ri limixin me Israel, nedi lavaanat saxaruki ren; kopmen tekavaxap at labalamu ren.

²³ Neni goxo domampe nedik at levenaleng limixin munepen diga sak tup midik; kopmen tekavaxap at labalamu ren. ²⁴ Neni ga lox asepmus dik basinge limixin munepen minama; kopmen tekavaxap at labalamu ren. ²⁵ Im taba luxa lempanga axap di rooro; kopmen tekavaxap at labalamu ren.

²⁶ Ata tong avukat amisik ti ne Moroa boro vana at laxalibet; kopmen tekavaxap at labalamu ren.

137

Lanteng At Leme Israel Keneng At Loxokoxo

¹ Nema magat kis saparap lewendan sen to Babilon. La maga duudu go at loxonaleng magam doma lemenemen Saion. ² La magak paxa suke lempat taaleng atnema ro at levenuna vilou (willow) mo ga tu auret laradan sen. ³ Nedi mo diga vaxat kaka nema, diga tong i rinema do manak pixan. Diga tong i rinema do manak pixan kusu tik lox amomo nedi. Digak lok keretna, “Minak pixan tinema mi toxompixan mumu lemenemen Saion.”

⁴ Ga lolos aleng tinama xusu mana vixan toxompixan ti Leeme Silok nade at na lenep at limixin petpes. ⁵ Do ana domampe lemenemen aulis tarak Jerusalem, ba lox avukat anoxo epovo xusu ana sak bok ba ligita rak mo! ⁶ Do ana domampe lemenemen Jerusalem la anoxo doma bok ba i ngan neni lavanga loklox amomo rinotno rak, ba lox avukat do anoxo epovo xusu ana vixan bok ba.

⁷ Leeme Silok, una vorang mo levelinga xapmek leme Edom diga lox i gano. Ap mo laaleng leme Babilon diga sele utut lemenemen Jerusalem la digara vaxat kaka nema. Una vorang mo levelinga atnedi leme Edom diga

tong amisik i do, “Mina sele utut asi Jerusalem ukopok at laxangka!”

⁸ Nemi leme Babilon. Melemu limixin esep dinaba sele utut lemenemen silok Babilon mumu mo loklok kakapmek miga lox i rinema. La mo limixin ua dinaba vorang mo loklok ti leme Babilon, lomomo ridi. ⁹ La dinaba lok kaka levengkadede atnemi leme Babilon la na saava amdanda di ro at lavaruat.

138

Lisingising Ti Tong Avukat

¹ Nenia a tong avukat tu Leeme Silok mi labalak axap tarak. A vixan emi asu ru ro melamgo at leven moroa axap. ² A ru gili ri loogu laplavang taram i xaala. La a rikbu emi asu mi laasen taram mumu labalamu lexen la loklok tuturun taram tia. La a emi asu minu atla uga lox asuusu i do laasen taram i silok pologat la levelinga ram i silok aleng la duk lok mavana at lempanga axap at na lavatbung menemen. ³ Uga ronga res tarak at loxonaleng aga ro ke ram, la uga lox alolos ia mi lolos taram.

⁴ Leeme Silok, lavaorong axap at lavatbung menemen dinaba emi asu minu, atla digara ronga vam leveng kakaape ram. ⁵ Dinabak pixan mumu lempanga ugara lok pam i la mumu laasen silok taram. ⁶ Keke i do nenu u silok polo lempanga axap, ketla uk lok tatao luvuttadi gamasa de xopok. Ketla limixin loklox aaso nenu u nemen paxalom basing di.

⁷ At levenaleng levenmumuat i tu kangkan ia, nenu uk lok tatao lorooro rak. Nenu up sep tangarang limixin munepen minia, di belemamao ia, la uk lox asepsu ia mi lolos taram. ⁸ Nenu naba lox epovo lempanga uga xaape min tia. Leeme Silok, labalamu ram naba nemen lexen.

Una lox epovo axap ta mo lugugu ua ugara vaxaru kaxat pam i.

139

Lakleklen Axap Mi Loklok Tatao At Ne Moroa

¹ Leeme Silok, ugara ila mumu avukat pam ia, kuren la uklen avukat tinotno ia. ² Ukleklen axap mo lempanga nia ak lox i. Uk lok paxalom tino, ketla ukleklen axap levendoxoma rak. ³ U reven ia at levenaleng nia a gugu xopla ak lok mamana. Nenu uklen axap leveloklok tarak. ⁴ Keke i do a xovisi ana vaase, uraklen pam levelinga salai anaba vaase i. ⁵ U turu too rak at lengkot axap. La u reven aratao ia mi lolos silok taram. ⁶ Lakleklen taram tia i si aleng. La mo lakleklen taram mumu ia, a sangu aleng teren.

⁷ Anaba sixiro ua basinge u? Anaba vas taba ia ua basinge levereven taram? ⁸ Mo do anat pas uto vana at laxalibet, nenu uk lok go. La do ana midi ro at lemenemen at labarongan, nenu uk lok go.

⁹ La mo do ana rava kaxat uto at lenep, laxangking i losu ve xopla anak lok to vaxalom at lenep laxangking i lotup e, ¹⁰ nenu mo unabak lok go xusu tim gomgonga ia la unaba nemen go rik lok tooro ia. ¹¹ Mo do nia giba epovo ri tong i ri lamain kusu na lipe ia, kopla laxasep mo ik lok kangkan ia na repukus ngan laxanimin, nenu naba epovo na ven ia. ¹² Ketla lamain bok kopmen na lok ngan lamain at levereven taram, la laxanimin i kasep ngan ta laaleng kangking. Lamain eburu mi laxasep, nedu du epovo mun at levereven taram.

¹³ Uga rudum lengkot axap at labantuxu rak. Uga vop etang ia ro xeneng at latnenat at ne naga. ¹⁴ A emi asu minu atla nenu uk lok lempanga sangsangu. Leven gugu ram i lok petpes la i nunuan aleng. Akleklen tino i mi

lodoxoma axap tarak. ¹⁵ At levenaleng levesi rak ga taut etang avukat tinotno ro xeneng at latnenat at ne naga. La ap mo levenaleng nia aga sisilok nemnem go xeneng, nenu ugaraklen pam i do nenia mo agak lok, ¹⁶ la uga reven ia avot ti laaleng ne naga ga visix ia. Leexes at levenaleng at lorooro rak uga rivit li i ria, ugara malagan li xatling pam i at lubuk taram, avot ti mo levenaleng nat pot saparav ia.

¹⁷ O Moroa, i lolos aleng tia xusu ana xasep at leven doxoma ram. La lavanisa axap mo levendoxoma ram ik lok! ¹⁸ La amo do ana us mo levendoxoma ram, diba buaang polo laxanit kangkaneng. At loxonaleng nia a rakdu tuang, nenu move uk lok buru minia. ¹⁹ O Moroa, a vara i do una sev amet luvuttadi sepsev amet tadi! A vara i do luvuttadi sepsev amet dinaba ke xepe mulus ia! ²⁰ Di paase leveloklok kakapmek mumu u. La di paase asu loklok bilinga rik lok kapmek laasen taram. ²¹ O Leeme Silok, a belengatngas tino rinedi mo di belengatngas tu! A rexes tinotno nedi ua ding tonga viribang u! ²² A belengatngas tinedi mi langsung lebelemamao. A tong di do limixin munepen minia.

²³ O Moroa, una ila mumu ia la unaklen labalak. Una lok tong pen ia, la unaba long terek ka leven doxoma rak. ²⁴ Una ila mumu ia do teveloklok kakapmek tarak, la unam gomgonga amisix ia at langas at lorooro avolo.

140

Lisingising Ti Ne Moroa Nak Lok See At Laradi

¹ Leeme Silok, una lox asepsu ia basinge limixin kapmek. Una lok tatao avukar ia basinge limixin sepsep. ² Nedi di rivit li nemnem amisik leveloklok kakapmek, la dik paxaru kaxat amisik leegang. ³ Lorooro atdi i umsu mi laxakapmek ngan lempatmaaut. Leven gam atdi ik lok

ngan lempat sii angkang la levelinga atdi ik lok ngan lasak at lavatmoora.

⁴ Leeme Silok, una lok see rak basinge lolos at limixin kapmek. Una lok tatao ia basinge limixin sepsep ua digam nem mu ia xusu dina sev asubu ia. ⁵ Limixin loklox aaso dira li vam lelixo ria, dira saga vam lengkutkut atdi, la dira li laxam pelixo ro at langas kusu ti lixo xaka ia.

⁶ Na a vaase ru Leeme Silok keretna, “Nenu ne Moroa rak.” Leeme Silok, una ronga lerengteng tarak kusu ti loklok tooro ram! ⁷ Leeme Silok, nenu Loorong Avolo, la nenu Lentupe lolos tia. Ugarak lok see rak keneng at leven esep. ⁸ Leeme Silok, nemen gat utam taba nedi limixin kapmek mi mo lempanga ua nedi di vavara rin. La nemen uta ke avolo mo leven doxoma nemnem atnedi xusu na soorun.

⁹ Uguta ke mo limixin munepen minia dinak sak tup minia. Ketla una see antan mo loklok dik lox i ria, nabamlong mu di. ¹⁰ A vara i do una lox asu laxali kao bokbolot na subu mavana atdi. La una lu arup midi ro xeneng at lemeroon kusu dinoxu eng su bok ba. ¹¹ A vara i do nedi mo dik sok taba lentaba vetpes mi levelinga xaxarang, di noxo lox epovo tekot. La a vara i do laxapmek na suxuna limixin sepsep, la na lok kapmek tino di.

¹² Leeme Silok, aklen i do nenu u tu see at limixin banbalo, la u tu at lenep atnedi dik pakes. ¹³ I ruturun tinotno do limixin manmanton dinaba emi asu minu, la dinaba nemen maxopok at loklok tatao ram.

141

Lisingising Ti Leng Kantinao

¹ Leeme Silok, a ro ke ram at na loxonaleng. Soso mun una lok tooro nga ia! Una ronga ia at loxonaleng a ro ke ram. ² Una siam ka lisingising tarak ngan ta lusuxa i so

mavak, la una siam ka lukngak angosong aurut min naba lok ngan ta laramtaba ru ukantinao.

³ Leeme Silok, una lok li taradi rutu mu ram nade at lungusno rak, la naba reven tatao bok levelinga rak. ⁴ Una beng ia basinge lavavara rik lok laxapmek, la basinge lixitkis etangas eburu mi luvuttadi loklok kakapmek. Axopara i do ana anan eburu midi at lara peluxa atdi atla mo leveluxa atdi naba lox abilinga ia.

⁵ I lox avukat do laradi nunuan na vaase sox ia mumu laxakapmek kopla na sep aleeng ia. Ketla anoxo siam kaka lasinorong at luvuttadi xapmek. A ngising amisik kusu di noxo lok bok ba leveloklok kakapmek. ⁶ La amo do dina so gingin suu mi lubung amgomgo atnedi boro vana at labarabaras buang uat, limixin diba tong asu ba i dola lavapaase aronga rak ga ruturun. ⁷ Naba ngan loxonuna di vagam i, la dira ra koxorop axakalix i. Kerepmo laxan si atdi bak midi ekarakat go at lisigege at lamaaut.

⁸ Ketla nia move a nunu saga ram, Leeme Silok, Loorong Avolo rak. A vara i do unak lok see rak, la uguta ke xepe ia ana met! ⁹ Una lox asepsu ia basinge laxampelixo mo di lili pe ia min, la basinge mo lempanga kutkut at luvuttadi xapmek. ¹⁰ A vara i do limixin kapmek dinaba oon tubun axa at lara pelixo atdi kusu nia nabat pas sepsu la anoxo ruuna ka taniu.

142

Lisingising Ti Loklok Tooro

¹ Nenia a ro ke at Leeme Silok ti loklok tooro ren, la a sing lolos tinotno i. ² A tong taba i mi levenmumuat tarak. La a tong axasep axav i mi lempanga lolos keneng at lorooro rak. ³ At loxonaleng a lok do ana doma abulubun, neni iraklen pam lodomdoma salai ana mumu asu i, kusu ana sepsu basinge mo lara pelixo, limixin munepen minia

dira li pe vam ia min ap mo langas nia at pas teren. ⁴ Amo do a reven tangtagap kangkan ia, axo ven tara go xusu naba lok tooro ia. Kopmen teta go nak lok see rak.

⁵ Leeme Silok, a reng taba u xusu una lok tooro ia. Leeme Silok, nenu Lurutu See Pe rak, la a vavara xusuk mun u keneng at na lorooro. ⁶ Una ronga ia, ang teng ti loklok tooro ram atla lodoxoma abulubun i suxuna axav ia. Una lox asepsu ia basinge limixin munepen minia atla di lolos aleng polo lolos tarak. ⁷ Una lox asepmus ia basinge levenmumuat tarak, kusu anaba emi asu minu ro at lovotpot buru at limixin taram, atla uga lok luvukat tia.

143

Lisingising Ti Loklok Tooro

¹ Leeme Silok, una ronga lisingising tarak! Una ronga i na lisingising lolos tinotno rak atla loklok taram in manton aleng. Uk lox epovo leveng kakaape ram, kuren la una ronga ia! ² Nenia lasaxaruki ram, kuren la uguta lok li ia at loklok tong pen, atla kopmen teta ip sepsen at lamaram.

³ Lavamunepen minia digara vuse ka vam ia la dira sep kapmek tinotno ia. Dira lok li vam ia at loogu xokoxo i main bonot, la a lok ngan tino nga nedi ua diga met axa gano at lereot. ⁴ Kuren la a gagas kusu ana raba xepe nga lorooro rak, atla lodoxoma abulubun na i suxuna rinotno nga ia.

⁵ A doxoma su ap mo levenaleng gara oon pam. La a doma mo lempanga nenu ugara lok pam i, la mo leven gugu ram i vot manga at lodoxoma rak. ⁶ A song aurut mi lukngak tu keneng at lisingising tarak. La labalak ik minu ru ngan ta loxongkangka vatmang.

⁷ Leeme Silok, soso mun una ronga res tarak! Nia ara doma abulubun tino. Uguta lok ali pe u basinge ia, lavanga

ana emu buru minedi ua di si uto xopok at lemenemen at labarongan. ⁸Unak lox adoxoma ia at leven maxantamak axap mi mo labalamu lexen taram, atla lununu rak i tu saga ram. Leve singising tarak i uturut upana ru, kusu una lox ase ia mi langas nia anaba mumu asu i.

⁹Leeme Silok, a vot saparav u xusu unak lok see rak. La una vaxat asu ia basinge limixin munepen minia. ¹⁰Nenu ne Moroa rak. Una lox ase ia mi langas ti mumu asu lavavara ram. Una ke Loroonan Avukat taram na lam ia at langas nunuan.

¹¹Leeme Silok, una sat asu ia basinge limixin munepen minia ngan uga xaape vam min. Nenu uk lox avukat, kuren la una lox asepmus ia basinge na leven mumuat tarak! ¹²Una sev amet limixin munepen minia, atla nenu u balamu ia. La una lox abaava tino di mo dik lox asongor ia, atla nenia lasaxaruki ram.

144

Lorotong Avukat At Loocong Ti Ne Moroa

¹Nia a emi asu mi Leeme Silok, ni Lurutu See Pe rak! Neni i arala ia mi loklok ti esep, la ik lox agagas ia ri leesep silok. ²Neni Lurutu See Pe la Lentupe ria, la Loogu Matmatkun la Laradi Loklox Asepsu rak. Neni laradi ua a nunu saga ren kusu naba kubak pe ia. La neni ik sak tup mi levenabung mixin petpes la ik lok li di maxopok at loklok tatao rak.

³Leeme Silok, limixin nedi lempanga salai, la uram doma mu solo di. Nedi lempanga gamasa mun ketla ung tonga levelinga atdi? ⁴Nedi di lok ngan mun lamanman i rava polo. La levenaleng atdi i lok ngan mun lamamau i sonao.

⁵O Leeme Silok, una vaxat das laxalibet la una vas si ude xopok. Una long tu at lempatkaana la dinaba soobang asu lusuxa. ⁶Una riki asu lamam (lavanga i mam) la una sak

epeseves limixin munepen minia. Una so asu mi levesoso ram kusu naba lox amarat di la dina sixiro. ⁷ Una song asi boro vana, la una sat asu ka ia boro xeneng tubu at lamaxat dan, la una lok li asepsu ia basinge mo limixin munepen. Una lox asepsu ia basinge lolos at limixin me xadiong, ⁸ ua kopmen tinotno dina tong asu rinotno luruturun. Ketla di xaxarang mun, keke i do diga xaape do diba tong asu levelinga ruturun.

⁹ O Moroa, anaba vixan loxompixan maxat tu. Anabak sak ligita rak la anak pixan tu. ¹⁰ Uk lox alolos lavaorong kusu dinak sak tup mi limixin munepen midi, la uk lox asepsu ia, lasaxaruki ram ne Devit. ¹¹ Una lox asepmus ia basinge lebelemamao at limixin munepen minia. La una lox asepsu ia basinge lolos at limixin boro vetpes ua dixo tong asu luruturun. Ketla di xaxarang mun, keke i do diga xaape do diba tong asu levelinga ruturun.

¹² Nema ma sing u do laxamdamk puraau atnema dinaba lok ngan larauna i suusu urut, la i lolos. La ma sing bok do laxamposono maxat atnema dinaba milik maraanu ngan levempos diga xovox i, mo i nganang levenmesuluk axap at loogu at loorong. ¹³ La ma sing bok do laraogu lili atnema naba unumsu mi lara met luxa axap. La ma sing bok do leve sipsip to at levenang kolonu atnema, dina pisik aleng ngan lasangaun larabin sangsangaun kobot. ¹⁴ Ma sing bok do laxan bulumaxao atnema, dina pisik aleng la di noxo pisik amet koplā dina seeve. Ma sing bok do xopmen tanbulu xopla tanteng koplā toxokoxo mumu levenesep eburu mi limixin munepen nak lok to at levenang kolonu atnema.

¹⁵ La lomomo naba vot parap mo lubang mixin mo do na lempanga na ravasu ruturun tidi. La lomomo naba vot parap nedi ua Leeme Silok, neni ne Moroa atnedi!

145

Loxompixan Emi Asu

¹ Moroa, nenu Loorong Silok tarak. Anaba tong asuusu laasen silok taram. Anaba tong avukat amisik tu la anoxo xap tinotno ri tong avukat. ² Anaba tong avukat tu at levenaleng axap. Anaba emi asu amisik minu la anoxo xap ti emi asu minu.

³ Leeme Silok neni i nunuan aleng pologat, la i epovo rinotno do limixin dina emi asu min. Atla ixo epovo xusu anaba re sa at lununuan teren ua i volo lakleklen tarak.

⁴ Limixin dinaba emi asu minu ri levempanga ugara lok pam i, tuka i at lara loola vetpes la ti lara loola melemu. Dinaba tong asuusu levempanga lolos ugarak lok pam i. ⁵ Dinaba paase asu lixitkis orong taram i silok aleng tinotno la i volo lempanga axap. La nia anabam doma mumu leven gugu maraanu nenu ugak lox i. ⁶ Limixin dinaba paase mumu leven gugu lolos nenu ugak lox i, la nia anaba paase asu laasen silok taram. ⁷ Dinaba tere mo luvukat silok taram la dinak pixan mumu labalamu ram. ⁸ Leeme Silok i ruuna labalamu mi lebelen tuntun, la kopmen nak belemamao soso ketla i umsu mi labalamu lexen. ⁹ Neni i vukat ti limixin axap la i ruuna labalamu tinedi limixin axap ni ga rudum di.

¹⁰ Leeme Silok, lempanga rooro axap nenu uga rudum li di, dinaba emi asu minu, la limixin axap taram dinaba tong avukat tu. ¹¹ Dinaba paase mumu lisisixam la lolos at lixitkis orong taram, la dina tong axasep limixin mi lolos taram, ¹² kusu limixin axap dinabak leklen leven gugu lolos taram la lisisixam maraanu at lixitkis orong taram. ¹³ Lixitkis orong taram naba nemen lexen, la nenu Loorong Avolo, kopmen tekavaxap taram.

Leeme Silok ik lox asoorun amisik leveng kakaape ren. La ik lox asuusu labalamu ren keneng at leven gugu

axap teren. ¹⁴ Ik lok tooro nedi di vekip tangarang mi levenmumuat, la im tebeng aonon nedi ua diga subu.

¹⁵ Leeme Silok, levempanga rooro axap di reven tu mi leven doxoma voovo atdi, la um taba nedi mi leveluxa ua dik pakes tin. ¹⁶ Um taba epovo rinotno nedi, la uk lox epovo rinotno levem pakpakes atnedi axap.

¹⁷ Loklok at Leeme Silok in manton tinotno keneng at levempanga axap neni ik lox i, leven gugu ren ik lox i, ik lox i eburu mi lebelen tuntun teren. ¹⁸ Neni ik lok saparap nedi mo di ngising tin, nedi mo di ngising tin mi luruturun. ¹⁹ Neni im taba epovo ri levem pakpakes atnedi ua dim taba asinorong i. Ing tonga leven anteng atnedi la irak lox asepsu nedi. ²⁰ Neni ik lok see atnedi ua di vavara aleng tin, ketla neni naba sev amet nedi limixin dixo mumu asu i.

²¹ Anaba emi asu amisik mi Leeme Silok. La mo lempanga axap ua neni ga rudum i, dina emi asu amisik mi laasen kaala ren la kopmen tekavaxap at leemi asu rin.

146

Leemi Asu

Ri Ne Moroa Luntoo

¹ Leemi asu ri Leeme Silok! Labalak, una emi asu mi Leeme Silok! ² Anaba emi asu min at levenaleng axap, nenia ana rooro ren. La anabak pixan ti ne Moroa rak keneng at lorooro axap tarak.

³ Mi guta nunu saga at lubang amgomgo mede at lavatbung menemen ti loklok tooro, atla kopmen teta mede xopok i epovo na lox asepsu nemi. ⁴ Mo do dina met, dinabam long ti laxangka. La ap mo laaleng, leven doxoma ali atdi naba xap.

⁵ Laradi naba ruuna xaka lomomo mo do neni na siam kaka ne Moroa at ne Jakop kusu tik lok tooro i, la neni i nunu saga at Leeme Silok ne Moroa ren, ⁶ atla neni Laradi

Runtudum Li at laxalibet mi lavatkangka la laras, la mo lempanga axap bok di nemen keneng at na lengkot axap. Neni ik lox epovo amisik leveng kakaape ren. ⁷ Ing tonga linga avukat at lava baava, la im taba luxa nedi dik toxo.

Leeme Silok ik lox asepmus luvuttadi xokoxo, ⁸ la irak lox arepalas lengkatli atnedi ua dixo reven. Neni im tebeng aonon nedi ua diga subu mi levenmumuat. Neni i balamu aleng tinotno nedi limixin manmanton teren. ⁹ Neni ik lok see atnedi limixin me xadiong ua di nemen keneng at lenep kangka atnedik. Ik lok tooro lempat naa rixin eburu mi lubang karun, ketla ik lox asaxaek tino nedi luvuttadi loklok kakapmek.

¹⁰ Leeme Silok neni Loorong Avolo la kopmen tekavaxap teren. O leme Saion, ne Moroa atnimi nabat kis amgomgo lexen tinotno.

Leemi asu ri Leeme Silok!

147

Leemi Asu Ri

Ne Moroa Lanaraavuk

¹ Leemi asu ri Leeme Silok!

I lox avukat kusu atak pixan emi asu ri ne Moroa atnedik. Ik mokso rinotno la ik lox asusu lomomo tinedi dina emi asu mi Leeme Silok. ² Leeme Silok ira vaxaru li amu lemenemen Jerusalem. Neni ira lam kaka amlong limixin kokoxo. ³ Neni ik lox aroo nedi ua lempeve atnedi ga tepovorok la ga koxo pe levennin kooxing atdi.

⁴ Neni gara doma vam i do naba rudum lavanisa lax-ampenti, la ikleklen leven asen atnedi getgesara. ⁵ Leeme Silok atnedik i silok la i lolos aleng. La ixo epovo xusu ataba us sa mo lakleklen teren mi tepanga. ⁶ Neni ip kip aurut nedi ua dik lox asi di, ketla it pas puuvus nedi luvuttadi loklok kakapmek uto xopok at laxangka.

⁷ Atak pixan lengkom pixan emi asu ri Leeme Silok. Atak sak lerengteng avukat mi lempat taaleng ti ne Moroa atdik. ⁸ Neni ik lok li lengkon takabu ro vana at laxalibet. Neni ik lox asuusu larakabu ude ri laxangka, la irak lox asuusu levem pivilis to vana at lengkong kaana. ⁹ Neni im taba luxa lempanga mi lavanuet kangkedek atdi, la im taba bok leven natnat kooxo mo do dina sing panga ri anan.

¹⁰ Lomomo ren kopmen na tu at lempat paaros lolos, la ixo momo solo mi luvuttadi esep lolos. ¹¹ Ketla in tuuna xaka lomomo boro atnedi limixin dim taba asinorong i la di nunu saga at labalamu lexen teren.

¹² O leme Jerusalem, mina emi asu mi Leeme Silok! O leme Saion, mina emi asu mi ne Moroa atnimi! ¹³ Neni ik lox aru lolos lempatban at larangas uat atnimi la ik lox anarong limixin go. ¹⁴ Neni ik lok tatao leven apdopdo atnimi basinge limixin munepen minimi, la irak lox aan mais nimi mi leven uit maraanu.

¹⁵ Neni i paase levelinga ri lempanga at na lavatkangka, la ik lox epovo soso mun mo levelinga neni i tong i. ¹⁶ Neni i vavaxat palas asu lusugao mumudut (snow) ngan ta lavat tamon bukburu, la ira tereve ledemi mumudut (frost) ngan ta laxakup. ¹⁷ Neni ik lox asu lempat betlom ngan ta laxariri uat. La ixo epovo xusu tara na ekini mi mo lumudut silok ua neni ik lox asuusu i! ¹⁸ Melemu neni i paase asu levelinga ren, la mo ladan uat (ice) ira kadan amu. Neni im taba asu lamanman la mo ladan ira sesen ta.

¹⁹ Neni ga raba limixin teren me Israel mi mo levelinga ren, ni leventaangas la Laulis Linga ren. ²⁰ Neni goxovisi na raba i ri lubang mixin petpes. Kuren la dixok leklen levelinga ren.

Leemi asu ri Leeme Silok!

148

*Langavang Axap**Na Emi Asu Mi Ne Moroa*

¹ Leemi asu ri Leeme Silok.

Nemi mi nemen to vana rubu rino, mina emi asu mi Leeme Silok ik lok to vana at laxalibet. ² Nemi lubang angelo eburu mi limixin esep teren, mina emi asu min.

³ Laxangking mi lagaaling, muna emi asu min, la laxampenti soosoo, mina emi asu min. ⁴ Laxalibet pana xasep la ladan ik lok ma vana at laxalibet, mina emi asu min.

⁵ Nedi axap mina emi asu mi laasen at Leeme Silok! Neni ga tong mun i la nedi na lempanga ga raut. ⁶ Neni ga tong mun i la mo lempanga ga xis bus ap mo lengkot atdi la dinaba nemen lexen go la di noxo ronga xepe levelinga ren.

⁷ At na lavatbung menemen, laras main tubu, la lempat konomus, mina emi asu min. ⁸ La lamam mi lebetlom uat, lusugao mumudut (snow) mi lengkon takabu, la lara manman lolos ua ding tonga res at levelinga ren, mina emi asu min.

⁹ Nemi lengkong kaana mi lempattaavut, la larauna vipisik peeve eburu mi lempatbuan, mina emi asu min.

¹⁰ Nemi bok lempanga mi lavanuet kangkedek, lentaba sio la lentaba roonu, la laxa siisi mi lavapixa, mina emi asu min.

¹¹ Nemi axap lavaorong mi limixin axap, lavanarong eburu mi lubang amgomgo vetpes bok, mina emi asu min.

¹² Nemi bok laxamposono mi luvuraa atlok, la limixin asioxo mi laxaalik kakalik bok, mina emi asu min.

¹³ Naba lox avukat do nedi axap dina emi asu mi laasen at Leeme Silok! Laasen teren i silok ti limixin axap. La lolos teren i volo lolos at lempanga axap at lavatbung menemen eburu mi laxalibet. ¹⁴ Neni ga lox alolos lubang mixin teren, kusu limixin axap teren dinaba emi asu min. Limixin me Israel di silok tinotno at lodoxoma ren.

Leemi asu ri Leeme Silok!

149

Loxompixan Emi Asu

¹ Leemi asu ri Leeme Silok!

Mina vixan loxom pixan maxat ti emi asu mi Leeme Silok. Mina emi asu min to at lovtopot buru atnedi limixin ua di ruturun tin! ² Nemi leme Israel, minak lek mumu Laradi Runtudum Li atnemi. Nemi limixin me Saion mina momo mumu mo Loorong Silok atnemi! ³ Mina tii momo ri emi asu mi laasen teren. Mina pasa levengkuvu eburu mi lempat taaleng ti emi asu min.

⁴ Leeme Silok in tuuna ka lomomo mumu limixin teren. Im taba asinorong nedi ua dik lok atnaasan la im taba di mi lolos ti sak tup mi limixin munepen midi. ⁵ Naba lox avukat do limixin at ne Moroa dina momo mi leepang silok atla diga sev asi nedi, la dinak pixan momo maraanu rinotno at lengkanimin axap. ⁶ Naba lox avukat do dinap kup silok at loxonaleng dina emi asu mi ne Moroa, la dinam tebeng levenise esep sengsen atnedi, ⁷ kusu tik sak tup mi levenabung mixin petpes, la rik lox asongot di, ⁸ la kusu ti koxo lavaorong atnedi mi lempat sen, la mo lubang amgomgo atnedi bok mi lempat sen aen. ⁹ Na lempanga naba ravasu kusu ti lok li liina mavana at levenabung mixin petpes ngan ne Moroa gara vit li vam i. Nai i ngan lasinorong at limixin at ne Moroa. Kuren la dinaba lok kaka laasen silok teren.

Leemi asu ri Leeme Silok!

150

Leemi Asu Ri Leeme Silok

¹ Leemi asu ri Leeme Silok!

Mina emi asu mi Leeme Silok to xeneng at loogu laplavang teren! Mina emi asu mi lolos teren toxun pana

at laxalibet! ² Mina emi asu min mumu levempanga lolos neni gara lok pam i. Mina emi asu min atla neni i silok solo mavana at lempanga axap.

³ Mina emi asu min mi lara tu. Mina emi asu min mi lempat taaleng la leven gita. ⁴ Mina tii momo la minak sak gaamit ti emi asu min. Mina emi asu min mi lempat gita la leveng kaatu. ⁵ Mina emi asu min mi lasaksak lempat tingtigon aen (simbol). Minak sak silok lempat tingtigon aen (simbol) ti emi asu min. ⁶ Levempanga rooro axap, mina emi asu min.

Leemi asu ri Leeme Silok!

Lenavolo Lovoang Kaala Maxat La Sam
The New Testament and Psalms in the Madak Language of Papua
New Guinea

Nupela Testamen na Buk Song long tokples Madak long Niugini

copyright © 1995, 2011 Wycliffe Bible Translators, Inc.

Language: Madak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

PDF generated using Haiola and XeLaTeX on 10 Sep 2021 from source files dated 9 Oct 2020

746cf984-10cb-5215-870d-023c1da5c00d